

國學基本叢書  
湖海詩傳

一

書叢本基學國

傳 詩 海 湖

(一)

輯 利 王

行 發 館 書 印 務 商

古人選詩者有二。一則取一代之詩。擷精華。綜宏博。并治亂興衰之故。朝章國典之大。以詩證史。有裨於知人論世。如唐文粹。宋文鑑。元文類所載之詩。與各史相爲表裏者。是也。一則取交游之所贈。性情之所嗜。偶有會心。輒操管而錄之。以爲懷人思舊之助。人不必取其全。詩不必求其備。如元結。殷璠。高仲武。姚合之類。所謂唐人選唐詩者是也。二者義類已不同矣。予弱冠後。出交當世名流。及游登朝。寧。敬。歷四方。北至興桓。西南出滇蜀外。賢士大夫之能言者。攬環結佩。率以詩文相質證。披讀之下。往往錄其最佳者。藏之篋笥。名曰湖海詩傳。忽忽將六十年。而予年亦八十矣。去歲自錢塘歸。發而觀之。則向日所錄。蟲穿鼠蝕。失者十之二三。詩中之人長逝者。亦十之八九。并有聲消跡滅。無所表見者。是不得不急爲傳世也。因屬同志。編排前後。復稍加抉擇。要不失乎古人謹慎之意。共得六百餘人。編四十六卷。以科第爲次。起於康熙五十一年。迄於近日。其間布衣韋帶之士。亦以年齒約畧附之。而門下士并附見焉。視感舊篋衍二集。多至一倍有奇。亦云富矣。問以遺閒軼事。綴爲詩話。供好事者之瀏覽。雖非比于知人論世。而爲懷人思舊之助。亦庶幾元結諸公之遺。至于往時盛有詩名。而爲投契所未及者。則姑置之。蓋非欲以此盡海內之詩也。然百餘年中。士大夫之風流儒雅。與一國家詩教之盛。亦可以想見其崖略。或不無有補於藝林云。嘉慶癸亥中秋王昶書。

# 湖海詩傳目錄

## 卷一

程夢星

張梁

查爲仁

許廷鑠

## 卷二

厲鶚

錢陳羣

盧見曾

顧棟高

戴亨

沈起元

蔣恭棐

尹繼善

張廷瑜

王安國

樓儼

## 卷三

汪由敦

王峻

李重華

劉統勳

陳浩

嚴遂成

## 卷四

張元

蔡德音

鄒一桂

彭啓豐

呂熾

楊錫紱

梁詩正

孫灝

商盤

許開基

## 卷五

嵇璜

英廉

方觀承

陳祖范

周宣猷

彭端淑

董邦達

金德瑛

秦蕙田

蔡新

劉綸

諸錦

杭世駿

卷六

陳兆崙

沈廷芳

夏之蓉

齊召南

符曾

陳撰

朱稻孫

陳章

程廷祚

翁照

馬日琯

馬日璐

張庚

陳黃中

胡鳴玉

楊潮觀

曹秀先

卷七

宋邦綏

觀保

德保

錢琦

王會汾

喬光烈

阿桂

祝維誥

高瀛洲

袁枚

卷八

沈德潛

卷九

程景伊

裘曰修

儲麟趾

李繩

姜恭壽

申甫

曾捷宗

楊述曾

寶光鼎

章寶傳

鄭虎文

王太岳

廖運芳

熊爲霖

陳宗達

卷十

夢麟

錢維城

蔣元益

閔鶚元

李友棠

宋弼

江權

卷十一

盛錦

周準

陳魁

顧詒祿

韓騏

李果

鄭廷暘

金農

沈之亮

陳臯

吳燦文

趙虹

卷十二

張錫爵

王爾達

王愨

蔡瓏

葛景中

沙維杓

張崗

胡承祝

過春山

朱研

朱昂

易諧

陸貽穀

沈懋功

邵玘

王本蕃

王玖

卷十三

梁敦書

廖景文

王鳳儀

王秉韜

邵齊熊

梁國治

汪廷嶼

朱珪

馮浩

錢汝誠

李中簡

張裕榮

邵齊然 劉星煒 查禮 余慶長 吳翀 黃文蓮

王元啓

卷十四

劉墉 譚尙忠 周於禮 穆丹 惠棟 陳鴻寶

吳焯 褚寅亮 邵嗣宗 梁同書 錢載 秦贊

周天度 董元度 紀復亨 沈清任 張鵬

卷十五

翁方綱 顧光旭 蔣宗海 周大樞 陸燿 袁文康

馮廷丞 阮葵生 周震榮 張五典 胡溶 吳維鏜

吳桂 梁夢善 朱休度 朱休承 盧鎬 施養浩

王日杏 賈虞龍 陳文錦

卷十六

王鳴盛 紀昀 錢大昕 王又曾

卷十七

倪承寬

胡紹鼎

朱筠

翟灝

平聖臺

蔡書升

葉佩蓀

沈業富

曹學閔

杜玉林

范家相

薛田玉

于宗瑛

汪永錫

李昌昱

劉鑾

周春

鄭米祚

卷十八

沈大成

朱方藹

閔峯

陶元藻

朱楷

華玉淳

華淞

江昱

江恂

江立

王廷槐

徐薌坡

林如璋

高景光

卷十九

陶璉

張棟

莊寶書

杳岐昌

徐堅

黃之紀

薛龍光

葉抱崧

劉潢

金翀

陸藻

陸藝

涂逢豫

江春

毛大瀛

陸授詩

卷二十

盛百二

朱雲駿

劉秉恬

凌應曾

蕭霖

袁文典

蔣業晉

徐作梅

陸惇宗

曹錫寶

李漱芳

周嘉猷



彭元瑞

卷二十一

蔣士銓

彭紹升

吳寬

孫永清

張遠覽

彭光斗

陸遵書

張銘

張時風

卷二十二

畢沅

諸重光

王文治

吳璜

程之章

吳楷

謝啓昆

錢受穀

王曾翼

裘麟

卷二十三

吳泰來

王宸

祝喆

徐觀海

申兆定

張應均

卷二十四

胡高望

趙翼

陸錫熊

卷二十五

曹仁虎

顧震

吳玉綸

李文藻

嵇承謙

蔣雍植

吳興宗

馮應榴

崔龍見

儲祕書

沈士駿

卷二十六

趙文哲

卷二十七

張熙純

馮兆觀

卷二十八

沈初

祝德麟

卷二十九

褚廷璋

奎林

卷三十

張四科

金式珪

嚴長明

蔣雲師

韋謙恒

董潮

吳省欽

汪棣

朱維藩

鄭灑

姚鼎

吳森

施朝幹

鄭炎

蔣業鼎

錢維喬

王嵩高

吳霽

羅有高

陳鴻賓

朱漢倬

朱孝純

蘇去疾

張塤

楊懷棟

朱澤生

金學詩

李集

萬鍾傑

朱維魚

朱位恭

王鳴韶

諸廷槐

汪昭

林大中

張允武

朱璿

許兆桂

張夢喈

張夢鼇

王芳

曹錫黼

張登晨

邵炎

陸文啓

陸文蔚

何王模

金鴻書

朱位行

王陳棟

王陳梁

卷三十一

汪孟錫

朱炎

金兆燕

謝垣

沈世煒

孫志祖

彭禮

徐以坤

陸敬

陳初哲

陳嗣龍

任大椿

陳朗

伊朝棟

潘奕雋

吳壽昌

龔敬身

程沅

王瓚

戚蓼生

于鼇圖

印照

嚴翼

卷三十二

程晉芳

邵晉涵

周厚輅

魯仕驥

徐長發

錢澧

洪一朴

伊湯安

彭淑

汪端光

卷三十三

鄒炳泰

毛上哀

許兆椿

李堯棟

吳俊

李棻

鐵保

馬緯雲

董詔

秦瀛

吳蘭庭

趙希璜

高文照

溫恭

吳錫麒

范來宗

顧宗泰

曹錫齡

李廷敬

嚴福

宋思仁

陳繩祖

王啟焜

卷三十四

黃景仁

程夢湘

蘇加玉

殷如梅

朱士廉

朱履長

韓是升

徐麟趾

金夢麟

陸象拱

卷三十五

楊芳燦

吳照

金慰祖

汪中

李旦華

黃駢

陳樹華

卷三十六

張誠

宋大樽

趙秉淵

馮培

馮敏昌

管世銘

錢世錫

李鼎元

王元勳

徐大容

汪如洋

江德量

法式善

吳樹萱

謝振定

吳蔚光

錢塘

程際盛

陸伯焜

史國華

卷三十七

楊揆

趙懷玉

王鼎

汪學金

曾燠

陳廷慶

楊倫

馮集梧

俞廷楡

沈景熊

邵培惠

李驥元

潘奕藻

呂星垣

邱思燕

卷三十八

王復

徐書受

何青

胥繩武

劉大觀

王初桐

余鵬翀

黎簡

朱彭

曹秉鈞

朱文藻

金德輿

金廷榮

卷三十九

黃易

羅聘

汪履成

陳焯

吳騫

方薰

翁春

慶蘭

吳鈞

蔣元龍

王開沃

王翰青

趙汝霖

莊師洛

徐文錫

孫魯

鍾駕齋

汪大經

周厚培

張雅宗

萬福

石渠

卷四十

徐榮慶

余鶴年

孫星衍

楊夢符

何道生

汪彥博

梁履繩

朱文治

王芑孫

邢彥成

阮元

伊秉綬

張錦芳

王廷蘭

洪亮吉

張問陶

桂馥

李麋芸

張若采

洪坤煊

余煜

詹肇堂

吳本

英和

葉紹楨

唐仲冕

章嵩生

孫爾準

顧張思

王文潞

何錦

卷四十一

朱宗大

張燕昌

邵志純

余慶遠

錢大昭

陳燮

許宗彥

鮑桂星

吳鼐

樂鈞

錢林

陸學欽

沈端

繼昌

卷四十二

吳嵩梁

陳文述

郭塋

葉紹本

汪庚

張興鏞

顧蕤

王世錦

王尙珏

馮金伯

史善長

王炘

邵步瀛

王汝翰

卷四十三

張興載

沈靖

徐熊飛

金棻

蔣莘

蔣徵蔚

蔣夔

張彥曾

卷四十四

郭麀

徐葵

王槐

王豫

蔣炯

何元錫

姚椿

楊文蓀

吳引年

蔡元春

袁文揆

胡駕年

卷四十五

華瑞漢

高岑

施晉

朱鐘

陳韶

項墉

胡量

袁廷樞

陳基

陳遶

方燮

鈕樹玉

楊之灝

朱桂

湯禮祥

何其偉

李福

徐雲路

石鈞

李方湛

金學蓮

李斗

周中孚

董國華

陶梁

楊惕龍

楊試昕

徐鉞

朱壬

吳嵯

于淵

戴延介

吳傑

章柱

邵保和

王紹舒

王莊壽

卷四十六方外

明中	篆玉
達澄	達瑛
劉敏	清恒
	默可
	際祥
	覺銘
	實源
	逸雲
	洪汎
	性仁



# 湖海詩傳卷一

程夢星

青浦王 昶德甫輯

字伍喬。又字午橋。江都人。康熙五十一年進士。官編修。有今有堂集。

蒲褐山房詩話先生淡於榮利自丁內艱歸終身不出築篠園並漪南別業讀書偃仰其中竹西故南北衡途往來進謁者文酒流連主詩壇幾數十年詩兼法唐宋而雅好在玉溪生以雪灘叟注未精重爲箋注其集中句如碧流似帶環雙峽青嶂如屏抱一村十里烟深因近水一年秋早爲多山芰荷風自浮輕幔羅綺香多過別船女牆宿草經春綠古渡斜陽照水紅軒因惜竹三間小樓爲看山四面寬一院雨聲留客後半窗梅影上燈初滿塢雲深紅杏雨一溪煙澹綠楊風花落尚攜沽酒棹潮來爭泊賣魚船皆清麗可誦予少客竹西暇日過從門庭蕭寂門茶飯餅仰其風貌不啻孤雲也

## 五說樓詠五首

鹿門子以五瀉舟華頂杖太湖研烏龍養和訶陵尊贈毘陵魏處士作五說詩余齋中無長物有洪源方竹丈一漚子琴綿津研五茸筆格味諫壺皆友人所遺壬戌夏於齋前構小樓落成以此貯之題曰五說樓余何足以方處士而惠贈諸君則鹿門高致也因繫以詩

洪源方竹杖洪源萬化谷去岑山五里許谷中多方竹取以爲杖枝節稍短而方整明潤絕勝天台所產

洪源故鄉人。惠我園中竹。方外而虛中。寶此數尺玉。拄上蓮華顛。晴空寄遐矚。

一漚子琴

一漚子。明隆萬間僧悟言也。所藏琴。云賜自神廟。流傳三陽。處士汪敔盤。敔盤歸道山。其子以余愛琴。因寄贈焉。

孤桐斲秋琴。散音傳葛嶧。昔聞奏雲門。禪榻曾寄迹。臨風時一彈。何似山陽笛。

綿津研

綿津山人端溪研。舊有銘。舍人余叟白得之。贈余。

商邱研有銘。胡爲落市肆。舍人偶得之。精英肯自秘。愧我不中書。永負良友遺。

五茸筆格

雲間僧慈寰。有竹筆格。中半剖。凸其背。滑淨如脂。余以詩乞得之。

梵夾安筆格。形質何離奇。老僧解吟詠。余乃乞以詩。還期山心室。共參玉版師。

味諫壺

天門唐南軒館丈齋中多砂壺。有狀如嫩攪者。或惜其拙。余獨謂拙乃近古。遂枉贈焉。名曰味諫。

義興誇名手。巧製妙圓整。茲壺獨擁腫。贅若木之癭。呂申公有一盞。回餘甘。清味託山茗。

四月二日登康山。喜環山歸自新安。各賦五言古詩十二韻。

康山近市廛。頻年遊跡杳。何況家新安。江峯隔浩渺。今日遂伴過。高堂坐清曉。時維四月初。節候尙春杪。

荒樹隱深林。曲逕餘蔓草。有客卸帆歸。來自桐廬道。煙巒盡入手。歷覽衆山小。視此城東隅。那足事遐討。

余謂豁心顏。一邱亦自好。昔賢急友難。繁弦寄窈眇。我輩殊蕭閑。隨地攄曠抱。底事返天都。扶筇躡雲表。

雨後過讓圃登樓野眺。以韋蘇州綠陰生晝寂。孤花表春餘。句分韻得綠字。

積雨生夏寒。輕煙散晴旭。勝地游故頻。佳招諾敢宿。耽吟有舊侶。力疾但朝粥。城遠喧不聞。樓高紛可矚。隔溪餘夕紅。羅戶雜新綠。麥壠尙微波。村徑自歸牧。古宅感廢興。清襟比風浴。願傍開士廬。更結野人屋。

重訂箋注李義山詩刻成題後

西崑無鄭箋。遺山昔悵悵。況我千載下。敢窺祕密藏。虞山箋杜陵。惟此亦推讓。朱氏本道源。注釋未云創。所惜作詩意。蒙昧若煙障。要非扶其微。何以發高唱。時從癩祭外。一洗優孟樣。楚雨縱含情。其義某竊諒。穿鑿固不免。論說或非妄。但求古人心。寧避世俗謗。想其不羈才。詎肯牛李傍。君臣朋友間。厚意誰與亮。美人怨芳草。遂至北浮浪。豈知寄託深。直追風雅上。荆公是知己。謂與少陵抗。杜箋匪一家。往往共頡頏。梅溪有蘇注。司諫更精當。疑誤藉改定。後先寧礙妨。管中窺豹斑。聊用志所歆。

登看山樓觀殘雪用東坡聚星堂雪韻

歲餘莫莢才六葉。雅集消寒觀剩雪。小玲瓏館最清閑。樓上開眸迴幽絕。蒼松倚石老不凋。翠篠橫窗低欲折。萬鱗堆瓦瘦逾明。一桁遮牆淡疑滅。已無亂影作花飛。還有殘光驚電掣。依稀遠岫露眉痕。約略平池舒面纈。蕭齋呵研試烟丸。暖閣圍爐添炭屑。簷前霜重多倒垂。林際風迴尙斜瞥。聚星復舉潁州令。冷然亦效汝南說。許有字觀雪冷然臺詩豐年但願太史書故事須從汝南說酒闌更擬賦廣平。莫笑詩人心似鐵。

布泉歌

乾隆壬戌冬杪。西域人黑某攜青綠古器來售。中有布泉千餘。云山左鄉人掘土而出者。余爲檢視得六十四種。惟平陽安陽可辨。餘不盡識。攷春秋有平陽。漢書謂之東平陽。史記王子侯表。安陽侯桀。濟北貞王子。索隱表在平原。大抵皆漢時物。諸家泉譜。布泉十品外。載異布不過十餘種。未有若斯之多者也。因購得之。作歌。俟精於古篆者考證焉。

黃虞泉制杏難攷。秦漢鑄造還堪追。一刀兩柱別朋貝。五銖半兩分龍龜。天鳳以來創十布。紛紛名目莽所爲。降至後代祇圓法。貨布盡廢殊前規。蕭梁顧烜略紀載。李唐封演推廣之。趙宋李金董洪輩。旁搜遠引爭傳疑。綜核已非世常見。疏漏未免人猶嗤。我朝方子繼溪氏。博學嗜古老不衰。嘗蓄古錢累三百年。代一一分澠淄。更有扶風兩弟弟。亦復愛此藏書帷。余昔間獲一二品。竊同寸管誇天窺。乾隆壬戌歲冬杪。西域有客來江涯。叩門請謁嚮古玩。傾倒盡出囊中攜。商尊周卣誠重器。雖欲購買無其貲。中有異布以千計。青斑翠點光陸離。古文奇字詎易識。安陽平陽差能知。當時侯國各私鑄。大都出自炎劉時。獨惜繼溪已仙逝。無由攷訂相窮推。越日馬子忽枉過。開械一見生嗟咨。千有餘歲蝕土壤。那能完好畱今茲。古物精英不終秘。蟲書有篆伴鼎彝。願以此品補泉志。庶幾全備稱精奇。宇內廣大何不有。耳目所見真幾希。偶然得此聊自賞。紀其歲月系以詩。

同人攜茶集張漁川齋中試惠山泉用山谷謝黃司業寄惠山泉韻

故人寄茶詩與俱。雨前題封紅紙書。鷓斑初展一痕翠。蟹眼乍翻百斛珠。況截石乳雲碧腴。試較蜀井當何如。但取清風生兩腋。底須清夢游蓉湖。

雨後兩明軒看盆荷再用山谷韻

兩明軒子風月俱。種樹自繙老圃書。荷葉田田花柄柄。午時驟雨跳新珠。素瓷五十紛雪腴。三十六陂紅不如。晚天吟賞不歸去。小窗清興同江湖。

小玲瓏山館題郭熙寒風密雪圖

山館林陰翠欲滴。微露清光縈四壁。中懸郭熙風雪圖。凜凜嚴威儼相逼。枯樹偃枝疑有聲。危峯積素真無隙。當時藝苑稱名流。譜入宣和擅高格。神宗年號章宗寶。兩兩標題皆可識。內府珍藏七百年。詎料流傳屢沿革。不因靈物相護持。豪奪巧偷遭蠹蝕。何從寶軸歸君家。一丈鷲溪尙完璧。時維四月風雨多。銀蟾閉窟陽烏匿。對此不覺生夏寒。消盡煩蒸轉蕭索。清暑之殿曾高張。壽安之宮亦陳迹。區區墨妙畱人間。等閑遷徙江南北。於今移向草堂看。老眼摩挲三太息。

和馬嶰谷雪後看山樓小飲

小有玲瓏館。春初已報晴。瓦溝容雪凍。竹杪見山橫。飢雀晚仍下。老梅疎轉清。幾人共幽賞。吟興酒邊生。  
十月十七夜西疇招集行菴席散復登彈指閣

山舍罷吟初。登樓興有餘。煙光四野合。月影一林虛。人語凌寒寂。鐘聲入夜疎。城闌歸路遠。睡美藉籃輿。

五月十二日集篠園

一棹泛初霽。荒園夏景深。林藏前日雨。雲度半湖陰。與客分磯釣。有時穿竹吟。還期新月上。小閣坐橫琴。

豆棚

種豆衡門下。支棚小院中。葉疎偏障日。花細不禁風。午夢棲閑蝶。涼秋語夜蟲。老夫無事日。清話有鄰翁。

水雲漁屋聽雨分得江字

隔宵猛雨似翻江。又送檐聲到紙窗。暗入竹梢猶瑟瑟。細添石罅更淙淙。已愁攪夢眠難穩。更爲催詩意未降。最是故人瓜渚夜。一燈風岸泊吳艘。謂樊榭

九日登平山堂分韻得雲字

菊囊萸佩結幽芬。山閣扶筇避俗氛。遠岫浮江疑近岸。高松當檻不遮雲。開鑿香泛村村醉。打稻聲喧處處聞。更喜老夫腰脚健。又憑吟檻送斜曛。

篠園種竹分得六言絕句二首

原是篠園舊地。蕭蕭又漸成林。邀風邀雨邀月。可茗可棊可琴。清吟與我同瘦。遠俗非君不能。開徑應多酒客。何妨更有詩僧。

小漪南詩三首并序

宋葉主簿杞有別業淞江魚鱗涇上扁曰漪南丙申秋余築篠園二十四橋之東偏復構小亭於溪上澄潭修鱗可以垂釣蓮房菱實可以樂飢既落成仿主簿意以名之小云乎哉以果吾腹猶以爲大也

吳淞別業憶前賢。博士清詞亦可傳。願比潁昌營水竹。小漪南似小斜川。新添亭子傍疎籬。幾曲闌干俯碧漪。移柳乞桃忙未了。清明又是種荷時。芹青菱白滿平蹊。寂寞蓮花十里隄。畱得二分明月夜。棹歌只在小橋西。

雨後看梅

山齋愁坐雨蕭蕭。趁曉看花不待邀。應是東風知客到。暗香先送過溪橋。

南園春柳詞

覆牆一帶細於絲。飛絮年年入硯池。記得夕陽人喚渡。綠陰深處待船時。又見新條換舊條。春風吹瘦女兒腰。二分明月菴前影。長是青青壓畫橋。

泛舟小漪南觀荷聯句排律三十韻限南字

日涉原成趣。夢星荷開肯後探。小衫披軟白。黃短艇汎澄藍。容與經孤嶼。程夢透迤入淺潭。葦桴收古篋。吳

茶具挈都籃。勝集欣聯袂。程名良朋快盍簪。樹藏蟬嘒嘒。程志隄夾柳毳毳。園竹紛千个。星沙鷗狎兩三。

停橈遵北岸。裕曳屐過西菴。小漪南亭在飯松菴側。曲榭弓方拓。鈞平池鏡半函。闌廻縈細浪。吳牖敞納虛嵐。直擬

居蓮社。世名何須問石龕。山志繞亭偏旖旎。志照水更清酣。鬢鬢晴雲斂。星晶瑩冷露涵。霽蒸顏綽約。裕風

逼氣醞醞。掩映啼妝遜。鈞招搖舞袖慙。盈盈嬌欲語。吳脈脈睡初憨。似列屏間麗。世名如勻臉際醴。凌波羅

襪瘦。志出浴黛鬢鬢。絕世雙身少。星傾城一笑堪。解愁傳謝沈。用謝文君沈君故事設色倩王譚。王友譚

品異種渾難辨。鈞佳名豈悉諳。會心寧在遠。吳聘目未云貪。釀熟思仙姆。見王荆公詩香生憶老聃。見謝合

寒來莖不斷。志雪處藕應甘。裂芰能爲服。星分枝自可含。漢昭帝喧尤憐浣女。裕歡足代宜男。以茲代登

人歡昭明太子。志雅合揮絃操。鈞還憑捉麈談。拈毫嫌拊拾。吳覓句費研覃。漫載紅盈舫。世名徐傾綠滿甌。夜

凉人影散。志魚戲葉之南。星

### 張梁

字奕山。號幻花。婁縣人。康熙五十二年進士。有澹吟樓詩鈔。

蒲謁山房詩話。先生卜居吾里。有保閑堂。澹吟樓。學圃居。叢桂讀書堂。鶴徑風漪草堂。花陰館。和香

亭。一松齋。書巢。備水竹花藥之勝。又兄農部別業。本高文恪公竹塋。在杭州西溪。是梅竹最深處。每

年上元後。輒往探梅。至雜花俱謝。綠陰如幄。乃歸過中秋。復往看秋山紅葉。歲以爲常。上琴。遇好山

勸之。出山清要。可立致矣。不答也。晚歲專修淨土。至八十



山莊雜興

青山入牕牖。日夕烟嵐濃。無心看行雲。有興咏古風。漁歌叢竹裏。鳥語深松中。隔溪佛屋近。高枕聞疎鐘。卽景自怡悅。思與故人同。

霜散碧落迴。澄池映岩光。臘殘氣未暄。草樹懷春陽。梅萼破一二。日炙聞妙香。雖非飲者流。欣然命我觴。醉起月在天。門掩山蒼蒼。

荒邨一夜雪。人跡淨原野。飢鳥鳴樹間。凍犬吠籬下。對此逸景賒。扁舟愜心寫。四山皓已盈。蕭屑空林灑。歸來撫香醪。感彼荷蓑者。

歲華忽云暮。人事焉得閒。獨子此棲泊。篁徑門晝關。方寸自恬曠。素琴時一彈。鄰翁偶相過。談笑劇歡顏。問我何不歸。無言對寒山。

彈琴雜詩

昔有累丸者。用志凝於神。薄藝何足耽。亦以示精勤。中人異嗜好。如口於甘辛。靡麗戰我前。危此間中身。牙籤擁書罷。羅薦橫龍唇。嘈嘈箏瑟間。庶幾鳴其真。吟露草蟲秋。晝華山鳥春。拂石一再鼓。清風散四鄰。昔買靈開材。斷紋勝蛇腹。攜之西谿游。有舍西谿曲。頗似庾信園。雖小亦已足。焚香對山僧。一彈差不俗。響隨澗水落。指與烟霞觸。至今泠泠音。清夢尙相逐。明年正月破。此游良可續。不到茶笻時。先掃梅花屋。

譚嵇中散琴賦有會而作

束髮好鼓琴。自謂甚易工。初得一聲似。曠若意已通。學之既十年。茲理彌無窮。吾未忘我手。焉令諸有空。乳泉滴幽洞。箏木含遠風。至音本自然。聊與相從容。

由庚六笙詩。何乃實以句。昌黎十琴操。等之乖其趣。誰曰辭不工。於聲倘無與。古人意慨然。觸物偶有寓。冲和寫間曠。刺促含怨慕。且非指所傳。而謂口能喻。附會一何鑿。聲失義始著。乃知得其聲。辭可悉汰去。庶幾無言中。時與古人遇。

學圃居

隙地種花竹。幽居興非淺。土膏以養人。毋乃等暴殄。蔬者穀之佐。日食誰能免。抱甕未幾時。新菘行可翦。宛然野人廬。籬落露華泫。夙勤菜盈筐。古語聊自勉。夙勤則菜盈。頃筐見譙子。

遣興

晚景知物情。閉門却塵雜。秋爽入東籬。遠山晴見塔。空齋藥氣濃。窄徑花陰匝。雀字多並檐。蜚吟近依榻。人閑方晝眠。落葉響誰踏。

家兄營別業於杭之西溪時初落成偕雪莊游止卽事

屋向羣山倚。門臨一水斜。畫欄深映竹。吟棹曲穿花。客到轉迷路。人來欲住家。桃源那勝此。戶外盡桑麻。

掩關塵事遠。隱几道心平。好鳥當軒下。新蟬抱樹生。岸痕知久雨。山氣識將晴。此意誰能道。幽居近物情。

蟋蟀

只爲聲難闕。偏教跡易尋。露花垂暫濕。風葉聚籬深。切切多私語。悽悽更苦吟。老夫牀下穩。容汝伴鳴琴。

黃宮允唐堂八十年辰集少陵句得五言律六首並禁複題遵香屑例也

中允聲名久。殊恩且列卿。青松寒不落。天馬老能行。耕鑿安時論。樵漁寄此生。謂公行樂圖本無軒冕意。心跡

喜雙清。奉寄王中允維。奉送郭中丞充隴右節度使。寄峽州劉伯華使君。贈陳二補闕。吾宗。邨夜。猶酌。屏跡。

軒冕羅天闕。如公復幾人。蛟龍得雲雨。鵬鷲離風塵。鍊骨調情性。虛懷任屈伸。神仙才有數。酒綠正相親。

贈太常張卿。奉簡高三十五使君。奉贈嚴八閣老。奉贈鮮于京兆。寄峽州劉伯華使君。贈王二十二侍御契。敬柬王明府。獨酌成詩。

王國稱多士。先侁胄子行。使臣精所擇。仙老暫相將。鑿徹勞懸鏡。提攜頗在綱。名高前後事。回首一茫茫。

奉贈鮮于京兆。賦衡山縣文宣王廟。送顧人分文學。觀李固請司馬弟山水圖。秋日荆南送薛明府。秋行宮張望督促東渚耗稻。發潭州。懷錦水居止。

海內文章伯。官高何足論。思飄雲物動。詞感帝王尊。世路知交薄。家聲器宇存。流傳江鮑體。高價越瓊瑤。

暮在陪李尚書汎舟。佳人。敬贈鄧諫議。奉酬贈集賢崔于二學士。從驛次草堂復至東屯茅屋。贈虞十五司馬。贈畢四曜。贈蜀僧闍耶師兄。

老去才難盡。新詩近玉琴。文章千古事。時序百年心。暗水流花徑。荒鋤淨果林。維南將獻壽。楓岸疊青岑。

寄彭州高三十五使君適。西閣。偶題。春日江邨。夜宴左氏莊。課小豎鋤斫舍北枝蔓荒穢。假山。舟中伏枕書懷。

伊昔黃花酒。明星惜此筵。坐深鄉黨敬。甘與歲時遷。竟日留歡樂。秋風灑靜便。八荒開壽域。恣意向江天。

九日登梓州城。春夜峽州田侍御長史津亭留宴。壯游寄岳州賈司馬。六丈觀安西兵過赴關中待命。秋日夔府詠懷。上韋左相。春日江邨。

從子鶴來別二十年今年歸暮秋過邨居喜作

雀喧叢薄掩籬門。返景殘霞帶遠邨。寒色小停江上艇。晚香濃引竹間尊。陰晴事往嫌重數。唱和篇多喜細論。落葉蕭蕭三徑積。未妨吟遶藥欄根。

### 查爲仁

字心毅。宛平人。康熙五十三年舉人。有蔗塘未定稿。

蒲褐山房詩話。蓮坡先生早賦鹿鳴。被計得罪。數年而後得釋。因發憤讀書。博通典故。所居天津水西莊。貯書萬卷。南北往來名士如萬栢坡。風樊樹。趙飲谷等。無不攬環結佩。延主其家。相與覃研詩詞。書畫。又所娶金夫人含英。亦就風雅。人望如仙。其集中句如地偏人跡斷。湖定水痕深。落花寒食節。飛絮午晴天。晚徑黃花開。有色曉程殘。月落無聲一榻茶。烟留客話半簾花。影枕書眠苦。中晚店妙句也。今下世四十餘年。而莊亦改爲公廨矣。先生弟儉堂與予交善。而子篋槎。給事爲予同年。故得其風流好事如此。

### 大悲院題壁

瞻此東林社。來尋惠遠師。坐深涼意滿。吟苦樹陰移。白鳥衝殘照。青蘆響暮颺。一層樓上望。浩蕩自伸眉。

### 留題勗宗上人玉泉山房

初地雲邊構。精廬岩腹藏。半庭春水活。一屋古松香。禪已離文字。交須耐雪霜。支公容入社。分我小匡牀。

秋夜

雞蟲得失又何傷。聊爾閑吟夜未央。簾樹含烟難辨色。瓶花貯水有餘香。且煎雀舌添清課。尙戀蠅頭讀細行。繆地又教悲老大。朝來兩鬢點吳霜。

佛手柑和查浦伯韻

盈筐相寄自吳船。幻出天龍一指禪。摩頂雖無心印法。拈花却有妙香傳。剖煎翠茗芳逾烈。畱伴黃梅色並妍。本是兜羅綿現相。越橙吳橘敢差肩。

萬松寺

寺前青翠萬株松。寺後巉巖百疊峰。坐久不知天過午。數聲聽打飯時鐘。

許廷鏞

字子遜。長洲人。康熙五十九年舉人。官武平縣知縣。有竹素園集。

蒲褐山房詩話。竹素先生詩才綺麗。始學杜牧之王仲初繼而規模何大復徐昌穀志和而節雅。七言絕句尤爲人所傳誦。然性豪放。上論古今史事慷慨激發。一官閩海。憔悴數年。非其好也。既歸長洲。居郭外二十里之陳墓。河水雲千頃。花藥數椽。適作詩以自遣。時時入城與沈歸愚蔣繩漪兩公來往。故予常得接其議論。

憶昔行寄石洲觀察

同心有幾人。每作參商隔。山川一間之。世事復紛迫。遂令面會期。迢迢望無極。自予走四方。奇士儘能識。

君從蒼梧來，秉心貞且直。風義篤友生，古道照金石。抽思必詣微，靈境多獨闢。亮抱璠璣姿，文采耀東壁。一朝登賢書，聲名動京國。本以金閨彥，而混簿領職。牽絲聊一試，政平伏已擿。治行遠近聞，間歲乃三陟。屬當濱海區，伏莽多刼賊。白晝肝人肉，裨校肯辟易。蔓延將百年，流毒過辛螫。君來指顧間，豺虎吭以搯。渠魁尸桓東，降者保黃馘。南越百萬戶，自此安衽席。先是粵東被盜禍最烈，丁役莫敢捕，人人自危。君一出而搗其穴，散其黨，根株既絕，四境遂得安枕。何來逢掖生，首建不世績。天子聞其名，有喜動顏色。既綰銅魚符，旋樹牙門戟。鸞鳳際清時，九霄行展翮。憶昨華掌遊，繼遇金臺側。溫溫公瑾醇，至今猶在臆。武溪重相逢，翦燭話疇昔。風波一失所，蹙蹙靡定迹。蚩駘性相依，芝蘭氣無敵。南睇鳳山雲，伊人如可卽。緘素屢言情，半被洪喬厄。尺書天末來，忽見雙飛翼。邀我韓亭遊，勸駕詞甚力。嗟予值數奇，豪氣未全革。重爲飢所驅，浪作年年客。憂勞能傷人，況復暮景逼。衰病戀故邱，壯遊計久息。非君知愛深，胡爲遠行役。啓途歷水陸，兩見江月碧。高秋蹋鈴閣，君上珠江鷁。盈一水間，遙望心如怒。賴茲賓從賢，談笑西園劇。鳳雛有清聲，英英覘世澤。觀之散老懷，離思終難釋。昨日報霓旌，將發五羊驛。翻因歸有期，更引長相憶。各蘊十年懷，吐之待良覿。

題活溪

活溪一片石，長寄幽人賞。蘊靈亮有基，穿徑識所昉。昔遊景已移，勝情紛涉想。重來際蕭晨，清湘駐雙槳。初日澄遠心，水木明秋爽。石梁敲半橫，絕壁峭以上。曲徑垂繁陰，流泉激清響。當境乃自今，過目已成曩。

寂寞塵外蹤。日見屐幾兩。高秋多白雲。空亭自來往。

對月懷石洲觀察

憶昔平川月。同看淥水流。戊申相別於淥水湖十年逢此夕。獨照海天秋。使節正當路。故人今白頭。清輝千里共。望

遠一登樓。

鑪香峰

昔夢香鑪頂。空中浮紫煙。今來瀑布下。天半挂流泉。遠寺鐘聲斷。蒼山月影圓。狂歌招李白。雙鶴下雲邊。

懷宋四嘉榆

依然不得志。五載鬢毛疎。正挂匡廬席。開君蒙澤書。生涯各歧路。鄉夢半離居。憶想葑溪上。長空流望舒。四海誰相識。斯人知我心。天涯逢令弟。話舊一霑襟。聞道赤城去。蓬萊碧海深。爲期秋水闊。予亦返楓林。

送春

吳兒日暮踏歌回。紈扇痕新袖底開。燕子一雙斜掠地。不隨春去却飛來。橋過芳草酒旗橫。醉睨當壚倒玉瓶。十里好風吹不住。亂紅飛雨過長亭。

題家書後

觸撥離情拂彩箋。秋風瑟瑟雨綿綿。寒燈獨照三千里。薊北江南共不眠。

吟鞭遙指酒帘斜。唱徧旗亭樹樹花。忽憶風光滿吳苑。江頭燕子又還家。  
乍逢寒食客中情。麥飯誰家隴上行。如雪梨花如線柳。當年容易過清明。  
飄零莫怨竇連波。每對青山憶黛螺。錦帶書成頻寄否。天邊飛雁北來多。



# 湖海詩傳卷二

## 厲鶚

字太鴻，號樊榭，錢塘人。康熙五十九年舉人。乾隆元年薦舉博學鴻詞，有樊榭山房集。

蒲褐山房詩話：徵君性情孤峭，義不苟合。讀書搜奇愛博，鈎新摘異，尤熟於宋元以來叢書碑說。以孝廉需次縣令，將入京，道經天津，查蓮坡先生畱之水西莊，觸咏數月，同撰周密絕妙好詞箋。遂不就選而歸。揚州馬秋玉兄弟延為上客，嗣後來往竹西者凡數載。馬氏小玲瓏山館多藏舊書善本，間以古器名畫因得端居探討，所撰宋詩紀事、遠史拾遺、極篇詳洽，今皆錄入四庫書中。其先世家別有自得之趣，瑩然而清，管然而達。幽新雋妙，刻琢研鍊，五言尤勝。大抵取法陶謝及王孟，章柳而吳下，莫能相掩也。予於戊辰歲在長洲，趙君欲谷小吳船過之，辱為亡年交。嗣後徵君過吳，必訪余于朱氏蘋花水閣。凡三年而徵君下世矣。至其詞，直接碧山玉田，子已錄入琴畫樓詞鈔，故不具論。

### 曉登韜光絕頂

入山已三日，登頓遂真賞。霜磴滑難踐，陽崖曦乍晃。穿漏深竹光，冷翠引孤往。冥搜滅衆聞，百泉同一響。蔽谷境盡幽，躋顛囑始爽。小閣俯江湖，目極但莽蒼。坐深香出院，青靄落池上。永懷白侍郎，願言脫塵鞅。

### 宿永興寺德公山樓

昏黑山雨歇，一徑松烟蒙。微聞梅花氣，吹落踈磬中。詎惜衣履溼，宿處投支公。凭樓答人語，迴與雲際同。少選沈鷲斂，俯聽幽林風。明星忽三五，挂在殿角東。短燭照春綠，夜靜山逾空。觀河悟衆象，拂石期冥鴻。

神清了無夢。亂壑流何窮。焚香以達曙。茲焉悅微躬。

永興寺二雪堂曉起看綠萼梅是馮具區先生手種

幽人先鳥起。林磻正寂然。是時春空霧。山翠爭便娟。的花間雨澹澹。花上烟。烟雨爲合離。花態亦變遷。祭酒昔游此。手種猶生前。傲兀根倚石。欹倒枝暎泉。微馨委陳跡。高格同枯禪。儒官罷亦得。不廢招隱篇。攀花久延佇。世已無其賢。

溪上巢泉上作

翫溪遂窮源。東峯屢向背。朝日上我衣。春泉淨可愛。不知泉落處。潺潺竹籬內。喧聞兩疊瀉。靜見一潭匯。松風颺纖碧。花影蓄深黛。名言猶有相。幻照乃無悔。悠然巢居心。頗欲終年對。

晚入石人塢還永興寺

撥蘿尋微徑。山意黯將暮。幽討忘體疲。窈窕入深塢。激瀨不通人。踏石凡屢渡。返景忽難留。蒼蒼目爭赴。萬竹皆爲風。千花并成霧。去鳥有遺音。歸樵詎同趣。夕梵懷信宿。春溪延緩步。入門不生月。仍倚簷際樹。同巒城耕民游良山。山在城東北。高可二丈許。蓋土阜也。旁列古松三四。晚風肅然。殘雪在地。臥殘碑已中斷。讀之不甚了了。乃元良山土神廟碑。大德己亥紹興路儒學錄古杭沈德章記并書。廟不知毀於何時。作詩紀之。

皁亭雪未消。數峯粲可數。城陰良其背。有此山戴土。牽拂無事朋。共探風物古。晚寒閉漁村。斜陽入蔬圃。疎松時一響。似喜我輩撫。徘徊去仍畱。斷碑記祠宇。惟存豬兒年。髣髴辨某甫。斯人今安在。閱世如過羽。社翁一尊酒。寂寞罷歌舞。明年梨花時。再尋比韋杜。沙河春水生。看客曳柔櫓。

四月十五日同施自勗吳尺鳧游西山入龍泓洞

淺夏宜尋山。幽深最靈鷲。言瞻理公塔。濃綠暗晴晝。行勝已十里。地奧峯轉秀。石牀不暇坐。窈窕入雲竇。乳泉排蜂房。其下若懸霤。絕疑秋雨時。濺撲到襟袂。圓穴居上頭。晃晃天影漏。照見壁間書。亡國有餘話。洞刻咸淳丁卯賈似道同客俞昕等題名蒼然畱後嚙。反似神所守。嬾嬾出別洞。冷襲袂衣透。恨不裝輕絛。佛國殊氣候。

冷泉亭月夜

望月迎峯菴。已吐鷺嶺背。林閒炯積雪。搖影紛瑣碎。出門路漸低。步步入幽竊。過橋松露滴。茅屋一犬吠。層巒回復凸。月尚隱其內。招要坐空亭。萬木鬱垂蓋。泉光動深池。翻疑夜當晦。聞聲彌覺靜。澗韻雜陰籟。微於交枝隙。忽見鮮雲挂。此時各無語。翹首翠屏對。颯然古精靈。髣髴妙景會。烟中客兒句。風外寶公喟。欲畱凜生寒。將去如有待。今宵單牀夢。猶繞琉璃界。

晚至溪上巢

林巒生春寒。心在諸天暝。列坐踈竹根。微泉各爲聽。花光淡欲無。松籟遞相應。衝烟山鳥還。余亦下蘿徑。

西溪曉起

首春溪中寒。假臥如屈鐵。宵分天柱夢。覺來轉清切。開門殘月在。下見數峰雪。雪際生白雲。宵暎不可說。登橋水市靜。尋徑冰泉裂。田翁尙無事。初陽候林缺。懷新意似欣。理舊抱已結。何如巖棲人。難竹飯松屑。

行田至荆山嶺下作

大山何連延。細岑若迴顧。中有微徑通。兩村隔松霧。平疇開朝日。宿麥半凝沍。雲根脈未洩。涓流但微注。野人籬落小。鳴雞隱雜樹。雖無汜勝書。農話眷幽素。稍營下涇業。更羨上洞住。竹橋滑春霜。往來定非誤。

同吳西林汎舟西溪看梅

緩櫂縱遙目。心與春流平。邀侶以事解。得朋因寡營。峯色烟上霽。竹風沙外清。一夜叢梅發。幾處山窗明。香中林鳥語。引我沿溪行。積翠點殘雪。陰淡寒自生。西崦未云夕。東畚方可耕。稚子寫迎客。花間啓柴荆。

曉過福清竹院

探幽勇晨興。靜院鐘未歇。晴烟暎竹澄。殘月轉花沒。地僻養靈姿。氛潤蒙玉骨。有如列仙儒。初日晞蘇髮。深山留古春。凡豔想易竭。老僧空色相。折取供白佛。護此無盡燈。常依妙香窟。坐聽籬落間。絲羽轉清越。

夜宿松籬山房

閑房駛雨過。林杪挂星漢。涼深欲添衣。不但殘暑遁。蔬盃供細食。花巾奉清盥。相偕靜者流。共待疎鐘斷。

夜闌空山黑。月吐翠微半。澄輝漾庭戶。秋影互凌亂。露蟲鳴始急。坐覺歲時換。人生非學佛。詎免遲暮歎。感此不能眠。裴回以申旦。

晚由金家堰步至崇先寺

一峯抱花迴。不知凡幾里。遲日落未落。散策從此始。石梁跨澗空。苔枝皆倒倚。入寺罷晚參。僧堂寂如水。詰曲取微徑。返景照花裏。瀾漫徧岳壑。春透無剩藁。乍疑吐佛光。白毫映霞紫。復訝妙香生。秘醇得禪髓。盤桓憩松根。結茅擬來此。何必問通波。遠尋光福市。

十二月八日敦復招集餅花齋食臘八粥聯句

歲序何崢嶸。周京星紀忽已弔。八葉抽堯蓂。金志章五德重漢臘。吟社邀纖聯。樊榭山館喜簪盃。浴佛東京

遺。梁啓心設供西竺法。既釜精作糜。丁敬龍泓析薪燎以蠟。果兼檜殼膚。杭世駿米槩升俞合。釋之復揉之。全祖

望。謝載剝還載。拾瀘泉力斧冰。顧之麟蒸餽氣焚蕝。汨汨醅汎缸。吳城濃濃乳傾榼。宿辦勝咄嗟。丁健早

起占噓嗑。坐疑集梅林。汪啓淑圍如禮花塔。不待木魚呼。穆門何煩齋鼓鞞。素甌滿同盛。江聲淨饌齊一呷。甘

芳滑流匙。樊榭磊塊利用椀。羣喋訝水鳧。錢林餘瀝施簪鶴。口香聞諸天。龍泓腹果傲古納。利益瞿曇云。董浦家風

靖師蒼。緬思烹穀初。謝山軒后澤溥洽。玉井象昭垂。田寸橐籥紀職納。人皆依風往。亭俗始理生陋。貴或糅元

黃。誠叔三品侈和雜。貧或點齋鹽。秀峯七寶爭嘖嚶。或詭名目奇。穆門料斗說閭闔。或因衆指繁。江聲舖歛沸吹欲

魚傳放翁詩

樊榭

膏載叔庠劄。寒持濟軍飢。

林葢

晨炊恤僮乏。何如我輩閑。

泓

文史共歡狎。蜡飲用上寅。

董浦

談

議資某甲。嶺梅吐萼纒。

謝山

山茶破紅恰。騁辭筆紛飛。

田寸

搜祕神有塔。節物鬪朋牋。

顯亭

故事徵梵夾。流連至

纒黃

誠叔

新月照簾押

秀峯

二月十七日重游洞霄宮探大滌洞天

振衣浴罷體更輕。竹杖投石聲彭觥。空山昨夜龍洗窟。雨過萬壑泉縱橫。山靈知我有默禱。故遣松風作前導。一峯陰見一峯晴。天柱中央翠於掃。元同先生昔隱居。洞天長鎖琅函書。前游日夕未曾到。恨身不得乘鸞車。穿盡幽篁履苔石。驚見谿澗洞門圻。童子曾爲擣藥禽。桃花解笑題詩客。此中日月停兩丸。想像九夏尤清寒。微明秉炬觸暗壁。古靈題字來尋看。洞中題刻多漫滅。但見一處云。陳襄述古來癸巳夏。玲瓏乳竇隔凡處。路接華陽不歸去。有人問我洞中來。爲說浮雲如柳絮。

題敬身所藏崔子忠伏生授經圖

樹底危坐秦博士。頭童背僂須眉蒼。彼姝侍側兩鬢妥。啓唇似有聲微颺。一人炯視面若削。高冠褒衣意則莊。刻深頗似見顏色。穎川掌故稱智囊。據石作几俛首聽。手操不律書幾行。登來化我本齊語。豈至難辨如公羊。此時未有蔡侯紙。非是簡策應縑紉。羸灰既冷孔壁匿。聖權獨賴生扶將。二十五篇復繼出。微言大義難低昂。後儒往往疑作僞。欲與百兩俱淪亡。典午清談那辨滿見切。此地下齒冷梅豫章。操矛入室

眞鹵莽。安得生也相撐塘。北平崔丹古節士。布袍草履神揚揚。貴人乞畫怒不與。槁死上室甘飢脰。龍泓館主得小軸。晨夕坐對齋屋張。遺經獨抱湖姚姁。樸學正可傳諸郎。猶勝濟南一女子。宛轉膝下青桂裳。焦山看月分得聲字

焦山寺裏鐘始鳴。焦山寺前江月生。此時月上潮復上。風水相薄爲奇聲。餘音瑟瑟獵枯荻。磔然飛起棲禽驚。長波萬里入杳靄。中流一道馳空明。數星莫辨北固火。幾點不送南徐更。羣峯隔岸悄如睡。何事賈舶貪宵行。吳頭楚尾兼越角。我輩聚若九子萍。同游者九人珉石興來弔鶴瘞。瓊田望去呼龍耕。坐久起踏松影碎。滿地窳窳霜華橫。琉璃宮殿水精域。佛界盡在寒而清。良朋偉觀那易得。天教今夕二者并。高詠坡公赤壁句。一尊酌月還同傾。

### 東臯閑居

白拾成新隱。青苔徧舊蹊。水明村裏外。樹罨屋東西。菜把官羊敵。茶香佛粥齊。慨焉思靜侶。安得手同攜。沈大匡先生華山草堂

心跡竟沈淪。空山闕古春。亭留唐野史。名在宋逋臣。破壁全題字。雙松一作薪。惟應千載上。媿殺瘦腰人。晚秋夜雨有懷故園

落葉卷風雨。客愁仍去年。背燈三峽水。欹枕九江船。預想他時話。須妨此夕眠。南湖烟翠色。應濕草堂前。

羊流店拜羊太傅祠

茅屋疎林雜晚炊。羊公祠下獨來遲。探環已失前生樹。墮淚猶存故里碑。盛德在人如昨日。清談誤世詎同時。雍容裘帶瞻遺像。深媿無才進些辭。

月夜渡江

露荻風林隱戍樓。宵分月上動行舟。凌雲髣髴三山意。濯足空明萬里流。北府兵廚誰與載。南朝詞客寫同游。人間奇絕成孤賞。喚起魚龍一笛秋。北府兵廚。宋時鎮江酒名。

二月十日同丁敬身金質甫陳江臯登寶石山天然圖畫閣

塔下樓開躡級登。東風聊憶昔游曾。春深城郭渾如畫。定裏鶯花不屬僧。人影漸移湖上柳。烟花又綠壁間藤。畱題爲紀閑蹤跡。只有看山詫最能。

送沈確士歸蘇州

滿天梅雨合思吳。早挂烟中十幅蒲。白髮定能爭席不。朱絃曾遇賞音無。人同樂圃文偏潔。宅近靈巖趣不孤。只恐鷗情成閒阻。五湖那復憶西湖。

悼亡姬

病來倚枕坐秋宵。聽徹江城漏點遙。薄命已知因藥誤。殘妝不惜帶愁描。悶憑盲女彈詞話。危托尼姑祝



夢妖。幾度氣絲先訣別。淚痕兼雨洒芭蕉。

郎主年年耐薄游。片帆望盡海西頭。將歸預想迎門笑。欲別俄成滿鏡愁。消渴頻煩供茗椀。怕寒重與理熏篝。春來憔悴看如此。一臥楓根尙憶不。

除夕家筵已暗驚。春醪誰分不同傾。銜悲忍死畱三日。愛潔耽香了一生。難忘年華柑尙剖。瞥過石火藥空擎。祗餘陸展星星髮。費盡愁霜染得成。子望溫柑尙食其半。

舊隱南湖淥水旁。穩雙棲處轉思量。收燈門巷快微雨。汲井簾櫳泥早涼。故扇也應塵漠漠。遺鈿何在月蒼蒼。當時見慣驚鴻影。縱隔重泉便渺茫。

蒲褐山房詩話樊樹下世。蕓于杭州四溪王家塢。因無子嗣。不久化爲榛莽。後四十餘年。河君春渚琪游西溪田舍。見草堆中樊樹及姬人月上栗主在焉。取歸。偕同人送武林門外牙澗黃山谷祠掃洒一室以供之。予爲撰丈室花同天女散摩閣詩。共老人參句。以題其楹。李光甫方滿蔣村。炳陶覺香梁諸子皆有詩詞記之。樊樹生于康熙三十一年九月十一日辰時。月上姓朱氏。名滿。嬖烏程人。生康熙五十八年三月二十四日辰時。歿于乾隆七年正月初三日。日戌時。並屬蔣村及項金門壩。許周生宗彥。各于忌日奉酒脯薦焉。

### 春寒

漫脫春衣浣酒紅。江南三月最多風。梨花雪後餘醺雪。人在重簾淺夢中。

### 題周兼南唐小周后寫真

命婦隨朝掩淚光。虛聞龍袞紀興亡。畫師自有春風筆。不寫傷心人汴梁。龍袞江南野史今所傳不全。載小周后事。見王銍默記。

明鄭貴妃書泥金普門品經同丁敬身作四首卷首題云大明萬曆甲辰年十二月吉日皇貴妃鄭謹發誠心沐手親書觀世音菩薩普門品經一

卷恭祝今上聖主祈願萬萬壽洪福永享康泰安裕吉祥

梵夾瓷青出漢京。翊坤題處最分明。依稀買得研神記。紙上香多蠹不成。明大內寫金字經多用瓷青紙。翊坤鄭妃宮名。

巧笑由來雨露偏。佛恩遣在聖人前。開函稽首無他願。一筆泥金壽一年。

柘館餘閑罷女紅。祝釐不與衆嬪同。也勝密誓高元殿。小字親封玉合中。

城南詩老觀空久。特賦新詞繼夢華。更待秋山黃葉下。與君禮足九蓮花。靈隱寺有慈聖李太后賜九蓮觀音一椽。

西溪山莊有感

闌壓垣衣戶網塵。嫩寒惻惻那禁春。一池好漾羅裙水。只照梅花不照人。

錢陳羣

字集齋嘉興人。康熙六十年進士。官至刑部侍郎。加尙書。諡文端。有香樹齋詩集。

蒲褐山房詩話。公久直內廷。深蒙知遇。而乞假歸田之後。恩禮尤深。時賜御製詩章。俾其屬和。資子便。善至以明僧紹爲比。及翠華臨幸。不邦公輒在屬車。豹尾間。矢音寶和。詞臣歸老。榮眷有加。爲自古所未有也。公位隆望重。而愛才如不及。予適會試。三座師。皆出公門下。於禮爲小。而公以乾隆辛巳入都。祝釐予。尙未進謁。公已先來訪。予上直。未歸。聞人辭焉。公不許。直入蒲褐山房。坐俟予歸。劇談後去。蓋其瀟灑絕俗如此。先是公督學江西。特拔蔣君士銓。于時衆中所過名勝。輒有題字。而北關寺墨跡尤多。予兩至江西。公歸道山已久。公子東麓侍郎。謝世亦四載矣。時與蔣君循覽遺詩。不自知其淒黯也。

渡潯陽江經廬山至德安次香山德安趨潯陽韻却簡柱川太守

侵晨薄潯陽。煩慮始一展。廣川利泛涉。層巒揖清緇。穿石水紆迴。出岫雲舒卷。攀危倚僮僕。攪勝去帷幘。西崦竹逕封。東林碑字選。登頓信云疲。散誕乃忘倦。山程延信宿。茆屋就假蹇。復此遵修塗。仍欣開別嶽。村稠市稍喧。礪豁路初轉。通津俯金帶。古渡歷敷淺。稽圖豈遂游。托志聊紀顯。凌虛馬啼蹴。窮皴吾目眩。題詩報故人。卽事得幽遣。

題林上舍涪雲陶觴硯譜

端石如端人。厥質靜而正。徵行謚旣彰。傳愛銘可鏡。此册林氏守。名輩互考訂。銛鋒碾纖阿。圭璧發晶瑩。詞兼鱣柳深。體許斯豐並。借觀不忍釋。秋窗張短檠。龍尾穴已湮。風味賞難更。碧瓦多飄零。黃眼爭季孟。品題有羣公。石室事稱盛。我老當學耕。與君租一稜。

東林寺和王文成題壁韻

下馬登山踏秋艸。路人東林覺秋好。處士高僧跡已陳。廬山面目何曾老。石罅寒筑泉聲哀。酌泉仰看芙蓉開。天池拂水落天半。餘噴似逐清風來。出門西去重回首。今宵且醉山村酒。醉中猶認壁間題。龍蛇生動不可朽。故人高閣虛中庭。中丞開公遣吏來迎采芳遲我江之汀。夢回記上爐峯頂。北指恆燕一髮青。

楓香驛次靜山侍御韻

入山身在白雲鄉。復澗迴溪問野航。瞥見新槽聞酒熟。始知小驛是楓香。夢回郢尾人千里。月滿樓頭雁一行。馬上閒情數秋草。露葵開老尙當陽。

盧見曾

字抱孫。號雅雨。德州人。康熙六十年進士。官兩淮鹽運使。有出塞集。

蒲芻山房詩話。運使短小精悍。有吏才。總督那蘇圖特薦。謂其人短而才長。身小而志大。嘗爲四川洪雅縣令。故以雅雨自號。夙慕其鄉王阮亭。尙書風流文采。故前後任兩淮運使。各數年。又值竹西殷宮。接納江浙文人。惟恐不及。如金壽門、農陳玉、几撰、厲樊榭、鶴鶴、惠定宇、棟沈學子、大成、陳授、衣章、對鷗、阜兄弟等。前後數十人。皆爲上客。而是時地主馬佩兮曰：「聆秋玉曰：瑄及張漁川四科。易松滋諧。咸與扶輪承蓋。一時文酒稱爲極盛。又校刊乾隆度。高氏戰國策。鄭氏尙書。大傳李鼎祚。周易集解。封演聞見記。諸書。又補刊竹垞大史經義攷。并以國朝山左詩人最盛。屬鞫編修。遜行張孝廉元。董庶常元度。諸人採輯傳世。修小秦淮紅橋二十四景。及並集樓觀。以奉辛未丁丑兩次宸游。其愛古好事百餘年來所罕見。

承恩出塞。畱別揚州諸故人

解網綸言下九閣。孤臣猶在識天恩。三年便許朝金闕。萬里何辭出玉門。沙暗陰山秋獵壯。雪明瀚海夏裘溫。多情應信揚州月。直送征輪到塞垣。

休致歸里。畱別揚州

力體宣勤敢自憐。薄才久任受恩偏。齒加孫冕餘三歲。歸後歐公又九年。犬馬有情仍戀主。參苓無效也

憑天。養痾得請縣車日。五福誰云尙未全。

平山回望更關愁。標勝家家醉墨畱。十里林亭通畫舫。一年簫鼓到深秋。每看絳雪迎朱旆。轉似青山戀白頭。爲報先疇墓田在。人生未合死揚州。

### 顧棟高

字復初。無錫人。康熙六十年進士。乾隆十六年。以經學徵官。至國子監祭酒。

蒲褐山房詩話。震滄先生少與蔡進士德晉吳孝廉鼎精心經術。尤長於春秋。既捷南宮。官中書。以奏對越次罷官。遂不復出。所著大事表。萃公穀之微言。正杜孔之義疏。凡駁蠲紛紜之說。悉爲定其指歸。表而出之。蓋宋元以後。諸儒無其精確也。乾隆辛未。以經學徵賜官。國子監司業。未就。丁丑。迎鑾晉祭酒。時年幾八十矣。是時寓維揚者數月。猶見其撰毛詩類釋。今亦錄入四庫書中。先生不好吟咏。而大事表。後附論春秋詩。皆無關風雅。故從梁溪詩選中所錄止此。

### 寄秦子樹澧京邸三十韻兼柬蔡子宸錫吳子大年

春秋有淵源。其祕舅氏啟。閉門四十載。著述浩難紀。餘嘗慨後人。愚也叨染指。蔡子亦勃興。不謀而同軌。鑽研事三禮。註疏繁且哆。余著宮室圖。三代遺基址。蔡子有禮傳。精人豪芒裏。質齋兩昆仲。大年號質齋。與賢弟遊義。並以經學名世。臭味略相似。易傳與春秋。著論各宏偉。秦子年最少。味經得經髓。味經秦子別號。窮經著實用。穎銳尤莫比。治河洞古今。鹽筴析源委。乘時並高翔。稽古光有燁。而我守窮廬。麟經究終始。諸儒論積薪。不肯隨諾唯。編年從周正。紀事因魯史。朔閏補長歷。輿圖看聚米。紛紛日月時。瑣瑣得名氏。一掃支離障。庶得筆削旨。謬誤斥公羊。災異嗤董子。州次而部居。分肌兼析理。爲卷四十九。大義貫首尾。所恨帙浩繁。未能致雙

鯉。良友兩三人。無由攻疣痕。舅氏有從孫。爲華子師道貫穿窮根柢。尋箇數往來。辨論析朱紫。飲助良不淺。割豁頑鄙。此事有由來。先河而後海。十年粗告成。吾友當心喜。天遠帝城闕。白雲空徒倚。

正月十四夜泊建寧城外

春來漫說短長亭。迢遞離腸酒易醒。兩岸青山圍素月。一溪寒水宿殘星。人依樹色經年老。舟帶灘聲午夜聽。料得家鄉燈火鬧。可知客路在郊坰。

戴亭

字通乾。號遂堂。遼陽人。康熙六十年進士。官齊河知縣。

蒲褐山房詩話。遂堂襟情超邁。詩筆堅剛。自齊河罷官後。率其小妻。漂泊江湖久之。依雅雨運使于邗上。嘗與予同寓。冀州言生平所想。企者惟李鐵君。陳石閣兩布衣。餘子不足數也。故雅雨爲刻。遂東三老詩以傳之。性善飲。至數斗不亂。年近八十。貌如嬰兒。自誇得容成之術。予入都後。年餘聞移寓金陵。一夕無疾而卒。

宿來青軒

已覽香山勝。還尋勝地眠。陰厓連戶竹。疎磬出山烟。月色綠塔上。泉聲到枕邊。夜來魂夢冷。身出白雲巔。

山行

每至幽棲地。長懷出世心。緩隨流水去。漸入白雲深。墟里澹斜照。烟蘿生暮陰。道逢樵牧侶。閒坐話中林。

雨後山齋

山齋雨乍晴。新月照茅屋。萬籟寂不喧。殘聲滴疎竹。

秋雨

孤艇泊秋林。夢繞江天路。寒雨帶歸鴻。飛向江南去。

沈起元

字子大。太倉人。康熙六十年進士。官至光祿寺卿。有敬亭詩文集。

蒲謁山房詩話。先生白淩之子。處爲名儒。出爲廉吏。自典郡以至方伯。所莅之地。深求利弊。次第斟酌。行之心切。愛民而以寧靜不擾爲主。入任光祿寺卿。引年致仕。生平清操自勵。進退超然。與武林虛船通政相似。而詩學尤醇。歸愚先生謂高者撫杜陵。次者近白傅。信也。甲戌秋。予在濟南。先生主灤源講席。把臂甚歡。出所著周易孔義集說敬亭詩文集見示。因得其學問之詳。歷城周君書倉永年。時年弱冠。在書院中。能讀徐氏通志。濟南學解。先生譽之。令予相見。其後書倉以辛卯登進士官翰林。兼通內典。爲濟南學者。沒後詩什無存。故附記焉。

秋日過顧思儼

秋容老更嫵。墊步尋幽居。天空高不盡。水冷清如無。曲折依蔬圃。往往逢樵漁。何以識君家。繞岸鮮芙蓉。稻黃喧鳥雀。池晴漾游魚。種藥霜不死。晚秀盈階除。分畦植菘韭。向日課耰鋤。靜觀造化理。自著蒙莊書。此樂真自得。淵明復何如。

石壁

客從花中來。僧向花中住。誅茅傍峭壁。日影常半吐。修篁入天翠。偏愛侵細路。石古柏根穿。松高巢鵲乳。

羣梅遶牆外。迴顧失來處。款接來山童。香茗煮花露。坐久客意安。徘徊不知暮。尋幽定頻來。勿以花落故。

溪閣秋晚和小山

寂爾秋遂晚。落葉散復聚。斷烟忽如雲。池中碧天曙。秋光入靜晷。會心不知處。孤吟欲有贈。望望夕陽去。

紀行一百韻

男兒不成名。飢驅遠行決。亦知北地苦。且念內顧缺。割棄試一行。百恨難具說。平生負奇氣。少小頗挺拔。落筆一身膽。結交寸心血。狂言衆所哈。志與蒼生切。功名不足取。肯念生理拙。阿翁垂七十。鬚髯皓以潔。數奇老不遇。意氣餘觀豁。一子嗟晚舉。瞠目望早達。十年走文場。三試竟三黜。劬勞阿母心。兒大母已沒。事母痛已虛。事翁力何竭。士窮未爲辱。念此增內熱。幸逢右文朝。曠典下金闕。思走長安道。聊振雙羽鏃。似非翁所歡。勉強聽整出。堂前苦無人。欲出轉愁絕。翁有舊執友。四五青雲列。平津篤恩義。投林匪干謁。買絲製羊裘。買布製羶褐。厚綿裝被褥。弱線理巾襪。懷中一卷詩。心知覆瓿物。冠蓋多賢豪。尙冀賞眞骨。落落辭朋儕。依依謝親暱。知己各有贈。規誦具古質。閨中有病妻。餘情復騷屑。畱勸諒兩難。徒看啼綆抹。幼女無所知。弄餌倚爺膝。且託丈夫志。掉首未遑恤。阿翁悽遠送。無淚向兒咽。仲冬北風寒。三更虎邱別。始悟失乳孩。夢寐殊忽忽。同行有繆子。心形故膠漆。舟車共長途。吟嘯散佛鬱。荷天假晴和。千里弄雲日。首塗惠山寺。孤塔烟中夏。泉聲茶思清。帘影酒情逸。漸看雙岸高。稍驗下水疾。吳楚山忽斷。一道江流活。



巍石撐洪濤。海門樹修闌。朝暎利彩飛。濕霧浪痕滅。片帆掠鳥鷗。瓜步倏超越。頓覺故山遠。吳雲望中失。  
蕪城煬帝家。枯楊剩芽蘗。邵伯積水長。烟草中蕩瀟。人家半淹漬。雁鶩雜鳴聒。俯視淮安城。盂底萬家室。  
窺簷亂帆度。憑舷女牆沒。疏鑿荒禹功。汨陳師鯨術。哀哉生民魚。千載憂潰鬻。恬波受輕槳。河靜流轉滑。  
旁支避險艱。靳公著宏烈。鷺鷥立清淺。蒲葦與曲折。功名垂不朽。豈必在賢哲。洋河見清流。俯映醒眉髮。  
就漁擊仙鯉。斫脰猶撥刺。亂山童亦佳。晴烟媚崑岷。夜寒風力尖。水凌長川截。光清日影淡。氣肅天空室。  
摧擊恃巨椎。琤琮玉聲裂。遂使一日程。三宿始改轍。旅舍濟寧城。驚心值令節。離情一線添。燈暗天欲雪。  
凌晨乘柴車。簌蕩比糠粃。辨途認征鐸。鷄聲遞木末。踈星閃餘芒。日色冷烟暹。霜花順風飛。人馬鬢鬣結。  
軟沙或埋輪。瘦石或拒轡。揚鞭乍奔騰。倦程時蹙躡。寒林村落虛。葉脫混梨栗。客來嗟過時。玩樹思解渴。  
樵髡古柳枝。童曝敗榆窟。空霄孤隼閑。荒野羣豕突。騎驢看少婦。羞顏蒙縵纈。塵埃劇靄霧。咳唾澀齒舌。  
自從河流徙。齊魯膏潤洩。菑畬變磽瘠。藝植鮮稻秫。承平日已久。土城壘螳埒。小邑數十家。茅屋見閔閔。  
暮投村店宿。泥床衾似鐵。苦酒一再斟。北食四五設。羸雞宰金距。美菜煮玉笏。屑麪更作餅。團團似規月。  
佐以秬黍粥。飢來愧饕餮。四壁疥題詠。妍醜未區別。河間太守堂。通家下陳榻。溫湯洗盆垢。負芒快一撥。  
詰朝指趙北。重霧裹林樾。天晴帝城開。瑞靄紛籠綴。車馬如雲烟。小儒媿薄劣。傍午登相府。遂許解鞍歇。  
先達假令顏。故知慰契闊。疲形得乍休。游魂尙恍惚。歲暮客窗深。清燈照孤子。江南杳何處。北斗如可揭。

計程越三千。數別途一月。家翁此際情。到期指應屈。如歸固云喜。心定轉憂懼。急思報平安。深夜呵凍筆。

下十八灘

下灘喜安流。客心付輕擢。復此風日佳。江山耿瀟照。連峯帶波迴。雲水相窈窕。一箭瀉盤渦。飛鳥不可到。近跡已條經。遙情復紛召。翻緣巨石橫。得領清景要。月流千縷光。籟起萬山竅。漁歌落遙空。客思正孤峭。去帆何匆匆。終傷流景慄。

桐廬江中作

霽巖消殘雲。蒼翠不可象。石色萬古新。風日與滌盪。峽曲江逾急。帆勢青冥上。前途旣迷阻。後逕復懔慌。林密鎖秋烟。蟬寒有餘響。孤村不見人。老樹挂疎網。清陰起遙情。靜目寓延賞。何必子陵灘。高風令人仰。

喜雨

久旱望雨切。無雨雲亦好。今朝忽纘盆。神功顯大造。危簷挂飛瀑。塔除走橫潦。飄洒林氣動。翻若烟塵擾。紙窗破忽盡。洞達領清灑。琴書霑漏濕。敢嫌吾屋老。此時田間農。狂呼天雨稻。穀熟農固喜。米賤吾亦飽。破屋與麤飯。平生事足了。雨罷颯然秋。長風送懷抱。

集穎山齋賦鬪蟋蟀

少皞行殺機。蟲豸氣先受。趨趨起郊原。唧唧滿戶牖。幽士感孤懷。黠兒逞捷手。巖厓剔虺穴。曉暮迹莽數。

獲異珍掌握。養材及配偶。雕盆比金湯。頒食選玉糗。頭鬚蠱兜矛。項領擁柞臼。負鼓張怒翼。含鏑鋸毒口。草間出韓彭。席上爭季郗。旗幟標錦彩。輝映秋八九。俠客呼鷹侶。閒曹鬪雞友。致師曳弱管。拔柵開細柳。未戰厲刀須。先聲憑氣取。初看齟齬交。如聞劍戟糝。膈膊興方酣。騰挪迭相蹂。勢均前却窮。力并轉側久。一擲或暫解。再合似佯誘。寸吻未云裂。兩股詎肯後。微傷強撐振。並仆益紛糾。呼吸不相當。斫刺已遭培。賈勇一鳴驚。亡魂四隅走。竄伏思藏頭。追奔更拉肘。壇心決死生。客面徵勝負。捐軀果何爭。戕類異滅醜。造物孽蝨賊。歡場狎斯阜。斯蝨阜蝨。皆蟋蟀類。宮掖唐家戲。平章賈相詬。流風昔朝寧。好鬪今童叟。長吟在野篇。幽詩王化首。

題元祐進馬圖

程真江收藏。圖五馬。每一馬後標計年月甚詳。意若當時進貢圖籍。獨不載畫者姓名。甚却生動。有法。一匹元祐元年四月初二日。左驥驤院收董鼐。進到錦膊。聰

八歲。四尺六寸。一匹元祐元年十二月十六日。右驥驤院收于闐。進到風頭。聰八歲。五尺四寸。一匹元祐二年閏月十九日。溫溪心進。照夜白一匹。元祐二年十二月二十三日。于天驕監揀。中秦馬好頭赤。九歲。四尺六寸。一匹元祐三年八月初九日。進到豹頭。聰四尺六寸。

趙宋全盛。元祐初。舉朝卿相皆鴻儒。巍峨元老。溫與路。二呂三范。同機樞。六合清明。萬物遂。兩宮日月。羣公扶。代遠人亡。青史舊。流傳墨寶。珍茲圖。茲圖五馬。盡神駿。元祐年月。來穹廡。董鼐初進。錦膊。聰于闐。風頭。照夜白。白溫溪。獻好頭赤。本秦中駒。豹頭誰進。偶缺略。馬齒尺寸。端詳書。青絲一人。牽一馬。冠服各異。馬色殊。行歸華廐。新翦刷。羈轡未受。當風趨。駿尾飄拂。連錢動。骨肉精態。清不耀。筆飛墨走。落空

橫。姓名失識知誰歟。承平在眼圖在手。蒼茫俯仰生嗟吁。中朝有人四夷服。胡馬不敢嘶邊隅。遐邦貢獻琛寶却。要使龍種歸騶虞。大宛汗血涉海至。豈事漢武窮兵誅。聖后垂簾眞相立。重譯跪進彤庭臚。鳥言卉服次仙仗。特詔畫手工描摹。黨碑一出天地閉。陰霾障日中原墟。銅駝荆棘生轉瞬。此馬知否來南都。馬不可問圖尙好。劫灰千載空區區。君不見他年窺覬偷寫照。有人立馬憑山湖。神器一跌元祐末。章蔡之肉何堪鋪。酒酣歌此意慷慨。冬青樹老啼霜烏。屏斥騏驎駕鷲劣。由來此恨無時無。

北行舟中懷許二子遜於兩粵

別後風流憶邈然。驚人佳句萬人傳。狂來魯國眞男子。餓後淮陰尙少年。揮斧莫教修皓月。銜杯何處問青天。南游芳草萋萋遍。夢到羊城路幾千。三年京洛共牢愁。二載章江復漫游。雁陣分行偏度嶺。梅花無使獨登樓。細斟柳酒千場醉。曼舞珠娘一笑留。可道春江明月夜。思君有客倚孤舟。

蔣恭棐

字維御。長洲人。康熙六十年進士。官編修。

景州董子故里

媿秦廢學校。坑儒并焚書。師吏辜誦說。六經歸榛蕪。漢興雖天授。創業由征誅。典禮命叔孫。繇叢誠區區。

百年生董子。私淑洙泗徒。下帷絕窺園。精心究典謨。從容對三策。致君期唐虞。武皇內多欲。遇之以虛拘。詎能崇正學。詔令相江都。後復相膠西。驕主重諂諛。誠正能感通。兩地無齟齬。邪臣懷妬嫉。主父偃。誦計何從據。春秋詳災異。衆口訾其迂。弟子昧師說。呂步舒。妄謂論大愚。獲臯得免死。緘口全其軀。所幸聖道明。邪正分殊途。以待後來者。迭起肯匡扶。有宋五子興。直溯姬孔初。日月懸中天。蒙翳消雲衢。何人啟衞徑。廣川實先驅。而胡昌黎伯。吐辭取敷腴。屈原司馬遷。子雲與相如。論道遺董子。所見猶偏隅。我過景州里。祠宇裝粉楡。稽拜瞻儀容。和粹緬真儒。王道復誰陳。攬轡空踟蹰。

### 尹繼善

字元長。號望山。章佳氏。滿洲正黃旗人。雍正元年進士。官至文淵閣大學士。謚文端。有文端公集。

蒲褐山房詩話文端公歷任封疆晚歸塞閣歲歷五十餘載承先啟後三代平章史冊所罕觀也公在江南最久慈祥豈憐活洽開閣而官吏格心斂手無敢稍爲乾沒及去而漕弊漸滋至今猶煩釐別故民間思而誦之公入觀詩云九重塵念是江鄉節屋年來少蓋藏疾苦未全登奏草帝心早已切如傷多年積潦閔淮徐元氣於今尚未舒四野盡鴻滿滿眼類諸景象象近何如直以民隱具陳寓規于頌實有古大臣風範性耽吟詠詩等牛腰覺後

秦隴江南余皆三至新知舊雨聚散無常癸酉春日一房山齋中感懷口占

惜春屢唱送春詞。人似浮雲任所之。白下風光常入夢。青門花柳又題詩。行來蹤跡離還合。老去情懷笑亦悲。此日齋前頻把酒。明年賓主得知誰。

余將赴金陵得袁子才山中寄懷詩依韻和之

廿年四度到江城。江草江花屢送迎。白下爭看新使節。青山仍伴舊書生。梅因耐雪香逾晚。雁爲凌空影自橫。野外清閒無底事。行雲來去尙關情。

瑤琴獨抱向誰彈。僻處荒村夢亦安。膝下晨昏方日永。中間嘯傲覺春寬。來札有山中歲月膝下晨昏之句隨風笑我舟無定。臥雪憐君骨尙寒。欲問年來身健否。幾回北望整征鞍。

高東軒東省查災甫竣又奉命來南勘河余於病中寄懷卽用東軒舊韻

年來轍跡遍東南。郇雨歌傳信不慚。山左茅簷如望歲。沭陽古渡又回驂。秋深澤畔鴻皆集。路滿棠陰樹亦甘。那得揚帆登畫舫。清波皓月夜深談。

流水行雲不染塵。先憂後樂總忘身。廿年豈易成知己。千里還應似卜隣。望月定多懷友句。隨風誰是繫舟人。署中舫屋名不繫舟料公此日篷窗枕。夢裏猶思海上民。

學使劉崇如所得三鶴忽失其一復賦

胎禽攜傍碧雲陰。世上塵氛未許侵。纔喜蹁躑來瘦影。忽從寥廓動遐心。養成羽翮三秋健。借托烟林一載深。也似鵬飛萬里去。不甘寄跡在江潯。

幾見梳翎碧沼頭。一聲清唳別羣流。海天自覺乘風杳。竹塢曾經對月幽。鷓鴣縱多誰作侶。稻梁雖好莫

輕謀不知亭畔雙棲者。可羨翱翔得意游。

和如菴學使臨行前一日不繫舟小集卽事兼以畱別韻

池上風清送晚涼。招尋把酒對秋光。人逢舊雨情偏遠。山帶斜陽色倍蒼。老圃湯嫌紅葉少。好花終覺素

心香。更深重話當年事。福地閒雲景不忘。如菴前和游攝山詩有千年福地無人到一片閒雲有夢通句

又向棲霞欲畱畱。看山夙願可全酬。連朝送客頻題句。兩地懷人易感秋。曲徑自隨幽澗轉。大江仍抱碧峯流。雲烟深處塵寰隔。拾級應登最上頭。

過燕子磯永濟寺

每過精藍便繫船。非關前路受風偏。秋殘野岸丹楓冷。水落空江翠壁懸。月色微茫僧入定。鐘聲斷續客初眠。回思十七年來事。似與名山有宿緣。

落葉聲中響木魚。茶烟輕散晚風餘。探幽路慣依山轉。隔岸人多傍水居。幾度登臨皆偶爾。再來意興復何如。虎溪一笑重回首。又送行雲過太虛。

張廷瑑

字桓似。桐城人。雍正元年進士。官至工部侍郎。

過永濟寺贈默上人

一徑秋陰蹋蘚苔。翠蘿深處寺門開。懸崖石色窗中出。繞閣江聲樹杪來。賸有禪房容徒倚。尙畱先澤重徘徊。流光五十餘年事。又到蒲公舊講臺。康燕壬戌先公有贈蒲公和尚詩。

松堂清悶聽鐘魚。苦行山僧八十餘。卓錫不曾行脚去。繙經爲愛閉門居。閒雲野鶴心同靜。瓶水爐香意自如。古木十圍忘歲月。蒼顏相對一窗虛。

### 王安國

字書城。高郵人。雍正二年殿試第二人。及第。官至吏部尙書。諡文肅。

蒲褐山房詩話。文肅清流眉目。官廣東巡撫。每以風節自矜。及入長六官。晚年充會典館總裁。所撰欲上比周官。唐六典以下不屑道也。乾隆甲戌。予以會試入都。公邀同編纂。常見老嫗所抱鸞。停玉峙瑤環。瑜珥卽今給事中懷祖時。纔十餘歲耳。公歿。懷祖幼而好學。長與興化李進士惇。江都汪貢生中。泰州劉廣文台拱。深研經義。而小學尤精。所撰廣雅疏證。剖析毫芒。咸歸古義。時人言訓詁者。莫之能逮。予以公居爲館舍。見其宅第庫廩廳事。至不容旋馬。益知清德之畱貽久矣。

### 游蒜山

杖策期我侶。極目烟嵐飛。披徑躡層岡。緣源面修碕。空水寒無姿。淡綠生已微。偃僂一老僧。隔澗開山扉。延客坐松寮。梵響生清機。谷幽光易暝。江遠聲逾稀。衆籟窅然合。心清無是非。憩久神彌愜。徒倚憺忘歸。舉手謝前嶺。逶迤窮林霏。

山光引游子。窈窕乘險絕。路歧情屢眩。徑錯興逾發。修竹翳層陰。危松綴殘雪。衆鳥寂無聲。騷屑林響徹。



石氣人昏冥。川光互漂擊。岸轉失來蹤。谿明得前白。斜日下江臯。餘霞蕩晴碧。夕嵐落千尋。空色遞相激。握手尋舊蹊。一一想所歷。忽看江上月。遙遙挂羅壁。

### 樓儼

字敬思。號西浦。義烏人。寓居上海。以薦入武英殿修詞譜。官至江西按察使。改京卿。有養笠軒僅存稿。

蒲褐山房詩話。西浦寓居申浦。與繆雪莊張幻花以詞唱和。兩君極道其工。康熙己丑。詔修詞譜。彼薦與杜紫綸同館。纂修辨析體製。考訂源流。曾駁正宜興萬氏詞律百有餘條。最中窾要。又以張綖之詩餘圖譜。程明善之嘯餘譜。及毛先舒之詞學全書。率皆謬妄錯雜。倚聲家無一遵守。因自訂羣雅集一書。以四聲二十八調爲經。而以詞之有宮調者爲緯。併以詞之無宮調者爲依。世代爲先後。附于其下。竹垞先生曾爲之序。後以卷帙繁重。未及開雕。今不可復得矣。

### 過同官峽用韓詩原韻

蠻鄉臘月天。詩境亦不少。閒閒巖洞花。澹澹沙洲鳥。凍雲懷微寒。薄雪弄清曉。作吏雖庸庸。行已實矯矯。江山景不殊。俯仰腸空繞。試問公家事。茫茫誰可了。

### 初秋夜坐

秋到月逾白。暑微風漸清。微吟忘漏下。久坐覺涼生。昨夜葺鱸夢。當年鷗鷺盟。拂衣歸亦得。鷄肋戀微名。

### 龍江晚泊

風晴日暖浪花平。一櫂秋江鏡裏行。薄暮山光多黯淡。近邨人語漸分明。長官自諳江湖趣。父老空勞燈火迎。指點星河天色冷。船頭小立露華生。

清明

三分春已二分春。幾日驚看火又新。人面桃花紅乍吐。裙腰草色綠初勻。試茶擬問山中信。插柳空憐客裏身。誰道秋千村落好。東顧吹滿敝裘塵。

光霽堂讌集演邯鄲夢傳奇口占二絕

一枕風光夙願償。醒來猶未熟黃梁。銀箏檀板尋常事。譜出英雄淚幾行。尋思我亦夢中人。一劍千山事已陳。回首瘴雲天似墨。恍疑磨盾是前身。

# 湖海詩傳卷二

汪由敦

字師敏。號謹堂。休寧人。雍正二年進士。官至吏部尚書。諡文端。有松泉詩文集。

蒲褐山房詩話。公優直內廷。幾三十載。清和恭謹。上結主知。予鄉會座師。皆出公門下。甲戌在京會試。以小門生禮見。相得驩然。深加獎厲。蓋夢文子。座主爲之先容也。其後哲嗣承藩。今官總憲。先與予同直西清。得公行事益詳。公卒後。總憲囑趙君翼編次其集。繕錄進呈。上製詩以弁其端。

題徐潛昭所藏米元暉山水

春雲濛濛濕不飛。層巒漠漠開林霏。力窮造物人毫素。老顛僂筆傳元暉。楚山清曉無由見。尺幅寸縑珍紀。巖含毫待制。知幾何。玉躑金題歸秘殿。此圖流落自何年。蛛絲煤尾淪寒煙。忽逢好事得收拾。腰纏豈惜奚囊錢。於潛徐翁隱埃壙。几列緹緗羅寶繪。子昂獵騎趙昌花。什襲雖多此其最。臨安山水多岷奇。圖中所見猶依稀。橫風吹雨過溪外。山腰紫氣斜陽低。雪花打窗歲方宴。邀我題詩展繪練。我詩漫與何足多。鑑古尤難辨真贋。朝來舒卷坐擁爐。眼前歷歷西子湖。平橋老樹虛亭孤。山樓對雨誰能圖。感君珍重拂拭。誰道知音世難得。只愁名蹟少流傳。不乏高人能賞識。

鄭方伯黃臬司張觀察招同彭宮允遊趵突泉

濟南名泉天下奇。湫流突見城南陴。白龍拔地幾千尺。鬣爪劈破青玻璃。明沙石瀨開平曠。噴薄中心忽神旺。地湧青蓮玉作花。井抽冰柱銀翻浪。驚湍灑灑匯清渠。日影波紋上綺疏。當軒坐擁三堆雪。繞檻平傾百斛珠。圖經自昔聞靈瀆。勝槩今來真在目。寧誇鸞羽曲江濤。不數晴虹匡阜瀑。公餘軒蓋駐郊坰。野色泉聲共一亭。泳游自適魚依藻。呵殿不驚鳥啜萍。清秋歲稔場將滌。地主情殷尋古迹。酌泉共喻飲冰心。紀遊莫笑成詩癖。

晴嵐閣學貽水僊碧桃走筆爲謝

釀花居士遣送花。白琢冰雪紅蒸霞。亞枝含笑人面暎。倚石側簪雲冠斜。濃妝淺暈各異態。神仙風骨無爭差。信風纔到老梅蕊。綠意未迴新柳芽。斡旋直借補天手。鬪豔競出東皇家。凌波娟娟步羅襪。和露灼灼調鉛華。風輕自著紙屏護。寒重更倩重簾遮。薌林矜賞破枯寂。靜海觸緒翻愁嗟。梁勳二公各有報詩。感情見乎詞。其意云爾。我生幸不乏意趣。燈前笑語爭喧譁。兒童少見強解事。旣以新水培新沙。燈棚廟市不計數。珍重詎比辱拜嘉。屏間墨戲適寫照。筆妙隱躍飛龍蛇。屏間雙清圖小幀。亦釀花居士所臨。趙子固王元章兩家筆。看花對畫坐忘倦。頓令陋室春光奢。從來草木同臭味。莫笑瓊樹依蒹葭。

吳江

輕帆向晚急。遠水入秋澄。煙靄漁莊柳。風低蟹籬燈。市沽缸面酒。盆採折腰菱。高士傳祠廟。遺蹤未易徵。

聖駕南苑大閱恭紀八首

千羽堯天浴。車書禹蹟同。順時稽令典。撰日整元戎。七德揚神武。三驅振古風。不須刊石鼓。盛烈邁車攻。  
清蹕向長楊。鳴鑣出建章。九旗懸日月。萬騎蹴冰霜。帳殿氍毹暖。旌門組練光。驍騰健貔虎。肅肅羽林郎。  
地是周靈囿。城連漢上林。華旃馳日馭。紺宇佇天臨。沙路飛塵淨。松皋積翠深。離宮時暫駐。端不爲從禽。  
甲帳拱中樞。辰旗辨正隅。花鬃金駮裹。析羽繡螭弧。令舉吟龍角。營開合虎符。氣酣金鼓外。雷動萬人呼。  
日角瞻天表。親巡驃騎營。乘麾森豹尾。按轡儼龍行。韎韐威容壯。戈鋌節制明。六軍同扞躍。挾纜此時情。  
周官司馬法。風后握奇經。迭進嫻師律。環生按陣形。千行飛電紫。萬道漲煙青。卻望高臺上。森嚴衛百靈。  
六鈞神力勁。一發耀天威。旋旆仍餘勇。呼應更合圍。彩翎迎日麗。錦翼傍雲飛。恩賚叨蕃錫。歡同奏凱歸。  
詰戎非耀武。偃革誕敷文。喜氣融城雪。和風捲陣雲。陽回軒律正。歌阜舜絃薰。謨烈承三后。垂衣仰聖君。

過丁乃清書樓

賸有餘閒作往還。每來高館俯塵寰。風光盡入三層檻。晴靄低迷幾曲山。好客坐看煙樹綠。新詩吟對夕陽殷。漫摹書幌思陳事。瓊蕊當窗手自攀。  
丁亥余讀書是樓。樓前玉蘭最盛。

元夜

村舍風光五夜過。春燈合岸射晴波。當頭璧月沉沉夜。勸客銀船緩緩歌。對酒漸傷前輩少。追歡惟聽舊

聞多板橋霜重人初散。不醉其如曉漏何。

除夕和趙學齋韻

十載清班忝致身。今宵餞臘正迎春。開歲元旦立春漏聲漸聽將交子。魁柄俄看又指寅。芸局圖書從汗漫。青編姓氏懼湮淪。是夕燈下編訂明史文苑列傳挑燈檢點經年事。多愧蘭臺筆札新。

常山峪行宮蒙賜佛手柑恭紀

佳實曾陳玉案傍。冰瓷擎出沐恩光。賜從紫塞風霜老。貢自炎天道路長。名美竝標僊掌秀。色深遙映御衣黃。縹囊什襲歸裝穩。畱對秋花共晚香。

題陸芑洲寒山舊廬圖用張文端公韻

蒼煙古木宋林邱。傳為韓平原南園故址四十年前紀舊遊。予於壬辰癸巳間過此入夜泉聲清到枕。隔城山色近當樓。石間句好苔紋護。洞口雲濃樹杪流。山上為紫陽洞此日天隨為地主。鶯花一洗向時愁。

王峻

字次山。常熟人。雍正二年進士。官至監察御史。有良齋集。

蒲褐山房詩話先生居壺中義形于色遇事敢言常劾其臺長時以為當故雷副憲貫一序其詩文謂議論侃侃直言天下事指此也謝病歸為蘇州紫陽書院院長巡撫宗室雅公蔚文小有過舉必面折之蓋自來院長所罕見也其詩宗尚兩馮參以趙秋谷何義門之說不獨前後七子深加揅斥即漁洋尙書亦多未愜然集中黔行詩最為清矯刻削轉似蜀道集何也

舟中望江岸石壁書所見

絕壁插江濱。瞰臨幾百丈。舟行過其下。人語山峇響。石門鬪玲瓏。洞穴赫宏敞。俯探魂已驚。仰睇神俱蕩。忽看崖隙間。結構絕人想。架空木縱橫。插罅椽三兩。連延綴蜂房。漂搖冒蛛網。鳥飛不可過。躋攀何以上。舟人頻指點。使我彌愴怳。云昔吳逆時。居民苦擾攘。相攜逃此中。不爾罹賊黨。聞言轉愀然。前行去沈澆。

斗狼箐

斗狼高插霄。萬木蒙龍蔽。循途繞山麓。壁暗天無霽。輿夫喘不前。號呼兩繩曳。盤紆至山腰。身已入雲際。四觀所經山。帖地皆瑣細。是時煙雨中。寒帷試一睇。灌木不知名。山花開自麗。芭蕉葉拂衣。翠竹陰交翳。羣猿競來窺。野雉止不逝。行行造其巔。惜哉難整息。蠻荒故多奇。天地亦護閉。此方山更雄。物產佐國計。丹黃及鉛鐵。採取有定制。而此深箐中。材木衆仰濟。自來阻幽險。兼以畏瘴癘。一朝成大路。見者恣芟薙。我知十年後。山童地且敝。感此遂成詩。山靈庶相契。

雨中過大小斗狼箐

小斗狼箐七八折。大斗狼路更險絕。蜿蜒十里幾十盤。關索雞公敢齊列。蒙龍萬樹翳天日。釀雨蒸雲失秋烈。人從天半下林杪。欲畱不能氣鬱結。平看對面山萬重。如瞰如飛鬪截竄。我行半日雨已收。忽衝雲脚又噴泄。輿夫躑躅倩人助。泥滑兼之石凹凸。况逢大水當路臥。性命須臾懼傾跌。山下居民三四家。伐

薪採綻衣破裂。行人再過不勝愁。全家來此一何拙。嗟哉苦樂天難均。蓼蟲食辛味亦別。

哭歸安吳奉常房師

難將黑水洗沉冤。萬里層冰慘鬼門。魍魅有知應下淚。文章無地與招魂。名高至竟爲身累。爵重誰能丐主恩。望斷尙陽堡外路。幾時歸櫬赦虞翻。

李重華

字實君。號玉洲。吳江人。雍正二年進士。官編修。有正一齋集。

蒲芻山房詩話。吳江詩家百餘年來。苦無傑作。先生筆力嶄然。滔滔自運。其宗法蓋在杜韓間。時吳縣蔣恭棊編修。工古文。而先生以詩名。兩者莫能軒輊也。先生諸子。皆能讀書。登仕路。而詩文未有收拾者。僅存此編。棊木亦久朽蝨矣。

道古四首

嬴氏尙督責。好用韓非言。不知吃公子。乃伏亡秦根。其身則已斃。其說旋以尊。良由嗜殺身。理勿使久存。岐周積仁義。箕疇助其源。奚獨且詭謀。亮弼貽後昆。維韓闢申商。毒甚燎火燔。追咎道德家。伯陽寧非冤。子長憤著書。論或憑胸臆。殷勤表素王。已足稱神識。時方貴黃老。經術尙剝蝕。卓然仰高山。先路導其惑。駢羅七十賢。附聖爲羽翼。遂使絃誦堂。崇祀盛軌則。我嗟衛道人。曾未預配食。盲左旣酬功。腐遷何愧色。俗儒矜奧博。凌雜徒記醜。我思鄭康成。迺得稱富有。窮經蒼翠說。羅列燦星斗。微言或有待。大義誠悉剖。



隱耀避時屯。侯伯不得友。悠然通德居。書帶映窗牖。陋彼馬季長。朱戶竟俯首。回賜不名官。斯言能道否。  
濂溪岡太極。發緒由希夷。正類洙泗傳。柱下亦我資。和彼容哲人。妙契超言思。早歲輒聞道。聖域可等期。  
傳心不在圖。聊復意擬之。微言吐精蘊。迺配繫易詞。斯人開閩洛。功績孔與姬。太元與元苞。何獨蠡測爲。

### 劍閣

我行閱雄關。天險殆無敵。迢遙來一髮。突兀遏重壁。橫排十萬劍。豁罅不盈尺。都無客土附。而惣精鐵積。  
其巔鬱叢箐。其底亂深射。烏兔讓飛走。蛟螭避堂宅。入門循地隧。雙峽亘而窄。左作長鯨掀。右類巨鼉擲。  
雷轟混斧鑿。雲蔚隨縷脉。迴風驟長驅。霜氣砭領脊。洪荒想胚胎。元氣更併迫。倘非僊掌排。亦屬應龍割。  
五丁力不逮。渠能萬靈役。殘山通仄狹。甬險藉控搃。誰知徒長奸。據竊逞荷戟。炎漢固殊類。偏安吾所惜。  
子陽先覆轍。王孟後接蹟。稱帝旋洞胸。降王遞銜壁。何況獻賊流。蝮蝎恣毒螫。張牙縱狂嚙。摧髮終寸磔。  
伊昔影敵初。人煙莽蕭索。生息今百年。犁闢連萬陌。文翁兼詰戎。武鄉兼教澤。遼絕若番藏。倏瞬達重譯。  
而此枕席安。號渙誰壅隔。地利分險夷。皇圖觀順逆。磨崖奮如椽。申命誠梁益。

### 五丁關

頑山積精銑。屏亘斷無路。旁崖暗潺湲。壘罅不可度。摩天大斧劈。霆迅裂扁鋼。至今龍鱗文。刻畫筋脉露。  
長蛇爾何物。詐誘致頽仆。得毋山精靈。幻化泄餘怒。二帝鑿混沌。七日迺物故。五丁頗相類。事與天地忤。

吾聞昔僊人。移山如縱步。造化可迴斡。猛奪何足慕。

孟冬遊草橋積花軒得澤字

遙情緬西山。近憩憶南陌。相期有素心。卽事互招客。氣候涉初冬。煙景異疇昔。折葦芸以黃。滄溪澹而碧。松門披窅窳。竹牖睇虛白。沿洄稍通渠。點綴頗疊石。長風遞寒條。落葉冒行蹟。始悟三春時。實見萬卉積。鄰園富花房。煖窖坎地脉。駢莖轉蔥蒨。吐穎彌悅澤。翻憐種植翁。坐令寒暑易。天香自供養。元化存肘腋。茲遊忘賓主。酣燕任狼藉。射覆笑先登。藏鈎戲相厄。開懷試清吟。佳興勿虛擲。

送徐編修激齋冊使琉球

人言地缺東南陬。羣川萬派爭歸流。譚天誌怪寓言耳。寧知地體圓如球。中華正居赤道北。列宿照耀分齊州。河環嶽匝限大海。人文道化雄千秋。奇肱鑿齒候朝貢。歸往大國爲綴旒。扶桑之西地以萬。盡控絕島如萍浮。吾皇手啟天地鑰。八紘六幕綱維周。揆文奮武四十載。西北小蠢指掌收。乾端坤倪順迴斡。火淵冰海匪遐修。帝言覆載悉寓下。來王待冊惟琉球。嘉汝有才冠詞館。其副大使敷鴻猷。玉棠崇班一品服。顏如渥赭鬚髯蚪。牙旗畫鼓駭溟渤。大官餞飲擁上游。桅高百尺颿六道。柁以鐵力沙棠舟。百靈開明萬怪伏。禽魚翔泳隨權謳。白洋橫分亘其腹。上看南極當船頭。珊瑚瑋瑁作海底。幻化五色光通幽。中山居民共雷抃。盟心望拜依神州。窮歡極讌坐宮殿。炮脰異族臚珍饈。飽求詞賦乞書翰。星斗燦爛龍蟠膠。

鑄之屏風刺弓韞。寶玩萬祀英名畱。此行何止使不辱。神人坐致懷且柔。宣威播澤報天子。乘槎漢客安能儔。遄歸更作寰海誌。他年考据當九邱。

小花山

一徑縈丹壑。千松入翠霞。人歸衆香域。山是妙蓮花。竹外春風定。廊邊白日斜。步來幽意愜。延坐拓窗紗。

寄席對揚并謝鈔書見寄

經時相望渺雲煙。標格英華世孰先。楊柳當年張散騎。芙蓉初日謝臨川。虞山風雅空前輩。婁水芳華見別傳。梅村係外曾祖聞說異書將寄與。裝成何止玉爲篇。

過居庸

太行東鶩正迴環。界截燕雲是此間。九土橫分雄地軸。三邊總會扼天關。羽書報捷風雷迅。戍卒承平日月閒。此去漠南皆枕席。馬啼思踏賀蘭山。

綏德州

全秦北戶勢嵯峨。韓范經營舊不磨。橫嶺千重遮絕塞。孤城三面繞長河。雲開古戍烽煙息。霜落秋原禾黍多。翻笑畫疆分控日。枉令西夏擁瑯戈。

湖天雜興

志和僊去杏忘歸。依舊青山擁釣磯。但隔斜風兼細雨。柳條如颺綠蓑衣。  
晚洲漁笛裊纖音。颯颯蘋風動遠林。無限亂雲飛忽盡。洞庭空翠落湖心。  
自趁溪雲撥小船。沿河幾度宿湖天。爛銀沙尾醉明月。有夢不離鷗鷺邊。  
斷渚平沙淨渺然。酒旗寒映晚炊煙。分明滿幅營邱畫。畫出江南欲雪天。

### 劉統勳

字延清。號爾鈍。諸城人。雍正二年進士。官至東閣大學士。卒贈太傅。諡文正。

蒲褐山房詩話。公光明正直。燭照先幾。事之可否。微發其端。至一二十年後。始服其精識。士有賢不肖。亦洞見其將來。不可得而親。亦不可得而疎也。內外臣工。無不仰其剛果。而情意肫然。不欲過爲嚴峻。生平未嘗奉佛。然於大乘方廣諸經。皆能得其指要。六句以後。入夜秉燭跣跌危坐。至二三更許。窗外偶有聲響。無不悉聞。臨終之日。五更起盥洗飲食如常。升輿至東華門外。與微側家人呼之。不應。比啓帷視之。則已瞑矣。上親臨其喪。見室無長物。內外蕭條。枯槁寒氣襲人。因深爲嘆息。賜諡文正。不待禮臣議諡也。公薨後。今相國石庵先生。以事在記注。功在史成。不誤行狀。不請爲墓。賜諡志。第取所奉諭旨。及生平奏疏。編年繕錄。以示子孫。其謹慎小心。亦後來台輔所當取法者。

### 平金川詩

臣伏見皇帝陛下。御極以來。聲教暨訖。宵翹遂性。猛鷲易形。所謂仁育羣生。義征不諱。四海九州。大順大化者也。西域夷金川土酋莎羅奔。狼卡。忽搆隣釁。不遵吏約。初懷懼罪之心。旋成負固之狀。潛伏阨隘。天討久稽。皇帝命大學士傅恆。親往經略。誅渠奸。破堅壘。刻日獻俘。乞降不允。皇帝特頒恩

諭許其自新。二酋悔罪扞誠。詣營歸命。以六事自贖。經略宣布盛德。受降班師。桴鼓不勞。膚功立奏。蓋敵愾之後軍。猶在中途。而振旅之前旌。已返內地矣。捷聞。晉大學士。傅忠勇公。御製碑文。勒石太學。以昭示無極。慶賀禮成。遐邇歡悅。臣備員禁近。親見指揮。謹撰平定金川詩一篇。以獻。凡千有八十八字。具道聖天子武烈文謨。明良喜起之盛。雖詞遜昔人。而事高往古。傳諸簡冊。庶以揚扞我國。家赫聲濯靈於萬一焉爾。其詩曰。

皇臨六幕。赫赫明明。陽開陰闔。秋攀春萌。有遠而賓。無疆弗庭。孰恃蓬質。以扞大刑。西南絕微。下豁高峭。踰躪映咽。兔窟蟻封。泳沫遐闔。以長以生。跳踉自適。乃忘其形。狼奔豕突。厥隣是驚。彼羸弗支。籲我尉候。選隸授兵。往訶往救。不卽厥糜。翻駭而鬪。負嵎誰嬰。虞人避獸。螳臂已揚。懼弗蒙宥。磨礪芟爪。包藏雞鷄。巨網空恢。神椎莫透。時曠功稽。師勤將逗。惟皇遠覽。誕降天誅。謂叛無小。在梗斯鋤。非懲而舍。頑則莫渝。爰究爰度。運此鈐樞。曰子股肱。汝宏遠謨。汝往徯克。汝遂相予。虎賁汝從。錫汝彤弧。左右文武。敦南之符。月在甲子。三日癸丑。建旄設施。良辰是取。于塞于郊。來桓來糾。天子位止。羣公先後。乘以訾黃。酌以大斗。虎步龍驤。相拜稽首。載抗威稜。來歸非久。爰集禁旅。禁旅庵庵。長轂雷野。高鋒隳雲。八方散彩。揚光飛文。讚列偏裨。纘朗紛紜。爰召勁卒。目我邊屯。卷甲東來。如育如賁。威險秋霜。氣挾春溫。攬淚執猛。動若焚輪。相臣率止。是用大誠。倩洌戈鋌。焜燿旗旆。度險如夷。颺驅電邁。乃越我疆。乃臨彼界。乃訓諸司。我營我隊。

有蹶其輿。孰遨以怠。乃討軍實。我卒我械。有淬其鋒。孰竄以壞。彼焰孰煽。孰誘孰和。廁我戎行。敢爲詐訛。眇睠治夷。日測則叵。旣駢而誅。乃絕盜囹。蔡莽葳蕤。岳厓嵒峨。倚依歛碕。壘石是窩。龜縮蛇伸。蜂房螿窠。霆擊山鳴。堅摧峻燧。外潰以犇。中慄而掉。彼氣斯隄。我勇聿稟。涉躡蒙龍。騰凌翫翫。陣相孤虛。軍環粟兆。白羽蜚葦。赤輪響爆。羈帶賜睽。僮束蹠蹠。何阻不踰。何幽不竅。旣選摧鋒。將移大纛。匪枝匪梧。無寧盡劉。笞痛而警。惟生是求。負殼藏踪。遣訶咿嚶。待命孔殫。如魚挂鈎。相曰非誠。矧乃重尤。旦夕爾俘。奚慙是匪。惟爾探威。戕隣樹仇。我仆爾梟。用綏彼柔。草檮師中。達於帝聽。請覆其巢。請訖其命。無俾遺育。以狃不共。弋取其穴。孰云可縱。相厥山川。審茲涂徑。簡銳而往。算則有勝。無我費畱。勞瘁我衆。三旬曷淹。一鼓斯定。皇容有侑。顧瞻咨嗟。予怒狂醒。子閔窮呀。弗赦弗圖。具燼於燬。曾是穀觶。而斧鑕加。予惟安人。非武節誇。予奉慈音。是訓是嘉。汝其端歸。有競鼓笳。息乃鷹揚。來相予家。相布皇言。風行汗渙。貸彼游魂。許以革面。凡我三軍。勿虓勿悍。式和爾容。歸承帝眷。有憬之魁。跂行闔現。魚瞰雞睨。出於笠圈。侏僂睽睽。有辭有獻。喜溢斯陶。恠餘猶顛。虎臣矯矯。提攜以來。取道彼衝。靡慮靡猜。翼從馳驅。結束鞞鞞。翊翊蠅蠅。雀躍兒哇。造於中權。膝屈額墮。戴寶銜盟。牽牲薦鬯。感發漣沍。悔深歎唉。六約有嚴。敢乞相裁。相曰來前。爾無怖苦。皇有恩言。弛爾罪罟。爾田爾宅。爾族爾聚。爾約我聞。我弗貨取。賜以鏹帛。啖以酒脯。舍之軍中。始焉圍圍。少旋而舒。觀其蹈舞。乃告成功。班師振旅。振旅鞦韆。露布以傳。皇曰休哉。錫福汝駢。疏爵酬庸。庸自相先。

豹尾雙綏衣。袞圭桓。相拜稽首。天子萬年。稱賀論功。歌詩肆筵。祇謁寢陵。明禮用虔。樹石成均。既磨既鐫。磨鐫伊何。惟皇有作。如日斯光。如天斯大。炳燿鏗鏘。詩書莫過。神武宏昭。聖文遠播。百爾賡颺。載歌載賀。五色相宣。八音迭和。盈耳洋洋。飛騰蕩箴。頌我皇猷。美我良佐。佐聖以薰。膺力方剛。爲元爲愷。爲召爲方。既定遐陬。思日贊襄。獻壽慈寧。菲祿穰穰。大孝尊親。徽號用彰。靈契神符。寫奕鴻龐。聲殷地紘。輝燭天閭。式於九圍。億載無疆。

題澄懷園八友圖

久結金蘭契。同殷翊贊心。勤拳分講席。蕭灑共芳林。煙樹瀛洲景。風篁韶護音。西園圖雅集。應遜此高深。自顧成荒落。名賢比屋居。月川晴理棹。花塢夜攤書。分袂趨華省。鳴珂到直廬。不須論主客。泉石列簪裾。

陳浩

字子瀾。昌平人。雍正二年進士。官至少詹事。有南游草。

蒲褐山房詩話。先生少日。盡聲詞館。與趙副憲大鯨。李編修重華。諸賢善錦齊名。其子戶部君本忠。與余鄉試同年。故入京晉謁。先生以子弟畜之。生平兼工書法。得蘇文忠墨妙。爲余書者最多。四十年來。遷徙遺失。僅存一册。蓋壬申春典試南行所作也。戶部兄弟皆早歿。詩稿不傳。而都下亦無知其工書者。

飛來峰

衆山環兩湖。皆以淡而妙。茲峰獨怪奇。壁立聳羣峭。梯空臂難引。吹籟穴能嘯。青蒼盤松檜。瑣細雜羅薦。

其下爲冷泉。鬪石恣騰越。有亭翼然臨。俛仰便登眺。旁尋得洞戶。深入窮窈窕。直穿山腹行。上徹天光照。誰參造化工。鑿破混沌竅。自古名飛來。此說或非剽。天欲壯此湖。靈鷲分半嶠。至今騫翥勢。猶見神尾掉。將老獲斯游。俗病冀可療。徐步下山橋。溪花向人笑。

周立厓侍御以所刻坡翁書清虛堂雪詩見寄卽次韻題卷尾

坡公眼空恆河沙。下視凡筆如蜂衙。偶然對雪揮醉墨。十指拂拂飛天花。豪情奇氣兩鬱勃。杜韓顏李同一家。神呵鬼護七百載。墨采照耀金輪雅。立厓侍御有古癖。欲爲藝苑畱瓊葩。搦成新刻遠寄我。見之技癢不可爬。我嗜公書嘗苦學。如飢思食渴飲茶。梁園寒夜百展玩。不覺漏鼓聞三撾。臨池那無千挺墨。惜哉老矣空吁嗟。清虛之堂在何許。栢臺雪照霜天霞。

渡揚子江

瓜步潮初落。春颿趁曉風。雪消江草碧。日上海雲紅。重鎮依天慙。中流起梵宮。濟川吾老矣。倚棹興無窮。

山陰舟夜

客行初入越。恍似鏡中游。風月來清夜。溪山送小舟。翠攢寒竹淨。香動早梅幽。已近齋居日。忘機對暝鷗。

遊蘭亭

晉代羣賢蹟。風流宛在茲。欲尋修禊事。不待暮春時。古色看修竹。清流到墨池。行廚知有酒。先酌右軍詞。



嚴遂成

字松瞻。號海珊。烏程人。雍正二年進士。官嵩明州知州。有海珊詩鈔。

馬文毅公彙草辯疑書後

入獄集少陵手書詩二百。從容赴柴市。千秋弔信國。

文山在獄中曾集杜詩二百音

馬公曠代起。蒙難究心畫。疑辯信乃

堅。守臣當死職。引脰絕粒時。蒼萃十二册。異同晰秋毫。一字一箋釋。侍姬亦斌媚。楷法淚痕積。闔門無吹火。燐青鬼其宅。遺書誰護持。裝池述祖德。幽囚緬四載。展卷我心惻。此筆如卓笏。生擊朱泚賊。此墨尚流血。溼漉稽紹軾。同時范忠貞。淋漓炭畫壁。閩粵遙相望。對勒平原石。

遊蘇門山百泉出此山下

蘇門山。痺隘。濯濯無顏色。孫登鸞鳳嘯。縹緲霧空碧。風雨颯中天。百獸爲之匿。臨眺動羣疑。虛名若浪得。而我不謂然。闌微貴撫實。此山空其中。上上下下則石。萬竅搜天根。一綫貫地脉。靈氣縈繞之。源源通不塞。運濟衛河流。濫觴罅縫坼。其功助灌溉。其害謝沖激。倒浸玻璃屏。山固兼水德。嗒然不自明。惘惘道用默。受侮於目論。甄藻賴寶識。朗朗見山心。白雲澹夷懌。清輝閣名良復佳。試泊張融宅。

高梁洞上灘

萬山建瓴水。直下勢懸瀾。而故屈折之。拗怒毒愈厚。呀然立洞門。夾束氣不透。穿罅鳴鳴箭。殷空牛吼吼。

濤春堆疊雪。流撇蹴衆纒。船尾如曳龜。船頭仰舒味。鏗然不受篙。支左先誦右。中心起鐔鏢。大聲呼疾救。跳珠溼滿身。手與霹靂鬪。負素腰環環。邪許聲應候。宋鶴防退飛。吳象忌反走。蟻旋磨出險。喃喃口詛咒。不敢問前灘。憊矣矧多又。

易門水城爲黃春齋明府題 易門因山爲城小而孤大龍泉環之而山上無水昔苗攻城必過泉使內坐困明季王公國勳始於西門爲重關水從地道入爲備禦計

眷齊明府今重修之民並祠焉

平川浩如海。中央倅佛髻。高八九仞餘。圍以三里計。城削趾爲墻。雉堞齊塔砌。上無多屋宇。下山憊水遞。仰維大龍泉。長流易灌溉。苗民數構患。長圍規便利。土斷徙其流。喝者坐待斃。經始明王公。諱國重關峙大礪引脈使暗通。濫觴竅溥沸。歲久石頽圯。修築君善繼。居安思預防。內捍釋外懼。昔聞漢將營。揚水敵退避。宋臣鑿清澗。深觀井養義。一水之有無。攻守所關繫。用敢勒此銘。報公祠永慰。

紀石樓令袁梅谷瘞燭樓事 石樓古屬地崇禎四年闖匪渡河入劇屠剽距今百有餘年矣庚戌夏署西北隅忽露一枯燭樓掘之麟次飾比斷鐵剝缺爰瘞之義家 旁勒石歲奉祀弗絕焉余既嘉其事又重悲乎死者之姓名湮沒不可考要皆生不辱於賊而死則碧血一抔何莫非勝國之勇夫義婦也詩以弔之

晉封夷吾地。迺今石樓縣。縣小山爲城。居民苦逃竄。石田廢春耕。土穴斷朝饔。隔河近米脂。劇賊首發難。吹唇兵搜牢。獻馘築京觀。百年槎牙級。癘疠漬刀箭。是皆恥生降。忍死就塗炭。女不受賊污。男不受賊亂。中宵風月黑。啾啾聲達旦。里居旣蕩析。子孫亦糜爛。誰復與招魂。春秋澆麥飯。袁君莅茲土。撫循法稱善。

餘波澤枯骨。幽魂雪煩怨。朱囊白木柙。榮附義塚畔。而我想當時。賊勢遠博戰。出入河南北。晚登未央殿。淋漓人油炸。流毒天下遍。安得百袁君。遂爾首邱願。鬼亦異遭逢。望空發遙嘆。

### 飛雲巖

天公切石如切泥。搏之挽之分刀圭。亦復琢雲如琢玉。巧匠雕鏤納山腹。呀然一口中穿空。其下湧綿壁。絮蝶髻何蓬鬆。鍾乳滴成石變相。鱗鬣森動雷而風。咸與雲氣相追從。當前矗立太華蓮花峰。儼如三島浮自海上蓬萊宮。傳聞巖性忌不潔。往往呼泉一洗滌。官中那有清淨身。杉槽漆斛名無實。既來未使太匆匆。滿飲僧茶消水厄。

### 由坡貢之郎岱

望遠峨峨冠切漢。衣襟霞舉天之半。經宿崎嶇日已迷。雲烟各自開生面。一峰曠近若舊識。乃是三日前所見。以身盤磨蟻穿珠。左縈右拂香爐篆。高履星行下窺井。轉眼之間凡幾變。區田隨勢列等差。如規曲尺如畫線。什什伍伍不成村。殘梨在樹落微霰。風無定所歷亂來。畫眉聲碎彈翎怨。

### 渡盤江

盤江源出金沙江。自烏撒入懸奔瀧。踰二千里流益怒。影砂礮石以力扛。尸浮鼈令不知數。天塹畫斷蠻夷邦。始焉貫絙三十六。兩崖雲棧橫空絡。有風撓之鐵則鳴。人到中央濤浪作。後來改制橋落成。巨材排

比雁齒生。銳頭而上。牛鬪角。大鵬背橫空行。轉以板屋夾欄橋。琳宮梵宇交回縈。積日累月計程度。鬼神助役工非輕。豈知迤西有僻路。舍易就難前事誤。花河拿鮮<sub>名地</sub>。黃草壩。赴滇較近日無睹。直從莊蹻至於今。地老天荒屨鏹固。偉人帝錫勦奇功。屹然坊建西林渡。江寬尋丈水安流。昔遁新獲罔用泐。陰平間道取鄧艾。盧龍絕塞規田疇。鼉鼉爲梁烏鵲駕。遜此平版來夷猶。省水衡錢民利涉。棹歌一曲飛輕鷗。

蔣別駕芝岡招同費副使懷谷戴孝廉開成上舍光林遊陸氏水木明瑟園二首

十畝無多地。到來如許寬。池深魚氣靜。樹密鳥聲歡。淺碧侵琴薦。輕陰護藥欄。小長蘆去後。山翠至今寒。乞與天隨子。此間銷夏宜。堂虛雲不去。山近雨先知。種竹新成个。浮蘋亂吐絲。便無花亦好。况遇有花時。

常山旅夜

江館雲陰合。青燈耿夜闌。櫓聲離岸小。山氣壓城寒。樹老鴉棲穩。泉枯鹿飲乾。草坪<sub>離常山四十里。與玉山交界。</sub>明日路。細雨濕征鞍。

楊州春日

竹西自古繁華地。况是風光九十天。紅杏一枝春店雨。玉笙三疊夜樓烟。隔江燈影迷歌館。吹岸衣香過酒船。好夢撩人歸未得。拂城楊柳亂啼鶯。

宿許天植見山樓

綠樹疎燈落燼遲。夢醒如中薄寒時。風通花氣全歸枕。月轉樓陰倒入池。如此夜深猶有笛。可因春盡竟無詩。開門便赴尋山約。酒熟茶香短簿祠。

### 蔡忠襄公祠

飛度黃河勢已成。但憑一掌守孤城。三千兵帶飢寒色。百二關傳慟哭聲。報國不能生殺賊。殉君何用死留名。遺祠蕭颯橫汾曲。夜夜泉飛白鶴鳴。公諱時。山泉忽飛出。白鶴繞墓。

紀俺荅款寒事懷明王襄毅公二首。余分修山西通志。見俺荅屢入寇。前後死二百餘萬人。自襄沒也。不可沒也。

城郭豐州帝制雄。鈞聯三鎮潰雲中。唇吹石勒瀉蕪嶺。血浴高歡避暑宮。奇貨歸來和始定。名經請去貢長通。和臣新鄭江陵主議民休息。宋事虛徵葉夢熊。

不信漁陽突騎麤。連年膽落鐵浮圖。奇功忽逸桃松寨。小勝惟誇苜蓿湖。海若何心邀祭典。闕氏有手握兵符。西方以次皆歸款。衣賜紅獅老把都。事詳韃靼傳。

### 曲峪鎮遠眺時西睡方用兵

地近邊秋殺氣生。朔風獵獵馬悲鳴。鷓鴣盤大漠寒無影。冰裂長河夜有聲。白草衰如征髮短。黃沙積與陣雲平。洗兵一雨紅燈溼。羊角魀魚燧火明。前明邊墩掛紅燈其上。魀魚皮爲之。膠以羊角。雨溼不壞。

三垂岡

英雄立馬起沙陀。柰此朱梁跋扈何。隻手難扶唐社稷。連城且擁晉山河。風雲帳下奇兒在。鼓角燈前老淚多。蕭瑟三垂岡畔路。至今人唱百年歌。

姚礪圃徵士

聽斷蓮塘夜雨聲。與從兄惹田同居友善歸遲只爲啖虛名。才華見許盧思道。規矩難繩禰正平。珠帕簪花三館夢。錦衣泣月十年情。在禮館最久。替上三中副車。洞庭葉落秋將老。渺渺愁予與目成。銓掣長沙二尹。將行丁內艱。

秋夜投止山家

山當面立路疑窮。轉過灣來四望通。涼月滿樓人在水。遠烟着地樹浮空。熊羆之狀乃奇石。鶴鶴有聲如老翁。清福此間殊不乏。可容招隱桂花叢。

齊尙書秦黃學士子澄

龍虎山高北燕翔。兵聲藉口罪齊黃。忍因發難誅量錯。恃以成功相李綱。一死報君猶氣節。兩人誤國共文章。齊順天鄉試第一。黃會試廷試皆第一。與齊同榜。金川門啟宮中火。漫指西南路渺茫。

史閣部可法

鼓聲鈴閣夜驚眠。縞素孤臣茗飲年。一死平生文信國。千秋奏議陸忠宣。國殤有母呼遼鶴。家祭無兒拜

杜鵑淚灑隔江埋骨處。梅花斑竹黯春烟。

穎橋弔李元禮墓

碧血千年化水濱。回天力盡遂亡身。知臨虎穴櫻常侍。忍仆龍門負黨人。覆轍可堪尋白馬。禍胎竟至釀黃巾。東林亦造同文獄。漢碣摩挲重愴神。

宿江城晨起卽事

江城鼓歇一燈懸。竹葉春宜城酒名寒飲少眠。涼笛生於無月夜。曉鶯啼及未花天。水邊魚氣濛濛霧。樓外山光澹澹烟。試問白銅鞮唱罷。近來可有弄珠僊。

武定城望獅山龍隱庵

佛火空山照眼明。黔東庵亦白雲生。頻煩中使齋香出。可許亡人托鉢行。郵典未傳程濟論。南渡郵典。道錄。王午難。臣頗濫。無程經科不載仲彬名。致身錄言。仲彬以明經廷試。考科貢中無名。先公人晉身遄死。賴有長陵實錄成。先司空死。事澤州。見成祖實錄。

由水坪宿尋甸與額觀文明府夜話

滿林霜果落繽紛。二月花紅正夕曛。山與雲依相慰藉。水因石阻得聲聞。兵鋒險道窺南戶。戍火嚴城駐北軍。容易時清君坐嘯。當年滇蜀此平分。東昭二府。昔隸於蜀州。固滇北戶也。烏蒙出沒。戰守時聞。至雍正九年始定。

李後主

番歌一去更誰聽。天寶遺音滿後庭。烟氣暗生嬰玉鼎。花光深覆皂羅屏。只嫌擗雪無仙爪。不信量絲有釣舲。昨夜柔儀殿名鐘漏永。秋風簾押振金鈴。

贈沈樗崖

諱廷瑞字兆符宣城人善山水祖壽民以諸生疏論樗嗣昌爲東林黨魁

白雲長護在山泉。與世相遺老可憐。黨論舊傳元祐籍。門風私記義熙年。蓬萊東海三間屋。薇蕨西山一稜田。生業算來無長物。摩挲粉本更潸然。

題介白亭

逸亭三面水如烟。好是霏微釀雨天。滿袖蘋香將不去。夜涼輸與鷺鷥眠。

吳門客寓友人餉鮮荔枝

羅襦白玉出新妝。不數人間十八娘。四百紅欄今夜笛。月明吹滿荔枝香。荔枝香曲名

聞墨莊主人吹笛

金陵人時寓天雄僧舍

一聲入破決雲層。蕭寺閑愁寄老僧。彷彿秦淮人定後。月明如水滿船燈。



# 湖海詩傳卷四

張元

字殿傳號榆邨。淄川人。雍正四年鄉試第一。有綠筠軒詩集。

## 登石門

靈境闕礪曲。幽尋及春晝。犖角屢環轉。險仄逼遷就。危徑緣纖毫。梯空得奇構。珠龕藏崖竅。鍾乳滴巖竇。丹嶂劃開豁。虬松蟠烟岫。日射冰池明。翠染石花繡。傾盃倚谿筇。幽鳥鳴相侑。天風吹白雲。散亂霑襟袖。山深谷風寒。樹密嵐光逗。冷然洗塵氛。曠焉小宇宙。暮靄脩廻合。森沉夕陽瘦。淨業信難留。勝遊尙可又。夙懷託言詠。終期訪靈鷲。

## 遊冶源

風日藹明霽。策杖探幽境。冶源鬱奇秀。言遵溪路永。曲徑趁逶迤。峭壁緣青冥。連林杳陰翳。篠簌叢千頃。岸曲春水環。亭高遠山屏。紛吾快流覽。垂綸思舴舨。樽酒煩主人。坐對檀欒影。山風倏然來。珮環響幽冷。森爽淡俗緣。蕭寂發深省。眇焉懷昔賢。韻與平泉等。遺編夙湖洲。勝地復略領。盤礴情未極。夕陽已沉嶺。莫惜歸路遙。吾意愛孤迥。

白雲山歌

白雲之山連雲起。單椒直入蒼冥間。雲來雲去時滅沒。嵐光蕩漾青烟鬢。倚天拔地五千仞。背臨絕壑根。紆蟠清泉一線迸。石罅虬松高下籠琤潺。松迴溪轉數隱見。幾家村落臨烟巒。我來習靜借棲託。恨不馭氣騰飛翰。是時空山過微雨。松濤浮翠溪生瀾。穿林沿岸事登頓。風翻涼露霑衣繁。陰崖一徑垂纖縷。捫蘿附葛攀巘岼。雲竇嵌空劖疊嶂。石溜清冷凝晶盤。巖窮路絕壁面削。卻下澗底嗟險艱。仰見東南垂鳥道。拾級蹶躄腰腳酸。徑轉山南更西去。峯腰橫截珠宮攢。浮金炫碧啓象教。一聲清磬飄梅檀。梯空百折凌巔頂。崢嶸傑閣開金鑾。上帝高居御羣品。雲旗絳節排千官。瞻拜出門莽四顧。凌臨頓覺天宇寬。恍惚疑有仙人至。或乘白鶴騎青鸞。雲中笑語頻招手。遣我滿把黃金丹。但餐一粒縱超越。雲璈霞佩聲珊珊。安能跼蹐溷塵埃。坐令白髮凋朱顏。丹臺玉室無消息。仰天悵望憐緣慳。歸來茆屋卷書坐。松風流水空灣環。

華不注道中懷邊華泉先生

華泉在華不注下。先生墓直其南數里。

歷下稱詩宿。尙書沈杜儔。敦盤分北地。宗派啓東州。墓道風煙斷。華泉蘆荻秋。遺文傳海岱。永賴砥橫流。

韓倉道中懷李滄溟先生

落日韓倉道。懷賢慘客顏。詩名猶白雪。墟里但青山。七子琴樽冷。千秋林壑閒。惟餘幽澗水。日夜送潺湲。

蔡德晉

字宸錫。無錫人。雍正四年舉人。官工部司務。

蒲褐山房詩話宸錫先生精通三禮。常分門別類。以次相差。採綴鉤貫。凡五十餘冊。功未竟而歿。秦文恭公少與同學。得其本而增修之。證以歷朝史事。補以宋元諸儒之說。今所傳五禮通考。雖續健庵尚書讀禮通考之遺。實則據先生書為藍本。今其書割裂之餘。無有存者。詩亦非所長。今存一首。而附記其經學之淵深如此。

望鄉

龍山蒼翠正當樓。水上芙蓉一帶秋。雲樹不須遮望眼。夢中人在木蘭舟。

鄒一桂

字元褒。號小山。無錫人。雍正五年進士。官至禮部侍郎。卒贈尚書。有小山詩鈔。

天柱縣登樓

喜得齊雲倚石開。不愁前路有崔嵬。何人便說南天柱。我亦蓬山頂上來。

彭啓豐

字翰文。號芝庭。長洲人。雍正五年殿試第一人。及第。官至兵部尚書。有芝庭詩藁。

蒲褐山房詩話芝庭尚書。以醇德樸行。著于朝野。而性耽風雅。使節所至。遇佳山水。必游歷。乃去集。中句如楊柳春風江上棹。杏花細雨酒家樓。踈風影動林梢月。宿雨涼生檻外山。三徑杜門高士集。扁舟訪舊故人心。漁唱數聲初出港。樵風兩岸送歸船。落月踈星荒店閉。西風鼓角戍樓寒。鐘動遠。沉山店。月林踈。斜颭酒旗風。古壁殘燈明乍暗。空庭落葉掃還多。三秋風雨添良會。五字河梁鐘動遠。

離鶯湖處處多芳草。鹽市家家近畫樓。寫景關情神妙獨到。當世好爲生澀。槎枒者未能津逮也。

折柳行送宮贊錢勉耘同年假還婁東

燕京四月春方暮。柳色青青挂高樹。長條踈地最多情。濃陰遮斷前行路。病裏芳華冉冉過。那堪送別聽驪歌。心憐飛絮隨風舞。目斷高樓夕照多。忽憶江南煙景好。汀洲夾岸迷芳草。繫得蘭橈喚渡遲。泊來野店抽帆早。羨君安穩計歸程。拋卻紅塵步履輕。鱗魚入饌楊梅熟。不用蓴鱸動客情。婁江帶水崑山麓。瀟瀟逆溪田繞花竹。憑君折柳寄相思。東風吹夢江皋綠。

琵琶亭晚眺

臨江臺榭鬱嵯峨。九派潯陽檻外過。帆影微茫銜落照。笛聲幽怨激滄波。天涯易下青衫淚。商舶爭傳白苧歌。待得新涼明月夜。蘆花蕭瑟更如何。

楊柳枝詞和宋玉才韻玉才名樂常熟諸生有雋才早效

白公堤畔年飛綿。三月微陰澹以煙。宛轉肯隨金勒騎。輕盈都上木蘭船。萋迷山店拂澄潭。送別思攀尙未堪。春雨杏花零落盡。一株惆悵在江南。

呂熾

字克昌。臨桂人。雍正五年進士。官至副都御史。

恭和御製新修翰林院落成得見字

文教首蓬瀛。鴻儀今創見。鑿坡楹桷新。瓊榜星雲絢。廳樹麗龍旂。亭波涵雉扇。欣瞻日采臨。特重珠衡眷。雅韻發金聲。華筵羅玉饌。獅儵載拜賡。千古傳詞院。

### 楊錫紱

字方來。號蘭畹。清江人。雍正五年進士。官至漕運總督。諡勤愨。有四知堂集。

蒲褐山房詩話先生清標直節。爲在廷諸老所推。督漕運時。嚴飭沿途。毋需索。毋留滯。又體恤旂丁。以及押運各官。纖埃不染。使得迅速。過行。故數十年來。論漕政者。必舉先生第一。生平不以詩名。而所作清新踈秀。書法亦工。歿後人刻其書以行世。

### 梁王城

寂寞荒榛裏。巋然有舊城。烽烟千古劫。草木萬山兵。壞堞餘殘照。寒鴉落暮聲。年年迴棹處。憑弔不勝情。

### 安東作

近郭河聲怒。沿隄草木多。清宵聞雁鶩。白日走蛟鼉。補救功需亟。瘡痍氣若何。誰膺司牧寄。高臥盼庭柯。

### 夜舟

入夜鍾吾道。微風一葉舟。徐吟遲月上。獨坐看星流。野闊煙無際。波閑釣未收。逝將謀小隱。生事老羊裘。

### 夜意

河木明如練。風帆靜不張。蟲聲經露濕。月影渡波涼。計日秋將半。懷人夜未央。小山看漸近。到及木樨黃。

夕陽

一棹秋風裏。行行又夕陽。還飛鴉影亂。罷舞柳絲黃。客意銜山急。帆陰臥水涼。何人方獨立。覓句向蒼茫。

出臺莊閘作

帆挂秋風葉葉疎。臺莊一望半蓬廬。倦遊客類還飛鳥。出閘舟如脫餌魚。嶺外夕陽銜欲盡。河邊柳葉落還餘。風烟是處供吟興。行到江南想亦如。

七月二十八夜坐

歸帆初卸棹歌停。漠漠涼生草露零。正好夜來無月上。水窻風細數流螢。

螢

風前雨後往來頻。入幔依簾解近人。剛有流光能自照。已忘麩草是前身。

查園

花枝落盡畫簾空。亭角蛛絲半網蟲。只有青蟬仍抱樹。盡情啼到夕陽紅。

楊柳青

五旬風露歷朝昏。尺寸河流日較論。只有海潮循舊約。迎人先已過津門。

天津潮直到楊柳青。

梁詩正

字養仲號薌林錢塘人雍正八年殿試第三人及第官至東閣大學士贈太傅諡文莊有矢音集  
蒲芻山房詩話公居正陽門外楊梅竹斜街內清動堂蓋御賜也堂左有味初齋前隔牆蒲芻樂業  
其齋因以青乳名之公充續文獻通考總裁屬子司編校常宿其齋每日庭戶蕭然自諸司畫諾外  
更無停轍進和御製詩每逢劇韻必蒙嘉獎子異之公曰昔蘇文忠公善次韻每遇艱險處恆以詩  
喻出之是以信手驅駕毫無窒礙吾窺得此祕故後游行自在天然淩泊耳公歸養時與趙意林相  
倡和且手自書之士人以爲祕寶杭董浦  
編修跋云如瑤林玉樹高出雲表洵然

奉敕賦青蓮朵

按南宋德壽宮即今宗陽宮宮中舊有奇石傍石有古梅一株今石僅存上南巡頗拂拭之嗣大吏移送京師賜名曰青蓮朵并紀以詩

蒼涼南渡荒故宮。孤峰削立青芙蓉。薜苔斑駁琳館廢。忽超凡劫歸瀛蓬。花網良嶽不復見。誰念飛來雲  
一片。冷分黛色南屏腰。遠映清瀾西子面。此石經今六百年。窟竅不受神工鐫。卻陋平泉莊裏跡。差肩太  
華峰頭蓮。緬昔梅花石邊吐。石不能言花解語。花殘留影照春風。寂寞相看共媚嫵。即今重荷天睽存。翠  
膚新著摩挲痕。遠致雖非聖主意。珍異何啻瓊瑤琨。昔泐塵埃今苑囿。瓊華島石姿相筵。仇池雪浪詎足  
論。甲乙居然稱去聲。皴瘦一峰窈窕浮烟鬢。明窗淨室當屏顏。同時異物嗟流落。研山筆格空人間。嘉名肇  
錫新詩賞。苑枯頓令殊今曩。不須更憶藍瑛圖。爲種梅花恣供養。

意林同學友屬書賜錦堂記以詩來謝即次元韻

百城擁處擬侯王。鉛槧窮年鬢早蒼。獻賦乍蒙稽古力。待徵命作校書郎。錦頒內府榮儒服。記勒貞珉補

草堂傳語孫曾勤肯搆君恩霑速可能忘。

再疊前韻奉簡意林

烏衣自昔美諸王。秋水遐思葭菼蒼。賸有青編堪補史。意林著有南宋雜事詩。不妨白首未爲郎。說詩客每勞前席。

問字人多到後堂。謂蔡吳興天冠山題咏石刻。贈答卽今成韻事。他年吟社莫相忘。

征衣恭和御製元韻。

聞道長裾不利趨。用昌黎語。況隨行獵歷川塗。短衣佩劍風猶在。見莊子。缺膀從軍制未殊。見唐書高祖紀。已喜跨鞍輕

嬰鑠。不憂舉步礙榛蕪。書生鞭引周旋處。也製征袍與衆俱。

地窰軍士學食皆穴地爲窰。搭釜甑於上以資烹飪。

依山列幔隨疎密。因地爲鑪各淺深。穿穴不須陶冶埴。拾薪端可溉烹鷺。升烟遙結千廬白。移壘空存萬

突黔。漫說風餐兼露饜。自來增減重韜鈴。

奉敕題畫

仿趙孟頫

綠樹濃陰清暑。青山暖翠浮嵐。水閣平開溪北。人家合是江南。

山寺遠鐘未歇。烟村宿靄初收。最是鷗波館外。生平寄興滄洲。



# 孫灝

字載黃。號虛船。錢塘人。雍正八年進士。官至通政使。有道盟齋集。

蒲錫山房詩話：君夙厲清修。兩任屏藩。名望與太倉沈光祿相埒。入爲京卿。以品詣入直上書房。故常隨木蘭秋。獨退直後。歸帳房。遇山泉清潔。必取而煎之。淪以龍井芽茶。招旬山太僕及子並。啜之。雜談經籍。輒以爲常。其清寒幽峭。不異老儒生也。

## 咏撲滿

西京雜記：鄒長倩遺公孫宏撲滿一枚。因寓書示戒曰：撲滿者以土爲器。以蓄錢。具有入竅而無出竅。滿則撲之。土麤物也。錢重貨也。入而不出。積而不散。故撲之。士有聚斂而不能散者。將有撲滿之敗。而可不戒與。云云。唐姚元崇有撲滿賦。

有物工斂財。厥功利搏土。名卑貪夫愛。質陋良冶侮。守口深難窺。吸箕仰有取。六州鑄錢愁。一竅穴金隴。形模偃鼠微。腰腹怒蛙鼓。幣納周景千。瓶投漢銖五。情聯方兄新。筭用姪女數。拄杖看阮孚。繞牀詫夷甫。滿簾笑遺經。長袖比善賈。豈意欵器危。不堪墮甌撫。唾壺缺一朝。玉斗碎終古。混沌鑿忽開。膨脝脹何苦。速刪錢神論。大戒皿蟲蠱。盛滿厲所階。脂膏怨之府。苟懷焚身防。或較噬臍愈。東閣平津侯。西京媚臣祖。故人託諷規。忠告敢傾吐。布被飾清聲。金門踐華廡。廁名兒董儒。發跡羊豕伍。撲滿何心哉。寓言不無補。

## 和陳句山舍人作

湖海詩傳 卷四

五字哦佳句。蕭寥味共嘗。有情惟酒醞。無分是春光。官冷言愁易。鄉遙遣夢長。聯吟謝何遜。枉瘦沈東陽。

### 商盤

字寶意號蒼雨。會稽人。雍正八年進士。官至順寧府知府。有質園詩集。

蒲褐山房詩話寶意胸羅玉筍筆有錦機本以詞林乞爲郡佐久居白下饒有閑情常得趙姬小憐解碧玉連環爲贈易名環姬以中秋夕扁舟載之未幾玉隕關摧悼亡屢賦中如粵影憶簪化翠一眉痕怕見月初三舊居鸚鵡曾呼我斷帶鴛鴦欲付誰錦機未斷繾綿羅幃還留細膩塵誰與修書添半臂欲煩妙筆畫全身皆令人欲喚奈何晚得小東又有句云恐是玉簫償宿債偶從錦瑟感元白蘇醉諸家足以雄跡一世也君美鬢眉善音律衣冠修偉狀如古仙人其出守雲南予輩錢於畢秋帆疎雨樓作古詩五十韻送之又明年予至永昌君已歿於順寧其從姪將謫喪歸略敘生平索爲墓志雖屬稿應之然不得其詳常以爲憾

### 攔江礮

長江如修龍。蜿蜒向東下。庚神不能鎖。其勢實雄霸。天帝勅六丁。挾石爲堰壩。千尋亘縱橫。萬力防傾瀉。赴海得停機。約束勞造化。陽侯謹受命。違則罰無赦。我行秋冬交。水勢殊少謝。圭角露危礮。彷彿虹梁架。百繩挽一舟。有帆安敢駕。長年老解事。快從急溜借。始知天地間。利鈍爭一罅。鎮蹊免險巇。解紛在閒暇。臥看江流安。明鏡光新研。

### 石門

石門最高頂。勢壓列岫低。鑿開一混沌。劃破雙虹蜺。乾連坤忽斷。圓壁方爲圭。至寶謝雕琢。化工呈端倪。

老樹不知年。懸崖安可梯。幽瀑貫其腹。匯成九曲溪。數折入深洞。厥狀如覆瓿。蒼茫出元氣。虧蔽垂憫。石髓凝不消。斑斑青紫泥。惜哉靈秀窟。遠落巒荒西。往者漢昭烈。兵敗於此柄。代移疆索改。圖志無從稽。絕景不沿革。殘碣猶標題。嗟余慕邱壑。抗走窟塵壑。眼明忽睹此。勝刮黃金鏡。閨苑現樓臺。武陵聞犬雞。雲霄若士竦。物論莊生齊。茲游慰夙願。柳標當重攜。

### 東門關

暮陰忽四垂。宵宵日光薄。岌業東門關。勢向馬前落。拔地有千尋。去天無幾握。峰作牛毛皴。路爲犬牙錯。碧澗貫璫瑋。蒼藤挂瓔珞。怪木如老蛟。伸爪肆拏攫。難通漢使車。欲借秦皇鐸。五丁力已勳。知是何人選。在昔高羅司。種類此棲托。舞干文德敷。納土苗民樂。世秦息烽烟。時雍奠疆索。美哉膺膺原。盡屬天朝拓。漸行友人索觀入都近咏賦答

昨歲來潞河。停橈訪吾友。同心托蕙蘭。芬芳真可久。啓詹紀程詩。棄遺輕敝帚。旅人愁善鳴。長者愛忘醜。蟹螯味無多。羊棗嗜亦偶。聊當楚騷讀。如下漢書酒。鍾呂君素聞。何貴乎瓦缶。茫茫塵海中。賞音遇誰某。謠詠蛾斂眉。支離柳生肘。頗思結習除。香雨歸烏有。楊綰常自韜。丁儀求不朽。矜慎與質疑。其意皆可取。方當典學朝。搜羅到林藪。鴻羽漸雲達。魚鱗依左右。曩列供奉班。愧非雅頌手。報國薄詞章。寧須探小酉。此卷不足觀。請君覆醬瓿。含意分袂中。驪駒在門否。

彈子磯

何年巨靈掌。劈開混沌石。神工出自然。皴染淨無跡。嵯峨一卷小。勢與翠峰敵。蒼浮鵬鷲騰。黑覆蛟螭蟄。嵐氣與雲光。深入古潭碧。還丹誰所成。恫恍衆真集。老仙去不回。留此青鸞翼。五乳七星巖。到眼堪一擲。我有邱壑緣。相看似曾識。翠屏宜晚對。金烏忽西匿。擊汰始興江。春流浩無極。

摩天嶺

偉哉挂榜山。本號摩天嶺。象伏與龍蟠。相對爭秀猛。象伏龍蟠兩嶺名上可捫星辰。下或起雷霆。上聲巖石皆俯垂。如木怒生癭。美者雙髻鬢。鬢鬢臨鏡整。其色黝而蒼。不辨黎雲影。全身肆撐拏。元氣結肯綮。不圖絃絃外。乃有此奇景。交州古荒服。久爲中國屏。守者受法疎。天心遂怙怙。特將青蠅蝮。化作干尋綆。用以截華夷。有寇不須警。我朝威德敷。駱越猶鄉井。防邊刁斗嚴。專關貔貅領。鼠害毋他適。鯨貪絕吞并。蠻情久已安。貢道休教梗。茲嶺變康莊。會向昭融請。

除草

柞氏載周官。剪燠乘時候。單子論陳侯。道葑國有疚。矧茲荆棘叢。翁蔚迷昏晝。草竊古所防。何分人與獸。治草通治民。其理當深究。稂莠未完除。嘉禾安得秀。不斷將養奸。姑容卽藏寇。我行礪确間。一望驚紛糅。任昉愛春游。杜甫譏冬狩。身爲司牧官。施設在成就。亦知興與革。從容無取驟。奈此曠土多。墾田勞鏹棧。

倘非無蔓芟。何以施畊耨。燎原眞上策。炎炎功易奏。卽事成短章。晚憩前山墩。

五課詩

棲身十畝。舊學圃農。出守一麾。新逢吏士。至於家塾。每念羣兒。偶當退食。從容各賦。短章勸勉。課分五等。時屬三春。有水曹官閣之吟。無山簡習池之醉。采風行部。正宜治事如家。獨立趨庭。敢信愛民猶子。撫衷自愧。考績何優。用質同人。毋譏拙宦。

課耕

我本舊知農。半生以仕易。常祿雖濫叨。未敢忘民力。治郡首田功。厥土分肥瘠。何種宜高原。何種宜下隰。布穀已頻催。九九犁杷飭。乘茲春令和。相戒毋休息。指日具壺漿。來就畊夫食。

課圃

少陵在西川。菜把園官送。何不勤灌畦。抱此漢陰甕。芋區應候鋤。瓜疇及時種。厥味旨且長。口腹非云縱。堪作王公羞。亦爲賓客供。鄙夫無遠謀。斯意非嘲諷。

課吏

惴惴自無華。古稱廉靜吏。有餘補不足。當以日月計。政或拙催科。心其勞撫字。許丞原未邁。尹公嘗請試。掾屬有通才。瑜不因瑕棄。孤賞出風塵。靜觀屏浮議。托身俯仰間。未可隨同異。廉部告鄉人。二天何足庇。

課士

昌黎在潮陽。子厚居柳州。各將教化著。能轉文風優。熙朝振鐘鼓。遠不遺蠻陬。茲郡雖荒僻。囊序人才收。所學敦本原。經明先行修。懷此希世珍。佇待側席求。太守老腐儒。耽書親校讐。芟芭如問字。載酒元亭遊。

課兒

正月硯凍開。童幼入小學。勗哉紈綺年。沈潛遠浮薄。積墨遺後昆。溫公意有托。我子十齡餘。孫亦非總角。訓課不及時。將成乃翁錯。延師啓東軒。近傍籌邊閣。書長功課了。庭花紅未落。好鳥忽飛來。丁丁動鈴索。此時讀書人。應識讀書樂。

題八蠻進貢圖

李白昔成明堂賦。閣立本繪職貢圖。其朝有位貢有物。篚筐紛錯衣冠殊。誰歟狡獪作此卷。南蠻北貊形貌麤。番部君長偉丈夫。鬪賓纒錦纏其軀。腰間玉具雙滿盧。後有從者走且趨。大秦之獅大宛馬。文犀香象同馳驅。其餘獒雉非一種。迢迢重譯來通衢。異物寧爲天府貴。包茅要是王家須。東鞬西馱紀封禪。元龜翠羽垂史書。丹青雖戲關國典。荒服不至非宏模。我朝御世邁前古。昇平河岳呈苞符。蘇祿梯航歷山海。高昌弟子充生徒。華夷一統大無外。六街雜選聞僑侏。中原自有麟鳳現。萬里禽獸輕錙銖。憶昔侍直披香殿。親睹苑藪游驕虞。作歌作頌揚上瑞。寫生妙手煩曹吳。子牟闕庭久猶戀。師古王會工難摹。君不

見兩階文德今覃敷。勤兵服遠何爲乎。

李猷搏鷹圖引

道君畫鷹擅今古。誰歟匹者宋李猷。今觀此圖洵神異。素練八尺橫高秋。艸枯木落原野曠。鷓鴣累百雖  
縱鞞。此鷹一出振林莽。雙翻未動獐狐愁。爾時何處得此態。毋乃射獵南山頭。雄材絕技散天下。乘勢必  
與風雲謀。廉頗不用枉善飯。李廣已老難封侯。雲臺紀功二十八。就中豈盡揮戈矛。名鷹勇略比名將。氣  
象自異羣鷹儔。國家承平少征戰。田車千乘行苗蒐。此鷹才大必有用。但擊凡鳥吾所羞。安得晴空盡梟  
鳥。坐使鸞鳳來同遊。

棲賢舍利歌

梵書八萬四千塔。誰其造者阿育王。衆靈雜選供役使。分置國土隨神光。其在震旦十有九。就中一塔存  
南康。內有舍利十一粒。昔時埋沒今收藏。瓶是玻璃盤玳瑁。入土出土全不壞。百鍊終完寶勝軀。五光遍  
徹兜羅界。閻扶月照影逾寒。優鉢花籠形轉怪。聞者不見見者驚。蒼茫歷劫知何代。老僧向余言因緣。古  
塔建自咸平年。摩尼之珠未遭燬。遂從西麓歸棲賢。其大如豆小如粟。長有寶氣騰星躔。作銘作贊永無  
極。不逢鉅手安能傳。我昔曾讀匡廬志。復聞此語真奇異。熊軾雖邀一命榮。鹿車原解三乘義。放筆初成  
舍利歌。重遊定作棲賢記。君不見宰官說法天雨花。人間何處非初地。

投壺歌

投壺之禮古所垂。賓筵酬酢樂有儀。踰言僭立著深戒。義取正直非新奇。今朝張燕習嘉禮。兩楹羅列無參差。立馬以三挾矢四。諸賓登降肅不懈。嗟余好古生苦晚。魯鼓薛鼓亡其詩。張氏作圖卜作律。舊經新格何人知。分曹尚德不尚藝。但求命中良可嗤。是時深院日方午。酒鱗浮動黃琉璃。銅韻錚錚振庭樹。疑有落葉飄塔墀。丈夫懸弧本素志。會須手靖西南陲。弓矢載囊永不試。太平高會無窮期。

題林良九鷺圖

一鷺振振騰向天。一鷺仰視欲上窺。一鷺戍削寒聳肩。旁立一鷺一足拳。中有雙鷺斂翅眼。不飲不啄神氣刺。最後三鷺行不前。羽族亦有遭迍邐。飛鳴宿食野態全。誰與狡獪丹青傳。連意長在運筆先。寫生妙手真天然。秋深夢人寒塘路。葦白葭蒼不知處。

以俸米餽高妙主人系以詩

高妙主人冬掩廬。枯藤敗葉盈階除。典衣常贖少陵酒。乞米嬾作平原書。翰林一官清似水。臣朔年年飢欲死。便學侏儒將奈何。自憐骨相宜如此。薄少貽君君勿嗔。加餐善養苦吟身。裘糧略可充三月。救死何勞具八珍。他年拂袖銅駝陌。夕葵秋樹高人宅。一片黃雲弄晚晴。讀書負米真良策。

題番騎圖



邊城吹角黃雲起。番馬番兒見獵喜。幽燕不作畫圖看。逐電追風儼千里。一馬昂藏如欲鳴。數馬勃宰駘不行。就中怒馬忽奔逸。能使突兀高原平。雲錦成堆誰第一。驍騰都入曹韓筆。合圍臨陣兩縱橫。人馬同心勢無敵。聖朝駕馭盡英雄。繕塞年年奏武功。已見助綏番部順。豈徒舉手射夫同。赤狄烏桓連人漠。書生愧少平羌略。惟將老眼相驕驩。一過空羣同伯樂。嗚呼健兒慎勿誇身手。首宿蒲萄中國有。樂府爭傳傲儻歌。闕氏且酌屠蘇酒。

### 苗刀歌

沙渠土司悍且豪。大爲容美小散毛。納地久降諸峒長。尙存苗種懸苗刀。此刀出匣三尺水。吳潭素練翻秋濤。春鷗長尾自皎潔。鷗鵝安用尋常膏。蠻兒矯健逞身手。累年剽掠橫相遭。官軍緩攻議勦撫。居民雜處思奔逃。留茲利刃經戰鬪。往往深夜聞鳴號。卽今向化買牛犢。兼有就學嫻風騷。朝廷德威加四海。合兵不向臯蘭糜。羅平妖鳥避鷹隼。大宛天馬隨蒲萄。東南自充財賦藪。零星荒土輕秋毫。奠安有方賴守牧。奸宄何自潛蓬蒿。孟勞伏突本兇器。昇平盛世宜藏收。寒光如髮照無寐。起看太白西方高。

### 松雪硯歌爲童初五弟賦

名士愛硯如愛玉。肝是驂駟眼鷓鴣。百錢入市得奇珍。朝夕摩挲看不足。形模既古質性溫。斷紋隱約疑蛇腹。涓涓一勺水凝池。內有多年墨蛟伏。此硯曾供松雪書。自宋相沿閱陵谷。我聞承旨在吳興。妻爲仲

姬兒仲穆家學能傳駮駟圖。墨痕徧洒蒼筤竹。趙社遷移元運昌。隨身老硯無翻覆。同時亦有玉帶生。慷慨西臺留慟哭。身當歸隱焉用文。物不磷緇豈非福。烟零雨碎易消磨。幸落吾家老同叔。拂塵啓匣石聯交。對客揮毫雲滿屋。白壁休誇十五城。紅箋要展三千幅。大德重論舊歲年。良工且免新雕琢。與君洗滌試耕耘。開凍還將家課督。四民月令正月硯凍開命童幼入小學

恭紀聖駕口外行園

聞道秋行獮。從來日用剛。三驅嚴虎旅。七萃盡龍驤。綵仗移芳甸。期門整貝裝。從臣誰第一。染翰賦長楊。萬乘應時行。秋高右北平。巫閭蟠重鎮。長白拱神京。列辟趨金鳥。虞人植繡旌。中原燕天子。徒御不曾驚。山海烏孫外。星辰紫極中。省方疆索大。舉孽射夫同。首宿秋還碧。燕支晚自紅。從今輕駟鐵。不必採秦風。允塞兼文武。聲靈暨朔南。助綏驍將集。辨物獸人諳。梓嶺高無際。蒲泥遠更探。左賢遮道拜。率服不須戡。毳帳圍熊地。雕弓射雉天。盛朝誇羽獵。宿衛迷幽燕。石鼓周宣字。金支夏后年。皇心勒武備。應候舉秋田。至治陳千羽。遐方貢象犀。觀兵周冀北。繕塞達遼西。風入雙鷗勁。雲屯萬馬齊。豐碑宜有頌。遙見拂虹蜺。飛騰龍虎氣。隱隱出中權。霽日頭鵝宴。清霜詐馬筵。分弓秋隼外。列戟暮笳邊。應有屠蘇酒。諸王次第傳。大閱陳軍實。前朝總不如。虞巡傳輯瑞。鎬宴咏那居。但取平羌略。無勞諫獵書。小臣江海隔。北望想鑾輿。

林道人山房

道人老有道。自製薜蘿衣。清夢白雲遠。晚林黃葉稀。重尋應不遇。愛此暫忘機。十里下山路。蒼然橫夕霏。

聞蟬

石繖峯邊路。年年噪夕陽。忽驚新氣候。何處好池塘。森木雨初霽。古城秋正涼。如聞楚天雁。悵望一霓裳。

題鄭布衣秋郊餞別圖再送史丈

布衣老筆似龍眼。寫出旗亭薄暮天。折柳幾人同悵別。采薇何日罷防邊。帳中白髮依嚴武。城上黃雲弔赫連。莫問賀蘭山近遠。數行秦樹帶秋煙。

贈內子四十初度

憶聽靈鵲報初除。九載東華寂寞居。典盡金釵供傲屋。剔殘銀燭照修書。承恩縱得新鸞語。偕隱難忘舊鹿車。珥筆分符俱不賤。一麾休怪出南徐。人間仕宦海茫茫。泛宅浮家又豫章。五斗偶需腰已折。百年將半鬢同蒼。安貧便是宜家策。采葯何勞註景方。差勝蓬門荆布婦。白頭未識綺羅香。

送潘筠軒編修還越

昇平朝野總君恩。局外閒將出處論。結社未應歸白傅。種蔬早已賦黃門。一竿遠拂珊瑚樹。八口同居荔荔村。此去撫松深閉戶。蒼髯勝友老猶存。

環娘至淮

迴身宛轉故依然。小別重逢似隔年。葯餌急須調病後。簪環親與卸燈前。但教好月當三五。豈惜春衣典十千。江北江南風正厲。護花人祝養花天。

信步至萬柳堂是前歲亡姬舊游地愴然久之

鞦韆徐行不覺遙。鳳城寒食又今朝。地經前度增惆悵。人對芳辰轉寂寥。侍史華年傷錦瑟。故家別業問雕橋。真珠亭畔斜陽暮。翻恐無端拾翠翹。

懷淮上程魚門晉芳

夢到通波九曲邊。槐花黃近已涼天。豈無淮海閒居集。秦少游著淮海閒居集合有昌黎薦士篇。北斗望京成往事。

魚門兩赴京兆試南園餞別又今年。庚午北上。有南園餞別圖。丁家水榭聞歌處。凭遍雕闌夜不眠。魚門舊韻青溪水閣。

秦淮雜咏和所見龍潭旅壁原韻

兩戒江山萬古清。劫灰歷盡見昇平。後庭一曲堪亡國。玉樹從今莫再生。南朝樓殿勝蓬萊。物換星移起暮哀。寒雨不知歌舞地。瀟瀟徧滴舊官槐。

憶金陵舊游

吾鄉放翁在蜀十年。曾有所盼。歸日每懷舊游。屢見吟咏。僕於金陵亦然。月地花天。復此追憶。不

知身滯百蠻也。

選勝鶯花幾度經。吳娘低唱酒微醒。誰知暮雨瀟瀟曲。偏向蠻村意外聽。  
何處南朝不可憐。屏中樓閣鏡中船。茫茫洗馬愁難遣。已過羊車八市年。  
鸞坊寂寞鳳臺空。白髮吳伶話故宮。外院尙橫金鑷鉞。內橋誰奏玉玲瓏。  
謝莊玩月憑闌坐。梁緒簪花側帽歸。古巷斜陽誰認得。重來惟有舊烏衣。  
名士當年說過江。圍棋邀笛總無雙。只今惟有青溪水。九曲潺湲到客窗。

方塘

如鑑方塘皎不昏。琉璃經雨淨無痕。楊花吹落魚苗長。一夜春流綠到門。

許開基

字助宗。海寧人。雍正八年進士。官至戶部郎中。

湘潭道中遇雨

宿霧初收竹徑開。雨絲端與拭輕埃。泉聲忽作弦聲急。知是琵琶峰上來。  
琵琶峰在湘潭。



# 湖海詩傳卷五

嵇璜

字尚佐。號拙修。無錫人。雍正八年進士。官至文淵閣大學士。諡文恭。

送女勤之德清

憶別汝母時。汝纔繞母膝。往苒悼流年。汝年今十七。女工學未成。詩禮讀粗畢。當春賦于歸。余懷如有失。買舟送汝行。風帆毋太疾。却感泉下人。夜夜夢未悉。似憐汝尚幼。神魂不能佚。父母一身兼。未語愧疏率。幸茲夫婿佳。和諧冀可必。多言固所戒。沉靜葆汝質。操作職在勤。奉養心宜密。庶用慰汝親。佇卜百年吉。登輿汝竟去。有語不能出。平生丈夫概。肯爲所愛汨。十載死生情。頓牽別離日。回棹望吳羌。老眼淚已溢。

題汪文端公松泉圖

讓谿少師古君子。同直後輩羣相師。喬松千尺棟梁用。源泉萬斛左右資。風度凝遠無涯涘。廣平曲江儼在茲。名儒名臣實名世。詎止書翰兼文詞。是時直廬暇無事。榮光煜煜臨塔墀。雲箋捧出御飛白。松泉二字蟠蛟螭。諸臣讚美更歎羨。懸之賜第彰殊施。維公遂取以自號。書紳佩德深長思。松風泉韻入妙繪。道貌於此位置宜。二十年來一彈指。蓬山往迹那可追。二泉泉旁聽松石。尚冀翩然一遇之。

送二兒承豫之滇南

年老難爲別。秋高又送行。臨風人萬里。對酒月三更。有守惟從儉。無才更戒盈。勉思爲善吏。莫負此家聲。

英廉

字計六。漢軍廂黃旂人。雍正十年舉人。官至文淵閣大學士。謚文肅。有夢堂詩集。

蒲褐山房詩話相國初通籍時雅嗜芸緗尤敦車笠與樊榭及吳樸庭煇文符幼魯曾查蓮坡爲仁爲酬和友詩壇酒社翰墨飛騰雖江左風流不是過也既而職長六曹殫心時務或舉舊稿爲言輒遜語謝之蓋不欲以文人自命矣先是定制內閣大學士滿漢各二人及于文襄公歿時方爲戶部尚書滿缺上以其祖籍涿州本馮姓命踐文襄之席蓋顯梅之用久膺聖心故不拘常格卽司台鼎云

晚過古春小築奉雨訪樊榭

游雲不滿空。返景下疏堞。佳人隔深巷。薄暮引幽涉。相違期非遙。相見意彌愜。微風亂燭影。涼雨鳴蕉葉。寂寞共西窗。惜此清淨業。

戊子仲秋爲友竹先生題畫卷卽送歸吳門

虎山橋外記維舟。曾爲梅花結伴游。彈指不期卅載過。驚心才有兩人留。甲子正月鄧尉之游歸簡在師張墨岑盛青樓俱下世唯余與

友竹在耳相逢且作無何飲。老別方知分外愁。展卷幾回還開筆。微茫烟樹似吳洲。

方觀承



字宜田。號問亭。桐城人。雍正十一年。由監生保舉。加中書銜。官至直隸總督。加太子少保。諡恪敏。有問亭集。

曹素功菘粟齋墨歌

黃山六六峯。峯峯產奇松。曹阮二水交澄溶。天生墨材擅天下。精能孰繼廷珪蹤。廷珪去今八百載。劍脊龍紋幾丸在。元明妙製亦多人。轉眼烟塵隨刼改。興朝作者獨數曹。輕煤薄麝萬杵勞。水濡不壞點如漆。半挺可直千錢刀。後賢復能世其業。豹囊珍護青麟膏。鴻儒鉅公交口譽。姓字上徹楓宸高。却憶吾家老子魯。九元三極心良苦。名高物忌召恩讐。寂莫金壺賸空譜。于魯造九元三極墨。自謂前無古人。程君房與之競勝。遂搆嫌讐。秦寶鏡。吳純鉤。神物化去不可求。何如菘粟齋中青英。且日出。子孫長作松滋侯。老夫意氣雄筆壘。興來須遣雙螺待。菘甘園譜爲成圖。看潑春濤接雲海。

雨後夜坐

雨歇郊園暮。窗開野色青。歸雲不礙樹。淺水亦涵星。茶熟兼花氣。詩成託灑靈。涼宵秋得似。的的度流螢。

嘉峪關登籌邊樓作

時乙亥杪冬三日

燉煌西外酒泉東。萬里登樓驛盡通。望去單于新毳帳。牽來都護舊青驄。水分夾谷邊重繞。山到陽關勢畧同。冷映高旌移暮色。塞雲開處月如弓。

冬夜雨中同劉林一馬湘靈話故鄉風景因成四韻

微風拂拂雨濺濺。已到輕寒十月天。茗椀頻添新活火。時里門寄梅花重檢舊吟箋。客歲詠盆梅詩。憶及白門翠微寺綠萼梅。

障為隣預結山邊屋。湘靈疑卜居清涼山。息老須歸郭外田。林一話金牛洞舊田之美。記取官齋同翦燭。數枝殘菊影猶妍。

上都河道中

歌殘勅勒天如蓋。路繞灤陽水不回。一片黃雲千載淚。秋風吹上李陵臺。

淀舟卽事

雨後空明絕點埃。篷窗倚對夕陽開。遙村暝色收罾去。別港青泥載藕來。

行過塘頭復淀頭。葦花近屋稻盈篝。持螯消得津門酒。絕似江南九月秋。

連雨書

山妻解事酒常具。隣友能來句共參。竹檻荷塘深閉戶。未妨梅雨住江南。

陳祖范

字見復。號亦韓。常熟人。雍正十一年進士。乾隆十六年保舉經學。授司業銜。有司業詩文集。

乘月過韋蘇州祠

皓魄揚光輝。良宵展游眺。微吟韋郎詩。言尋韋郎廟。庭枝倦昏栖。罌烟歇晨燎。此邦幾人臨。公名至今劭。

曰余愧俸錢。郡閣但坐嘯。坐嘯政已成。來者誰同調。精靈苟或存。夢寐挹清妙。廟中祈夢多奇驗。

袁氏林亭

勝地宜開墅。移居遠世情。雲端雙澗落。雨外一峯晴。嵐重迷寒暑。林幽失晦明。主人興不淺。次第架書棚。信宿已徂暑。秋光一醒人。倚空山陡健。入夜月精神。鏡裏乾坤老。霜前樹石新。欣偕二三子。坐對此清真。

周官猷

字辰遠。長沙縣人。雍正十一年進士。官鹽運使分司。有雪舫詩鈔。

蒲褐山房詩話。雪舫長沙名族。其子弟以文行兼者頗多。雪舫任浙中鹽運判官。數載其配為萬九沙經女。故與全謝山厲樊榭諸君皆稱投分。詩集四卷。得大歷十子之遺。惜假蹇下僚。迄今無有知者之。

從常山至玉山輿中卽事五十韻

水勢日東流。山形緬西蠹。天險昔王開。行役余懷觸。太末古城陰。陂陀起平陸。蜿蜒出修蛇。窈窕屈荒服。三浙扁臺鍵。八閩蔽奧隩。一徑亘江廣。千岩聯楚蜀。舳艫不到處。牽輓飛隼速。百貨競塵至。萬夫紛蟻屬。我來值初冬。詰旦誠廝僕。笱輿計便安。無勞策筇竹。老大筋力衰。憑茲勝炙殺。垂帷避夕霧。卷幔迎晨旭。墟舍散仍聚。炊煙斷且續。小憇得草坪。欹斜幾椽屋。瓦盆野蔬鮮。酒旆村酤熟。颺風快飲河。一飽時已足。行行寒鳥啼。樹樹哀猿逐。橘看霜後頰。茶憶春前綠。确田列縱橫。疲農勞碌碌。亦足給糴殮。差堪返淳樸。

重關倏屹立。百雉誰興築。中有會關。上設城梁。危石扼咽喉。羣峯鎖腰腹。王路久蕩平。戍壘空懸箠。聞昨沔蓼區。妖鳥滋狂飈。潢池已解散。渠魁未卽戮。大吏識機宜。要隘嚴稽督。諒彼狐兔羣。疇能工竄伏。撫時生慷慨。望古益慚慙。惟昔爛柯人。仙枰閱幾局。嚼棗得長年。採藥思辟穀。亦有龍邱萇。遼榮甘抱璞。至今行路者。猶解指芳躅。我生蓬矢志。廿載辭圭竇。傲骨摧奸頑。鑠金遭謗譏。頻年牛馬走。萬里無停軸。鷄肋詎足惜。鴛頂已成禿。以茲浩然去。行笈兼程促。寒風刮面來。凜凜肌生粟。黃昏微雨霏。泥滑艱彳亍。遙望市肆門。如投鄉井宿。得窮一日力。哀然見懷玉山。名爐峯。與彭蠡。次第入遐矚。前途罔愆期。旦晚抵家塾。雖無金在橐。尙有書盈篋。白髮盼游蹤。荆釵冷銀燭。誓將謀二頃。壠上鞭烏犢。優悠可卒歲。知止庶免辱。遠游不如歸。斯言當三復。

葭林招集乳桐軒聽雨懷堇浦謝山

一葉蕉窗雨。懷人五月秋。江湖生遠夢。琴筑在高樓。促坐翦殘燭。天涯共白頭。遙憐吟眺處。嶺月不禁愁。

葭城訪王澹園明府

復此吳淞路。春風短棹餘。江寒連海氣。潮長入山渠。望郭煙迷戍。推篷雨濕書。故人官就此。聞道有懸魚。

南屏觀司馬溫公隸書家人卦磨崖

靈山此呵護。賸蹟重瑤瑤。言行名臣錄。風雲石壁書。懸崖蹲虎豹。下筆掃蟲魚。若爲鈎摹去。鴻都可得如。

下湘先寄鏡亭變軒兩兄湘濤弟

湘中清迥地。秋半早涼天。岸竹滋微雨。江花澹遠烟。帆隨峯影轉。月趁櫂歌圓。五字吟安穩。因風寄雁傳。

寄二兄變軒

家計仍相累。萍飄尙此身。三年違俎豆。一夢越關津。鹿柴聽樵斧。漁塘倚釣輪。迴思雞黍夜。風雨對牀人。

彭端淑

字樂齋。丹稜人。雍正十一年進士。官廣東肇羅道。有白鶴堂詩文集。

蒲褐山房詩話樂齋與弟遵泗以詩古文名蜀中時號二彭其德器從容涵養純粹梁文定公階平尤稱之自吏部郎出爲西粵監司未幾歸老余過成都適樂齋主錦江書院談藝之下相得其驩因出生平所作同其弟之文屬余論定余爲刪存十卷後六年余告假歸家適江安楊君卓來令吾邑見此願任開雕及余還都而楊君被議謫處伊犁此集不知何往矣是時聞樂齋亦下世爲之愴然樂齋詩大抵質實厚重不爲鞿脫之習者也

由硤石出穀谷

南來歷險阻。硤石獨爲最。萬古剗不平。磊落爭向背。二陵鬱相望。風雨時顯晦。秦晉昔交戈。百萬化土塊。設險自天成。陝勢分外內。崖傾一徑危。其下臨深澗。我馬虺以隕。跼步出入礙。艱哉蜀道難。劍門險尤倍。遙遙望前程。轉使心如瘴。

大士窟

乍望阻行旌。前山聳崢嶸。磴道蟠蒼穹。數騎自雲出。危石千仞懸。飛湍百丈溢。紆迴仗木欄。摧頽勢難必。偶然一俯首。不寒體自慄。叮嚀語僮僕。跋陟戒奔逸。防身如履冰。兢兢猶恐失。秦棧洵多奇。此岩寔無匹。驚定復長歌。愧乏少陵筆。

種蔬

老去復何爲。無營亦無欲。淡泊性所甘。食不假粱肉。宅外有閒園。土沃方種菽。是時已仲秋。天陰常震隩。計日未成旬。淳然出地速。毋令野葛侵。此輩多潛伏。春至應蕃滋。採擷佐饋粥。家居瑣務煩。勤動在手足。身無軒冕榮。理生那免俗。不見杜陵翁。題詩課僮僕。

發宜昌

孤棹發宜昌。西歸一水長。漸臨三峽地。深入五溪鄉。臘盡寒猶壯。灘枯險倍常。猿聲天半落。頭白早如霜。

駟馬橋送開制軍之伊犁

制軍名秦

河梁送別欲魂消。翹首伊犁萬里遙。正是秋風楊葉下。一行班馬響蕭蕭。

董邦達

字孚存。號東山。富陽人。雍正十一年進士。官至禮部尙書。諡文恪。

題白雲泉圖

白雲一掬陽山隅。涓涓滴下青泥珠。大瓢挹彼來注此。活火可試風前爐。泉下架屋山人居。林木窈窕羅蕭疎。泉甘味冽漱齒頰。能令燥吻生津腴。真如灌頂飢醍醐。又似九醞仙家醕。人間點滴不到口。而此日飲無時無。顧我年來病未蘇。那得到此嘗須臾。一杯欲乞治相如。消渴已捐頰痾除。山中煮泉良非迂。惜哉身不游姑胥。東吳佳處夢與俱。展卷爲寫雲泉圖。雲泉之泉誰有諸。有客自是山澤臞。濯腸洗胃神清虛。得非飲者其仙歟。

### 金德瑛

字汝白。號檜門。仁和人。乾隆元年殿試第一人。及第。官至左都御史。有檜門詩存。

蒲褐山房詩話。總憲酷嗜涪翁。故論詩以清新刻削。酸寒瘦澁爲能。于同鄉最愛錢君坤。一督學江西。識拔蔣君心餘。于諸生中。而汪子康古其戚也。甲戌子入京師。總憲時時招同游宴。于一經齋清談終日。率以爲常。及子南歸。又以書薦于前山東吳運使凌雲。其愛才推轂。若此類也。總憲歿四十餘年。而杭城士大夫。請祀鄉賢。時子主講數文。因送其粟。主奉于學宮。歸而重復其詩。爲之淩黜。

### 道源書院贈南安游心水太守

孟後千餘載。周子紹微言。生知無師授。獨臻闢奧全。晚得二程子。日月回中天。南安雖僻郡。司李栖龍鸞。大賢過化地。飲水應尋源。胡爲過嶺士。競慕南華禪。修途關易塞。野火撲更然。英哲尙迷方。狂聘如風顛。太守篤經術。仁讓變鷹鷂。一綫扶正學。辛勤歷十年。郡東峙佳嶺。秀色羅雲烟。翦除伽藍宇。改作禮義門。堂中四栗主。俎豆昭吉蠲。民懷功德在。配以王伯安。典型斯可仰。百世興儒頑。十室有忠信。入里必式焉。

寧謂四邑陋。不堪與陶甄。招徠青衿子。饗舍數十間。擇師具籩粟。琢璞成瓊瑤。我來一登拜。俯仰發清妍。霧月光風境。宛然落目前。君政異俗吏。必以德教先。邦人如鄒魯。君名當不刊。

朱子六經圖碑石刻在上饒縣學

六經之書古尙缺。六經之圖古更無。聶氏有功著三禮。猶惜六經非全圖。誰其縮之六片石。刻縷名物窮。鑄石六片銖兩面刻。宗廟左右辨昭穆。明堂頰會聯冠裾。徐揚雍冀列地軸。鳥火虛昴通天樞。國有六職工居一。輿輪蓋軫多爲車。六律娶妻呂生子。鐘磬琴瑟發笙竽。瞭然一一指諸掌。不比揣籥談空虛。古者左圖而右史。形上形下貫精羸。箋疏曲折難盡曉。了了壁上觀規模。不見文翁石室像。可證跪坐非跣跣。漢氏去古尙未遠。辛勤補綴追厥初。詎因犧象劉杏說。小失便訾北海評。紛紛末學講元眇。無根勦襲堪胡盧。聖人象數蔑芻狗。問及典制徒睢盱。一朝紫陽真儒出。大含細入該無餘。渺然心通作述始。置身三代窺虛虞。我生識小尙不足。敢比豎亥周坤輿。畱之昭示千萬世。何止聲價同鴻都。

桃源

主人耕作客人漁。說向先秦恁恍餘。好是碧溪紅樹裏。不傳數卷未焚書。

秦蕙田

字樹峯。無錫人。乾隆元年殿試第三人及第。官至刑部尙書。謚文恭。有味經窩詩文類藁。





嗟余履屯難。壯志邈難騁。反側聽蛩吟。熒熒一燈靜。清颺山中來。助我發深省。起坐調鳴琴。幽懷徒耿耿。

荅復初先生見寄之作

六籍聖所貽。紹述賴百氏。紀綱天地人。厥功焉可紀。精言與大義。歷歷瞭如指。性功達治術。出處均一軌。胡爲後世士。觸目驚且哆。如搆九層臺。版築傾基址。又如舟失舵。簸蕩風波裏。禮器及車服。誰復求形似。吾邑有顧翁。復古氣雄偉。窮年抱遺經。含咀吸真髓。脫身塵垢外。清曠莫與比。擁書萬卷樓。尋原必迄委。初年學古文。下筆輒光煒。尙論愛司馬。年譜究終始。先生曾著濶公年譜神交若投契。覲面相應唯。詎止傳賢蹤。裨補先正史。三禮圖宮室。古意追釋米。穿穴暨春秋。三傳列硯几。創成大事表。務合筆削旨。書成忽十稔。作歌告諸子。謂蒙守朴學。謬與談名理。款款尺素書。殷勤附赤鯉。軒朗豁雙眸。不啻脫瘡痕。所恨久離索。末由竟株抵。先生名山業。塵垢視青紫。高風式鄉閭。立志起頑鄙。嗟予日荒落。勺蠶難測海。持示蔡與吳。人手先色喜。何當返柴荆。百尺容攀倚。

燕子磯

策杖陟層巔。凌虛望遠天。江山自終古。亭榭幾經年。帆影懸殘照。漁譟入暮煙。長吟舒逸興。風月任無邊。

秋齋雜詠

夙有東臯約。春畦十畝閒。牕開泉上樹。門對雨中山。好鳥亦知靜。孤雲時就閑。何當守寂寞。長掩舊柴關。

# 蔡新

字次明。號葛山。漳浦人。乾隆元年進士。官至東閣大學士。賜告歸。加太子太師。卒諡文恭。

## 題汪文端公松泉圖

種樹添新蔭。先當培其根。疏泉資灌溉。先當裕其源。少師勤學殖。呈材依禁垣。汲深藉脩綆。下筆文瀾翻。示明自獻納。公望羣所尊。御賜飛白書。中有至道存。松貞泉比潔。寶之重瓊璠。贊皇平泉記。溫公獨樂園。何如此清華。天語含春溫。憶我追陪日。直舍鄰高軒。文漪頻挹注。美植長滋繁。披圖感今昔。遺韻猶堪論。既以惠來學。復此垂後昆。始知餘慶在。世業皆君恩。

## 題古中盤五松圖

昔聞畢宏韋偃畫古松。振筆長風浩呼洶。如何此卷僅矮幅。而多天矯騰踔之蟠龍。鱗爪攫拏勢莫止。濤聲在耳雲盪胸。倬哉萬松老居士。筆端具有造化工。此圖何處得畫本。傳自古云盤谷之中峯。侍從宸游多燕暇。相對勝友此扶筇。濡毫拂素標異狀。貌得盤山古幹真形容。最憐後彫質。沐日浴月幾春冬。太平之世豈獨民仁壽。草木亦含雨露濃。君不見泰山上有五大夫。風烟剝落摧秦封。如此蒼髯礪硯突。兀自千古得非福。地神秀鍾。松兮松兮安能布襪青鞋盤桓於爾側。髣髴乎桂父木客之高蹤。

# 劉綸

字脊涵號繩菴武進人乾隆元年召試博學鴻詞第一授編修官至文淵閣大學士加太子太保諡文定有繩菴內外集

蒲褐山房詩話爰定謙和恭謹尤以清修自厲少在尹文端公幕府得其指授繼以鴻博第一入翰林注文端公愛其才兼重其度晚年尤與劉文正公相得和而不流無所附麗代言應制皆爲一時之冠予嘗以要事繕奏稿夜半詣公門請閱公起夔燭操筆點定時仲冬寒甚公呼三公子爲具酒脯而廚傳已空僅有白棗十餘枚以侑酒公亦自嘆其儉陋爲可哂也

白菜

北里初寒候佳蔬入饌鮮千畦風露足一飽士農便絕勝金蠶味疑參玉版禪漢陰人笑我廢圃剩吳天

寫心精舍

恭和聖製元韻

仙源勝處隔塵音曲磴懸梯迥出林金粟花香真諦現玉池月印葆光沉能馴最是靈臺鹿解舞都爲閨苑禽當境拈參無盡藏仰憑天藻會天心

西郊晚行

亂蟬聲歇趁新涼路轉神臯草樹香卻羨村翁豆棚坐笑看秋稼比人長  
雨澗條條寒玉鳴風荷葉葉露珠傾宵來欲借高僧榻聽促蝦蟆續五更

諸錦

字襄七號艸廬秀水人雍正二年進士改庶吉士散館降教授乾隆元年復以博學鴻詞徵授檢討

官至左春坊左贊善。有絳跋閣集。

潘褐山房詩話絳跋閣集。後門人刪定。鄭磯尺江以爲措擢胃腎挾摘杳微。陸陸堂奮勳以爲言。近旨遠根。抵深而英華自茂。若定論也。余甲戌春入都。請予相見。每日苦茗一甌。鱸魚飯。雜談經史。危坐相對。必至日下。春而後許返。先生出臨川。李公穆堂門下。生平博聞強識。詩法山谷。后山而志節傲然。甘寂寞。守耿介。極貴之門。微逐之地。未嘗一至。蓋古之聞人而世之畸人也。

### 論畫贈吳叟威中

繪事有幾輩。此道嗟沉淪。昔聞廣川語。遊藝兼依仁。隱或在岩穴。顯或在搢紳。大約非俗工。流傳盡文人。匪直妙形似。亦以寫性真。精神到寂寞。乃始下筆親。青崖隻鬢幡。結茅秋水濱。解組歸去來。免踏京華塵。雲山米漫士。評斷張愛賓。偶焉騁墨戲。著手都成春。有時雙管下。有時五指皴。折枝含露帶。纖羽帖花茵。畫意亦畫似。師古不師新。翻嫌徽廟時。苑匠少軼倫。古來負絕藝。坎壈纏其身。空使倚市門。擲揄老斲輪。良工每手縮。識者徒眉顰。不見曹將軍。頭白傷賤貧。

### 牧牛畫卷

畫牛韓滉戴嵩最。後來張符亦擅長。是皆一匹萬縉直。風流埽迹餘芬芳。此圖誰所作。年久脫名氏。牯犝牯牯。數件并十四。牧童不麾肱。翹足樹陰睡。原田農丈人。何處負耒至。對此身在桃林中。白烟紅雨空。鬢鬆亦復神。馳渤海外。催耕勸牧脫佩帶。江南草長禾油油。見月不喘吳耕牛。忽憶宅邊烟雨足。沙汀試借一葉舟。飽飯冬善戴短笠。耕耨盡日夫何求。

桂林黨籍碑拓本

道君皇帝嗣位初。黑白氣挾西方俱。流傳天變不足畏。又見機槍紛掃除。乃知奸諛竊國枋。恣以鈞黨相吞屠。其先立石端禮門。未幾播惡及海隅。碑高三丈闊一丈。涑水以下無完膚。歿者奪官兼毀像。存者中朝不得立斯須。禮至作銘有遺臭。李斯刻石尤矯誣。彼猶可恕稔己惡。京也剪此朝士胡爲乎。想其顯書深刻時。意欲獨出無古初。海桑陵谷不能蝕。蟲沙猿鶴不可逋。睢盱噉嚼無顧忌。自謂快意真訐謔。嗚呼。天地有正氣。華袞却假一字誅。剝之上九存剝果。焉有君子反剝慮。三百九人更作傳。子孫恩例遞上書。宵人私恨徒區區。昔何氣銳今何愚。勾芒忽聞前殿泣。強敵連騎東都驅。上皇蒙塵紹興渡。此石未泐國已墟。猶存一本桂林拓。以爲殷鑒非黃圖。前者甘陵南。後者東林復社徒。邪曲害公亦如此。古來反覆何所無。古來反覆何所無。不見鹿可爲馬脯。可蒲。

天竺三生石

踈竹雨添翠。遠峯秋更青。來尋石門磻。未識香林亭。白日午不到。清齋人獨醒。葛洪有丹井。乞取問修齡。

東鄭叟

行人司雨  
隨公之子

日糴五升米。年侵雙鬢絲。阿誰羊舌泣。依舊虎頭癡。樽散難爲斲。風塵枉用緇。練裙寒色苦。惆悵綠窗詞。

叟所著

七夕

涼露微微滴。明河黯黯收。林端初繞鵲。客夜詠牽牛。戎馬猶邊地。關梁凝遠愁。清暉千里月。忍照曝衣樓。

十三夜月

蒼壁圓猶橢。高秋恰近中。微雲無點綴。清露竟流空。楊柳藏鶉起。蒹葭宿鷺同。隔船誰撫瑟。清怨出簾櫳。

### 杭世駿

字大宗。號荊浦。仁和人。雍正二年舉人。乾隆元年。召試博學鴻詞。授編修。有《道古堂集》。

蒲褐山房詩話。荊浦先生書擁百城。胸羅四庫。入翰林未久。即以言事罷歸。沈文憲公送之。有句云。隣翁既雨。談檣築新婦。初婚議窻炊。益深惜之也。既歸。益肆力于詩古文詞。海涵地負。日光玉潔。實足以雄長藝林。兩浙文人。自黃梨洲先生後。全謝山庶常及先生而已。乾隆丁丑秋。予至西泠。相見。共論古今文章流別。謂予曰。子無輕視放翁詩文。至此亦足名家。其沖懷樂善。迥異乎世之放言高論者矣。先生有子白。第八子寶仁。外餘皆下世。諸孫亦零落殆盡。其道古堂集。梁山舟侍講刻之。生平著述甚夥。今付剞劂者。未及其半。

### 秋日集鳳鳴菴

精廬繚山根。雜樹青不斷。微風透□輕。初日出林緩。閒閒素侶偕。戀此涼蔭滿。熏心借佛香。礪齒汨澄澗。卽事唯永懷。率爾役青管。石貌非世嫌。竹意同我嬾。不期釋褊心。竟以霍微瘡。起行弄清陰。寫望入幽散。

### 晚秋游蓮居報國兩招提

秋深澹疑夕。幽興任所選。野色迹鳥飛。翠影逐人轉。緣谿徑石橋。散策入僧院。出林清磬圓。到水涼雲變。

洗鉢魚不驚。坐樹葉屢顫。不辭竹風火。時得花雨濺。了知佛香清。矧戀鄉土善。視蔭惜邊歸。境過意頻眷。

越秀山懷古

峩峩越秀山。千古閱興替。臺隍夷夏交。月表秦楚際。緬維老夫陀。荆棘此翦薙。中原方逐虎。兵甲惜勞弊。從容得鬪疆。屈彊遂稱帝。帶海爲維藩。陴山作屏蔽。不知漢廣大。頗恃兵鋒銳。卓哉陸大夫。一語豁蒙瞶。稱臣請內屬。蹶起解椎髻。朝臺壓閭閻。奕世永帶礪。牝晨誤遠圖。煽處乏調劑。戈船下牂牁。一往失重閉。險設覺可乘。時衰力能制。始知開國人。貶損有深計。清朝息金革。曠宇喜開霽。秋風吹餘花。孤客恣幽憇。日落樹鸞鴉。潮來城上蟻。江天兩蒼茫。俯仰供流涕。岩巖腐吏筆。憑弔落荒裔。

會宿素舫齋作

苦雨漫林屋。向晚勢尙乘。希聞檐溜縮。時見新點增。嚴城急魚鑰。猛斂力不能。歡下聽雨牀。兼試照字鐙。深杯且重把。僻事請再徵。縱橫算文楸。爛漫天剗藤。微吟共擁鼻。短睡暫曲肱。瘦影儼翹鸞。靜退如枯僧。奇夜性所耽。習詔戒力懲。淒風攪松竹。併作清響聲。起視江上峯。澹澹沒翠棱。初地罕津逮。緩縛隻行滕。

張高要甄陶遣送嘉魚

鄙夫無他營。專意事口腹。家居江湖間。浩淼富水族。湖鰾鱸比絲。江鱸肥勝肉。其餘鱗鱉鯉。瑣猥不足錄。策杖來南中。譬奕已換局。炎荒闕冰雪。地氣少涵蓄。百錢謀盤餐。無一可壓屬。非無薑桂芼。不免腥腐啄。



廢箸長忍飢。噴責到僮僕。坐是兩頤瘦。經歲不能復。端州有嘉魚。性不受淤濁。噉嚼石室底。游泳蒼山麓。陟冬始上浮。千百自相逐。漁子伏殺機。網罟恣撈漉。蒼梧見未曾。丙穴耳已熟。豈若此地佳。萍垢能盡浴。張侯我同隊。蓬池偶失足。知我彈缺歌。清響出茆屋。牽船帶荇藻。遠寄一溪綠。撥刺賴尾長。斑駁錦鱗簇。笑鱸口空巨。陋鱸項常縮。饑投忍不禁。亟令翠釜沃。堆盤出芳鮮。飽飫豈非福。終餐默自維。俊味恐難續。諸生頭角鱖。程藝聚筍束。妙義如吞鉤。活脫不可捉。釣深思嘉魚。善譬本山谷。山谷次韻冕仲考進士試卷詩。釣深思嘉魚。攻璞願玉情事適相叶。會心吾豈獨。緘詩報良友。爛漫遂滿幅。臥想魚殮人。笑齒粲啓玉。

汎舟至游魚洲訪羅頰才精舍同過海幢寺尋本無上人

我友冰雪姿。寂寥抱冬心。亦有三黎生。共鼓風中琴。精舍八九椽。花藥羅堂襟。楫以六枳籬。劣許藤蘿侵。向南拓水窗。釣竹橫江潯。突出捎雲枝。濃綠招棲禽。從容申襟契。先後相窺臨。齋鐘起隣梵。命策同幽尋。幽尋到山寺。邪徑繚江口。參差春浮陰。飛墮不容帶。枯僧折幔幢。樹底一招手。佛屋可滌煩。禪喜詎嫌久。茶聲續寒吟。晷影側疏牖。循廊玩苔碑。坐樹接林叟。靈禽非生客。馴鹿亦舊友。揮手辭香林。濕翠猶在肘。次江關晚晴步浴鵠灣至花家山放舟歸南屏

泛泛仙客舟。歷歷南山樹。渚晚欲生波。烟輕已紆路。觀荷引勝情。直破鏡光渡。丹房酣落日。翠萼晦昏霧。想見高興時。豪吟驚宿鷺。收歸素幘中。尙有無聲句。川觀不克偕。雲思曷由吐。披卷一忻然。洽我滄洲趣。

小西別館追送程舍人晉芳用昌黎會合聯句韻

籌毫紫禁嚴。宣詔丹地重。世誰歟冠文豪。人選奮才勇。黃高騫歎力沉。翹望益神聳。閩摩空賦筆瓊。翻水

詩思涌。陳疾如馬脫銜。浩若川決壅。沙維遠齊嚴徐。肩近接顏陸。張四橫翔類排山。獨出儼斷龍。江光

連星河搖。氣懾虎豹恐。程名握瑜炫席珍。含穎挺嘉種。世東門飲餞多。北地鈴馱冗。裕乘風想揚鑣。過家

當上冢。華雞壇別舊知。鳳閣拜新寵。阜驂闔候館閔。旌拂驛樓棋。維衝寒馬毛縮。裹雪僕心恂。四雙堠隻

堠迎。十漿五漿奉。炎封崖冰嵯峩。撐郭樹臃腫。名閩市驚乍穿。短簪喜初擁。世岱色翠忽交。燕雲晴可捧。

俗曉警盤空應。夜咽跼寒蒸。華美哉壯游遨。胡然惜微迺。阜心儀王道平。目極帝闕鞏。維殊恩故特達。當

職敢傷鱗。四科陳謨追虞唐。銜憲展虔悚。炎革帶玉螭盤。黼裘青兕茸。名丹穴耀九苞。華省豔雙琪。世駿兼

晴朝制尊鼎槐。皇輿擴秦隴。裕德至銀甕出。瑞應玉膏浴。華賜復逮耆耆。肆省破孽萃。阜謀謨參廟堂。燮

理佐宰冢。維藁言羽排霄。清口繭抽蛹。四居中體易崇。近日價增踊。炎雄飛鳶戾天。卑伏燕斂翮。名世君行

慎樞筦。趨直準宮甬。世駿我其內熱歟。關險夜呼洵。裕

聖輿圖爲沈鏞作

魯雩門外壇崔巍。參覃灌木大十圍。龜山左顧帶沂水。差差綠漲初生肥。聖門狂點見大意。童冠六七相  
因依。餘寒乍減試白衿。雜花亂逐羣鴛飛。上已祓除本國俗。此老胸次何祥禩。解衣就冰盤薄羸。那得遽

免同川譏。臨深况有辱親懼。教猥毋乃行人誹。魯論古本踵訛誤。小儒咋舌徒依違。昌黎解經出巨手。奮筆直改沿乎沂。此義皎如撥雲霧。紛紜曲說皆當揮。沈郎觀書鄙章句。志在擺脫塵中鞿。謹謝冠者望童子。意取活潑流天機。紅鵝拍拍戲苜岸。青芽短短抽蘆埼。游絲颺空如繫日。暖風度水旋吹衣。眼前生意收不盡。好事往往傳郊扉。從游一問子所善。樊遲而後三人稀。涵濡聖涯更得汝。上與狂者爭幾希。城南暮景翳將入。舞雩在縣城南七里濯濯皎月流金徽。三章試咏舒天紹。攜幼緩緩循隄歸。

南漢金塗鐵塢歌

香刹崢泓花雨歇。秋繁匝地涼珠結。華幢七級門莊嚴。突兀東西破空立。椽尖葺葺刺天閭。焦葉盤盤卷雌蜺。是誰留此鎮山門。儼似巍峩雙闕揭。我來開梵訶子林。衣上濃陰清可攝。脩廊走徧寶坊開。捩眼香雲驚一瞥。青苔繡蝕九蓮花。勁骨橫撐孤竹節。層層烟蓋透瓏玲。獵獵風輪轉替戾。細尋銘字瘦蛟蟠。淨剔霜花釵股折。僞號公稱大寶年。傳家不改驕淫轍。矯首江天三太息。往事茫茫更稱說。昌華苑裏月如霜。歌舞岡頭花似血。髡徒嘯篋竊國鈞。熏涿瞞天污朝列。塗金定徵三品貢。鑄錯空糜六州鐵。君不見天險頻爲荒宴移。地脉潛教媚川洩。又不見洗祠枉殺邵廷瑁。賀江晚起潘崇徽。雙女山前戰艦空。流出降帆水鳴咽。江南眼見死牽機。西蜀同時亦灰滅。亡王獨爾保天年。佛力居然佑顛蹶。尋僧弔古起羈愁。漸西烏澹將沒。摩挲千過飽興亡。歸到虛堂轉騷屑。

題魏司馬縮課兒圖

吾聞漢有鄧仲華。勳高望重願不奢。子十三人人一藝。後乃各自名其家。又聞晉有劉長盛。教子紛綸經史並。蔚然門內七業興。北州學者莫與京。魏侯攬轡來黔中。諸郎玉雪驕春風。佳者龍鳳劣虎豹。頭角嶄露牙須雄。侯今施政政已通。訟庭長草青丰茸。晚衙初放常自教。短檠噓燄燒青空。此樂於今幾人見。寫入圖中洵堪羨。不將蠟鳳滴圓珠。共向銅槃誇異饌。青箱素業世爭傳。鍛鏤門風原不賤。清時養就凌雲姿。豈患雄文少人薦。我聾於世百不聞。愛就阿戎談夜分。投床隔屏支枕聽。琅琅送響清入雲。長公名聲如蘭芬。次公意氣更不羣。橫經奪得戴憑席。弄筆書破羊欣裙。盤空硬語輒敢和。跋扈真足張吾軍。杜言紈袴不餓死。蘇言識字憂患始。斯皆過激非至言。吾所斷章不在此。請標二事舉似君。符讀城南陶責子。

夜入羚羊寺

羚羊峽束初上湖。斷岸千尺叢青茅。衝波卷浪擗柔撈。舟師怖恐龜魚駱。松間忽出焮火照。始識蟻路緣秋毫。登登輕策攬臂上。蘇磴屈折藤蘿捎。榕陰黯黹穩栖鳥。石骨通峭愁飛猿。野僧披榛起肅客。纖塵不動鳴蒲牢。潮音傑閣亘天半。香雲縷縷盤空拗。側窗透空望江影。似有寶月中招。天風擺磨振仙梵。飄墮木杪驚鳥巢。吾聞仙人顏李蕭。伸臂運筆一丈高。見范石湖詩註英山古寺昔題壁。靈迹已邈難追鈔。茲宇崢嶸夾山立。佛力猛鎮千年蛟。一重沙界一重獻。腹背交壓菩提梢。搗天峭壁闕雲篆。浩劫期我騰神尻。埽

空試鐫三百字。雷與好事懸椎敲。脩羅降雨助墨海。餘潤立灑潮田磽。江深夜黑一揮手。燭龍銜曜應相邀。

明嘉靖中端州守曾直建八節祠於北門外以祀唐張柬之李紳宋劉摯鄒浩胡寅胡銓正張世傑而魏元忠以亢直貶高要尉獨不得與余以春日肅拜祠下心獨異之作歌簡吳太守繩年

劉高要爲鴻

君不見。魏元忠。布衣上書論兵事。金殿吐氣如長虹。鐵冠峩峩肅綱紀。豪奴杖殺都亭中。除惡志在清君側。白簡豈顧張昌宗。羣邪側目謠詠起。卑官謫墮炎荒中。洞夷畏威噤不發。至今崖厂流清風。吁嗟高要一隅地。貶官往往王侯充。韋承慶輩不足錄。如公豈合隨沙蟲。我來端水恣臨眺。步履晚出高城東。僂僂崇祠壓道左。大樹突兀寒烟空。人門肅拜認粟主。八賢名姓昭愚蒙。唐景龍逮宋迄命。大節歷歷摩蒼穹。茫茫宦跡證人代。屈指獨少齊貞公。元忠封齊國公諡貞去雷豈復有深意。討覈那不謀羣衷。笙鏞暗啞芹藻闕。閱二百載無人攻。自來守土責匪細。社稷尸祝宜甄綜。漢陽王傅志失載。高要志不載張柬之與公乏祀將毋同。旅窗作歌寄牧尹。會看闕憾能彌縫。豐祠從此標九節。亘千百世垂無窮。

連日飲止山堂梅花下簡盛上舍世揚

短卷晴莎輭。嘉招步履頻。梅雷殘歲萼。酒泥蚤春人。素壁廻鏡豔。枯碁算劫新。耳邊鄉語熟。客裏倍情親。

好客應須酒。看花可少詩。清吟君最擅。爛醉我何辭。冷蕊時窺座。飛禽忽踏枝。眼前生意足。不用慰衰遲。

題獨漉先生遺像

南村晉處士。汐社宋遺民。湖海歸來客。乾坤定後身。竹堂吟暮雨。山鬼哭蕭晨。莫向匡門去。霜風政撲人。秋井苔花漬。荒廬蜃氣蒸。飛潛兩難尚。憂患况相仍。拄策非關老。裁衣祇學僧。淒涼懷古意。豈是屈梁能。巢覆仍完卵。皇天本至公。蓼莪篇久廢。微巖採應空。劫已歸龍漢。家猶祭鬼雄。等身遺著在。泉下告而翁。

謝錫大將軍惠黃精

返黑思黃獨。羅浮產最良。斲來鴉背膩。馱送馬蹄香。靈液蒸丹竈。山苗曬石梁。羅淨有葛洪丹竈二山相接處有石如梁曰鐵橋

方言聽漸熟。知是野仙薑。

鄭氏休園二首

巷逐城陰轉。人傳谷口居。入門三徑曲。過嶺一亭虛。捉塵鷗邊席。行廚竹裏廬。不知尋鹿砦。裴迪近何如。蘇壁青蘿繡。苔楹老樹撐。穿花莎徑窄。照影古潭清。高臥茶喧枕。微吟鳥繼聲。卽看仙跡杳。猶剩石棋枰。

贛州傷王總戎濤卽題其浩氣集後

章江東望颺檣烏。太息元戎此寄拏。見說票姚工蹋鞠。豈知虜善投壺。蠻荒笳鼓開詩壘。瘴海風雲入陣圖。萬里一棺歸未得。尙容徐孺奠生芻。

秋日獨上五層樓望海

千級層梯宛轉過。浮雲棲棟下承阿。樓船瀨水思楊僕。黃屋蠻荒笑尉陀。蜃氣三春侵畫堞。駟夷百戰息  
礪戈。茫茫漲海東南去。極目天涯涕淚多。

九日曹孝廉逢招游光孝寺喜遇羅秀才元煥

相期九日散清愁。共向城西古寺游。樹葉翠含梁代雨。井波涼汲海門秋。吟邊剩韻邀羅袞。劫外零縑見

貫休。卅載津梁慙臥佛。又隨紅葉上經樓。

貫休畫真羅漢一幅。尙存寺中。經樓上有銅臥佛。

齋廚曲傍翠琅玕。爛煮松花恣意餐。識字耕田慚兩負。打鐘掃地喜相安。池光透日搖丹壁。草色乘秋上  
古壇。俯仰便生身世感。山僧只作勝游看。

拱北樓

蕩蕩雙門勢鬱盤。危樓直北拱長安。蓮花轉漏銅龍咽。雲葉棲簷鐵鳳寒。萬里行來初放眼。九秋悲後獨  
憑欄。珠明氣象層層迴。可許孤臣綵筆干。

得閩中諸故人書却寄

鄉心長在雁歸前。回首生涯意黯然。奉使自慚非陸賈。傳經差喜得彭宣。浮江客去剛三月。謂吳雅過嶺  
書來動隔年。坐待深更僧磬寂。不堪依舊抱愁眠。

哭厲徵君詩

復衣升屋叫荒祠。掌夢無憑祇益悲。服散幾年疎酒伴。分香先日放歌姬。契丹已定傳疑史。天水空鐫本  
事詩。泉路定應尋月上。斷風零雨說相思。君著遼史拾遺期與余撰金史補闕宋詩紀事百卷已刊行月上其亡姬也。

年年蹤跡滯揚州。兩點金焦健筆收。翠壁分題香界暗。玉山高會草堂秋。韓江烟月魂應戀。石友情懷老  
更愁。謂馬曰瑄曰璣他日來尋舊吟榻。不堪腸斷竹西游。

集素舫齋詠春陰

如船矮屋入新年。雨後偏慳曉日鮮。芳草客尋行藥地。輕陰人住養花天。檀欒翠竹清收影。澹菴荒池冷  
霧烟。山鳥錯疑巖谷暝。飛來長繞石牀偏。

秋日南屏僧舍茗讌

藤刺鉤衣石有稜。旋螺山路記來曾。貪涼客喜因秋健。無礙天真似水澄。竹裏煮茶清響發。樹頭安榻午  
風增。孤懷欲寄東林社。不見虛堂覓句僧。詩讓公在桐鄉。

紅橋雨夜

小雨微微未肯晴。漫游且共放船行。望中撥擢春泥滑。醉後推窗夜氣清。玉鏡雲蕤華月影。畫橋風度豔  
歌聲。珠鐙照水參差見。莫使閒鷗夢易驚。



悅枝堂坐雨

爲戀清歡未肯歸。棋完剛值雨微微。儘牽孤客偷閒坐。別約殘花恣意飛。似醉心情仍命酒。作寒天氣欲更衣。青鞵不惜衝泥滑。傍郭人家早掩扉。

秋集徐本清學圃

桐陰不雨也生涼。藥草因風自送香。弄水與鷗分野席。看山留客坐茆堂。舉杯已約月同飲。得句且邀秋共商。幾折危闌天半倚。葛巾吾欲傲斜陽。

咏木綿花

自極牂牁水亂流。低枝踈地入端州。最憐三月東風急。一路吹紅上驛樓。

過文明門見木綿花再賦一絕

只和柳絮撲雕闌。不共蘆花漲碧灘。可惜向春零落盡。西風依舊客衣單。



# 湖海詩傳卷六

## 陳兆崙

字星齋。號句山。錢塘人。雍正八年進士。乾隆元年召試博學鴻詞。授檢討。官至通政使。

蒲褐山房詩話。星齋先生成進士後。重入宏詞。游登瀛寺。侍直上書房。兼尹京兆。而意致蕭散。雖處輒有山澤間儀。書法蘭亭。取意簡遠。梁侍講同書云。本朝不以書名。而書必傳者。陳文簡公。元龍及先生也。余得其手蹟頗多。適瀟後皆失之。王寅修西湖志於杭州。因索先生遺詩。而令子同知玉敦深閣不肯出。及其孫桂生來京師。始以全集見示。并乞序言。因而甄錄。如左。

### 春正四日謝孝廉徵雲招飲一枝山房

亞字城南烏石西。市塵不到稱幽棲。一聲山犬穿雲吠。幾處林鳩帶雨啼。掃葉煮泉丹井暖。就花移棧石牀低。平生賸有春襟在。纔入新年醉似泥。

### 臘底病中有述

聲聲巷柝報三更。欹枕無眠對短檠。技到鳴驢真可笑。心關鬪蟻動成驚。中年斷欲衰偏早。瘦骨支寒痛漸生。已自低頭攻七發。其如歲事劇崢嶸。

二月二十日同孫二端人夏十二醴谷宿海淀隱師房。師號隱屏。僕與交久矣。頃來上御門益早。始初辨色耳。故翰林官侍班多借宿於此。一聲孤聲散林陰。好月當窗照素心。手版恰堪量丈室。顛毛渾不稱華簪。中春漏促眠須早。老伴情多話

轉深幸得締緣歡喜相。鎮容塵轍此相尋。

蒙恩賜鹿肉恭紀

一轡分需獵騎還。霜毛猶帶染輪斑。烟浮豐草長林外。味在松花柏子間。作炙送杯憐僕倦。下鹽爲脯笑余慳。平生頗切庭懸愧。須認君恩異等閒。

將回至熱河公寓途中疊南天門韻屬景垣和

萬曲東流湧玦環。輪困佳氣近堪攀。未成清暑宮中頌。前一月餘侍皇子讀書於行宮東禁以殘暑展圖期故也。忽自長楊獵後還。

有含靈先潤戶。潤戶用天官書語意。雲將入塞半遮山。今宵合刻題詩燭。屋底安眠慢啓關。

題邵戒山先生朝參遺像先生諱遠平康熙甲辰進士入鴻詞科累官少詹事

坐殘宮漏整冠裳。脈脈書思踏曉霜。未許家人窺藁草。藁草見班彪傳肯令隸役探綈囊。連逢昇泰忠逾篤。世閱艱難慮較長。借問椒馨滿楡社。幾人留得簡編香。

沈芳廷

字晚叔。號椒園。仁和人。乾隆元年召試博學鴻詞。授編修。官至山東按察使。有隱拙齋集。

蒲芻山房詩話椒園風流儒雅詩筆亦同書法在蘭亭丙舍間乾隆戊寅予入都遇于臨清同行者經月青簾畫舫書籤硯格纖塵不染望而疑爲魏晉間人也爲臬使時嘗欲以湯文正公斌崇祀兩廡事雖不行士論疑之。

題商秀才紫芝剝谿秋泛圖

騷人泛剝曲。爲愛名山多。谿光動古壁。秋色明烟蘿。時有清香來。遠渚留殘荷。菰蘆雜蘋蓼。奕奕揚微波。中流自容與。曲折隨扁舸。昔游每入夢。塵境浮青螺。況讀吾友畫。恍若重經過。雅懷將無同。歲月空蹉跎。溪山不負客。歸計當如何。

登泰山歌

五岳巨鎮推岱宗。插天萬仞青芙蓉。盪空層雲浩如海。夜半日躡扶桑紅。初經迴馬嶺。路轉山腹行虛空。旋過水簾洞。倒懸雪練噴長風。石磴盤盤歷盡十八曲。始覺捫參撫井呼吸。上與天關通。左招碧霞君。右叩青帝宮。羽衣金節飄飄半空下。邀我游戲秦吳兩觀東西峯。其間秦松漢柏雷雨已摧朽。焉辨七十二代玉簡金泥封。攫身絕頂高攀雲松。磨崖剔古篆。剝蝕如爛銅。獨有無字碑。屹立寒雲中。我欲大書補其闕。恐驚山鬼驅蚪龍。還尋祖龍避雨地。更訪天寶盤游蹤。祈天符命理無據。矧以縱欲希神功。粵稽重華事柴望。肆覲羣后昭協同。周王時邁陟喬嶽。明堂敷對來球共。東巡自古有典禮。詎尙封山刻石誇豪雄。吾聞泰山之雲膚寸合。氤氳條欻彌蒼穹。化爲霖雨澤萬國。神靈酬秩宜三公。默贊我后效雙理。永饗早潦銷兵戎。和平作頌覲神聽。多稔多黍歌年豐。

彈子渦

海天插水石如笏。忽肖怒濤勢鬱勃。留在波間山作骨。中有通水碇礮。雙巨彈子相磨汨。祖龍欲鞭鞭不得。生此莫計萬歲月。頃乘長風駕雲帆。攀掖登岸凌巉巖。俯視窈深宛在械。試嘗水味仍作鹹。若遺龍卵質不凡。移置隔宿劍合函。人有以彈子石移置他坡仙頻訪忘誓巽。愛之不異孰香饑。余亦癡與弗可。芟匹聆廣樂逢謨咸。品題奚止玉與瑊。歸躡石頂勝野巖。潮平一色春蕉衫。

次韻答樊榭見寄

市歲相思碧海遙。先生南返我辭朝。夢回梁月聞雞唱。香滿湖花發藕條。貧裏預籌遊岳屐。老來縱筆賦江潮。耦耕行踐秋蕪約。無盡意齋吟次寥。

立秋夕同中林履旋小飲隱拙齋

早見銀河角影斜。西風先到小庭花。涼生荷芰野人服。秋滿竹林居士家。團扇欲拋留篋衍。短檠初上對窗紗。題詩莫感流光速。明月當頭酒可賒。

夏之蓉

字芙裳。號禮谷。高郵人。乾隆元年。召試博學鴻詞。授檢討。

過十八灘

自我來西江。連宵黯風雨。旋渦濺急瀑。孤夢破柔櫓。舊傳十八灘。迅疾甚飛羽。其上排雲霓。其下蟠水府。

三曲奔雷霆。五座鑿門戶。涼灘尤斗絕。餘波尙歎吐。橫空折坤軸。入坎發機弩。滾滾驚狔奔。盤盤瘦蛟舞。怪石立積鐵。穿沸類鳴釜。決溜懸篷牕。雲霧暗江浦。憶昔游閩南。王事日靡盬。豈無川梁隔。未覺行役苦。江潭古人輕。窮薄命所主。敢謂恃忠信。時亦戒莽鹵。積悶腸腹回。愁多頰慵拄。所賴素心人。聯舟澹容與。險韻誇競病。諧談雜爾汝。驚湍倏已平。微陽照孤嶼。

### 齊召南

字次風。號息園。天台人。乾隆元年。召試博學鴻詞。授檢討。官至禮部侍郎。有賜硯堂詩。

蒲褐山房詩話。侍郎賦才敏慧。博學多聞。自詞林以大考前列。卽登鄉試。入上書房。退直歸澄懷園。上馬守門兵。舉赤捧驅之。馬驚墜地。傷于額。腦髓盡流。皇子聞之。亟遣蒙古醫生往視。殺牛取其胃。絲繩包裹。昇回館舍。至半夜乃得蘇。又傳以祕藥。閱六七月始痊。然于平生所讀。已不能記憶矣。其所著摺。皆未能成編。惟水道提綱。係充一統志。館纂修時。所撰於源流上下。縷析條分。使讀者如指諸掌。又有寶繪堂文集八卷。則浙江臬使秦君瀛刻之。詩亦編爲八卷。稿尙藏其家。今摘錄如左。

### 午窗坐睡

讀書花滿眼。憑几柳生肘。不如扶養和。一覺齊萬有。睡鄉鄰醉鄉。太古相傳久。跌坐遊華胥。至人或捧手。教我持斗杓。盡量飲天酒。導我餌丹丸。天地並老壽。形神豈長保。金石亦衰朽。葆真傳片言。長跪謹當受。人嗤晝作夜。我似浴去垢。醒來午炊熟。疑值邯鄲叟。

### 越城懷古

海內蓬萊是越州。畫屏中臥鏡中遊。家家接檻連青雀。日日開簾對白鷗。蟹舍罾懸明月夜。菱田標颭夕陽秋。我因一曲思狂客。煙水微茫何處求。

符曾

字幼魯。錢塘人。監生。乾隆元年。薦舉博學鴻詞。尋保舉。官至戶部郎中。有春鳧小稿。

蒲褐山房詩話。余初入京時。即見春鳧主人。時年已六十有餘。為戶部郎中。常以病假。所居韓家潭。令余直入臥內。床幃之外。書籤畫卷。若椀香爐。列置左右。几案無纖塵。四時長供名花數盆。余笑謂曰。入君燕寢。已如在斷橋籬落間。使人不復憶西子湖矣。其雅潔蕭灑。非東華軟香塵上中人所能企也。蓋自少與樊榭董浦玉几同學。故其襟情如此。詩亦清絕。不免窘於邊幅。而翛然物外之致。可想見其風韻焉。

宿水興寺德公山樓同厲樊榭作

空山行晚雲。褐衣濕春雨。昏際人漸希。杳靄入深路。曲磴伏潛流。叢篠紛交護。到寺僧相迎。把火話曩素。雨止鐘亦殘。星光出幽樹。境異心頓開。魂清跡偕赴。夜窗覓山歌。影忽落如霧。亂耳百松聲。鏘然奏韶濩。清極本無寐。有夢亦同趣。至晚重儻徊。烟華想流注。

雨中舟泊白門

濕雨低飄重。冥冥江路遙。殘蘆易蕭瑟。孤雁感飄搖。秋盡身仍客。舟停晚避潮。烟中一吟眺。遠樹見寒條。

菊



西風被墊菊，踈蕊自離離。瘦影交秋徑，寒香出短籬。淡能消世味，清復絕人知。持此縈懷抱，冰霜與後期。

燈夕懷稚威

東華雪霽後，烟月白孤清。開閣客初去，下簾苔欲生。梅花醒宿酒，斜月夢春城。除却吟兼臥，深懷望遠情。

重過永興寺

向與樊榭看梅，夜宿于此。去年廿八年矣。寺亦頽廢爲之慨然。

尋碑野寺蘚痕斑，祭酒風流杳莫攀。不見疎梅照寒水，祇餘修竹滿空山。雲歸初地鐘聲寂，秋散遙天客意閒。還憶春泉滴幽澗，竹窗深夜聽潺湲。

淮浦贈鴻漸僧，工畫能詩家吳中。

偶然淮浦寄閒身，卷裏青山與細論。到寺秋光紛滿眼，繞隄流水自通邨。師如鴻爪空留跡，我比蛛絲淨掃痕。他日支硎訪梅去，袖攜香雪叩柴門。

題畫

秋來游興遍天涯，山水方滋豈繫家。一枕清風住茗雪，未妨留客爲蘋花。

遊南湖慧雲寺

昨夜西風減漲痕，荒坡流水接城根。秋光多上綠荷葉，斜日晚花香寺門。

過皂林

蟬唱西風暑漸忘。蓬窗客睡試新方。夕陽帆影沈秋水。一路菱花送晚涼。

感舊

蒼涼無復舊遊蹤。踏月聞歌記昔逢。今日西風黃葉路。獨行荒寺聽疎鐘。

陳撰

字楞山。鄞縣人。布衣。乾隆元年。薦舉博學鴻詞。未就。有玉几山房吟卷。繡缺集。

蒲謁山房詩話。楞山為毛西河弟子。又工寫生。以墨筆之若不經意者。而蕭疎簡遠。品格極高。亦不苟作。故時人寶之。余定交。邗溝時年已六十餘矣。戊削而修。望之若閉。鷗野雀。嗜吟咏。今所傳吟卷。蓋一鱗半爪。住者或不盡是也。然句如二分明月樓頭影。十里平山檻外雲。兩時茶板伊蒲饌。一樹梅花貝葉書。詩卷白頭悲舊雨。燭花紅淚滴秋堂。焚香自寫關中影。把卷何須絃上聲。饒有晚唐人韻。

歲晚雜述三首

我旅苦瑟居。無以與日夕。惟有二程子。松門借柳過。從稱莫逆。如何復分張。數月虛接席。漫天雲萬里。到地雪

三尺。閉門時相思。開門斷行迹。百里尙如此。何況千里隔。時松門客真州借柳還宣城

楊子別三月。楊工求相見出意外。握手總片時。凡到寓齋即去咫尺阻塵盞。既無連牀話。亦乏斗酒會。身踐逆旅難。

時窮道途憊。獨有磊落腸。一往尙凌邁。今晨命歸楫。幡然返蓬艾。惟我留天涯。寒廳轉無賴。遙思急風帆。

雪花飛掌大。

時既苦鈍悶。客亦抱拙遲。耳目乏充對。胸膈靡妍思。盜盎花一叢。出自我友貽。水仙一盆。宋庭所貽。置之硯席間。坐起同燕私。衝寒發妙香。虛室來天機。不足爲人道。吾以絃吾詩。

擬古

黃鳥集柔桑。白駒逝空谷。豈不慕言旋。進退悲無告。作客每思人。投足多蹉跎。已無邱園存。十畝何由築。白雲時時飛。煩紆亂心曲。諺草不可樹。汎此杯中綠。

端居生百憂。獨步向原野。擾擾躬耕子。誰可與言者。倦翼拂樹還。頽景依林下。不見一心人。延首淚盈把。撫枕怨遙夜。振衣步中林。涼月皎素輝。照我松間栞。佳人不可觀。山川阻遐深。願因西飛羽。遠致瑤華音。雲路無由階。引領傷我襟。

天道不可問。撫躬良悠悠。昔爲公卿子。今爲輿隸儔。劍埋豐城獄。鼎沈伊水流。貴者可復賤。賤者將安求。何如遊太始。冥心委糟邱。

市門競錐刀。志士爭懷抱。誠使中心安。此外均草草。貧賤顧有分。簪裾何足道。松柏本不凋。何知春風好。陽鳥收餘映。夕兔升檐光。傲然一樽酒。醉倚空階旁。不知庭際露。泫然濕我裳。援槩譚陽和。清響激天霜。此曲苟可理。知音寧所望。

昔聞彭澤老。耽醉未能醒。折腰恥俗吏。歸來臥柴扃。茅檐秋日高。朗誦山海經。悠然觀物化。坐對南山青。

我行一何有。于世空沉冥。遐慕今已矣。太息增撫膺。

古蕩歸途

日暮東風急。歸途雨正繁。泥深粘屐重。雲濕帶林昏。野水喧漁艇。人家掩竹門。遙憐折梅處。回首更西村。

春盡

爲貧常作客。春盡未還家。故國重回首。江城正落花。屯雲依樹斷。江柳趁風斜。寂寞年時意。勞勞空歲華。

羈棲

羈棲成我拙。躑躅世都忘。草樹荒三徑。琴書亂一牀。苦吟貧亦好。屏跡嬾何妨。時復看雲去。和烟過石梁。

聞蛩

不寐夜聞蛩。淒淒四壁空。疎燈人醉後。細雨客愁中。失路依衰草。長吟向暗風。壯心殊突兀。爲爾感飄蓬。

□□

日沒秋陰靜。閒庭向夕昏。鳥栖無定樹。葉落半空村。砧杵誰家急。園林幾處存。衰燈寒照客。獨酌盡殘尊。

新柳次韻

淺拂輕描畫閣前。微黃楚楚倍芳妍。春風驛路初橫笛。夜雨江城恰禁煙。試看藏鴉還計日。憶曾繫馬忽經年。無端觸忤生惆悵。豈待吹花賦別筵。

漲

木落烟江漲。沙崩古樹根。汀洲蘆葦沒。繫艇到柴門。

葦

疎牕秋氣靜。清露濕離根。細語蛩聲急。愁人自掩門。

螢

月黑秋林昏。映水忽明滅。微光聊自照。不假因人熱。

艇

放艇沿清溪。隨風去容與。隱隱聞漁歌。蘋香不知處。

筇

白恰清秋客。蒼藤碧玉紋。醉扶三徑月。吟倚萬峰雲。

箏

淨展桃笙滑。涼生薤葉秋。橫琴山月浸。欹枕水雲浮。

樵

腰鎌入秋山。山秋足烟樹。長歌行荷薪。踏葉尋歸路。

經舊酒家

小市紅鏡憶昔遊。短衣側帽劇風流。錢郎已去王郎死。忍過樊川舊酒樓。  
予庚辰北上。同王紫欄使君及歌者錢郎會飲於此。

送工求

天畔離思夢未醒。登臺秋露下殘星。落花吹徧江樓笛。偏在關山獨自聽。

朱稻孫

字稼翁。秀水人。彝尊之孫。貢生。乾隆元年。薦舉博學鴻詞。有六峯閣詩稿。

蒲褐山房詩話。稼翁少孤。其祖撫之。漁洋題小長蘆卷。所謂桐孫稻孫者是也。稼翁以名人之後。所至人傾慕之。乙亥丙子間。年近七十。游揚州。為虛雅雨。運使上客。因出其祖所撰經義考。後半未刻者。雅雨為刻其全。其後開四庫館。詔求遺書。得以全帙獻於朝。上題詩冠首。由是流傳海內。蓋可謂能守先澤者矣。晚年貧不能支。曝書亭藏書八萬卷。漸致散佚而已。之所作亦久不傳。余與其孫伯承為鄉試同年。又在揚州同寓梅花亭數月。故得見其詩。張匠門序所云。始則氣猛而格上。後則境觸而情遙。殆不虛也。

月夜宿清流關

重關昔設險。山勢多劣削。徑小路盤紆。有蹇策不得。秋月皎夜光。遠近見峯色。分明龍眠畫。具此大筆力。緩步過山坳。櫛櫛費攀陟。鐘聲雜鈴聲。可聽不可即。白露濕我裳。一餉林間息。

過張顛三水周林留題

一曲波淪小。軒窗四面懸。儘能留散客。自可酌清泉。風定花枝亞。林疎塔影圓。撐他湖上去。合喚總宜船。

甌舫卽景

節未逢寒食。傷心已禁烟。欲臨求米帖。久讀絕交篇。樹有新禽集。牀無故客眠。淒涼桐竹下。卽景淚潛然。

賦得十月先開嶺上梅

峯前迴雁北飛時。早是東風第一枝。小雪乍晴行客路。短牆深護曲江祠。青猿上樹休教折。翠羽中宵尙未知。說與隴頭人不信。除非驛使寄相思。

無題和柘南

纔渡銀河會女牛。瞳瞳日上最高樓。人當欲別終難別。曲記無愁果有愁。絕世自應稱北里。憶梅從此下西洲。水邊輪與雙鸕鷀。皎鏡芳塘暖共游。

片帆重指莫愁村。好向南塘舊事論。桃葉滿江猶可渡。梨花如雪不開門。隔窗煙冷思秦女。尋夢風颺逐楚魂。欲結同心何處是。空山夜夜叫哀猿。

一縷烟銷日未晡。箇人無賴倚窗遑。淺流脉脉終難渡。弱柳依依欲待扶。料得牆東憐宋玉。空教陌上憶羅敷。絲連藕斷渾閒事。對此踟躇計轉迂。

已逐鈿車下碧霄。經春驀地動歸橈。曾隨月底修簫譜。漫向樽前試舞腰。鏡裏獨憐張靜婉。道傍最憶董嬌嬈。年來已作傷心樹。撩亂長條復短條。

東溝

一溝淺水碧灣環。紅板橋西柳可攀。日暮晴雲趁風去。隔江時露六朝山。

七夕詞

最好人間落葉時。宵分河曲慰相思。不知露冷香風起。開到秋花第幾枝。

陳章

字授衣。號絨齋。錢塘人。布衣。乾隆元年薦舉博學鴻詞。有孟晉齋集。

蒲錫山房詩話揚州巖商所萃喜招名士以自重而馬氏秋玉佩兮小玲龍山尤爲席帽所歸時  
虛雅雨任運使又能奔走寒峻於是四方輻輳而浙人尤多如全謝山祖望陳楞山孫厲太鴻鶚金  
壽門陶巖箕村元藻及授衣弟江皋尤以領袖稱授衣詩  
上規章王下則錢耶非戴石屏等江湖小集所可並論也

荷汀納涼

孤遊去塵遠。小坐戀烟渚。水風能清人。何地著炎暑。紅蕖媚明波。娟好如靜女。冷香灑生衣。淒若冒微雨。  
不逢人浦船。只有沙禽語。日暮凝碧雲。因思涉江侶。

西潭夜漁圖

秋潭夜氣澄。烟水湛寒綠。孤艇淡夷猶。蘆灣凡幾曲。涼月沙際生。亭亭耿如燭。知君豈爲魚。要令幽意足。  
且莫扣舷歌。恐驚鷗鷺宿。



遊攝山

朝隴涉風湍。暮策冒松靄。攬勝情已收。出險心彌泰。度澗屐踏石。憇林一解帶。微涓注藥叢。頽陽麗崦外。足跡半吳越。默歎此遊最。幽篁裊孤磐。投宿知所在。攜月入荆扉。然鐙步香界。愛詢前遊人。夜靜引清話。緇牀養脚力。明欲領其槩。

僧樓坐清曉。雨在西南峯。忽然雲滂合。不見寺外松。殘梅飄歷歷。澀澗鳴淙淙。天影互明晦。山氣雜春冬。陸子鐘輝發高興。不顧霑冥濛。樓帽曳筇屨。予亦欣相從。名園叩幾處。危磴拾百重。風爐酌乳泉。石窟瞻金容。回頭望來處。但聞岩下鐘。巢禽競歸翼。遊客尋還蹤。帶溼轉蘿陰。門徑煙已封。

夏夜宿環溪

追涼昨有期。還尋舊宿處。雙鵝向客鳴。荷葉門前路。登閣盡殘霞。杳然平楚暮。草響農牧歸。野語籬根度。藤竹多清陰。幽意與心遇。所嗟縛塵勞。經過不獲屢。主人情最殷。埽牀兼治具。風吹林間酌。月照池邊步。夜深倦投席。水軒微滴露。晝暑氣難斂。轉枕輒復寤。驚魚靜還躍。繁螢飛且住。清絕愛荷香。披衣不待曙。

早春田家

爲農傍東臯。知時卽生理。歲酒尙有餘。獨酌茅簷底。宿雨澹杏花。微風活谿水。珍重數日閑。作勞自此始。

晚步劔池

書遊夜復至。境靜了不同。疎星明澗底。人語春山空。僧扉待我掩。露滴松間風。

舟中望縹緲峯

但作孤峯峭。不似羣山亘。翠影落前灣。夕陽峯背暝。應是無行人。松花滿風磴。

孤泛

寒溪景蕭條。清幽復窈窕。偶然泛扁舟。不必有同調。林疎見山樓。岸曲隱漁釣。喧寂與曩殊。但覺所歷妙。密竹已夕陰。平岡尙殘照。搖搖興難盡。煙際孤鴻叫。

行庵坐雨

漠漠雲初合。蕭蕭竹作聲。雨喧人自寂。苔冷地逾清。幽鳥忽雙下。疎鐘時一鳴。茅檐猶點滴。樹杪夕陽明。

江上早行

侵朝沙際路。麥冷尙裝縣。幽鳥初辭樹。清江半入煙。迴橋藏釣艇。空谷響耕田。幾處晨炊絕。憂心祝稔年。

歸舟

負土荒山去。蒼茫欲雪天。江湖暫歸客。兄弟就衰年。濁酒孤鐙話。寒更一舸眠。薄田如可買。送老傍松阡。

落日放船好

落日放船好。沿緣出綠荷。低田分水急。高柳得煙多。欲罷當窗釣。時聞隔浦歌。江湖後歸客。閑詠意如何。

同太鴻話吳興舊遊和韻

春風陳迹已漫漫。爲話蘋香憶碧瀾。四月桑陰門巷綠。半城谿色市橋寒。老漁舉網銀刀出。少婦織絲雪繭殘。果有心期不相負。三閩水閣未應難。

悼玉裁

雪涕同興宿草情。月襟水佩憶平生。蛾眉自昔嗟難嫁。牛耳從今失主盟。俊及清流叨合契。錢郎傑作讓齊名。海山兜率知難覓。聞道芙蓉別有城。

寄秋涇

亭臯落日惜分攜。滿樹桃花鶻鳩啼。春色漸歸芳草外。行人應近灞陵西。情深留別詩常記。路遠相尋夢易迷。九曲黃流如箭激。鯉魚可得斷書題。

鷗灘

蘆叢鷗所家。水淺鳴還浴。月夜上春潮。飛向前灣宿。

雨後泛舟過篠園

谿流凡幾灣。荷葉欲無路。撐艇到籬門。一蟬吟碧樹。

夜過吳江

涼波如畫泛輕艫。夢醒秋衾月在牕。臥聽漁人煙外語。白荷花裏過吳江。

篠園水亭

枕簟茶瓜幽興長。柳深池館自生涼。片雲吹過西陂去。一片荷花無夕陽。

程廷祚

字啓生。上元人。諸生。乾隆元年薦舉博學鴻詞。有岫雲閣詩鈔。

贈顧進士復初

憲廟昔臨御。恩波覃八極。渙汗其大號。邱園交束帛。維時承平久。化成邁往昔。里巷聞絃歌。窮陬務修飭。聞命各戒裝。爭先赴上國。儒冠旣峩峩。征車復奕奕。或懷隨侯珠。或握荆山璧。或披蘭茗新。或掣滄海碧。鳴珮集丹陛。心情接虹霓。就中星斗寒。鉅儒出無錫。讀書破萬卷。性同杜氏癖。著述窮歲年。鑽研人無隙。宣尼生周季。仰窺王迹熄。然後作春秋。萬古垂法式。筆削見是非。義存三代直。當時游夏輩。欲贊空太息。如何後世人。無端奮私臆。邱明見國史。事實頗能核。傅會雖時有。網羅著勞績。齊魯多陋儒。厥惟高與赤。鄒夾未有書。莫由問失得。三家遂鼎峙。左氏仍後植。自茲口說滕。聖經嗟晦蝕。功令尊胡氏。學子徒守墨。首先革周正。先聖寧蹙額。一褒復一貶。譁張令人惑。褒貶本所無。安用常唧唧。忍使日月光。蔽虧重雲黑。先生歷然興。掃除不遺力。百家咸披靡。似用大師克。煌煌大事表。卷軸日盈積。發憤闡闕文。塵埃教蕩滌。

曲說從此廢。禾稼驅螟螣。上則考天時。殷勤補長歷。下則綜形勢。聚米圖疆域。僭禮與敗度。亂賊暨戎翟。事事關大義。臚列各就職。載觀交兵篇。往來正如織。旌旗猶在眼。開卷若憑軾。晉楚爭夏盟。宋鄭困行役。向戌忽弭兵。難免司城責。五材民並用。戒懼存法則。霸統經再變。王猷竟永寒。人欲日橫流。瞻烏更誰適。竊取有深意。肯令鱗生識。君書出雖晚。重到杏壇側。鐘磬鑑然鳴。清音動四壁。憶昔鴻詞徵。余亦預末席。客居郊壇西。頗愛厥境僻。涼風下庭梧。朝昏玩義書。冥會得懸解。忽然塵慮釋。與君偕罷歸。十載臥泉石。著書曩未成。今也喜大獲。假令留青瑣。茲業諒俱寂。深荷皇天慈。慨然增感激。

### 翁照

字朗夫。號霽堂。初名玉行。字子靜。江陰人。乾隆元年。薦舉博學鴻詞。十六年。以經學徵。有賜書堂集。蒲褐山房詩話。霽堂少時曾奉教於毛西河。太史西河序其詩。盛爲推挹。常詠囊衣。有風雨一身秋之句。從此得名。後在浙幕中。詩亡失大半。今所刊賜書堂集。十之三。四爾其爲時。傳諷者。則有一株夕陽。連漢苑。二分春色。在蕪城。小樓夜半。朦朧月。深院秋千。澗岩風。青拂河橋。風乍轉。綠昏江店。雨初來。春寺煙深。聞粥鼓。午塘風暖。度鷓鴣。一聲啼鳥。破春寂。數點落花。生暮寒。殘月半痕。巫峽晚。夕陽一片。洞庭秋。關塞梅花。愁裏曲。池塘芳草。夢中詩。夾岸綠陰。垂柳渡。滿篷紅雨。落陽天。沈椒園臬使云。先生年高。藤杖方袍。須眉朗映。其詩風致盎然。而神韻瀟灑。

### 送歸愚沈少宗伯予告歸里

片帆潞河來。相值在泇水。知公子告歸。南風指故里。敬讀御賜詩。千丈榮光起。載廣洵一德。眷注情無已。遭逢媿虞唐。進退善終始。公歸有程期。我老失準軌。離筵布南池。鳴蟬綠陰裏。無計更挽留。去去波如駛。

但願南風狂。維解舟仍艤。

憶昔初識公。其歲當壬午。兩地合雲龍。僑札通縞紵。吳門與暨陽。來往互賓主。矻矻商古今。經經訂出處。龍躍終升天。雲散難作雨。遙遙兩地分。間隔寒與暑。雲龍今復合。情深逾昔者。叶齒增易驚惕。道進無違拒。相期同惜陰。晚節師侃禹。

送公歸去來。悠悠返荷屋。作社赴雞豚。約伴同樵牧。引權香水溪。采芝硯山麓。誰識袞冕儔。依然抱黃犢。道充輕祿位。天定歸淳朴。我將還故林。老去愛雲木。三十三山間。結廬臥空谷。公能復來過。江臬路應熟。念舊話前程。草堂夜同宿。

涵秋亭小憩懷師十五南塘

疎林過微雨。返照明殘滴。獨立野亭中。蕭然起寒色。澄湖落雁斜。古渡啼鴉寂。不見遠歸人。楚天淡秋碧。

秋雨

旅泊滄江上。頻聞楚雨過。昏黃低雁陣。寒綠漲鷗波。氣逼孤燈暗。聲兼落葉多。故鄉鰕菜好。何日着漁蓑。

重過張墨岑別墅

重尋方外侶。林壑認依稀。一逕入紅葉。數峰橫翠微。夕陽明笏笠。秋色上荆扉。纔到幽棲處。逢君采藥歸。

將之北河留別

織就文禽作對飛。一篝燈火久相依。耦耕當日言猶在。佐讀終年計轉非。但使我能拋犢袴。肯教君更泣  
牛衣。料應不學蘇家婦。金盡歸來也下機。

贈沈侍御椒園

展卷光騰五朶霞。總由忠愛發精華。詩宗杜老推雄抱。文泝昌黎屬大家。午夜疎燈焚諫草。春風小驛見  
常花。懸知兄弟聯吟處。添得新詩護碧紗。

馬曰瑄

字秋玉。號嶰谷。祁門人。監生。居揚州。候補知州。乾隆元年。薦舉博學鴻詞。有沙河逸老集。

晉樹亭坐雨同邵北崖程泝江陳竹町陸茶塢張西園弟半查分得坐字

入秋已浹旬。殘暑氣未挫。暑盛猶可逃。旱甚真無那。今朝北郭苔。欣逢上客破。老樹垂千年。穉竹搖萬個。  
颯然好雨來。晴風先滿坐。一時研席涼。幾處農人賀。擬作甘澤謠。君訝我當和。

爲寄舟上人題天池石壁圖

中吳山水佳。天池夙所慕。往歲恣行吟。曾踏松陰路。是時九月中。風葉落如雨。上涵明鏡光。倒影射寒兔。  
石室千載留。高士幾回住。別來踰一紀。夢魂屢沿溯。寄公湯休流。文字契眞悟。攜圖出示我。一見豁沉痼。  
念往俗慮湔。懷新秋色赴。惜哉筋力衰。足蹇慚故步。持此當臥遊。白雲莽回互。

五月十二日集篠園

時候黃梅近。林亭宿雨晴。早荷爭水出。晚筍上階生。雲影過橋斷。茶聲隔院清。可憐城市客。無復此閑情。

擬復竹西亭和泝江太史

邗溝東畔竹西亭。歲歲尋遊感廢興。細雨斜廊還有井。蜀井在禪智寺夕陽秋寺欲無僧。幾時碧玉圍千个。依舊

紅闌覆兩層。收取江南煙樹色。蒼茫祇借一枝籐。

甘露寺

斷磴猶存劫火銷。祇憑絕頂看金焦。我來十月霜風厲。紅葉飄零似六朝。

馬日璐

字佩兮。號半樵。乾隆元年薦舉博學鴻詞。有南齋集。

西山擬常徵君建

幽思落巖穴。起尋山澗鐘。松風導我前。石磴希人蹤。落日辨遠樹。一片煙濛濛。氤氳花氣合。窈窕禽聲通。空翠望不極。雲歸知所終。況茲波上月。瑩魄明前峯。洲渚暝色至。蒲稗浮光重。此時閑眺聽。餘清貯心骨。

雁足燈歌

炎漢燈檠二十五。想見神壇照風雨。秀華細錯首山銅。未入歐陽一家譜。集古字遺西漢前。丹陽裴守搜



荒烟暮來雁足燈銘古。榮宮造自黃龍年。何如吾家曩所得。自昔曾無弋人弋。瓜皮綠活土花鮮。螢尾蠶頭月半蝕。銘文緣槃之半故云。初疑槃仿蓮勺形。漢蓮勺盤銘亦彎環如月。既認趾同鳧蹠青。老眼觀書夜行燭。年號依稀辨竟寧。竟寧年間屢郊時。火續燈傳接芳苒。麟鬚難以拂霜蛾。零落蛻膏與鳳髓。不將歌舞挂樓頭。曲柄須煩黨伯舟。皎然細注輝齋壁。浙爾涼風裊素秋。墮葉紛紛窗戶裏。似有哀鴻拍秋水。炎光銷盡一咨嗟。開閣殘燈竹間起。

秋霽集看山樓得山字

秋色矜新霽。憑闌此解顏。雲涼花氣薄。天淨鳥行閒。喜有三間屋。還添一角山。何當諸勝侶。吟望不知還。

遊冷泉亭

鐘韻一星星。幽尋獨此亭。山從入寺好。泉欲過時聽。冷氣怯春服。清輝隱翠屏。我來巖下坐。刻石記曾經。

杭州半山看桃

山先燄燄映明霞。燕子低飛掠酒家。紅影到溪流不去。始知春水戀桃花。

張庚

字浦山。號瓜田。秀水人。監生。乾隆元年薦舉博學鴻詞。有強恕齋集。

蒲褐山房詩話浦山工於山水世多以翰墨稱之不知學問淹博如通鑑綱目釋記糾繆補註極爲精密古文簡樸五七言古體詩頗見古人堂奧丙子丁丑閒君來往廣陵常同樽酒盡讀所著書故

得悉其  
深造

聽葉亟齋談霍山之勝書此爲尋游之約

結廬南嶽下。耳目飽幽勝。一雨百泉鳴。高秋衆山靜。地僻無澆風。居人葆真性。聽談未及終。吾心已潛泳。請爲來歌期。再作誅茅訂。

游法慶寺

勝游敢後期。況乃秋容好。林吹聽方清。山氣攬逾顯。崇寮敞閎爽。仄徑入窈窕。烟篁旣深靄。雲闕還高造。逸境延冥搜。元情逮幽討。淪泉和石髓。纈裳貯瑤草。芳潔良自娛。冥微有誰攷。殘陽上遠峯。夕霏翳虛療。側見帶蘿人。勞心鬱懔懔。嘉惠不我疑。逝將信夙抱。

聽雨

曉夢忽泯漾。空庭春雨聲。浙瀝集芳樹。蕭散侵軒楹。迴風時一過。林鳥寂不鳴。重門尙未啓。虛幌已已明。欹枕豈能寐。悵然生遠情。懷勞莫自歇。傷舊復多縈。大江日東逝。亂山杳西迎。客鬢霜雪積。故園無草平。方知衡泌客。寧讓安期生。

三橋峽

叢峯忽相合。蒼翠鬱沉幽。入深路逾峻。陡壁夾洪流。怪石皆側出。奇狀奚以侔。懸若列鈇刃。蟲如攢長矛。

天府開武庫。森森眩人眸。隋磴間危棧。升降懷惕憂。乍看午景射。倏忽嵐陰稠。哀猿啼斷續。古木盤虯。奇花媚晚色。瘦竹清脩脩。於山歎觀止。於險驚絕儔。自笑白髮翁。有此南荒游。

### 大樹舖山家

連峯翠無際。環列如圍屏。中有千幅田。灑灑畦水平。山村倚崖麓。灌木杏葱菁。於時能收穫。百室歡盈寧。園柑垂早黃。圃韭舒晚青。石泉瀉沙淺。野花被徑明。爭桀羣雞集。歸巷黃犢鳴。征夫方倦役。對此尤移情。酒香試新籩。斟酌依前楹。夕曛半隱見。浮嵐藹崢嶸。微風一相拂。秋氣彌以清。憶昨曾過宿。風雨昏冥冥。今來值霽爽。萬象粲自呈。栖栖感徂歲。僕僕悵勞生。誰曰夷俗陋。計將闢柴荆。

### 倪雲林溪山無盡圖

清闕高人標格奇。意趣豈復同凡兒。偶然適興寫山水。冷冽疑欲凌人肌。想是霞餐却火食。不然那得清如斯。此卷高尺長減仞。幽溪重複山逶迤。枯林一簇山之麓。林下深深置兩屋。蓋茅零落牆欲頽。屋後蕭疎映叢竹。柴門不閉闌無人。烟波迤漾平侵門。旁通略約亦將斷。舟楫沉齧洲沙痕。崇峯側嶺絕蹊。荒寒似寫亂後村。要是生當至元末。亂亡在在驚心魂。目有所傷手自應。豈惟迂癖成性存。此卷筆法尤可喜。細觀不與常作似。山石居然王右丞。樹木全偏營邱李。枯淡雖云是本色。神味須知備衆美。李君珍惜同隨珠。自云得之酒家胡。出坎藉茅非偶爾。定是迂翁神與俱。

### 陳黃中

字和叔。號東莊。吳縣人。諸生。乾隆元年薦舉博學鴻詞。有東莊遺集。

蒲褐山房詩話和叔爲少章先生子。校讐考訂是其家傳。而和叔少時即留心史學。頗以經濟自負。常遊督撫幕府。晚年歸家。病。宋史繁蕪如湯義仍王損仲屢有刪故。皆未成書。因將宋史紀傳表共改定一百七十卷。但以未諳天文歷律故。各志尙屬闕如。歿後其稿本尙存于吳下藏書家。詩不多作。彭尺木收而刻之。未爲完本。卽予所見。其在長沙作五言排律六麻一百韻。則已失之矣。

#### 夜泊黃河口

永夜河聲壯。扁舟客思孤。山川雄兩戒。漕粟擁千艘。明月中流湧。歸鴻隔岸呼。一生江海意。對此獨踟蹰。

#### 武昌登樓

行藏落拓漫登樓。楚塞山川四望收。納納乾坤懷管樂。滔滔江漢憶曹劉。五年重到仍爲客。此地從來說上游。水漲民饑風景惡。未知誰作徙薪謀。

### 胡鳴玉

字廷珮。青浦人。貢生。乾隆元年薦舉博學鴻詞。

#### 初夏訪御李

喬木疎籬似畫圖。數椽老屋向城隅。隔林雨霽鳩呼婦。近戶風輕燕引雛。花委藥欄紅欲盡。草深蔬圃綠全蕪。知君剩有郦筒酒。許我池邊一醉無。君近日白蜀歸。

# 楊潮觀

字閔度。號笠湖。金匱人。乾隆元年舉人。官至瀘州知州。有吟風閣詩鈔。

瀘州山房詩話笠湖性情倜儻。王畫竹詩亦多傑句。尤王度曲所著吟風閣傳奇。如語葛公夜渡瀘江寇蔡公思親罷宴話劇聲情磊落。思致纏綿。雖高則誠。王實甫無以過也。子掄字方叔。掄字承叔。皆能詩善賦。體著名於時。

## 雨中登劍閣

煙火迷秦塞。登臨帶雨來。鷹聲盤絕壁。虎跡破蒼苔。古戍風雲暗。重關劍戟開。時平天失險。空憶勒銘才。

## 牛頭山

于盤出劍閣。萬仞上牛頭。嶺勢雲中見。江聲地底流。連山風送雨。滿谷樹生秋。何處葭城小。深藏大壑舟。

## 魏公子無忌

太息夷門市井紛。信陵高躅想風雲。誠知天下無雙士。莫道當時有四君。屠僧監門登上客。婦人醇酒畢奇勳。可憐未冷英雄骨。動地函關又出軍。

## 登雅州城樓和觀察杜凝臺韻

千盤轉粟上青雲。使節籌量動夜分。尙有兵烽通夕照。未妨農耜遍朝曛。庾樓嘯起邊城月。嚴道春殘故壘雲。所喜年豐堪借箸。緩裘亦足張吾軍。

負戴千羣鳥道中。廟謨豈爲重邊功。風雲列陣原無戰。枕席行師偶未通。肯使唐蒙輕發卒。敢言魏絳且和戎。天威震疊須臾事。望氣應知率舞同。

城上頻傳叱馭聲。黎風雅雨倍關情。

昔普兼守雅州

山連相嶺遙飛輅。江帶平羌近濯纓。望裏干戈銷舊壘。坐聞

鐘鼓報新晴。一緘訝許巴人和。筆陣空慙細柳營。

### 曹秀先

字冰持。號地山。新建人。乾隆元年進士。官至禮部尙書。諡文恪。

#### 雄縣舟中

繞城一水自彎環。野色雲容各自閒。便當乘槎溯天漢。眼中只惜少名山。

#### 途中雜詠

古道垂楊雨幾巡。披襟剛是晚涼新。平生愛讀秋聲賦。聽到蟬吟亦可人。

# 湖海詩傳卷七

宋邦綏

字逸才。號曉巖。長洲人。乾隆二年進士。官至戶部侍郎。有紅杏齋集。

霜鐘

長夜天將曉。鐘鳴蕭寺寒。響沉和月落。聲遠帶霜殘。老屋燈初暗。閒窗夢已闌。誰將斷續意。靜證道心安。

思歸

離情日見鳥分飛。惆悵傳經心事違。江雨山風勞跋涉。可知官好不如歸。

觀保

字伯容。號補亭。索綽絡氏。滿洲正白旗人。乾隆二年進士。官至左都御史。

九日同友人登雲光洞賦成十韻

崖口地名初迴獵。相於興不違。況穿紅葉谷。共叩白雲扉。嶽坎仙關豁。青熒佛光微。倒垂花片片。突起霧霏霏。開闢神工大。超遙羽駕歸。三門藏奧蹟。一徑引清暉。乳滴殘碑在。苔荒古篆稀。景光延過客。空翠濕征衣。暫息塵埃躅。潛窺造化機。山風任吹帽。欲別尙依依。

德保

字仲容。號定圃。索綽絡氏。滿洲正白旗人。乾隆二年進士。官至禮部尙書。有樂賢堂詩鈔。

秋日

荒村無事掩柴門。世味嘗同嚼菜根。靖節未歸彭澤里。相如獨守茂陵園。風來別院生虛籟。苔長空階沒舊痕。此景此情誰會得。半床殘帙一清尊。

春歸

百計留春春亦歸。東君欲別更依依。空庭夜雨醒殘夢。芳草天涯怨落暉。繞樹乍聽鶯百囀。銜泥驚見燕雙飛。欲尋紅紫無蹤跡。花點池塘絮點衣。

錢琦

字相人。號瓊沙。仁和人。乾隆二年進士。官至福建布政使。有澄碧齋集。

渡海歸重經澎湖

柱石砥中流。狂瀾面面收。有山皆種麥。無島不藏洲。重到兩年客。孤乘一葉舟。何時成利濟。消息問潮頭。

送魏夏初歸慈谿

連宵情話思依依。夢冷西風憶故扉。未信才多偏折命。洵知遊好不如歸。板橋霜重人初起。江岸潮平雪



正飛。贏得手中金線在。遲君重整嫁時衣。

### 王會汾

字蓀服。號晉川。無錫人。乾隆二年進士。官至吏部侍郎。左遷大理寺卿。有梁溪詩鈔。

### 江陰迴舟憶芳三金佩亦文諸子

靡靡逐清景。迢迢傍芳澳。水岸一花明。殘陽數峯綠。沙鳥下仍飛。漁唱斷還續。美人方阻修。相思憶如玉。

### 朱光草蟲同年何克思索題

油窗日暖殘霞烘。飛絲落絮春濛濛。起摩倦眼潑茶乳。神輿尻馬遊無窮。鯤鵬么麼一氣中。人間日日天池風。且隨羣動自翺躍。安用結束誇兒童。君不見古來文物埽絕蹤。長安畫史多傭工。更無弓刀鬪襄鄂。祇吮鉛粉摹安豐。貂蟬插髻有何好。意思蕭索如枯蓬。不如朱光草蟲畫。手腕所到天機融。荒寒意態入毫楮。碧花翠蔓懸秋紅。恍然坐我故山裏。草根露濕吟秋蛩。開圖索句無忽忽。甕天發覆難爲功。人生磊落自可耳。不羨爾雅箋魚蟲。

### 札克丹鄂佛洛營觀蒙古騎生馬歌

札克丹營氣蕭爽。沙坡澶漫連平壤。諸蕃遊騎爭驅入。霧鬣風鬚恣來往。呼韓晚上羊羸羹。幔城合奏琵琶筍。曲終更呈舞馬戲。奚官碧眼虬髯獐。鞭鞘一拂馬齊縱。附尾綠鬃不施鞵。千夫疾躍萬夫唱。雪花旋

捲塵飛霧。注坡驀礪。走佚。舞袂交竿。捷有神。忽然墜地。勢驚絕。慢如健鶴。翻輕身。舉後蹶前。雙掣。凌虛制變。爭毫髮。馬閒出入。馬不知。逸態雄姿。轉相發。至尊一顧。神沖灑。人馬咸資。控馭工。少府金錢。服官綺。拜恩蹈舞。擎歸籠。卡輪競出。尋荒壘。蒙古諸蕃帳房。例在旌門外。筆築風高山。月起御營。鎗火燦華星。萬帳烟光夜凝紫。

### 喬光烈

字潤齋。上海人。乾隆二年進士。官至湖南巡撫。有最樂堂文集。

秦中王素村招飲舟中至虎邱後山遇雨卽次素村韻

爲喜詩人折簡招。山塘十里碧迢迢。小橋曲岸連芳草。綠酒紅筭引畫橈。山雨忽飛林影暗。波光斜漲寺門遙。梵王樓閣溟濛裏。好景憑誰寫素綃。

夏日與華州王刺史登雁塔

金利崑嶠上碧空。清涼高處拂天風。危欄下俯真無地。畫拱層飛欲起虹。掃盡炎氛歸象外。迴看佳氣滿關中。使君應似高常侍。正喜題詩舊日同。

### 阿桂

字廣庭。號雲巖。章佳氏。滿洲正白旗人。乾隆三年舉人。以蔭生補大理寺丞。歷官至武英殿大學士。

一等誠謀英勇公賜寶石頂四團龍補服薨贈太傅諡文成。

蒲褐山房詩話公像著紫光功存册府勛名德望所不待言二十餘年為太平宰相而意猶不自謙蓋本文勤公之教嘗令其事鄂文端公爾泰朱文端公軾楊文定公名時徐文恪公元夢蔡文勤公世遠承其指授又與王錫林蔣湘鵬諸君游意在儒林文苑不以韜略為長也統兵所至決策如神曰在西陲即親行陣屢著膚功及木果木兵潰後五日而復美諾二年而掃金川甘肅化林坪鹽茶聽回人連年蠢動負固皆一兩月平之故番王悍將率拱手聽命悅服無間言其後偏裨官至將軍提鎮者數十人至督撫者亦十餘人及入內閣愛才好士見官屬必教以慎持名節毋營競見外吏必戒以廉潔自矢毋貪黷所居總事前僅容旋馬日食不及四簋絕無園林聲色之樂比其薨也天下識與不識皆嗟嘆之先是公從軍於北路及平伊犁收回部拓地二萬餘里上欲置兵屯候尉益壯西北屏藩同事大臣未肯肩其任公獨奏請從容建置河渠集農功立驛傳築城積穀商旅交集不十年而甌脫變為都會自嘉峪關西天山以北直接科布多烏里雅蘇臺與喀爾喀諸旗相接而葱嶺以南直抵葉爾羌行者如適堂塗如哈薩克布魯特及北鄯強悍之戎羅斯亦恪恭震疊公薨後伊犁將軍保公徇眾請建專祠隨蒙俞允蓋深知遺愛之長也公有作輒焚其稿予偶見而錄之故所存止此。

感懷用蘇文忠公寄量美叔韻

少小重意氣。踟躕警前賢。惟知一往樂。誰能計萬全。而今衰老矣。狂直都棄捐。心跡聊自慰。功成付與天。百憂如蝟集。擾擾白髮年。雖塵生還想。寧知口碑傳。胡不賦歸去。恣意窮芳鮮。松竹蔭吾廬。朝昏飽雲烟。涇渭自清濁。美醜何憎妍。不見亦不聞。幽谷長日眠。予有數椽在盤山下。擷彼南山茶。松枝活火煎。一甌滌內熱。快意耽靜便。豈必覓丹砂。妄與神仙緣。醉鄉亦復好。遑惜囊無錢。

蘭泉比部初度

瘴地三年客。軍中百戰身。傳經崇世講。闕泉鄉試座主。夢少司農。文子會試座主。錢少司寇。稼借箸重嘉賓。白髮歸還未。青鏡聚正頻。初辰一卮酒。梅放近陽春。

話舊贈錢冲齋觀察

憶昔承師範。蕭齋只兩人。始從親研削。直至命冠巾。經歷風波險。甘同蔬水貧。十年情意重。愛我比祥麟。

余幼隨冲齋。學人元朗先生。受業至登科。通籍終未易師。而先生亦別無弟子。問一歸浙。閱數月。即返京師。在南日。亦未受館。他氏十餘年中。閱歷憂患。甘苦共之。不獨文字獎許也。

人海藏身久。翛然物外情。會心耽易理。厭俗避詩名。貧賤長如素。文章莫與京。誰知繼起者。尚有父風。

先生秉節高介。濟于訓接。晚年好易。朝夕不釋手。時有心得。即錄記之。以質先文勤公。與會所至。亦寄吟咏。長篇大章。有至一百二十韻者。然從不以詩自名。制舉義極工。而艱於一遇。時論惜之。

祝維詰

字宣臣。號豫堂。秀水人。乾隆三年舉人。官內閣典籍。有綠溪詩藁。

蒲褐山房詩話。先生少有才名。一直薇垣公。卿皆為延譽。查張兩相國。尤器之。屢隨清蹕。故灑河遠海風。數見於詩。李布衣鐵君。謂其怡穆醇靜。沈宗伯稱其出塞諸作。激壯適上。蓋是時風雅中。巨擘也。然沉淪下秋久。當出補同知。而非其意。所願量遷內閣典籍。乞病以歸。未及家而歿。余至京師。即辱先生獎許。以綠溪詩稿。屬為點定。留篋中者垂四十餘年。今始歸。其孫世守。子喆。亦已謝世。別見於後。

舟次同陳丹城

連朝多東風。向晚灑疎雨。漁燈隔暗葦。幾點明烟渚。照我同舟人。寥寥一相語。微聞山鐘歇。詩思杳何許。

夜度長城嶺

已出清涼山，行行過臺麓。嚴風時刺面，餘雪猶塞谷。明晨當度嶺，人馬畏偏促。芻秣乘夜闌，倉卒戒奴僕。冥冥十數里，顛滑冰歷碌。嶺頭門不開，欲進詎能速。彳亍荒山坳，却退少村屋。稍前得古寺，叩扉橫被逐。破廊三尺餘，蹲踞各蝟縮。手足骨已僵，口鼻氣難續。始信苦寒行，此況最云酷。四更嶺門啟，跨鞍忍戰塚。橫空十八盤，千仞更一曲。林深易相失，徑黑致互觸。仰窺天宇微，旁睨地勢蹙。臨高素知戒，拾策但徧徇。側身防偶蹉，錯趾嗟屢踖。乍聽鼙鼙號，復恐豹虎伏。馬跑雙泉響，掛甲古松矗。俗傳宋楊延昭掛甲處坡坨旣縈紆，崖壁亦重複。雞鳴到關口，野店且憩足。驚魂擾終宵，履坦俟朝旭。險阻寧憚勞，紀行聊備錄。

泊瓜洲

維舟宿瓜步，欹枕聞驚濤。深夜月微白，長江風自寒。壯情千里闊，歸夢五更安。不奈金焦望，茫茫烟路寬。

二月十五日尋春過偶圃憶朱大

暖風到處動吟魂，芳草閑尋近郭村。黃耳隔離能認客，蒼頭劊筍自開門。春留元亮花三徑，飲乏劉伶酒一尊。迢遞京華游子在，旗亭新唱與誰論。

崧峻招游澈湖

平生未到澈湖濱，此日招邀許問津。葑草綠生雙浦淨，杜鵑紅點萬山春。人思賀監空留宅，情比支公愛

結隣日暮悠然桑竹下。桃源風物古來淳。

翁莊感舊同壺尊作

徑荒苔竹礪荒泉。戶滿蠶蛸只黯然。可記讀書清曉坐。水風涼到曲闌前。

### 高瀛洲

字翰起。號願圃。仁和人。乾隆三年舉人。官太平同知。有小稱意齋集。

賦燕

雕梁小壘漸泥融。修尾長襟鬪翠紅。不愛高飛愛雙宿。晚簾消得月朦朧。

### 袁枚

字子才。號簡齋。錢塘人。乾隆元年薦舉博學鴻詞。四年成進士。官江寧知縣。有小倉山房集。

蒲謁山房詩話。子才少舉宏詞。旋成進士。嗣以散館。出為縣令。初在江寧。總督尹文端公絕愛其才。既丁憂。再起。至陝西。與總督黃文襄臭味差池。上書萬餘言。不省。遂乞病歸。得廢圃于江寧。小倉山下。疏泉架石。釐為二十四景。窗牖皆用五色琉璃。遊人聞集。時吳越老成凋謝。子才來往江湖。從者如市。太邱道廣。無論費耶。森夫互相酬唱。又取英俊少年者。錄為弟子。授以才調。等集挾之。遊東諸侯。更招士女。之能詩畫者。共十三人。繪為授詩圖。燕欽蟬髮。傍花隨柳。問業于前。而子才白鬢紅烏。流盼旁觀。悠然自得。亦以此索當途。題句於人爭愛之所。至延為上客。適館授餐。而子才又擇其精饌。彙作食單。梓以行世。故三十年中。墻門納履。為向來名人所未有。才華既盛。信手拈來。矜新鬪捷。不必盡遵軌範。且清靈雋妙。筆舌互用。能解人意。中蘊結今石庵。相公在江寧時。臨其蕩佚。將訪而按之。子才投以二詩。公閱畢。即請相見。頓釋前嫌。其詩得力如此。然謝世未久。頗有違言。吳君嵩梁謂其詩人多指摘。今予汰淫哇。刪蕪雜。去細俳。清新雋逸。自無慚於大雅矣。孫君淵如又謂其神

道碑墓志銘諸文紀事多失實予謂豈惟失實并有與諸人家狀多不合者卽如朱文端公軾岳將軍鍾琪李閣學紱裴文遠公曰修其文皆有聲有色然予與岳裴二家之後俱屬同年而穆堂先生爲子房師李少司空友棠之祖且子兩至江西見文端後裔詢之皆云未嘗請乞亦未嘗讀其所作蓋子才遊屐所至偶聞名公彌可喜可愕之事著爲志傳以驚爆時人耳目初不計信今傳後也

### 水西亭夜坐

明月愛流水。一輪池上明。水亦愛明月。金波徹底清。愛水兼愛月。有客登西亭。其時萬籟寂。秋花呈微馨。荷珠不甚惜。風來一齊傾。露零螢光濕。屢響蛩語停。感此元化理。形骸付空冥。坐久并忘我。何處塵慮攪。鐘聲偶然來。起念知三更。當我起念時。天亦微雲生。

### 雨後步水西亭

雨氣不能盡。散作滿園烟。好風何處來。荷葉爲翩翩。羣花浴三日。意態柔且鮮。幽人傾兩耳。竹外鳴新泉。啁啁一鳥歇。閣閣羣蛙連。暝色起喬木。斷虹媚遠天。蝸過有殘篆。琴潤無斷絃。憑闌意清悄。與鷗相對眠。

### 八月廿九日同補蘿晴江探桂隱仙庵歸憇古林寺

游山同隊行。看山各自領。不逢桂花開。且踏桂枝影。桂葉何離離。蓄意如未逞。寒潭明空霜。禪室納虛景。脉脉夕陽沉。泠泠天風冷。道人登竹樓。彈琴萬山頂。

曳杖隨所如。小憇古林寺。經聲如有人。松花飄滿地。一僧長眉青。萬竹短籬翠。爲我滌齋廚。供以伊蒲味。時當晚課齊。各各參佛義。余亦慧業人。拈花領微示。出門秋正清。下山月猶未。回頭雲一重。鐘聲渺烟際。

玉泉觀魚

玉泉何澄清。銀河移在地。戢戢萬魚頭。空行渺無際。紅鱗色陸離。白小影搖曳。窺客若有情。銜花噉相戲。池間荇藻長。風定水烟細。可惜夕陽沉。鐘聲雲外至。春山生睡容。遊客有歸意。回首波紋平。淡月僧門閉。

聞魚門吏部充四庫館纂修喜寄以詩

文思天子搜遺書。子以文名領石渠。士安不用借五車。娜嬛福地張華居。憶昔蛩蛩附鉅虛。兩家簡牒爭搜儲。愛而不見心瞿瞿。一朝去我翔天都。明堂大開招羣儒。青藜太乙僮僮趨。四千年物盡輓輸。朱文綠字體製殊。龍威玉牒元皇符。漢唐所少元明無。咸集舜陞來堯衢。西山光芒燭太虛。子與蘭臺諸大夫。雙眸一串牟尼珠。部居別白分鐫銖。縱難讀盡在須臾。但觀大略亦足娛。有如餓腹餐天廚。朵頤未動口欲吐。又如大海遊蟬魚。恣汝屬爨樂有餘。問誰有此遭逢歟。領百萬君恐不如。我猶未免爲鄉愚。聞見狹隘探索疎。側身西望空嗟吁。不能從子爲書奴。願抄書目遙寄予。俾得約略知些須。此身不負生唐虞。

夜過借園見主人坐月下吹笛

秋夜論秋士。先聞水上音。半天涼月色。一笛酒人心。響遏碧雲近。香傳紅藕深。相逢清露下。流影濕衣襟。

起早

起早殘燈在。門關落日遲。雨來蟬小歇。風到柳先知。借病常辭客。知非又改詩。蜻蜓無賴甚。飛滿藕花枝。



北樓

北斗挂高樓。江山一望收。白雲簷外宿。清露檻前流。遠樹深藏寺。風窗易得秋。飛花雜松子。終日打簾鉤。

泊舟平望借齊次風宗伯周蘭坡學士訪玉川居士

輕帆爲我慰離羣。得見梅花又見君。三徑苔痕藏草屋。一湖水氣濕春雲。風停篆影微微直。雨歇鶯聲漸漸聞。彈指來遊剛十載。當筵莫惜酒杯醺。

題沈凡民蘭亭卷子有序

凡民與王虛舟裘魯清交最狎。沈王故工楷法。五十二歲時各臨蘭亭一本。互角精能。畫者作流觴曲水。貌三人于其中。亡何魯清死。又數年虛舟死。凡民每哭一人。則跋數語於卷尾。乾隆十六年十一月。凡民來白下。出圖命題。余牛晚不獲見。裘王兩先生。而其時凡民之官建德。余又將赴長安。感三友之多情。逢兩人之將別。磨墨愴然。不能自已。

先生垂老淚星星。行篋常攜感舊銘。一代交情存筆墨。三人顏色付丹青。酒杯白社秋來憶。玉笛山陽雨後聽。五十二年鴻爪在。昭陵風雪滿蘭亭。

浮生難挹魯靈光。風義羊求事渺茫。兩晉書亡王內史。六朝人剩沈東陽。金仙次第辭西漢。宮女憑誰說上皇。惆悵鍾期來海畔。斷琴彈落一天霜。

與郭鳳池侍講秦淮話舊作

當頭新月墜纖纖。十二年來吏隱兼。人似孤鴻雲聚散。詩如老將律精嚴。黃梅雨久秦淮闊。紅藕花深畫舫添。料得憑欄定含睇。六朝春在水精簾。

春柳

消息江南又隔年。秋千院落碧雲天。春心肯落梅花後。青眼常開寒食前。十里烟籠村店小。一枝風壓酒旗偏。遊繻欲綰愁無力。任爾橫陳大道邊。欲訴衷腸萬萬條。滿身香雪未全飄。新絲買得剛三月。舊雨吹來似六朝。綠影自遮南北渡。春痕分護短長橋。五株一入先生傳。不學柔枝亂折腰。

春興

身居宏景三層閣。家住香山八節灘。愁踐落花時讓路。愛生春水獨憑欄。朱藤架老蜂喧早。薛荔墻高蝶過難。呼取樵青作僮約。幾痕新雨試魚竿。

山中絕句

草草亭臺布置餘。今年真個愛吾廬。牙籤都放西廊下。自有斜陽來曝書。鎮日山腰劖白雲。裁量烟草話紛紛。春衫不用金爐爇。自向百花香裏熏。

青蘆葉動春潮。堤上楊花帶雪飄。滿地月明仙鶴語。碧天如水一枝簫。

春日雜詩

千枝紅雨萬重烟。畫出詩人得意天。山上春雲如我懶。日高猶宿翠微巔。  
水竹三分屋二分。滿牆薜荔古苔紋。全家雞犬分明在。世上遙看但綠雲。  
清明連日雨瀟瀟。看送春痕上柳條。明月有情還約我。夜來相見杏花梢。  
萋萋芳草遍春潭。深院無人綠更酣。何處一聲清磬響。斷峯西去有茅菴。



# 湖海詩傳卷八

## 沈德潛

字確士。號歸愚。長洲人。乾隆元年薦舉博學鴻詞。四年成進士官至禮部侍郎。子告歸。加尚書銜。贈太子太師。諡文愨。有竹嘯軒詩鈔。歸愚詩鈔。

蒲謁山房詩話先生濼劉名場晚登科第應西林桐城之薦即蒙主眷不數年游武春卿卿雲復且之歌卷阿矢音之什資鸚鵡學往昔所無繼以年近八旬陳情歸老復賜詩以寵其行有云清時老名士莫下舊詩人又有云玉皇案吏今仙客天子門生是故人其嘉獎至於此及鸞輅南巡恩榮盡接加銜食俸優禮彌隆宜海內誇為盛事吳中傳作美談矣先生少從學于吳江葉星期雙葉居橫山故阮亭尙書云橫山門下尙有詩人然先生獨綜今古無藉而成本源漢魏效法盛唐先宗老杜次及昌黎義山東坡遺山下至青邱崢嶸大復臥子阮亭皆能兼綜條貫嘗自進其全集御製敘言以高王爲比誠定論也所選別裁諸集匯千古之風騷聚一時之壇坫年至九十八而終益得于天者厚矣或文有反唇而譏者真少陵所詈汝曹昌黎所謂孛兒爾

### 制府來

客述制府始末甚詳。因成樂府四解。誌往事。做後來也。

制府來。勢炎赫。上者罪監司。下者罪二千石。屬吏驅使如牛羊。千里輦重來。奔忙鞠脰上壽登公堂。制府賜顏色。屬吏貼席眠。破得百家產。博得制府歡。制府之樂千萬年。一揚旗旌。麾三軍。制府航海清海氛。聲名所到。步步生風雲。居者闔戶。行者側足。但稱制府來。小兒不敢哭。軍中隊隊唱凱還。內實百貨裝樓船。

文武郊迎。次且不得近前。制府之樂千萬年。二制府第神仙宅。夜光錦披牆壁。明月珠飾履舄。貓兒睛。鴉鵲石。兒童戲弄當路擲。平頭奴子珊瑚鞭。妖姬日夕舞綺筵。賞賜百萬黃金錢。天長地久雨露偏。制府之樂千萬年。三太陽照。冰山傾。黃紙收制府。片刻不得暫停。輶車一兩。千里無人送迎。婦女戟手。童穉呼其名。爰書定在旦夕。求爲廝養廝養不可得。盤水加劍請室閒。從前榮盛如雲烟。制府之樂千萬年。四

侯氏三忠祠迎神曲

天門高呀然開。儀肅肅神靈來。神靈來太常公披朱衣冠芙蓉。激雷電斷金鐵。排趙嬈擊曹節。掖庭危邊疆敗。公直言櫻螿。經百折。歷九死。死握拳生嚼齒。靈在天欣同類。揖楊左肩周魏。靈既來升華堂。羞燔炙。達羶薌。靈安坐奏清徵。蠅金颺寒衆體。修肝蠶忠孝門。聚星辰光乾坤。

右祀太常公諱震賜

坎其擊鼓。廟庭之下。俟我雲車。迎我風馬。車馬繽紛。通政降只。飛龍元螭。牙角從只。血痕斑斑。心憤痛只。論伸冤獄。力折強藩。逆丁陽九。龍馭升天。銜鬚受刀。決脰報君。精衛填海。身腐心存。卞壺授命。盱眙從死。不辱門風。是父是子。辭釣天所。來饗齊明。網網縕縕。達以精誠。鳴梟妖狐。伏而不鳴。

右祀通政公諱嗣曾

鬼雄前隊操戈。燭燮壘壘血模糊。飛車兩旁灑絳旛。中有義士髯而鬚。髯而鬚。侯季子地老天荒。鐘鏞

遷徙廣柳車內藏忠臣。陳臥事敗連駢棄東市。升元冥。謁帝局。上帝謂而忠貞。相隨而考而兄。出入玉闕。金庭。被髮翩然。娛游下土。周覽城郭。心悲離黍。後車載美人。冠帔何容與。當年巢破卵不完。連娟修眉殉其主。神靈風雨飄颻如。醉神清爵神來乎。

右祀太學公諱岐曾

分賦古鼎詩三十韻

龍文高晃朗。雲氣覆霏霽。丈室神彩凝。高座古鼎在。肅穆儼介珪。鄭重埒鼎鼐。蟠螭足參立。貫索耳雙對。無色不駁瑩。有狀悉萃薈。藏伏饕餮魂。追取最夙態。鬚鬣天馬羣。雕尻鼯鼠輩。上鏤雷回文。下鑄乾艮卦。甗鄒別俯仰。窺輒誌腹背。字類鄒嶧碑。銘非考父誠。跟肘細分析。詰曲空抑噫。初疑周虎彝。亦異虞瓦秦。比紀甗增價。並石鼓稱最。腹儉失名號。口吐詫靈怪。康弧俗情閔。玉鉉庸耳贖。常然櫛易熟。函牛汁堪噉。取部魯非禮。售贖宋竟味。染指嗤子公。覆餗訕元載。滋味仗調燮。法物諒珍愛。器列禮祀時。用昭廟堂內。正直形不頗。靜虛量匪隘。吐景成品瑩。敲雲散埃瑳。烹煎明作離。灌漑澤資兌。實黃流在中。席文茵于外。左陳伯索孟。右置師旼敦。塵劫逾千秋。神游歷三代。相對供捫摸。雜坐勤盼睞。扶風傳瑰奇。彌明謾狡會。博物蒐典籍。琢句慙曹鄴。世寶垂億年。作歌期保艾。

泛碧浪湖泊道場山下

湖海詩傳 卷八

泛汎碧浪湖。乍離峴山亭。吳興太守段康建亭於山名顯山亭後改峴山。荷蒲無故色。寒林有餘青。驚鱗潛水草。沙鳥立雲汀。但憐空翠過。幾忘舟楫行。青山與白塔。隱隱如相迎。已覘墟落近。漸識炊煙生。野叟作吳語。相顧殊有情。涼月誰共對。村酤易爲醒。明發入雲去。遙尋清磬聲。

九月登賀九嶺初見霜葉相傳吳王賀重九處

陶公愛重九。我意同斯語。遊興高令節。山行覓儔侶。已謝籃輿逸。遂陟崇岡阻。讌樂想虧闕。傳聞匪稽古。縱步無近尋。流眄有遠覩。隔隴動齋鐘。半嶺聞樵斧。楓林點輕霜。紅葉燦可數。貌腴神欲凋。浮榮難久處。超遙偕同游。沈寥感秋序。倚杖佇蒼茫。輕煙起平楚。

游天池

山靈招我深。輕策上層阪。巔頂涵清池。坎艮象成蹇。水寒魚不生。穴黝龍疑假。想當融結初。天匠費鐫鏤。鑑影鬚眉寒。洗心煩鬱造。沿緣把垂藤。趺坐藉蒼蘚。是時暮樵還。風送歌聲遠。雲凝羅徑濕。煙動僧廚飯。聊追謝監游。詎同阮公返。不見青蓮花。羽化空遙緬。

竹塢訪文文肅讀書處

山深境亦寒。人家住叢竹。言尋故相居。指引隨樵牧。秋籜點林閭。斜日下蘿屋。登堂緬古人。當年此耕讀。經術協天眷。貞亮秉鈞軸。道直泯險夷。恩渥輕寵辱。曾罹孟博危。復遘曲江逐。斯人已云亡。巖壑留高躅。



望遠重致身。懷賢恥干祿。清風激頑懦。名山享尸祝。何處來溪毛。寒泉羞杞菊。

### 曉登小白陽山

山嵐曉濛濛。踏雲仰層頂。林深光未顯。峯折路疑引。陟岡輕嶮巖。縱目得深迴。遙巒勢環抱。隱隱作蕃屏。參錯互烟水。橫縱開畦町。是山客少過。地阻名未炳。仿佛高蹈流。箝聲晦箕穎。人嫌洞壑寒。我愛松石靜。攀條驚鶴棲。漱澗分猿飲。握蘭緬道侶。雲臥逢真境。晞髮巖之幽。初陽照孤影。

### 晚入鄧尉山宿還元閣

晚鐘流巖壑。尋聲經疊嶂。重游二十年。雲山故無恙。來登四宜堂。聊此息筇杖。老桂漸凋殘。吾生豈強壯。憑軒送遠目。百里納清曠。晴雪漫陂陀。香風透屏障。花影連湖光。夕陽搖滉漾。俄頃寒烟凝。遙嵐換形相。夜投還元閣。高枕鳥巢上。風雨驚夢魂。松濤入紙帳。

### 經仙掌峯至石屋

文肅嘗讀書於此

尋山得靈閣。險磴緣雲上。峯裂十指形。云是仙人掌。造化弄奇巧。畱此意外想。蹊危少安步。石仄容孤往。迴矚途屢變。遙睇景難象。古洞勢豁豁。深入轉開朗。境寂返聽真。無風動虛響。石扇疑啟閉。仙蹤乍惚恍。哲人孰誦讀。於此得幽賞。出山嬰華簪。罹禍幾鉤黨。撫躬審行藏。懷賢緬疇曩。何如此冥心。元珠探象罔。

### 過插

截流利轉漕。險要閉版牖。奔流挂丈餘。玉虹下石硤。驚霆擺礮硯。鐘懸響鞶鞶。未到耳先震。乍視氣已響。客舟排檣竿。喧逐亂鷺鴨。儒者懼欲弭。勇者浪堪踏。長年理戩筥。鳴金衆夫集。退行索齊挽。逆上船疑立。忘身與水鬪。性命輕於葉。人定終有濟。忽奪兩崖入。中流自在行。安危判一睫。出險更思險。心定膽轉怯。猛省戒垂堂。未敢貪利涉。前途浩茫茫。願言慎舟楫。

陽陽

山形如玦環。聚族成邨塢。東向受初陽。和風滿林莽。人家藝花竹。傍湖實網罟。嫁娶不出邨。禮讓成賓主。世氛日囂喧。隔水風偏古。我行訪林屋。失道遵枉渚。居人知我至。相邀具雞黍。地僻多遠心。情真寔浮語。把卷懷前哲。讀蔡九遠秦存古詩臨風久延佇。

石公山

青螺點蒼波。登陟忽巒岫。山石備萬形。變態各奔湊。荒幻理所無。俶詭境罕覩。造物費鑄鑄。用力幾莫就。亭臺嵌巖阿。因地成締構。風出一罅天。雲生百尺竇。石公與石姥。峙立分左右。我來秋已深。遙林熟橘柚。問齋饌伊蒲。隨目觀衆皞。夜畱來鶴亭。名亭巔。霜寒伴猿狖。

度石碁嶺

谷深沸淙潺。山亂圍合沓。緣山臨無際。注目氣先響。徑仄趾不受。石礙頂欲壓。覓路穿高雲。盤盤百尺級。

同行肩難並。後進履防躡。磴危碎石支。沙崩古槎接。亦知垂堂戒。尋幽願深入。到頂身屢疲。趨下目轉捷。半途不退悔。踰險終寧帖。寄語學道人。用志慎毋怯。

發慈光一路經老人峯緣天都峯趾過斷凡橋上木梯至文殊院宿

欲窮升仙境。言別金仙宅。取逕傍嶮巖。穿松入蒙密。盤盤路忽高。十步三憩息。巖深谷虛牝。澗瀉泉噴激。經過老人峯。偃僂似迎客。峨峨陟橫雲。境界頓開闢。沿緣天都趾。仰睇蓮花萼。崖裂容一人。磴仄礙雙屐。扶掖憑山僧。駢蛩勢難隻。尻高首偏下。穿洞行匍匐。入井復出井。牽縋用全力。支木接斷橋。梯空上危壁。到頂地平坦。舊締化人域。千峯總圍抱。一氣周羈歷。造化理所無。到者人方識。辛苦苟未經。奇快何由得。彌勒許同龕。留此桑下迹。

天都峯

黃山天下奇。天都峯之特。絕地九百仞。陡如下斧劈。勢疑塞高空。體許鎮地脉。無心拔衆上。衆自莫敢敵。通體斷寸膚。萬石怒分坼。蚪枝蟠千年。蒼蘚積五色。石室開曠朗。甘泉流罅隙。或云仙人。都軒轅。此游息。浮邱與容成。飛行無留迹。斯理果不誣。長生歸有德。胡爲學仙人。空聞鍊金石。

下百步雲梯過華溝穿鯨魚洞作

山轉路滅沒。險逾川中棧。斗然遇雲崖。直下足難踐。已累百步梯。課數九折坂。探奇志勇猛。前進不敢嬾。

氣銳力副之。崎嶇亦平坦。迴合望欲迷。凹凸勢莫鏟。行過蓮花溝。一線蛇蜿蜒。是日雲烟凝。四望失巉巖。策恐支虛沙。足防滑蒼蘚。高步躋危岡。恠偉忽在眼。有境窺門垣。無底入甌甌。呀呷疑吞人。僂行敢驕蹇。漸穿巨鰲腹。神定體幾瘠。飛鳥斷蹤跡。樵者見亦罕。行當逢容成。丹臺路匪遠。過此爲煉丹臺

登獅子峯望石筍

奇巖搏象形。雄踞高隱嶙。發興登其巔。餘勇賈未窘。後顧氣混茫。前瞻境虛牝。到眼驚喜并。荒幻見石筍。刺天攢千戟。迸地出萬菌。破碎互相糅。逼迤遞徐引。觀此靈奇質。衆類覺窘蠢。物象隨人名。俚俗半堪哂。鬼工險莫加。天匠巧欲盡。而胡六六峯。轉使嘉名隱。跡高人莫知。箕穎樂肥遯。維時罡風來。壑谷吼聲殷。愜心願少延。佇足防未穩。下阪屢迴颺。抗手情豈忍。

憩雲外峯趾度數嶺至皮篷以杉皮爲篷

我從雲中來。又尋雲外路。稍稍憩雲根。盤盤踞微步。黯黯穿荒榛。喧喧聞瀑布。山花媚游人。徑仄不暇顧。少焉逢坦夷。短筇且停駐。迴瞻峯頭雲。是我經行處。澗泉趨正絕。涉水濕芒屨。何來午聲鐘。星星空際度。撥雲問香林。葱鬱娑羅樹。山僧松圓孫。耕厓係程孟陽後人猶餘詩人趣。相遇不言禪。默默得靜悟。前行遂孤雲。更向巉巖去。

度萬年寺後嶺穿林涉澗緣岡踰嶺二十餘里至石梁

出雲復入雲。度嶺還上嶺。遙山千圍合。環抱下疑井。跼步恥後怯。跛勇赴前猛。涉澗流方激。穿林光欲曠。是時秋氣高。萬樹微霜凝。丹砂間點漆。錯雜類文錦。游日奇已過。醉心趣旋領。輕身降平陂。橫從辨畦町。覓徑得荒庵。萬松庵叩門乞苦茗。迴憶攀陟餘。險夷變俄頃。前聞輕雷聲。殷殷路修永。行將度石梁。漸入仙人境。

### 石梁觀瀑

巨靈用全力。兩厓忽分斷。放出三白龍。天矯互鬪戰。莫窮水之源。直下急於箭。巨石不容水。水怒力逾悍。水石兩相爭。倒躍勢撇漩。如傾萬斛珠。噴灑濺崖岸。匯合赴一門。迅疾激雷電。俯看奔驛馬。仰睇掛匹練。久坐心骨寒。乍驚耳目眩。石梁跨穹窿。劍脊險逾棧。猿鳥亦回蹤。客子敢輕竄。過此逢仙真。堪使凡骨換。雲裳許裁服。芝草當餐飯。津逮有何人。渺焉悵雲漢。

### 瓊臺望雙闕

山形如缺瓜。峨峨倚天半。插根清冷淵。陡削天匠鏗。欲上無梯級。鳥路懸一線。行人緣線升。有足不敢健。猿挂憑攀藤。蝸旋疑陟棧。終焉上層巔。攬奇遂初願。兩峯劃然開。雙闕峙對面。宛如龍門鑿。亦似伊闕斷。放眼千青螺。重重裏峭蒨。此中列仙人。蹤跡多變幻。寸心果精堅。鶴駕行可見。何處天姥峯。夢魂餘眷戀。

### 過金地嶺記所遇

層巒千迴折。陡下忽平坦。洞洞松根泉。蒼蒼坡間蘚。藉蘚挹泉流。酌取冷然善。何來一老僧。龐眉手自撚。問僧年幾何。行將三大衍。四十年示我養生方。無爲順仰俛。忘身並忘心。數自莫能管。大藥在偶逢。蒼朮肯龜犬。服之屏營爲。亦足壯關鍵。熊經與烏巾。古語術空緬。最下鍊金石。伐性適自殄。語罷超然行。忽近旋忽遠。我欲往求之。雲路迷深淺。

黃山松歌

爲翁壽  
堂作

古盎倏見盤。蚪龍鱗甲剝。落蒼苔封。繆枝偃伏三尺許。豈是峨眉頂上萬年不長孤生松。問松托根來何從。乃在黃山六六之奇峯。黃山山高接霄漢。古松連蜷挂巖畔。怒裂石罅斷土膏。日月光華潤枝榦。工人善鎚鑿。長繩繫其軀。下龜俯絕澗。萬丈懸空虛。磊砢山骨巧斲破。一卷怪石連根株。遠從洞府最深處。千里移置幽人廬。空堂時有烟靄起。天都雲氣髣髴來庭隅。我對黃山松。想象黃山巔。浮邱與容成。雲際時往還。安得身騎白鹿蒼崖間。松肪食罷體輕舉。抗手羣峯迎列仙。

張鐵橋畫鷹

鐵橋道人性疾惡。慣寫蒼鷹露奇狀。金眸閃爍爪拳鐵。猛氣稜稜出紙上。空堂子立形軒然。百鳥驚飛不敢颺。陰山九月天雨雪。林木槎枿凍欲折。此時翻空入雲去。萬里高天灑毛血。胡爲斂翼棲枯枝。掉頸獨刷毛羽奇。從知畫師有深意。要令鷲鳥藏霜威。草間狐兔不足擊。健翮且漫橫空馳。君不見鶴鷗梟鳥多。

惡聲封狼破鏡時從橫。會須使汝食其肉。一洗宇宙歸澄清。坐看麒麟鸞鳳來明廷。

濟南雙忠祠

祀巡按御史長洲宋公歷下知縣韓公

大軍向南下。屯聚攻危城。雲梯攀躡爭先登。陣雲壓城城欲崩。御史率縣令。奮義抗強敵。殺馬食民民不忍。食裹瘡吮血。列防衛。援絕兵殘勢危急。是時日色無晶光。天地黯慘飛嚴霜。御史登城望闕拜。稱臣萬死無以報陛下。一身誓與城俱亡。須臾城隅陷。被執志不屈。大聲呵叱如雷霆。面受刀傷。漬殷血。冲天烈焰骸幣銷。原軫歸元竟空說。兩公同日死。騎箕游昊穹。握拳透爪追英風。邦人立廟崇雙忠。神之來兮雲旗紅。嗚呼千秋享祀歷城下。以媿爲人臣而懷二心者。

閱三朝要典

薰廟御極類乾綱。疎遠保傅親貂璫。茄花委鬼互糾結。薰天勢燄何披猖。守原之問史貶斥。況令婦寺紊朝常。顧命老臣半誅戮。朝衣血裹投圓牆。清流白馬禍更慘。一網盡矣空巖廊。顛倒是非著穢史。手翻三案詞。俯張詞云挺擊陷國戚。追論可灼誣先皇。移宮噦鸞肆迫脅。康妃八妹奔蒼黃。更云筆削繼孔聖。大書特書明王章。永爲人臣不忠戒。冠以御製文煌煌。黨與秉筆亂忠佞。顧乘謙黃立極馮銓等。霾閉日月無精光。同文館獄書黨籍。元祐君子遭摧戕。二蔡二惇恣兒戲。竟使二帝幽窮荒。此書千古同繆戾。力鉏忠耿扶姦彊。從來事往有定論。青蠅白壁終顯彰。刑餘死骨斲身後。正士祀典修烝嘗。所惜國本旣剝喪。再傳宗社

旋淪亡。小人勿用著聖訓。承家開國須周防。

鬼車

夜寒慘澹陰風呼。長天啞嚙疑訓狐。乍東乍西無定響。條斷條續行空虛。一聲初起衆聲應。似有萬鬼同悲歎。家人聞聲滅燈火。掩耳且勿驚童雛。蠻奴拍手嚇犬吠。羣犬狂叫奔街衢。或云妖鳥鬼部領。滿車載鬼雲端趨。車中鬼眼運鬼手。下瞰雞鶩殘其軀。或云此物最荒恠。兩翼十首形容殊。當年天狗斷一首。至今頸血猶模糊。淋漓一滴濺華屋。高門大宅應焚如。世間無物比陰毒。但所過處思驅除。吾生疾惡性最猛。擬抽弩矢彎雕弧。寒雲漫天暗如漆。何從覓影行誅鉏。夜深飛鳴勢轉盛。欲挾鬼族游清都。妖孽莫漫矜得意。東方會見升金烏。

客談燒山事甚詳詩以紀之

叢山合沓藏於菟。目睽舌磔常負隅。封狼獾綸連元狐。醜類朋比甘爲奴。食人白骨堆霜顛。下及麋鹿牛羊豬。俛魂蚩蚩効前驅。獵人蹶張墮雕弧。時當獵月風割膚。蕭蕭苦竹鳴黃蘆。四山草木僵不蘇。壯夫憤激忘其軀。火攻巢穴良可夫。始焉數點疑火珠。乍隱乍現光模糊。忽看烈燄漫空虛。炎炎照耀千里餘。林神社鬼來獻訣。返風滅火大雨滂。山君咆哮走郊墟。血人於牙肆吞屠。上帝赫怒行天誅。祝融經天色純朱。彤旛赤纛翻絳旗。火龍蜿蜒火馬俱。巖焦谷爛驚斯須。榛莽灌櫟遭焚如。山精木魅潛逃遁。炮燄猛獸



燔厥徒。存者竄伏黨與孤。兒童伸手編其鬚。往時狎狷安在乎。開關險徑爲坦塗。遠近寧貼無驚呼。除妖降祥瑞則符。麒麟騶虞世豈無。嗚呼麒麟騶虞世豈無。

趙忠毅公名南星鐵如意歌爲蔣半關賦

蔣侯購得鐵如意。銀絲鏤飾存款識。額圖太極八卦形。背列天垣斗星位。銘辭無多語詰屈。廉而不劌君子器。銘詞流傳知自忠毅公。年月日與姓名備。維公生值桓靈朝。婦寺秉政同宣驕。紛紜鉤黨禍正慘。孟博繫獄訴咎繇。城狐社鼠不易去。悲歌擊節心憂焦。上方請劍空有志。唾壺敲缺真無聊。賢臣從古一網盡。遣禦魍魎投邊郊。邊草荒荒斷行跡。邊風蕭條邊月白。尙書振臂忽起舞。手持故物還拂拭。一揮天地欲低昂。想見鬚髯立如戟。賜環無詔來邊庭。萬里忠魂歸不得。陵谷變換廟鼎遷。尙書手澤今依然。光彩爛爛照四筵。鬼膽震懼那敢前。珊瑚二尺不足擊。指揮并勿談枯禪。蔣侯蔣侯知爾所寶在人不在物。要令忠義之氣垂千年。

### 蔡將軍歌

名人龍。吳縣人。天啓壬戌進士。仕潯州守備。遇獠民亂。力戰死。子至中。召死士入藤峽。俘其魁。縱火焚之。藤峽平。詔贈人龍游擊將軍。

蔡侯人世飛將軍。身長九尺勇絕倫。左射右射開六鈞。上馬下馬舉百斤。生兒更似李亞子。一門驍勇非

常人時逢獠。撞反藤峽。草木爲屋山爲門。猿猴出沒肆攫奪。青天白日誅平民。將軍奉詔入重地。膽大直欲通於身。十蕩十決勢莫敵。生鶻橫入烏鴉羣。峽深路險援兵絕。漫山賊衆如蜂屯。將軍願死不願生。呼聲動天雙目瞋。伏劍血流體僵立。義憤上訴天爲昏。郎君慟哭召死士。拔刀誓衆風雷奔。前驅遇賊氣欲吞。殺賊不異屠雞豚。深入巢穴縛渠魁。揮刃刳膾何紛綸。餘黨拘繫夾碓斧。一火木石俱遭焚。埽清藤峽只旦夕。報主差足酬先臣。當年平播砭朝棟。史書劉綎昭殊勳。揚應龍反播州將軍劉綎討平之朝棟應龍子也將軍父子闕紀錄。雖經贈爵終沈淪。敢告右史秉特筆。臣忠子孝光乾坤。

魏傅巖畫墨竹歌

鄙南公子髯如戟。眼中無物氣無敵。醉餘揮筆埽竹枝。倏忽琅玕勢千尺。一叢新長成籜龍。亭亭直上捎青空。一叢礪畔忽斜出。寒梢俯地烟濛濛。一叢偃蹇穿石罅。蕭疎鳳尾搖清風。兩枝枯幹頭且童。勁節中斷如截葱。其後崇岡恠石各異態。千梢萬蘚隨橫從。乃知成竹在胸次。元氣入手人無功。自言北地寒威酷。只有黃沙少修竹。平生愛竹如性命。借此豪端洗塵俗。坡圖涼氣來滿堂。觀者動色神蒼茫。恍惚風雨黃陵鷓鴣語。令人咫尺游瀟湘。

贈王耘渠丈兼道別

昔年相遇秦淮樓。樓頭買醉澆牢愁。今年秦淮復相見。落拓依然縱談讌。髭鬚白盡兩頰紅。興高奪稍羣

英中酒酣耳熱肝膽露。豪情右盼還左顧。先生少主文章盟。使筆直使秋空鷹。跨海欲掣掉尾鯨。意氣魁壘山嶽傾。豫章千雲世誰用。龍泉貫斗光難平。一官如泥等閒棄。鳳鳥肯逐羣雞鳴。杜陵老去依幕府。醉後登牀傲嚴武。青鞵萬里歸去來。滿徑蓬蒿守環堵。回空那及猗氏益。名塞滄瀛竟何補。唯餘愛才一寸心。結交忘年到爾汝。酒間誦我新詩篇。爲言逸興凌雲烟。低昂奮袖時起舞。淮樓四座停歌筵。我生厄寒殊自憐。途窮慟哭年復年。一人知己可不恨。何況推獎逢高賢。爲雲爲龍未可定。東西南北安得相周旋。春花落盡辭鄉久。歸心觸撥濃於酒。東風知我重離羣。當筵吹折秦淮柳。前途彼此兩茫茫。天邊明月分清光。遙憶君家著書處。金壇山下松花香。

吳小仙雙松醉仙圖

天半雲雷卷中起。龍吟虎吼空堂裏。誰掃雙松勢千尺。吳生小仙醉時墨。几席陰森失豪素。上拂元冥真宰怒。林間中酒一丈人。頽然高臥忘其身。松風滿壑吹不醒。一臥直欲三千春。何時起來松下更飲酒。笑問乾坤無恙否。

集黃尊古草堂觀山水圖作歌時黃將游武夷

五年相別今相見。綠酒青燈夜開燕。主人酒酣示我新畫圖。壁間高挂鷺溪絹。江流一瀉水。山岳數蟻邱。咫尺萬餘里。浩氣凌滄洲。空堂嵐氣出復沒。耳邊似聞熊羆叫。嘯清猿愁。忽然川迴山斷勢平遠。清沓淺

洛林塘幽。陰晴明晦。澗變熊粉墨。真許追冥搜。坐間劉廣文。湖嗟咨歎欲絕。亦有王文學。學睇眦分毫末。我時把酒還披衿。意興能窮造物窟。我謂主人工畫如工文。筆未落時先凝神。主人謂我作文如作畫。要使筆力回千鈞。主賓相視復相笑。此中三昧外人那得探其真。我不能畫解畫理。如君畫師辭客兼一身。酒闌脫帽意氣豪。自言趨捷追猿獠。遍歷五岳到絕域。采玉河畔嘗游遨。武夷九曲未沿溯。使我夢寐心煩勞。今日有酒且痛飲。明朝茫茫寒浪橫。輕舸三十六峯試芒屨。歸來皴染開邱壑。高堂置酒邀我看。神往仙巖聽仙樂。水樂亦名仙樂。

宋徽宗鸚鵡圖

徽廟畫手天所縱。花卉翎毛無伯仲。時危點筆太清樓。萬里江山供戲弄。至今流傳鸚鵡圖。御押垂垂挂當空。松枝纖末起長風。羽族開張勢飛動。一鳥鬪敗力已殫。翻身下墜轉向天。一鳥憑空奮拳擊。忽臨其腦難回旋。一鳥旁囑欲相助。不許雄猛摧衰殘。從知渲染有至理。扶持合在危與顛。如何助金滅耶律。欺人孤寡前盟寒。燕雲雖復兵禍結。如以鳥雀隨鷹鷂。靖康之恥繼懷愍。萬里龍沙夢初醒。鸚之鴿之公辱之。稠宋佶桓略相等。畫圖早已露先幾。誰向幾先發深省。馬角難從塞外生。有人將畫寄朝廷。宋弁在沙漠寄六帝

御容及徽宗御畫跡。披圖似帶水霜氣。可是來從五國城。

戴文進看碑圖

魏武未嘗渡江。看碑會稽之上虞。其事莫須有也。因已載雜記中。故詩亦從俗。

三百年後碑當墮。當墮不墮逢王叵。此言似諺。還似謠。不解解之無不可。曹公看碑事有無。錢唐戴進文進名寫出江上看碑圖。浩浩江流勢欲走。撐空崩嵐昂其首。碑陰仰看者爲誰。面目生動軒須眉。一人緋袍

一官綠。大帶撻尾腰間垂。前者解頤若有得。後者沈吟良苦思。從人奚官好結束。屬鞬短後羌兒服。三鬢剪出桃花駒。嚙尾嘶風與翹足。此文傳是蔡邕讚。敏絕楊修識黃絹。老瞞心忌伏兵機。就烹偏在能鳴雁。聰明受患今古同。畫師微意傳豪翰。吁嗟乎。才子渝則戕其身。范史云。修雖才子。渝我淳則。愛深舐犢空傷神。何如投

江抱屍知有父。碑雖磨滅心常存。

### 覺生寺大鐘歌

牙角鬚鬚蟠老龍。色相古黝兼青紅。旋蟲躩踞列衆獸。旁羅鬼漢諸姦凶。重逾萬石更萬石。漢高廟器將毋同。金泥傳自明永樂。遷都北地仍燕封。廟社旣建鼎呂定。次及梵宇成華鐘。道衍監造役鳧氏。數倍仙掌鎔金銅。彌陀華嚴皆全部。沈學士度筆藏稜鋒。懸之傑閣入雲表。六僧舉杵齊撞舂。當年燕飛啄孺子。南兵百萬爲沙蟲。抄連瓜蔓凝碧血。禍延赤族鋤羣忠。妄憑佛力消黑業。越越聲徹大門重。恆河沙數至無算。火燄滅熄刀輪空。從來王者貴不殺。豈緣象教尊禪宗。神孫更創萬壽寺。大璫勢力移其中。熹宗以後委諸地。龍臥沙草雲難從。熙朝郭西建寶刹。重樓複殿棟宇隆。錫名覺生代木鐸。警醒憤憤憐愚蒙。鐘

從廢寺徙新構。萬牛迴首驅徒工。鯨鏗鼉鳴整課誦。響達長樂隨天風。我來郊原訪林麓。一徑委折趨靈宮。諦視古蹟決雙背。偉觀一豁平生胸。因思雞鳴埭西北。巨鐘蝕土眠蒿蓬。摩挲永樂二年鑄。兩地麟福邀天功。一鐘淪棄聲久啞。一鐘叩擊驚頑聾。蒲牢亦等遇不遇。何況士類分雌雄。獨惜大鏞置佛地。虛無祇伴金仙蹤。今皇崇道講經學。鴻都觀禮來耆童。始終條理藉法物。曷不重鑄歸辟雍。於倫於樂頌聖德。相和鼙鼓聲逢逢。

夏日述感六首

旱潦頻仍後。三吳風景殊。民貧輕揖讓。力盡畏征輸。瘠土農皆散。平田麥已蕪。吾生慙俯仰。觸目總艱虞。糠粃聊充腹。遷延及草根。長官齊設粥。黎庶最銜恩。奔走誰家子。哀鳴到處村。吏胥休蠹食。國法至公存。癘疫連三月。災荒歷二年。空村多鬼語。茅屋少炊烟。乞命崇淫祀。招魂赴野山。四方俱掩骼。感此意茫然。三尺森然在。無良尙有徒。探丸分黑白。劫客隱萑苻。聖主時蠲賦。賢臣欲繪圖。爾曹須向善。回首免刑誅。身世空搔首。茫茫總不堪。多金高甲第。無食賤丁男。救弊須良策。哀時敢戲談。傳聞鴻雁羽。肅肅去淮南。

時淮民多  
就食四方。

五行多錯迕。恆雨又恆暘。乍看修堤急。旋聞戽水忙。憂時勞丙吉。占策問京房。玉燭資調變。還期格昊蒼。

今古含冤地。孤臣舊死忠。已成三字獄。竟廢十年功。匡復憑諸將。沉淪念故宮。六陵殘毀後。泉壤泣英雄。大將迴戈日。中原陷敵時。朝廷輸幣帛。父老望威儀。天意竟如此。神靈儼在茲。千秋見孤憤。認取向南枝。

漫興

見說岐山鳳。和鳴及盛時。羊腸千折險。虎口一生危。直節風霜鍊。清名草木知。重華真至聖。款款許陬詞。荃蕙成蕭艾。芳馨忽變更。申申嘗正則。下下考陽城。擊斷憑卿貳。寬仁仰聖明。猶存三代直。野老有公評。

有感

天上風雷過。人間氣象新。狐羣竟濡尾。象齒足焚身。有媿文章伯。誰爲社稷臣。爾曹堪一笑。回首等埃塵。

夜發

古壘戍旗收。烟中起棹謳。風霜欺短褐。星漢入歸舟。鐙動江樓影。蛩吟野岸秋。往來常此路。欲白旅人頭。

晚秋雜興

亢陽連四月。凶歲歷三年。恭遇成湯世。難回覆閔天。西風動茅屋。荒草滿原田。黃雀虛求食。飛鳴亦可憐。蓬戶炊常斷。朱門廩亦空。已判離骨肉。無處鬻兒童。井邑征求裏。牛羊涕淚中。誰能師鄭監。圖繪達深宮。北闕須才峻。山林士氣增。蒐羅到麻葦。曲直中鈎繩。周燮逃名苦。孫宏對策能。虛聲應共雪。莫負藥書徵。

送王蘭泉會試

之子魁南國。邦人願枕經。此行冰雪路。歷盡短長亭。水湧黃流濁。山橫岱嶽青。廣川三策在。望爾對明廷。

月夜渡江

萬里金波照眼明。布帆十幅破空行。微茫欲沒三山影。浩蕩還流六代聲。水底魚龍驚靜夜。天邊牛斗轉深更。長風瞬息過京口。楚尾吳頭無限情。

吳山懷古

大觀亭榭俯丹梯。千尺峯巔一杖藜。孤嶺界分城內外。曲江劃破浙東西。潮頭如馬當空立。山勢猶龍入望低。吳越興亡總陳迹。伍胥英爽震羣黎。三千強弩捍錢唐。賜券分茅異姓王。五季代傳唐土地。百年廟受宋蒸嘗。林柯曾寵將軍號。溪谷還霑錦繡光。所惜擁兵名義正。未從羅隱伐朱梁。夫差曾報閻閻仇。宋室南遷事竟休。和議有人增歲幣。偏安無詔復神州。中朝已灑萋宏血。塞北空聞杜宇愁。莫上鳳凰山頂望。冬青誰認舊陵邱。襄樊失守勢飄搖。半壁河山付北朝。餘燼但依新會水。無情深恨浙江潮。君臣俘馘歸沙漠。宮殿荒涼遍黍苗。唯有青山終古在。夕陽回首客魂消。

舊邊詩九首



我國家內外一統。萬方寧謐。揆文奮武。無遠弗届矣。閱明史見季年屯政不修。邊事日壞。民生凋敝。因作舊邊九首。述往事。益以慶太平也。

憑關俯海舊邊疆。一線迢遙指薊方。外國梯航通貢賦。高麗貢道中邦門戶重隄防。渾河冰合勞飛輓。長白霜清冷戰場。誰識天心正東眷。鬱葱王氣在遼陽。

右遼東

漁陽重地衛幽燕。倒馬飛狐關嶺連。自徙寧藩無外鎮。遂令古北急防邊。初以大寧爲外邊。永樂間寧王內徙。而薊始重內邊矣。牧人度阪時驅馬。名將當關日控弦。不有築城楊御史。恐教羽檄達甘泉。都御史楊博修邊。設防禦。敵患少却。

右薊鎮

大寧棄後守開平。又見蒼黃失重城。土木變後開平與和亦不能守。正憶文皇黎絕塞。翻憐英廟誤親征。風旗蔽野晨挑戰。雪帳連山夜斫營。設險正須防上谷。安邊總爲翼神京。

右宣府

代北燒荒草木空。防秋從古重雲中。二關形勝環寧武。三面烽烟繞大同。俺荅內侵邊柝苦。吉囊遠寇陣雲紅。行間欲問平戎策。魏尙當年有戰功。

右大同

蘇武城頭落日低。明妃冢畔暮雲迷。重臣逐寇籌方略。都御史何喬新逐寇於灰溝設善後六策遺孽操戈釀禍梯。古疲馬帶瘡馳代北。土兵枵腹守山西。不聞仁愿防邊日。張仁歲歲荒原動鼓鼙。

右山西

榆林遠過皋狼鎮。洪武新兵設備多。末季無人恢套口。中朝有恨棄黃河。正統時所棄三更急雪還傳箭。萬竈飢軍且枕戈。能向延綏勤挽粟。馬騰士飽定如何。

右榆林

賀蘭層嶂入云霄。五衛蒼茫殺氣遙。冰結黃河飛敵騎。風高紅寺落盤雕。牛羊野老常驅隴。弓箭遊軍各在腰。共識靈州沃衍地。蒿萊滿目莽蕭條。

右寧夏

鎮連八郡咽喉地。戍鼓邊笳晝夜聞。鞏鳳徵兵須轉餉。每歲調臨鞏西鳳兵防守芻糧在本軍額內支給非策也甘肅失勢莫移軍。移蘭軍獨駐花馬池。亦非策之上者霜嚴萬堡停樵爨。雲暗千山亂馬羣。倚劍儻能籌勝算。獨教虞詡立殊勳。詡守階州開

羌人懼服

右固原

平羌斥堠界山丹。白草黃沙沒馬鞍。萬里先兵西水弱。三軍鳴劍黑風寒。永寧地險周防急。哈密鞭長戍

守難。欲慰廟堂勤遠意。留屯邊境起凋殘。

右甘肅

題王蘭泉三泖漁莊圖

魚扈連延接雁汀。伊人新勒草堂銘。三重湖泛天邊白。九點螺橫鳥外青。菰米飯炊香淡淡。水仙操動韻泠泠。往來時有樵夫迹。問荅微言愜性靈。

蘭臺

蘭臺空署赴輪臺。詔遣從軍萬里來。食祿自應持正論。至尊終是重良才。不教天遠投魑魅。更許兵屯闢草萊。想象高秋望京國。一時回首白龍堆。

送杭堇浦太史

殿頭磊落吐鴻辭。文采何嘗憚作犧。王吉上書明聖主。劉蕡對策治平時。鄰翁旣雨談牆築。新婦初婚議竈炊。歸去西湖理場圃。青青還蕝向陽葵。

南鎮

周禮會稽推首望。大神作鎮鎮南方。位同炎宿垂朱鳥。德秉離明祀赤璋。寢殿闕宮常肅穆。雲車風馬每騰驤。吾皇報饗勤成秩。總爲蒼生祝降康。

寄周迂村

移家自得天隨友。尤飢鶴居皮市迂村自甫里移偕隱相攜孺仲妻。家居臨頓里恰符皮陸樓隱地向共閒吟追汐社。近聞直釣坐清溪。  
行藏齒冷乘軒鶴。文采心驚斷尾雞。何日隨君還故業。一蓑烟雨課畊犁。

北垞

白云生高原。忽渡南湖去。遙知隔溪人。應與雲相遇。

曉起

疎星淡已無。纖月猶木杪。天末明霞生。烟中散羣鳥。

雨泊話舊

寒雨蕭蕭夜打篷。篷窻相對一燈紅。十年無限存亡感。并入空江話雨中。

過許州

到處陂塘決決流。垂楊百里罨平疇。行人便覺須眉綠。一路蟬聲過許州。

# 湖海詩傳卷九

程景伊

字聘三。號莘田。武進人。乾隆四年進士。官至東閣大學士。諡文恭。有雲塘詩鈔。

蒲褐山房詩話。文恭贍於詞章。兼精吏牘。初不以道學名。而濂洛五子之教。素所服膺。故臆誠樸實。頗知大體。其見於詩者。冲和真澹。雖非風騷正則。不無有德之言。乾隆庚子。余爲都察院副都御史。元旦朝賀。都御史侍直西階。大學直東階。駕出當先。在中和殿行禮。余往邀之。會是夕大雪。公來早。中寒已不能語。按歸邸舍。未幾而歿。

送同年馮若渠客遊平陽

驪駒已駕苦難攀。襤被攜囊赴晉關。楚裏白雲龍尾闕。馬前秋色雁門山。驚才定卜三都貴。樂志寧愁六月閒。只悵從遊違舊雨。何時樽酒待君還。

題同年許紅橋春宴圖卽送之任粵西

薄寒風物正宜人。舊雨過從趁早春。每到醉鄉稱小戶。恰于花國得閒身。酒旗星聚人千里。燈樹光融月一輪。排日朋簪渾未厭。離亭怕見柳條新。

六街燈火曠長隄。接軫聯鑣鳳闕西。選石名園全醉月。攀花曲徑一登梯。春回上苑鶯喧早。人去灘江草綠齊。促席追歡能幾日。不堪回首鷓鴣啼。

中秋前五日劉繩菴廷尉移寓奉東二律寓中有小閣可眺西山因卽以西山二字爲韻

一枝穩占鳳城西。掃徑誅茅位置齊。借綠短牆雲作屋。攀花曲磴石爲梯。管絃近接扶風帳。書卷長親太乙藜。茶臼筆床隨處好。當頭明月待新題。

移來家具菊初斑。籬落秋深靜掩關。片石剜苔新作沼。小樓拄笏飽看山。退朝詩思爭花發。近市心情似水閒。舊雨過從容剝啄。聯吟暇日好追攀。

### 裘曰修

字叔度。號諾皋。新建人。乾隆元年薦舉博學鴻詞。四年成進士。官至工部尙書。加太子少傅。諡文達。

蒲褐山房詩話。公神閒氣靜。明敏自然。事無大小。談笑應之。雖盤錯節。迎刃而解。每遇朝廷大議。論衆說紛紜。而談言微中。芬肌劈理。如奏刀春然。如土委地。人人各適其意。以去。總督高君崑麟。謂天仙化人。不可湊泊者也。公沒後。相傳爲燕子磯水神。後有家人遇之。拜祝祠下云。若果在茲。願乞順風。以之東風果作。挂帆而去。故顧晴沙詩曰。爐香燭影曉猶紅。稽首陳情語未終。試看靈旂微颺處。春江已借一帆風。

### 恭讀御製土爾扈特歸順記書後

國家中外大一統。曩惟西事煩經營。兩朝撻伐未竟緒。皇帝睿斷功乃成。勝算在握要領得。如雷斯厲風斯行。乘機迅掃到回鶻。陽關以外無堅城。再讀御製歸順記。土爾扈特來投誠。前茲羣夷梗化久。四衛拉特相支撐。我師當時定全部。獨此早竄偷其生。未曾遣使遠招致。亦不索取勞甲兵。幡然挈屬奉表至。彼

蓋遜聽心先傾。譬從地底見紅日。有不仰企非人情。試看稽首列萬帳。盡隸臣僕歸皇清。西陲全部此始結。更無別種防芽萌。上承付托述遺志。下慰蒼赤垂麻聲。倘非幾先具定識。安得臨事不震驚。大文細繹再三四。眼中事理昭然明。信哉至德感必應。昔者敵壘今編氓。提攜襁褓及婦子。不似昨日飢寒并。脫離羅利入樂土。自此畜牧安昇平。渥巴錫汗知向背。鴛遷出谷茲爲榮。馬前纍纍復若若。乍習拜舞依龍旌。山莊宴賚盛典屢。丹青落筆騰光晶。鴻勳偉烈古未有。照耀天地環九瀛。豈知聖意益深遠。凜凜秦運猶持盈。

題桑敬甫五岳集

去年持節西域行。道邊恆華相逢迎。恩恩日馳三百里。那復酬對勞山靈。今年奉使出齊魯。岱宗天半空嶢嶻。中州中岳亦咫尺。烟雲寂寂巖書局。平生五岳入夢寐。輪蹠到處聊延停。其如可望不可卽。直等海上三山橫。向禽一語躬未踐。史冊已自垂高名。豈知遙遙數千載。有人誓不渝前盟。藉彼嶽嶽磊落之面目。暢我高寒寒峯之性情。客中投示紀游作。五岳一一足所經。芒屨幾兩昏嫁畢。快哉有志事竟成。學山至山果若此。我今相士不敢輕。手君詩卷待明發。回首猶望崧山青。

題陸包山仿王叔明高士聽泉圖

老龍夜吼濤聲起。近聽卻在松風裏。鏗錚淅瀝和者誰。流泉一派清入耳。洞庭毋乃仙樂張。細叶宮商調。

角徵廣陵散絕經千年。兒女箏琶徒靡靡。幽人意態疇爲傳。披圖云是包山子。有元巨手數黃鶴。曠代高情工寫此。橫斜落紙遠逼真。毫芒底用求形似。莫言不見並不聞。有聲悟得無聲旨。萬籟俱息山空空。漈玉跳珠鳴不已。何當譜入無絃琴。志在高山在流水。

奉勅題江村草堂圖

應是白蘋洲上。居然黃葉村邊。鹿門有客招隱。蓮社無心結緣。乍可浮家泛宅。兼之鋤雨耕烟。臣亦江湖舊隱。畫圖重與周旋。

仙霞嶺

戍樓曉旆露初乾。一徑紆盤客意安。壁壘久忘當日險。功名仰愧昔人難。李文襄扼  
耿賊於此青連翠鳳排林起。白走銀龍瀉澗寒。形勢東南分控帶。眼中甌越下方看。

次韻送張寶臣少宗伯予告歸里

一笑翩然喜宦成。麥秋時節暑風清。明廷屢緩還山勅。老輩難勝揖別情。調鼎有人留坐論。抽簪寧礙獨歸耕。某邱某水欣無恙。舊社雞豚約共迎。

儲麟趾

字梅夫。荆溪人。乾隆四年進士。官至宗人府府丞。



蒲褐山房詩話。宗丞居諫院。伉直敢言。由是爲聖明所眷。帝歷京卿。嘗遣祭少昊陵。奏唐虞五臣皆  
有專祠。惟契獨無。請立廟以補前缺。奉旨令蒲萼二州立廟。永垂祀典。既歸。嘗主書院講席。年八十  
餘而終。

### 張公洞

石洞破山腹。驚雷飛玉龍。採藥一仙去。至今呼張公。魚梁噴珠沫。靈響疑笙鏞。初猶索火照。徐乃天戶通。  
振衣上層磴。雲影盪塵胸。奇石蹲獅虎。山花無春冬。出洞已巔頂。指點數諸峯。歸路躡鳥道。彷彿疑仙蹤。

### 西溪卽事

溪上露華白。舟行破清曉。林端隱缺月。烟際出叢篠。渡筏漾碧沙。漁罾倚紅蓼。逢僧問前路。舉步疾飛鳥。

### 李繩

字勉伯。長洲人。乾隆六年舉人。官平樂知縣。有葑田吟稿。

### 由青田至錦水塘

灘響非一名。峰疊更千狀。乍疑前溪阻。忽訝後嶺障。牽纜泝委紆。蕩楫信容漾。清月一以對。萬象皆澄曠。  
巉石印虎跡。叢條淒猿唱。閱日遇轉新。撫景意彌愴。鄉思忽宵增。清謳聆越榜。

### 遊靈峰寺羅漢洞至一線天

仙洞拔地起。怪巧天匠鏤。披莽穿仄徑。尋異得幻覲。蓮瓣兩岸裂。佛掌一罅漏。上梯井牽綆。下坂簷墜露。

同行挾山僧。駢歷互牽就。倒退尻高胸。直進趾壓首。隨步凜戰兢。履險無蹶仆。入洞轉曠如。板屋成結構。石櫺挂珠簾。泉乳孕巖竇。僧牀狙共眠。佛髻蘇爭繡。枯坐了聲聞。歸雲翳寒岫。

登城望西山殘雪

寒原動晴暉。城闔暫流憩。遙峯雪未消。積素明新霽。白雲映層嵐。清光互虧蔽。藹藹烟樹疎。陰陰返景麗。岩翠淡欲流。涼氣攬衣袂。一塔指吳宮。雲林望迢遞。

憩靈異亭眺東谷諸峯

下嶺谷轉深。奇秀衆峰窟。聞鐘引前路。松徑入蒙密。溪迴得幽亭。淪茗偶停歇。過耳噴琤涼。到眼驚翠嶽。巧疑鬼工鏤。怪訝坤軸裂。摩空劍戟攢。逆地芝菌出。鼙鼓叩逢逢。斑管抽乙乙。俱峯名宵形隨稱名。雅俗難盡述。是時微雨過。巾袖涼風拂。石泉和松籟。仙樂奏竽瑟。步移幻態增。日眩詭景失。諸天坐空虛。境寂塵抱豁。白雲解留人。幽禽叫林越。

遊東谷一路登靈巖尋龍泉水

雲滃衆峰浮。雲淨登嶂曉。竟日白雲中。泉鳴雲路杳。丹花綴幽崖。翠壁敷寒篠。過目接新賞。引步紆遐討。入寺剩頽垣。苔塔淨如掃。名峯卓東西。屏障削天表。捫蘿追層巔。峰峰盡可了。虬幹走巉岩。寒湫俯深窞。何年蟄毒龍。雲黑露鱗瓜。拂蘇尋留題。道人句可考。境靜契無生。塵網脫宜早。隔塢度疎鐘。纖月挂林

杪。

山行過古寺飯訖遇雨觀山田插蒔感而有作

山行緣澗深。危步踏澗石。入谷聞午鐘。鐘遙嶺轉隔。山僧導我前。野蔬手自摘。齋廚動炊烟。幽禽下窺客。濛濛濕雲流。千岩翠欲滴。庭陰澗松篁。嵐靄上几席。開軒面畦塍。涼風吹巾幘。油油動秧針。灑灑引泉脉。勤力冀有秋。敢咎山地瘠。芸人愧無成。忡忡感行役。去去攜孤筇。烟消亂峰碧。

過廬溝橋

吹角戍樓寒。征塵上馬鞍。斷雲橫碣石。斜照冷桑乾。設險前朝事。悲歌此地看。故人燕市酒。相憶路漫漫。

天台道中

亂壑響春雷。山泉百道回。梯盤松路暗。崖削石門開。水碓雲中出。樵歌澗曲來。幾家殘雪住。籬落點疎梅。

河間懷古

鬲津故道指茫茫。文物由來重此鄉。訓詁一家傳博士。山川終古屬賢王。黃沙夕捲河流合。白草秋枯野燒荒。何事田間還佩犢。問誰奏績繼循良。舊渤海郡

周迂邨丈招集諸同人宴小漆園卽送周緝堂還吳江吳南勤之華亭

雲龍追逐久忘年。接軫還看二妙聯。松石尙留名士蹟。簪裾重卜故人筵。池光到榻涵疎雨。花氣侵塔雜

暮烟珍重明朝分手去。一樽款款話燈前。

嚶嚶鳴鳥悵離羣。折柳歌殘酒易醺。十子風騷懷北郭。三江烟月望南雲。疎鐘遠樹溪堂隔。細雨春帆驛路分。預擬崦西梅信到。探幽重爲待夫君。

涿州早發

三輔藩垣此一方。切雲雉堞倚巖疆。角聲千帳飄殘月。客夢孤城入早霜。經術古文傳涿鹿。英雄土俗話樓桑。時清休吊岐溝事。白草蕭蕭戍壘荒。

姜恭壽

字靜宰。如皋人。編修任修子。乾隆六年舉人。有皋原集。

蒲褐山房詩話。靜宰自號香巖居士。能詩善畫。工篆隸。癸酉從雷翠庭副憲視學江蘇。時予尙爲諸生。靜宰得所。試詩賦愛之。遂來定交。後五年復遇於都下。靜宰寫梅數枝。取姜白石疎影詞篆書其上。以爲贈。嗣後不復見矣。聞其病亟。遺命以古玉二枚華嚴經一部殉葬。蓋矜奇之士也。

豆花

暮色下秋旻。蒼然生老圃。庚庚鹿眼離。紛紛豆花雨。豆花旣以白。豆莢亦成縷。晚飯臨涼風。秋實腴堪煮。上有青蟲縣。下有寒螿語。霜田落爲其。小人良辛苦。

杜若

秋水不染芳杜搖孤翠。白雁下橫塘。照見相思字。天末懷夫君。日暮期不至。江南可采蘅。西風吹垂淚。別去可復論。露華易蕉萃。

渡江東歸

燕子磯邊九月天。鯉魚風送石城船。黃花又見歸來日。紅豆空栽寄遠篇。玉樹歌中陳後主。仙人掌上柳屯田。緘情合付長江水。江北江南盡惘然。

秋夜

餘焰耿頽垣。荒蕪滿庭戶。中有人未眠。蛩吟入秋雨。

題梅花

一枝瑤蕊倚春風。鶴去寒山夢已空。記得夜深林下過。月玲瓏又雪玲瓏。

申甫

字笏山。江都人。乾隆元年薦舉博學鴻詞。六年舉人。官至左副都御史。有笏山詩鈔。

蒲褐山房詩話。笏山副憲。以中書舍人直軍機。掌內制十餘年。代言起草。指事頗情。九重時嘉賞之。爲詩抒寫性情。羌無故定。白樂天楊誠齋查初白。其免閱冊子也。好句如行攀石磴。無人跡。靜聽流泉。冷客心。幾日閒眠。關竹戶。一番細雨。長秋花寒。歸木末全無葉。暖人梅梢。漸有花。尙有晚香留紫菊。不妨小閨到黃楊。至今有吟諷者。歟。後畢秋帆中丞爲選擇而梓之。凡四卷。

旅思

二月天涯旅思交。輕寒惻惻雪纔消。一庭芳草客惆悵。幾點杏花春寂寥。何處借風吹好夢。有時聽雨度清宵。自從江令魂銷後。縹緲雲山不可招。

送陳西樸南歸

草檄才華久擅名。倦遊難得是歸耕。胸中湖海豪猶在。鬢上星霜老欲成。枯柳暮烟鴉陣陣。西風殘雪雁程程。江南到日梅應放。與寄相思太瘦生。

桐川大兄南歸率賦小詩送別

釀泥深巷雨如絲。矮紙催題贈別時。欲去始憐相見晚。得歸何憾到家遲。掃除塵土三年夢。成就山居一段奇。更喜津門楊柳暗。扁舟渾似畫中移。

己卯重陽日同監試諸公明遠樓登高偶成七律一首

鳳城佳氣曉層層。高處涼生感忽增。霜葉老留前代樹。風簷閒憶十年燈。尙容我輩憑闌望。可惜無人挈榼登。轉羨陶然亭上客。葦花如雪興飛騰。

送姚二念茲之山右次陳句山前輩韻

山長新如得好官。夢餘休更惹愁端。才名不媿陳蕃榻。豪氣曾經貢禹冠。久住忽成千里別。強移聊借一枝安。草堂貨要隨時蓄。垂老依人畢竟難。

七月朔日籀石招同地山少宰小集山齋爲鴻博同年之會兩公各賦七律六章予亦和之書于籀石所畫歲寒三友圖後以誌一時盛事

山館涼生面面風。何分賓主此情同。故人海內今餘幾。往事樽前話不窮。各有姓名留薦牘。儘多酬唱入詩筒。衰年倍切齊年誼。氣類相關要始終。

接葉亭邊落葉寒。紛紛送客出長安。

丙辰秋冬之間。屬樊榭沈東甫沈幼牧。逢耕石汪槐塘。請君同寓于接葉亭試畢。先生出都同人咸于此餞別。

重來我只常

資進。晚達君猶本分官。未敢便爲徵士老。

丙辰中式。改庶常。予與籀石並爲後進。

不妨仍作布衣看。風流畢竟推前輩。早向雲霄刷羽翰。少宰山乙卯中

書丙辰中式改庶常。予與籀石並爲後進。

下馬高車已在門。

少宰先至。

相逢一笑略寒溫。兩公視我如兄弟。三世論交到子孫。肯以虛聲孤物望。將何努

力荅君恩。他年各買扁舟去。剪燭淮南盡處村。

四十年光電影俱。晚收或者在桑榆。飛騰踏雪曾留爪。老馬衝泥自識塗。難得盤桓同躡屐。卻煩羅列到

行廚。劈箋更做元人意。松竹梅花共一圖。

### 曾捷宗

字瑤圃。贛縣人。乾隆六年舉人。官鄆州州判。有瑤圃詩鈔。

### 南浦曲

湖海詩傳 卷九

郎自居南浦。妾自住西灣。盈盈阻江水。澹蕩起長瀾。一解欲採浦中花。凌波兩漿斜。單衫紅杏子。白袷罩輕紗。二解邀郎入花浦。不知郎住處。人傳郎門前。雙雙烏柏樹。三解漠漠春風吹。迢迢江水暮。問郎來不來。風濤那可渡。四解入亦復苦愁。出亦復苦愁。相思隔南浦。明月照樓頭。五解

江行晚泊

川原迷水驛。旅泊嘆孤篷。永夜一杯酒。寒江半櫂風。燈昏知雪急。衾薄愛爐紅。回首鄉關遠。青山幾萬重。

江行

天闊雁聲遠。江寒沙渚明。孤帆何處泊。日暮晚烟平。

楊述曾

字二思。號企山。陽湖人。乾隆七年殿試第二人。及第。官侍講。卒。贈侍講學士。

蒲褐山房詩話學士爲內閣學士椿之子。博綜史傳。乾隆己卯冬。上修通鑑綱目。輯覽。命學士及大興朱編修筠。武進蔣編修和寧。仁和張舍人壽同。余充纂修官。發凡起例。斷斷不少假。余輩常集其邸。家人善治庖。討論之暇。輒出飲饌。以恣燕衍。酒酣以往。語譚四出。猶見先輩風流也。詩不多作。偶獲二章。亦駁駁入作者之室。

題陸乾日隸書千文

乾日名瑣。河南巡撫。陸朗夫燿之父。摹漢魏八分十數種。有石刻。

秦時王次仲。六書變體。創八分。梁初周散騎。羲之碎字編千文。羽人已化大鳥去。侍郎髻髮。嗟如銀。迢遙應千載。源流一一區。河汾八分鴻。都石經後。元常準尾波。勢尤超羣。開元碑頌。僅具體。韓梁張史徒云云。



千文智永擅神妙。八百分散留江憤。吳興王孫所傳十七卷。俗書依仿贗本尤紛紛。松陵陸子嗜古有奇癖。蟲形鳥跡遠欲窺皇墳。一丸隄隄作螯甲。三寸柔翰供鋤耘。京華旅食坐無事。閒憊素紙舒羅紋。劃分篆隸綴晉字。規撫曹蔡凌右軍。當其捉腕時。引而不發有如勁弩縣千斤。及其縱手快。盤空夭矯有如鶻鳥摩秋雯。倏如長矛掃鋒鏑。突如巨石崩崖垠。屹如巍堂列柱礎。綿如遠岫霏烟雲。攬張如怒羣龍奮鱗爪。敷紛如綴百卉垂葩芬。或如淇園風動千竹葉。薤薤。或如湘流帆轉九折波。沍沍。纖濃各意態。直曲隨鋸銑。含文復包質。強力還豐筋。書成應置國門外。摹觀紙價逾元纁。嗟予學奇觚。拙手空辛勤。華山岱嶽未經到。郃陽酸棗憑傳聞。元黃賸句兔園冊。凡將急就同斷斷。縮蛇縈蚓自嗤笑。偶遊燕市欣逢君。一編示我插高架。縹囊珍重薰香芸。恍懸師宜帳。疑曳羊欣裙。何當數晨夕。泥飲乘酣醺。使從竊村學。梁鶴還持奇字師。劉棻。昨宵殘月正離畢。飛雨颯雷砢礮。曉來西山起晴色。豁開東牖延朝昕。摩挲舊籍忽三歎。沉吟拂几心殷殷。張生石鼓李潮篆。杜詩韓筆萬丈光。斨斨。我生已晚學蕪劣。文章豈直殊猶薰。搖毫擲簡不知暮。起看遙樹漠漠含斜曛。

浮山禹廟觀壁間山海經塑像

眞宰三靈萃。鴻鈞萬彙陶。神姦原並育。山海競潛韜。緬昔平成烈。時先涪洞遭。八荒勤偶步。四載奠林皋。蒼玉開函授。元圭錫命叨。鑄金窮變怪。象物晰秋毫。魑魅窺形屏。龍蛇匿影逃。洛符同寶貴。泗鼎忽淪滔。

斷簡存劉略。遺文問楚騷。尸藏相顧械。鳥飼畢方號。精驗如符契。疑言尙剖刀。何年圖鬼秘。入廟肅清高。靈石當塔峙。奇功一箕勞。岷峨聯脈絡。淮海帖波濤。浮似來孤鶩。移寧藉六鼈。中央森殿陛。百物備牲牢。恍惚陰雲合。睚眦怒氣豪。鱗身兼虎齒。魚負亦蛇操。飛有驪頭翼。髮生役采毛。燭陰曾不息。相柳尙餘臊。夸父奔林渴。刑天舞戚遨。森羅事顯相。環列儼分曹。過口名雖記。臨風首重搔。江河當四會。樓櫓集千艘。簫鼓喧祠禱。魚鹽雜市囂。古松崇廟貌。美黻換神袍。博士勞舟楫。驅巫逐赤緜。人天同詭誕。士女混譏褒。平野鱗分次。殘陽弓半放。茫茫橫百感。歸路響寒飈。

寶光齋

字元調。諸城人。乾隆七年進士。官至左都御史。有東臯先生詩集。

蒲褐山房詩話先生性情伉直。遇事敢言。而尤以文學受知。大考翰林第一。不兩載間。晉內閣學士。直南書房。屢荷文衡之命。其再使浙江也。發平陽重徵之案。幾爲交構者所中。幸得實上聞。詔令覆審。乃置縣於法。浙中人士無不踴躍感泣。而先生還朝。晉總憲。兼直上書房。益皆荷聖明如神之照也。然先生自謂獨及聖賢之旨。故於宋儒所言指斥不遺餘力。聞者往往驚駭。至詩非所屬意也。其後僣窳以致門人秦君瀛置其粟主於西湖望湖樓。且哀其詩而刻之。

登九仙山

連山東南豁。百里俯滄洲。陽崖叢石蓮。陰壑蟠潛蚪。嶢朵造白日。山絕頂名八梁峯。羲和礙行輻。萬壽冠羣峰。石色連天浮。覽古憶漢士。問年齊浮邱。選選傳丹液。可遇不可求。想像明月夜。鸞鶴驂遨遊。銀臺光照耀。倒

景隨東流。浩歌遏白雲。清絕令人愁。鸞鳩捨榆枋。黃鸝固遠投。涼飈振林樹。柯葉如驚秋。夙心展廣眺。及茲縫冥搜。

言陟從壽嶺。佇望仙橋路。有升仙橋積石淙清流。斜陽亂紅樹。賞心會獨往。倦足容小佳。頽宇龍象愁。危巖獅

虎怒。山有獅象峯。虎岩峯。仙人逼蓬萊。溟漲不可渡。溯洄溪風長。寒林颯已暮。杳杳遠鴻音。鬱鬱隱豹霧。撫化時有

適。得已物無忤。揮手攬皓魄。振衣拂白露。行行謝磷緇。終然完吾素。

游天井一名龍潭

游子追險絕。造物祕靈境。始下九仙籠。檻泉書庫名峰頂。西行得牛浴。幽尋問天井。杖策半缺折。谿徑猶榛

梗。跼身緣峻嶮。步澀覺道永。稍出石門隘。已怖風色猛。湍瀑迴羣壑。破角會諸嶺。仰瞻練峰嵌。轉睨龍塔

迴。勢挾河漢落。氣侵毛髮冷。黑雲閉靈壽。白日匿晶影。俯岸窺半壁。陰鑑洞內景。想見虛無底。積水藏溟

滓。有時沃驕陽。霖雨應禱請。沉牲終不受。澹灑涵淵靜。適來驚蟄潛。殷雷晨一警。豈謂感鬼神。茲游固多

幸。西暉餘照曜。延佇惜俄頃。

韓碑

昔讀南海碑。今來南海廟。遺碣越千年。望古集遐眺。洪鈞播萬類。噫氣吹衆竅。遭水自成文。韓潮極神妙。

南溟稱天池。晝夜浴兩曜。直極爲尾閭。噓噏百靈召。軒波礎五嶽。鯤鯨恣擲掉。惚恍游萬怪。三躡窮窈窕。

厥大莫能名。斯文與之肖。刊石勒祠廊。萬里鎮炎徼。想見神光起。燭夜連嶺嶠。遺文重摩挲。絕篔仰輝耀。扶桑搴一枝。乾坤有餘照。濡筆增怖愕。摹繪難領要。別派細橫港。小言碎螢燭。觀爛雖有術。坎科每自笑。何當學龍吟。一息蛙蚪蚪。

送胡少京兆從軍金川

落日明寒水。驚風動大旗。已知經絕域。不復憶生離。入穴寧論險。擒王或用奇。安邊定深計。番婦與番兒。雜種那高嶺。天河已洗兵。笳吟雲棧落。劍倚雪山清。幕府從籌筆。宮僚愧請纓。祇應驗楊柳。與作凱歌聲。

送王熊峯先生謫任西川

劍外論兵地。巴西望歲人。瘡痍羣命賤。飛輓異鄉貧。白馬今從事。青雲實致身。勿云分半刺。萬里借良臣。

夜過彈子磯

日下碧峯暮。山寒蒼鶴號。江流催地轉。石氣與天高。直想移靈鷲。何年斷巨鼉。客帆不得泊。欹枕送驚濤。

雨入瀆陽峽作

西壁巉無路。南天隘此門。壘空浮雨氣。迸水瀉雲根。灘厲牛仍鬥。峽中兩石如牛。門狀曰牯牛灘。江寒鷺不翻。樵歌聞谷口。稍稍見前村。

還過觀音巖作

迴岫枕江斷。入天青未分。波心塞過雨。洞口暮垂雲。滅火魍應見。吟風虎每聞。歸舟還小憩。宿霧白紛紛。

吉水道中

遠岫如螺湧。迴江作字流。波清從浴鷺。帆靜不驚鷗。前輩文章盡。荒岡日月留。江濱有日岡月岡。溪樓不可上。獨立倚灘舟。

抵清遠作

香爐中宿接嵯峨。擬訪禺君塞薜蘿。夜雨偏從枕邊急。春山卻向夢中過。驚心峽鳥喧芳樹。滿眼江雲送綠波。此去無勞費牽挽。停橈閒聽木魚歌。

登浴日亭次東坡韻

扶胥南下水如天。倚棹孤亭黃木灣。海外初收鯨背雨。雲中稍辨虎頭山。卽看銅鼓添沙棧。南海廟前漲沙數十里石。銅鼓豈有丹爐駐玉顏。東望白雲山有安昌期丹竈。我欲騎鯨攀若木。偏懸五色十洲間。

登越秀山

鎮海樓頭過雨痕。越王臺上俯朝暾。地連五嶺分鵬背。水帶三江下虎門。歌舞歲時人代換。山後爲東南市舶島夷繁。頗聞利病關絲禁。尙待咨詢達帝關。

章寶傳

字習之。歸安人。乾隆七年進士。官吏科給事中。有蘆江詩存。

秋日偕友人登陶然亭

蘆白楓紅淺水間。斷雲高曳小禪關。屐分莎徑涼苔語。磬出烟林暮鳥還。畫格今看秋易老。宦情好與佛同閑。凭闌莫使輕回策。一髮螺青似故山。

書山水冊子

放懷濠濮間。晤賞寂無侶。漁艇一燈遙。和烟落寒渚。

曉發碧浪湖

浮玉諸峯郭外欹。蕭然兩岸荻風吹。碧天印水平如鏡。剪破涼雲艣一枝。

鄭虎文

字炳也。秀水人。乾隆七年進士。官至左贊善。有吞松閣集。

將軍山

山含春雲青。石露虬骨瘦。倚空有孤撐。跨波得虛覆。壁削平孰磨。罅坼碎如湊。初疑女媧遺。采煉彌缺漏。又疑石髓流。風凝出皴皺。問名訝將軍。倅象殊甲冑。苔蘚偶作緣。土壤不敢垢。樹古蟠蛟螭。屏展界紋繡。上枝蔽危峯。下根貫陰竇。高宜致仙禽。險不隱怪獸。探岳遲巨觀。循江副奇觀。去舟泊中宵。迴榜覲晴晝。

酬此隔歲心。如有十年舊。磨崖欲題名。迅帆促歸溜。遊屐空遲迴。山林笑凡陋。

首夏偕近壘拈花浚谷雪園叔六開谷昆季遊城南王氏園林

我本夙湖釣魚者。只愛乘船怕騎馬。無因得避馬頭塵。扇障元規亦聊且。江南一別動年年。夢裏春波水接天。消磨上巳桃花雨。辜負清明楊柳烟。忽見街頭賣紅藥。坐惜流光付蕭索。城南水木自清華。十載遊蹤猶約略。閒雲出岫鶴辭軒。休沐能來避俗喧。因呼我輩不羈友。共訪王家沒字園。園中無聯額內入門戲呼爲沒字園

便覺意思好。一味清涼消熱惱。竹下原非爲主來。花間未識緣誰掃。無多亭閣似星羅。一碧池塘新鏡磨。回首誤驚幽鳥喚。穿雲愛趁綠陰多。松風壓頂秋濤急。草色侵鞵空翠濕。山成覆簣樹爲籬。隔斷紅塵吹不入。偶來人外十分閒。風景依然似故山。我欲盡檢書籍賣。脫身長寄水雲間。此願終愁墮空杳。高飛媿爾安巢鳥。出門舉手謝園林。潑眼烟光青未了。

度磨石嶺觀雲海

黃山雲海世所傳。曹嗣士有圖。潘記祿堂先生有觀歸愚篇。沈尚書有觀雲海詩。昔常披玩不忍舍。懷此不到空年年。今來楚南度磨石。如石磨磨折且旋。枯蝸升壁蟻出穴。高凌碧落卑重淵。悄然坐我三十六峯頂。俯視下界捩羅綿。維雲觸石膚寸起。澹痕輕素飄炊烟。初升一縷合萬族。漸彌罅隙無旁邊。當其欲合未合間。百重樹杪噴薄無聲有象之飛泉。分流互注各有態。虛空欲碎難雕鐫。遲來惜我未見此。但見浩浩一氣

相盤聯。幻參雲水寓色相。妙兼雪月爭幽妍。恍疑一拳坐一葉。斷查銀漢浮張騫。還疑岳陽喚未醒。神遊  
赤岸君山巔。或云天差夜郎洗陋俗。綏寧志云。古夜郎地。天吳海若紛駢闐。不然夸娥負山送我北海之北。南海南。  
罡風鼓籟開成連。盪摩星日墮杳杳。平夷凹凸歸平平。就中忽露雙峯尖。光明搖漾青螺圓。與之低昂波  
上下。俄然遠近風便娟。瀛洲方丈此或然。不爾胡得空中懸。吾聞乾坤大物山與海。表靈蘊真窮言詮。惟  
山有海海有市。變滅諸相真虛元。代傳其說見者少。況我過客尤難焉。登州海市禱乃見。侈神報豐天哀  
憐。不祈而獲我何德。重是帝命司文權。與蘇殊遇遇差勝。可無健筆追坡仙。坡仙往矣不復作。詩成未擬  
投時賢。時賢自有黃山在。那識渠陽別有天。

平金川

峨帽橫絕指金川。鳥道羊腸路幾千。域外河山歸禹服。寰中日月共堯天。不矜兵力誇三捷。自有宸謀出  
萬全。一怒安民功勒石。漢家勳業陋燕然。  
上將胸中富甲兵。登壇受鉞命專征。一軍未許驚韓信。五餌何勞策賈生。日下風雷馳號令。春來草木識  
威名。天誅更不煩擒縱。白羽輕揮瘴霧清。

卽事

半捲蝦須蕩玉鈎。蕭閒景物一庭幽。清池得雨青浮面。荒草無人綠到秋。落葉亂驚歸鳥疾。薄羅輕趁晚



風柔望中無限飛鴻影。看盡斜陽下荻洲。

### 王太岳

字基平。號芥子。定興人。乾隆七年進士。官至雲南布政使。左遷司業。有青虛山房集。

蒲謁山房詩話。先生詩宗魏晉。下及唐人。醇古淡泊。可稱高格。生有至性。每言及古來忠義事。輒爲感慨流涕。卽觀劇亦如之。與邵叔一。鄭誠齋。顧密齋。諸同年。以文字相磨切。才名甚著。及自雲南罷歸。復直四庫館。授司業。居海澱之太平莊。憔悴以終老。

### 讀史

漢祖戮功臣。本圖磐石安。豈知禍所伏。近在蕭牆間。牝雞一司晨。翰音遂登天。炎劉幾化呂。坏土殊未乾。產祿實昏駭。平勃勳爛焉。倘其遇莽操。何計能圖全。乃知牀第私。匪惟因庸孱。由來蓋世氣。半消兒女前。李唐武后禍。亦兆貞觀年。文皇豈不偉。貽謀何蒼然。千古同一慨。覆車無後先。關雎謹妃匹。信爲王化端。子孟起宿衛。綽有古人風。寅恭著夙夜。進止何雍容。六尺既有託。四海無兵戎。一朝臨大事。隻手迴蒼穹。凌烟標霍氏。遠紹伊且蹤。功成不知退。震主威隆終。爲兒女誤。躬與弑逆同。滅親昧大義。禍發還覆宗。信哉貴學術。臣節庶克終。

### 黛流村新營所住

昔予點朝簪。本自滄洲吏。一辭京雒塵。適會田園志。卜築代巖栖。嘉招慚遠至。遂賃伯鸞春。頗授揚雄字。

林間結架小，郊扉書常閉。灌溉發陽翹，荒粗豁蒙翳。剪彼惡木陰，暢此芳菲意。非惟娛徂年，兼得閑外視。支杖聽風篴，披襟納山翠。片雨洗青天，寥寥元古思。

種藥

結廬近墜陌，獲與田夫齒。蒲杏日萼與，農候茲焉始。余方據槁梧，素業亦時理。荷未竟不任，聊欲勤四體。鋤瓜夜雪餘，種藥春陰裏。酌以長生瓢，注之功德水。豈不念朝飢，好事良自喜。擾擾區中緣，遂性亦云已。奉酬檢討從兄見過之作

干城車馬路，尙愛野人廬。石隴看雲坐，春畦撥雪鋤。自憐頽放慣，人許往還疎。所賴吾宗秀，時時問索居。秋朝晏起吳百藥見訪酌酒敘懷

涼飈下梧葉，日夕滿庭墀。清曉鳥啼歇，岩窻人起遲。倒衣知有客，解帶坐論詩。世上紛微逐，將無文度癡。歸自東臯得顧密齋學士書口號卻寄

看遍秋山又獨歸，楓林樵徑晚風微。寒原漠漠耕人語，烟渚沉沉浴鷺飛。管有遠心當暮景，絕無飲興典春衣。集賢舊侶能相問，人在東臯賦采薇。

早過潼關呈屠參政

日上關門宿霧收，角聲悲壯肅高秋。山連二華橫秦塞，水控三川下豫州。行處牛羊歸聚落，幾家鷄犬共

林邱風流輸與屠夫子。深坐溪亭理釣鈎。

### 廖運芳

字湘芷。又字楚厓。龍南人。乾隆七年進士。官嘉定縣知縣。

#### 秋溪晚吟

葉涼秋江清。汶口人家暮。新月上孤城。斷烟橫遠渡。星星漁市火。杳杳寒山路。古岸斷行人。歸帆泊何處。

#### 飲酒

山氣殊未昏。雲林耿深曲。崖影墮層檐。暝色趨茆屋。遠村孤烟起。人家住深麓。清池澹涼颺。水荳度修竹。山巒然松燈。有酒我自漉。須臾石門月。娟娟照幽獨。

#### 過靜聞精舍

石徑無人到。溪聲隔竹聞。殘燈孤嶂雪。曉色萬峯雲。僧鉢呼猿共。山樵混鹿羣。澄心留半偈。歸路已斜曛。

#### 泊峽江病起口號

梳沐經旬罷。支筇作薄遊。鶴鳴秋水寺。鶉陣夕陽樓。背嶺荒城閉。迎風獨樹秋。如何三載客。淹滯尚林邱。

#### 京口懷曾瑤圃陳鑑堂

殘夜空江水。懷人坐到明。愁心楊子渡。落月廣陵城。飛夢懸秋水。相思折杜蘅。南歸無限意。北望轉含情。

虔州客舍送劉遠暉之江南余亦返權南埜卽席賦別

天涯離宴一樽同。折柳危亭夕照中。失路三年俱作客。秋霜兩鬢又飄蓬。斷烟城郭逢初雁。暮雨江帆見落楓。別後心期應不盡。西窗可記夜談雄。

熊爲霖

字浣青。新建人。乾隆七年進士。官檢討。有鶴嶠詩鈔。

下清浪灘

揚颿愛風駛。下瀨喜灘急。龍涎激秋雨。濺使青天溼。操縱勞長年。屏息蒼鷹立。一石捩一篙。心手妙相入。借勢得分寸。雷車翻欻欻。弄雪跳珠花。臥聽鯨人泣。

蠻拙留別盛于野

君將老劍谷。我亦歸緱山。山谷有真性。白雲爲往還。殷勤飲我酒。爲我彈猗蘭。酒力生春風。天地回朱顏。元音在正始。變徵還無端。惓惓向中夜。月落疎林寒。且復酌我酒。莫言行路難。

虎巖道中

迴巖通險阻。仄徑復艱難。礪曲水聲轉。雲深人語寒。隔林見村落。前路又峯巒。朔吹愁天晚。崎嶇十八盤。

黃崖

爲陟黃崖險。摩空欲建瓴。劃雲成境界。響谷下雷霆。鶴影瘦無際。村烟散幾星。倚欄看瀑布。一洗萬山青。

暮投瑞昌縣卽事

暝色來天杪。山城客到門。萬峯陰欲合。一水瘦無痕。樵唱月中影。僧歸竹外村。數聲吹畫角。霜雁落平原。

博陵蚤發

落葉破殘夢。疎林月五更。冰花勞馬跡。鐸語亂雞聲。影瘦寒仍怯。峯微遠欲明。中山遺石在。古驛近邊城。

陳宗達

字葯房。桐鄉人。乾隆九年舉人。有燕臺澄江諸集。

春日文子先生招同王大魯山西園限韻

春光澹沲來江南。澄江日暖天蔚藍。閒庭芳草吐新綠。名園上日窮幽探。謁來風流羨六一。招攜同伴人成三。別墅從遊忝陪列。烏巾白袷容清談。初從仄徑歷苔石。漸臨曲檻依澄潭。枯池荷柄盡欹倒。淤泥濁潦真如泔。平林漠漠淡烟織。瞥眼恍忽羅重嵐。坡陀怪石各有致。猶如鬣虬雄如魃。孤亭翠窣氣蕭爽。槎古樹撐楓楠。老梅低亞更清絕。晴暄盡拆霜苞含。支頤磅礴坐良久。依稀鼻觀聞優曇。卻憐今年春信晚。不然花底恣沉酣。狂呼聘日縱遠眺。君山俯瞰何耽耽。祇今申澗剩遺跡。儼如秋燕存空龕。人生會合貴適意。勝賞不厭貪夫貪。不見南樓劇幽邃。深篁密樹交鬢鬢。蕭閑妬殺閉關客。午餘睡足鐘鐺鐺。詩瓢

酒瓢想擗擋。揮毫潑墨樂且淇。獨憐歷碌事征鞅。東西南北其奚堪。焚書掃地平生願。幼輿邱壑吾能諳。  
白嶽黃山舊遊憩。徑欲小築誅茅庵。謝公登臨具逸興。聞言顧我頗深領。夫子盛年歷臺閣。曾從祕殿窺  
金函。學窮二酉探四庫。風騷一代身爲擔。白門夙昔仰山斗。珊瑚鐵網羣雅滄。文旌卽日指吳會。詩人猛  
士隨征驂。張黃秦晁指難屈。不數短簿同髯參。東南竹箭舊稱盛。儲材羅杞梓榿榘。閑從公暇縱搜討。聯  
吟鬪韻披銀蟬。新詩奇崛氣雄放。劍文剝蝕光生鐔。而我枵腹等魏瓠。巴吟里曲心懷慚。青桐百尺鳳凰  
叫。屋梁巢燕空呢喃。卻登經閣覓奇字。偕游更喜朋儕簪。百弓千笏幽意愜。淺紅小白花光涵。叢薄日夕  
多畏佳。恍聞風激波滄泮。歐蘇詠雪森紀律。白戰不許持矛鏃。卽今韻險等競病。催詩火急聊推戴。枯腸  
搜索鬪匠巧。斗室偃仰同眠蠶。詩成閣筆拍銅斗。還期惠我春醪甘。

# 湖海詩傳卷十

## 夢麟

字文子號午塘西魯特氏蒙古正白旗人乾隆十年進士官至戶部侍郎有大谷山堂集

蒲謁山房詩話先生樂府力追漢魏五言古詩取則盛唐兼宗工部七言古詩於李杜韓蘇無所不微無所不工風馳電掣海立雲垂正如項王救趙呼聲動地又如昆陽夜戰雷雨交驚雖係才多實悟入而七言古詩忽起忽落信手拈來縱橫如意亦非妙悟不能尤屬前賢所未發生平宏獎風流惟恐不及典乾隆癸酉江南鄉試予得其門下既進謁歷詢南邦人士子以鳳嗜企督曉徵來殷升之策時東有為對未幾視學江蘇取來殷諸人悉置之首列而于鳳嗜輩推獎不遺餘力既而召陟司空旋改司農預參機務上意將大用之忽病瘵以歿木隕山頽宜為清流傷悼矣先生嘗作古詩四章贈予又有句云軼塵孤往奮仙翮當今榮傑王與桑來殷企督及德甫盤挈變滅龍騰驪其推許如此而自首無成良自愧爾

## 戰城南

戰城南悲風吹吹黃沙沙倒飛左徒倒戈右徒棄兵倒戈者有生歸告大將大將怒女鬪死損我聲連師夜動虜驚晝馳歸營舉爵甲衆嬉嬉張鎗擊劍夜雲四開各各懽喜生來歸我思來歸來歸安可得願爲鬼雄鬼雄安可圖狐狸嘔血老鴉啄軀白日晚下游魂夜呼

## 雉朝飛

雉朝飛。其羽灼灼。雌前越。子後躍。于田于薄。是飲是啄。我弗如。爾行樂。爾樂我哀。朝行出游。歲暮獨歸。獨歸兮心悲。羣嗷嗷兮夜飢。我無術兮哺兒。先我死者知之。

今年別

前年別。淚填臆。卷舌入喉啼不得。上有白髮母。下有扶病室。忍啼作笑笑無力。出門三日不能食。今年別。苦復苦。出門無。入門無。不見我母送我。但見兒女盈前。淚下如雨。我無母。憶我無旅。爾無母。憐爾無所。提攜保抱。恃爾父。父去誰與。愼寒暑。爾伯爾叔。善視女。嗚呼前年別。啼不得。今年別。哭無力。

飲馬長城窟行

飲馬長城窟。城穴堆白骨。白骨爲人時。雙韃奪馬騎。解一騎馬過城下。飲馬臨城壕。堅冰凝澁瀾。朔氣鳴弓

刀。解二枕戈臥沙場。星芒動寒陸。青燐黯不流。枯體望城哭。解三

兄弟相送至蘆溝返

送者聯鑣旋。兄弟棄我去。林隙辨歸人。時見一回顧。停立瞻長橋。猶是見君處。層城隔暮煙。楚雨暗寒渡。賤子一寸心。長江千里霧。何當爲輕塵。冉冉京華路。

由天香行藥西盤初入山口

巖秀澄孤懷。趣塗意先往。理策遵迴蹊。空林得樵響。幽惊眷岑寂。矧茲秋日爽。霜徑稍曲盤。虛翠忽晃朗。



漸歷紆巒深。未識迴塗廣。孤暉隨趣濃。懸磴披煙上。杳藹接諸天。振衣發長想。王裘不可作。邱壑誰心賞。何時飯名僧。松檐稅塵鞅。甘從麋鹿游。拂衣謝親黨。

天成寺

秋氣寒空山。樹石忽清峭。採藥耽翠微。欣逐雲門調。叢薄稍蒙密。及此初日照。鳴淙石罅涼。欹徑雲間蹈。詰屈周籬樛。捫攀辨蘿鳶。偶歷開士居。忽證前蹤妙。霽壑明山楹。迴梁灑飛瀑。向背辨明晦。豁達縱臨眺。百里際檐端。雲物相輝耀。山烟自晨夕。流覽蘊深悼。緬懷田子春。當風蹙微嘯。

薄暮至萬松寺

山翠昏陰崖。雲際開孤磬。怖鴿驚深叢。枯筇響羅逕。松關晚森肅。荷衣拂深淨。日落山風吹。琴筑灑清聽。不見湯惠休。秋巖發高詠。曳屐循道門。簷間數峯暝。

曉入東巖往千像寺

幽尋意不極。披衣狗所務。山曉巖氣白。振策得微路。肅肅青松林。濺濺石流渡。岑露晨未晞。青草濕芒屨。曲折入空翠。霜徑屢回度。烟巒紛若積。迴塗阿非故。髣髴聞鐘魚。香巖澹寒霧。

朝往香山

夢覺鐘魚清。褰裳月在棟。盥濯辭精廬。山僧出林送。苔光上芒屨。昨宵知露重。亂泉聽乍失。溪澗澀餘凍。

石骨生清寒。行吟抱朝甕。日出照幽谷。山鳥發新哢。微風被空翠。流雲散巖洞。永懷煨芋者。隔岫聞清誦。

豐臺王氏園

孤筇曳青苔。院靜禽鳥樂。幽懷憺不極。獨行果前約。綠蘿暗荒逕。流雲帶晴閣。夜來微雨過。青林數花落。水木明朝華。陂塘翳烟薄。和風散微溫。芳叢扇紅藥。幽陰澄近原。修綠浮遙郭。不辨荷鋤人。高檐聽牛鐸。

園居夏夜

清池謝纖暑。岸幘臨冰除。徐步聞暗香。涼風泛紅葉。明月稍東上。悄然來清虛。遙樹影微得。近水光欲無。人聲過前林。迢迢歸烟墟。彷彿說禾稼。笑語良可娛。願祝百室盈。吾亦欣安居。

薄暮登清暉閣眺望

晚登池中樓。閒眺池上山。草樹炫夕麗。烟靄浮青鬢。微風從東來。披襟爲盤桓。偶然襲蘋藻。練影生輕瀾。搖曳動窗戶。人在空明間。始知元化妙。及此半日間。無心得良晤。寓目情所關。白雲出山去。日落何當還。

晚步泉上

山氣生夕涼。林端月初上。余行適無事。偶此飫新賞。池涵宵影虛。魄濯露華爽。高閣臥澄鑑。波動微偃仰。宿鳥驚流泉。風葉遞清響。夜深松竹香。翛然拂衣杖。時逢樵採歸。村謳忽三兩。長歌懷古人。晤言發深想。

白雲寺

曉發蘇門山。晚憩白雲寺。晨昏辨朱樓。亭午行乃至。車輪軋磬確。砂礫軼軒輊。檜柏晝晦冥。叢薄鬱深闕。時聞風入松。灑然落清吹。遵闌步幽澗。雲構妥布置。楂枒老樹醜。嵌空怪石墜。有泉出樹杪。噴薄不到地。跳珠落圓鏡。喧靜源不貳。境古塵貌銷。谷邃日容避。其巔開華堂。佳木森靜植。烟雲倏爽朗。巒陵雜虛翠。山春釀暄和。苔繡簇鮮媚。乃知林壑妙。明晦各有致。暫覿舒遐悰。重來緜餘思。無煩歎于役。了悟靜者意。

香山晚坐

秋晚珠閣涼。青山澹將夕。復此巖上住。披襟坐溪石。歸雲拂空林。蔚然翳餘碧。美人何時還。娟娟秋水隔。勞者徒爲歎。去矣將何適。飛葉響寒山。臨流悵行客。

永齊寺

籃輿就深烟。古寺入修竹。山光澄我心。復映窗戶綠。松雨墮殘滴。清響在空谷。隱隱西日斜。漸沒巖下屋。坐聞幽鳥音。眷此山間宿。

雞鳴寺

眷茲白下秋。稅鞅雞鳴寺。淨域臨古城。坐此巖下翠。殘露滿空林。鳥動時一墜。層軒傍松杪。寒濤瀉平地。烟影暮江辨。晚日澄湖媚。兀坐對青山。翠羽數雙至。

古詩四章喜王德甫過

璫葩麗雕榭。春飈扇崇蘭。美人衫服坐。瑤瑟聊獨彈。朱絃靜理蘊。遠調清徽完。音希闕苦意。闔戶資幽歡。殊響繁夜叢。泠泠曲就殘。綜往兼慮來。引領起微歎。願折珊瑚枝。持謝知音難。

之子亦何好。窈窕光容儀。落葉朝翩翩。手持瓊樹枝。翠瑤飾珠珮。翔步臨前墀。噓蘭拭洞簫。不惜勞空閨。明月來廣除。曲斷無人吹。含睇稍延佇。我顧神爲移。曲調寧不嘉。白日方西馳。努力愛景光。崇德爲子期。暄風被陽林。巖構榮丹葩。蘭芷及荃蕙。郁郁回春華。輕颺發芳豔。孤秀凌朱霞。太古忽已遙。入耳皆淫哇。不悲元音遠。坐患流無涯。斯人詣淳古。指摘勞相加。願製芟荷衣。怡子以清嘉。鳳階金管詠子

元音逝已久。瓦缶空陳陳。哀哉枯桐枝。俯首同殘薪。大雅出晚世。古意陶天真。靜參淳悶趣。援手扶奔輪。沉光祕元訣。和性噓芳春。斯人亦已然。此曲何難中。咫尺獨緘憶。悵望勞嘉辰。謂沈宗伯

夜坐園池

月出臨廣池。人影動空碧。松際隱清光。林罅露微白。風交樹影橫。鐘定空園夕。念彼前居人。悵望知何益。墜葉散青苔。時見幽人迹。

登舟將赴梁谿道間作

澹靄蒙青岑。孤篷冒疎雨。層波生淺涼。獨坐聞柔艣。溪迴移遠林。纜動驚棲羽。微辨墟上村。漸咽烟中鼓。出慣離翻難。客獨意增楚。匪緣逝者悲。誰識生人苦。稍與前渡辭。舉帷睇寒渚。江城忽已遙。孤情眷兒女。

夜過青浦

理棹投暮烟。餘暉黯遙巘。輕舸尋歸流。空波肆怡衍。野風送香氣。皓露涵微泫。重疊林景昏。微茫峯色淺。遠火辨孤城。隔岸聞亂犬。稍別烟墟移。漸覲雉堞轉。華月澹始照。流雲蔚初展。一與清景俱。乍喜塵踪道。招懷懷前蹤。餘風動深緬。

夜赴澄江

川涂屢回驚。輾轉眺明月。微颺生斷崖。清響散林樾。竹香深夜聞。波靜舟人歇。雞鳴知近村。遠寺微鐘發。雄飛嶺

都靡緣其東。春陵迤其西。凌陰楫祝融。迎陽賓九疑。客首歸陽程。風色書慘淒。積霾惑明晦。亭午日已低。稜鈎巨石礙。壁裂陰林蘄。入谷墮黯黹。上嶺排雲霓。不知天露艱。頰首隨狡狴。古木號驚叢。修蛇懸空梯。慌惚來山魘。投淚不敢啼。懸崖納獰颺。天半奔鯨鯢。投身冒欹林。顛墜乃復稽。棧轉陽景匿。谷響雷車摧。絕頂俯萬有。高冠衝天扉。蒼梧何茫茫。苦霧迷湘妃。如聞洞庭哭。崩濤咽迴谿。壞雲西角來。獵獵翻裳衣。頓覺羽翼生。大翮盤秋暉。咄哉萬里遊。到此真雄飛。弗歷登頓困。詎與烟霏齊。周道多庸庸。吾行將安歸。

黑石關

亂山如斷鼉。指爪出奇力。意外貢盤錯。尺路無寸直。破荒搜棧齧。鑿空露鐫刻。朝塗趨營陽。日晏不遑息。

瀕洞味昏曉。惕栗忘晨食。筵箐四山翳。縮足意惶惑。林礙天空高。雲入地底黑。嶄巖斷行旅。亂石作人立。百千蟲奇鬼。搖動不可測。峽崩綫空出。谷顯鐵壁寒。高步非無能。乃受傾崖逼。鯨鯢掉尾迴。貔兪磨牙集。毒手將老拳。蠻觸汝安極。長風摧石林。老桢不肯折。鐵中殊錚錚。駭此獨行客。逕絕雷靈爭。破關日月容。顏垣出雲棧。梯石足屢側。稍辨墟烟高。喜與蒸黎卽。努力赴周塗。理策鼓登陟。

天閑驃騎歌

風沙獵獵花門湧。肉駿礮礮蘭筋聳。才大姿雄動有神。牽出銅墀氣森竦。騰身遠踏流沙煙。深夜降精雷雨懸。列缺無光霹靂動。真龍拉沓生空天。青海蕃奴不敢控。蒲桃遠效哀牢貢。未施羈勒霜躡翻。蹴空不待交河凍。但覺揮戈大漠馳。誰知踣鐵連乾動。浮雲颯颯風颺颺。山崩谷湧馳奔濤。泥注萬里一乘輿。中天突兀方瞳高。天子宴坐合風殿。翠網輝分九華扇。夾鏡雙懸天骨張。蹴踏瑤階日光變。翹首長鳴電彩迴。至尊動色太僕羨。錦韉羅帕輕雲蒙。鏤膺繡簇珊瑚紅。作態懷恩自驕愛。殿前徐步何雍容。當時十萬沙苑馬。格鬪掀騰不肯下。當槽頗厭爭芻喧。短筆時被圉人打。此馬入門始一顧。萬匹吞聲就尊庖。前年大狩飛廉東。腐孽隼兔無留蹤。至尊玉轡山桑弓。鑿蹄剪鬣高纏驥。此時朔漠來真龍。馳突大澤毛羣空。倒射黃羊殘其五。血飛漉漉迴腥風。金鞍翠飾被來好。龍芻餐遍天山草。殿閣爭圖玉鼻驂。騰騫漫憶橫門道。君不見霜郊瘦馬如堵墻。東門日出看騰驤。天寒草枯朔風怒。長嘶夜半呼孫陽。

澹道人秋色梧桐圖歌

道人何故使我慘不樂。寒烟叢沓空巖落。西園氣爽客登樓。金井聲繁動鈴索。亦有穠李華。亦有園中桃。銅柯石幹豈不暢揮灑。胡爲貌出濃氛縈拂風蕭騷。道人驅走東華道。飽閱炎光覺秋好。著色悽迷任化工。披牋黯澹還天巧。當其落墨時。條歛風雨生。粗枝大葉氣橫出。披拂盡作秋聲鳴。琅玕一片赴瑤砌。欲墮不墮疑鏗鏗。遠憶梧宮報早秋。銀床夜冷露華稠。都將暝影虛闌意。寫入關山萬里愁。道人以我胸懷曠。寄來命挂中堂上。素幔渾連翠影勻。孫枝似有輕颺颺。極目江關首重回。涼烟斷靄接層臺。雷濃湘浦芙蓉落。露滴幽巖蕙草摧。龍門亦有參雲勢。可奈西風颺鳩來。

上方角鷹歌

上方角鷹番錦毛。星眸閃爍光如刀。綠鞵絡臂黃絙操。陰崖激日翻秋颺。刷羽戢翼勢飛動。勁氣掣斷黃金條。盤空曾踏天山雪。決雲驟起飛影滅。刷翎朝斷鷓鴣花。奮拳夜擣狐狸穴。倏忽騰身入霄漢。雨灑層空亂毛血。花裙胡兒不敢放。甃廬遠獻千秋節。嚴郊底貢馳青驄。鷹師祇候長楊宮。壯士臂歸動靈廬。英標玉立凝清雉。厲吻空樞眺寥泬。大翻疑落花門東。坊開近在銅龍側。永日嚴威動八極。鈴掣虛簪烏鵲馳。影翻昏晝鶴鷗匿。陰庭轉瞬爍流電。羣精潛喘夜惶惑。是時大冬風怒號。天青海國盤霜鷗。水枯草短豺狼嗥。豺狼貓緜接雁尻。棘枝凍雀相呼呶。跂喙翔走紛釋騷。雕戈雪練迴幢旄。鳴弦厲鏃揮孟勞。凌空

一逝不可招。高陵大谷追懸。疾過釐睫。馳修毫。河隄山櫓窮搜。牢毛羣羽族紛騰。逃孤飛擇肉披羶臊。霜睛不動寒穹高。下眎鷲鳥非吾曹。

蘇武牧羝圖

似烟非烟霜凍鬚。欲雪不雪雲寒塗。西海北海冰膠臚。鈞者饒得陰飈噓。響殷爾足鷲鷯呼。狙豬黃獐潛伏墟。有羶其首來于于。非羣非牽亦非羶。曰粉播羯厥狀殊。矜矜濊濊誰謂無。長肱不麾十指瘡。陰崗斷坂遊以娛。或羣或友亦步趨。寢訛降飲儕厥徒。何人重戴氈裘襦。短筆不假招蕃奴。高舉玉節持不孤。羣旄歷落紆丹朱。未央建章黃雲徂。酸飈獵獵翻干旒。哀哉子卿今牧芻。絕食大窖神女扶。戰塚慘栗愁弗舒。羝乳則歸歸或誣。有雪爲嚙旃爲茹。阿誰寫真充顧廚。鉛黃粉墨生態紆。麒麟漫漶丹青淪。畢謹效死真丈夫。少卿衛律嗟哉都。拜恩賜號封新除。兩甄馳逐形魁梧。驪駟蕃頌來余吾。祁連獵罷休氈廬。醴漿鹿脯封駝酥。寒茄按拍聲嗚嗚。紅羅綺組排妙姝。地鑪煖爇紅氍毹。君獨胡爲拘檄株。子卿善觀千金軀。繳槩弓弩良可圖。上林雁帛來神書。

循山西南行宿北壁小閣放歌

太行三日送我行。參錯萬派羅虛明。迴旋起伏突奔峭。鸞翔鶴峙標仙薨。今晨近山觀山奧。深藍淺碧丹黃青。磨礪空翠出千變。似娛我意故遣窈窕來逢迎。何人置此數椽閣。與山曲折無經營。招山欲來拂鬚



髻時有雲氣，倏窺簷檻。我本愛山兼愛雲，愛其紆迴參錯無相傾。佳處非山非雲，亦非閭妙會適與雲山并。却憶昨歲入西粵，城東峭壁排青屏。當崖一亭特孤絕，烟霏歷亂縈冠纓。雲山不復異南北，轟聒但少千雷霆。彼旣無期此無約，偶然得耳非前盟。我聞退之禱衡嶽，掃除陰翳開崢嶸。東坡廣德祝雲海，霜晨海市千人驚。二公丹誠感神鬼，天憐遷客施元精。今我不禱復不祝，坐收萬象澄孤清。登臨豈不憶鄉國，一身已逐飛鴻征。世間萬事本無主，當盃一笑諸緣輕。君不見雲山變幻不可恆，放歌且慰雲山情。

登樓行陝州使院作

七月流火疾弗瘳，十日不上西南樓。今晨風色清且柔，憑欄聊作凌風游。樓中几榻窗戶幽，樓外巒壑縈沙洲。中條倏歛雲氣收，萬尖突兀撐高秋。寒樹依微辨平陸，炊烟點點微雲浮。黃河一線東方流，抱城北折潛蛟虬。誰家挂席乘扁舟，流烟落日不可留。雲山緜渺生遠愁，夢魂昨夜歸蘆溝。歲聿云莫，心百憂。今我不樂，日月適當風，一嘯翻輕鷗。

中元舊縣驛夜歌三首

長河在南斗在北，叢樹無人月深黑。破柵殘扉不滿百，夜昏瀝酒家家哭。獨客聞之黯無色，欲見邱隴那可得。四年此節在異國，但見他人供酒食。孤兒何曾在親側，靈不見我應歎息。生不能歡祭遠適，父母生我亦何益。

去年南頓月之日。白六來聞我母卒。驚迴淚斷哭無聲。仰睇皇天白日失。倉卒翻疑前月書。書上平安誰所筆。憐兒或恐兒心傷。兒歸更繞何人膝。瀕危知復欲云何。未親含殮憑誰說。歸來一慟兒今還。呼天不應心如割。朝來漿酒陳應同。楸梧蕭蕭生靈風。五子羅立獨不見。靈魂應到東阿東。我妻嫁我十年半。十日啼飢九無飯。苦憶嚴冬一破裳。嫁我鬻盡供炊爨。年餘飽煖抵幾何。奄歛銷沉魂已斷。肝摧隱痛彌留時。腸牽兒女淚被面。流連知爾意無限。到頭何日重泉見。月來數女知何如。淒飈浙瀝吹裳裾。朝攜祭榼緣青蕪。秋墳呼母母則無。覓爺中夜聲嗚嗚。

王將軍行過汶上彥章祠墓作

太原城頭千老鴉。東飛大漠啼黃沙。晉陽王子子勝父。捧矢告廟拔刀舞。十萬健兒猛如虎。日出河心搗大鼓。鼓聲闐闐朝入雲。大梁夜遣王將軍。將軍意氣一何勇。揮戈叱天天欲動。十盪十決當者誰。朝趨邾濮來援稀。雲浮萬騎闐來追。裴回驚馬空鳴哀。梁唐朝暮生焉爲。不爲我用爰斬之。如公之死死豈多。爲朱三死如公何。

輿人哭

輿人迸淚悲嗚嗚。舌乾口燥哭路隅。爾獨何事中煩紆。輿人仰頭答。欲語聲於喑。自言祖父曾攻儒。孤兒生苦身無襦。收瓜負米販齊楚。兄嫂不可同家居。去年報名銅山縣。負戴趨走事良慣。日分五十青銅錢。

夫頭月給銀兩半。前擡官府經淮南。出無一月錢盈串。北關租草屋。費我三百文。勉強取隣女。約略營衣裙。出門日無幾。聞說家遭水。妻在水聲中。宛轉隨波死。所住間半屋。至今在泥裏。昨日縣帖下。說道官今來。驛吏備馬匹。縣吏呼輿擡。一班十二人。聚集相分排。平日喫公食。如何逃官差。天明發銅山。午至桃山驛。不道五十里。泥深沒腰膝。足下著菲登頓滑。赤脚肉痛畏傾仄。泥深沒我身。觸石傷我骨。前日擡官來。聽道往江西。彼時雨雖落。大道猶平夷。今日擡官去。言往江南潁。那知步步難。舉動皆辛楚。回首我家亦何許。足無完膚苦復苦。不怨行路難。但願蒼天莫下連宵雨。此去新豐鋪。道里尙三十。官路一尺泥。泥中有石脚難入。欲歸不能行不得。吁嗟輿人爾勿哭。爾不見頹雲壓首沉西北。千道電光如箭激。殷殷震雷在汝脊。

哀臨淮

嗚呼怪事吾不圖。臨淮城上淮水趨。崩濤直下城郭無。沈澹巨澤菰與蒲。七月廿日吾在途。月再閱乃成沮洳。城頭鼓棹平地如。不知下有田舍廬。縣官俟我城南隅。我叩其略聲淚枯。淮流欲入洪澤湖。湖水逆淮淮倒驅。夜乘厥勢來吾郭。洶濤驟湧人叫呼。夫逃子逐牽其孥。坐拋屋宇羣負隅。有室而沒田而漘。細流入括倉廩儲。巨流橫灌牛羊徂。官凡三夜遷厥居。今之住者氓之逋。北風中人金僕姑。于野誰恤衣無襦。昨計丁戶來十都。倉穀坐沒償錙銖。千村萬落悲飢烏。貧者富者同嗚嗚。嗟哉不救斃與舖。坐無擘畫

疼爾痛。願官好恤無母雛。天寶鑒此非彼辜。民不堪命吁可虞。中丞今夜來其蘇。

河決行

癸酉秋九月。河決銅山東小店汛。麟時司試江南過茲壤。情態口擊。作是詩。紀天子紆策促使。憂悴民命也。

嗚呼咄咄鼓矐胡。黃河之水點滴無。嗚呼黃河萬里之水。曷得點滴無。巨防溜決南東徂。乃使故道鬱塞。泥沙淤。宿靈虹泗奔濤趨。小店東來不一里。河身坐見馳驪駒。驪駒馳過河。河中飛黃埃。皇帝陛下痛觸徐方災。前遣大司寇。旋遣大司馬。賜之驛騎勿許休息。連宵來。屬以十從事。迅捷如風雷。傳聞宮中昏且霧。璧畫令百卿士各以所見陳瑤階。天關九重高高等萬里。天心乃與茆檐葺屋相周迴。徐州水衝突。物料無所求。皇帝命河東。協濟毋逗遛。河東大吏各各率屬驅行軸。知我陛下日抱蒼生憂。道逢老翁哭山徑。攜妻抱子含悲哽。老翁老翁爾不見。廟堂吁咈宸衷勞。九年之堯無此聖。嗚呼九年之堯無此聖。女曹何患無性命。老翁罷哭涕在頤。插翎數騎東南馳。

潑陽夜大風雪歌

山風吹。山山夜號。雷碾霄雲奔崩濤。地軸挫折鳴巨鯨。攫擊老樹鴉雀逃。夜入萬族掀蓬茅。砂礫旋舞雪疾作。鷲毛萬片如手落。東鄰墻場西叫呼。夜半搶攘聲勢惡。雪片轉粗風轉急。長空叫嘯坤輪裂。倉卒真

同海水翻。敲鏗時見簷瓦擲。毋乃下民干風伯。不然行者了奇劫。冬盡知無雨。夜昏疑有鬼神入。雙扉翁歛寒無力。僮僕凋喪婦走匿。嬌兒顧我意惶惑。摩挲呱呱傍爺泣。嗟乎兒泣尚可休。無衣之人何以活。君不見銅山縣東四十里。築堤十日工方起。呼集丁壯諸汝聲。下埽日僅尺與咫。手僵脚凍埽不穩。眼見千夫萬夫死。我乞天神願神已。此風莫入黃河水。嗚呼此風莫入黃河水。

長歌喜徐大快亭至飲酒作

黑風吹海聲如虓。大江千里無征艘。東溟漁人棹船至。君從何處橫輕舸。關吏傳刺我方食。投箸而起羹霑袍。積惻蝟集忽相晤。如背癢得麻姑搔。坐君琉璃四面閣。飲君碧玉千春醪。轟飲大嚼盼左右。卮融琥珀盤堆整。青眼高歌望吾子。杜句橫空岔起騷人騷。男兒不佩斗大印。便當去作鄉里豪。不然肆志憩泉石。空庭佳植羅慘樞。丈夫舉事貴快意。譬若鷹鷂離韝條。嗟君簿領賦塵漬。五年作吏東蒙叵。科條朝布吏役雜。錢賦暮比鞭箠敲。有時大吏出行部。前驅負弩馳如獠。掃治館舍索酒食。人奴口角饒訾謔。歸耕既無田二頃。出仕歷有途千遭。伯道無兒伯夷餓。爰書判斷須咎繇。羈留歷下月再閱。叩門弗應吁勞勞。酸風夜吼馬毛縮。洶波凍合浮艤膠。衣裘破敝行李乏。每念及子中焉切。心游道塗計月日。飛觴寧敢期今宵。嘆君跋涉喜君到。咨嗟叫笑兼呼喚。窗紅盞綠獨生蕊。鱗鱗碧酒金波搖。更籌屢易檐烏宿。戟門撾鼓夔夔高。開簾起視雪在地。霜空片月圓松梢。

出郭見西山晴雪有懷謝青柯

夕籟喧叢籟。蕭堂昨夜寒。朝暉上西崦。雪在青林端。此日跨驢客。梅花誰共看。一瓢勞遠意。落葉浩漫漫。

西堂秋夕

雲影度銀浦。碧天橫數星。幽人眷良夜。捉席暮山青。荷動觸虛籟。竹深流暗螢。遙思潞西客。翠袖倚風櫺。

寄題雲壑草堂

衆綠被墻趾。蕭然羅薜陰。一谿明霽壑。半畝面雲林。柳是先生種。松如靜者心。時來北窗臥。流輿滿青岑。

鄆城楊園

虛砌蟲語歇。夜涼開竹樓。數星動林際。片月西南流。露氣暖深竹。池香寒早秋。迢迢望河漢。莫慰異鄉愁。

河陽薛氏園亭

行盡蒼苔路。高齋暮色晴。一花如有意。數樹不知名。排闥書堆案。開軒水抱楹。小池更幽絕。烟水晚逾清。

欹枕臨池睡。招呼得晚風。帳鉤花影外。人夢月明中。意愜幽懷澹。神閒客慮空。來朝踏塵去。更起步深叢。

孟縣早發洛陽道中

弓衣小隊詰朝閑。岸柳風吹宿霧還。却訝樹頭紅日出。隔河青見洛中山。寂歷荒郊向晚過。道旁高塚鬱嵯峨。珠襦玉柙三泉冷。月黑楓林鬼語多。

面面青山是洛州。黃塵無際碧波流。荆榛不獨銅駝恨。十里寒蕪冷似秋。

園中春色麗甚觸懷爲詩

又到嬉春中酒時。苔青幽院捲簾遲。花前一事關情甚。覆盎門東賣酒旗。  
拄笏空亭日欲斜。林光池影映烏紗。黃蜂紫蝶入牆去。一帶綠楊歸晚鴉。

錢維城

字幼安。號稼軒。武進人。乾隆十年殿試第一人。及第。官至刑部侍郎。卒。贈尙書。諡文敏。有佺山集。

任邱縣

我行任邱縣。頓覺行路好。泥乾少顛躓。馬足亦輕蹻。頗疑民氣開。共訴膏澤少。插秧雖已多。結穗日就槁。  
前朝過涿鹿。夾路秀梁稻。豈意百里間。造物判殊巧。縣尹塵土來。齋沐方虔禱。具言民艱難。農事非草草。  
六月纔布種。田功已不早。典衣備力作。男女盡耘耨。夏秋五十日。縱雨亦微小。已空室中財。徒得眼中飽。  
豐隆遂終臥。家室恐難保。我聞心瞿然。歎息視天表。迴幹當有神。盈虛亦天道。宵來起微陰。竟失衣上燥。  
庶幾雨濛濛。忽復日杲杲。凌晨登前途。泥滑任馬倒。

舒城旅次作

王安石通判舒州以文彥博薦召入

宋業墮神宗。安石實首亂。時真寬法網。天末快窮竄。如何學士口。臧否尙相半。賢奸無首鼠。少正尸兩觀。

文章工何爲。斯高亦篇翰。趙高有發歷篇餘毒乃紹述。安足誅京貫。點火熾廣原。百物遂焦爛。詎憤攸灼威。而忘  
星星炭。理亂非一人。財用司其券。不聞治成康。囂然起嗟怨。大臣操國紀。得主患不斷。忍傷天下心。矜已  
伸一見。前朝紛礦稅。神廟惑寺宦。藍袍翻御床。思陵可勝歎。

桃花嶺

陟巘疲千盤。幽壑屢迴迂。遙見前山人。招手可共語。層峯起趺下。瑣碎不可數。白雲滯其間。倏忽若吞吐。  
深秋無定風。容易作晴雨。石窄滑不支。礪深危敢俯。螺旋已無經。蟻附復可取。人生苦局促。撇捩羨鳥羽。  
未盡三十程。曦輪過停午。

觀瀑

靈泉竇雲根。飛洒自天半。初如匹練下。觸石遂零亂。飄蕭恍雨霰。隱約冒落蘚。霧氣羃虛亭。霏微着几案。  
潭底無定珠。東西濕遙岸。客遊涼素裏。屢欲衣裳換。失口訝垂虹。驚風忽中斷。雷霆乍碎擊。琴筑復疎散。  
誰噴冰雪懷。高唱接雲漢。太白今則遙。翹首再三歎。

定遠山行見田間蓄水有法禾黍暢茂卽事述懷

山田上下如割藪。十步五步溝通池。農家婦子水爲命。蓄積升斗同金費。節宣起閉重分寸。兼察地勢分  
高卑。自然服習等臥起。非有智巧誇神奇。氣疎每至風雨好。澤潤并得癘札稀。揚州厥土惟塗泥。田實下



下經所噓。溝渠未失古遺意。東南財賦天下推。北方惰農亦鋤犁。禾生滿野無町畦。關門枕肘問晴雨。嗷嗷開口憑天時。禹勤畎澮首竟冀。誰其墮者不可稽。遐哉衛李安所責。荆吳亦豈當年基。屢煩明詔拯瘡痍。亦有使者紛驅馳。奉行豈必盡不善。事等創造驚愚黎。中丞崔公紀昔分陝。下令鑿井民猶咨。於今稍稍食舊德。樂成圖始理則歧。況今屯種踰安西。輪臺蒲海咸得治。遂人瀦舍職不講。奚取百萬供軍資。安得九扈官農師。赤墳白壤澤畢陂。遊談莫問是與非。滌池汨汨禾離離。男耕女饁不敢嬉。三錢斗米何足希。

屬疾寄曹劍亭

微疴如小隱。閉戶卽山林。節序拋孤枕。生涯賸苦吟。霜中羣木盡。雨後一燈深。持此蕭閒味。應符靜者心。

寒食齋中卽事

寒更已蕭寂。近岫復便娟。清磬上明月。孤琴流暗泉。投林山鳥適。背郭草堂偏。此夕念湖海。予懷正杳然。

分綠軒對月

夕景清殘暑。涼生滿院霜。不因風動竹。未覺月侵牀。有客吹長笛。何人倚曲廊。吳歌傳子夜。歸夢隔蒼茫。

雨後過平陽縣

時奉命往泰安

雨過空翠滴。風轉弱雲低。一路杏花發。滿山春鳥啼。人家斜崦口。城郭夕陽西。不信塵中得。行行惜馬蹄。

桃城

舒城縣北三十里繁盛過於縣城其名無可攷稍南爲北渚有額曰人在鏡中

五里桃城路。烟花夾岸多。秋風吹北渚。日夕起微波。巷有周郎曲。人傳小吏歌。塵沙騎馬客。自笑鏡中過。

舒城縣

同年姜王田曾宰此縣有春秋山形如臥龍李伯時讀書處亦名龍眠山

山翠落龍眠。孤城起書烟。風辭昨夜雨。雲作去聲早涼天。香稻千村熟。清池一邑傳。關心詢舊尹。此地有名賢。

文翁舒城人

桐城山中曉行

山行愛侵曉。松露滴人衣。晴旭澹空翠。虛嵐澄素暉。村烟看始上。谷鳥試初飛。及此諧清曠。何妨暮色微。

新秋雨後夜坐

斜陽殘雨外。一半作秋晴。雲葉飛無定。檐花落漸輕。螢流深樹影。鐘隔遠溪聲。靜愜幽蘭意。方疑玉軫情。

蛩

商聲不在樹。空砌結秋心。久客苦長漏。騷人愛短吟。并添四壁靜。獨對一燈深。復有清砧和。能無白髮侵。

十六日晨達温州

潮駛三更落。風平一葉輕。晴巖明海色。寒樹雜江聲。鳥語喧山寺。人烟護郡城。爲耽遊興好。遲爾半帆程。

登樓

萬樹斜陽迴。西風滿小樓。海雲多作雨。山氣易成秋。歸馬高城暗。殘蟬古寺幽。披襟聊騁目。暝色一窗收。

懷儂歌

永巷聞歌聲。歡愁不同調。儂情一寸燭。能得幾多照。  
清淚掩重袖。君行豈忘家。須知鸞鏡影。不是菖蒲花。

月下吹笛

碧雲無際海天長。十二樓頭思渺茫。一曲落梅吹夜月。霜華飛下薄羅裳。

蔣元益

字希元。號時庵。長洲人。乾隆十年會試第一。官至兵部侍郎。有志雅齋詩紗。

月夜追和碧城韻

含情脉脉倚闌干。料峭吟肩不耐寒。欲破閒愁憑綠蟻。難通芳信憶青鸞。靜中鈴索分明聽。遠處簾櫳約略看。怪底烏龍頻吠影。想風微動月如盤。

泛舟至法海寺

煙艇夷猶去路賒。尋春蕭寺夕陽斜。風迎桂櫂聽歌客。影亂湘簾隔水花。載酒俊遊消此日。帶人濃艷落誰家。暮鐘欲動香塵遠。擬認輕雷逐鈿車。

閔鶚元

字少儀。德清人。乾隆十年進士。官至江蘇巡撫。

中秋夜登州試院和吳沅春韻

乘槎直到海天東。秋意蕭騷興不窮。萬里相看明月夜。三山半落酒杯中。魚龍寂靜波濤闊。樓閣清寒嘯詠同。最有吳剛工斫桂。香風飄拂滿簾櫳。

李友棠

字西華。臨川人。乾隆十年進士。官至工部侍郎。

辰陽關

叱馭入沅陵。高下羅衆皴。幽探歷荒林。煙霏阻遐覲。卓立山骨開。垣墉森傑構。湍激石齒齒。靈淵滴漉溜。犖确逕愈微。僕捕愁馬仆。輿丁引雙繩。推挽翼左右。雄關勢撐霄。巉絕信天就。自可丸泥封。那容方軌驟。吳淞昔披猖。伏莽餘殘寇。釜魚喘尙延。檻獸困猶鬪。開府九伐崇。問道千金購。沿溪出奇兵。遂使虜巢覆。介然成康莊。行旅來輻輳。層坡無曠土。原田紛錯繡。隔嶺聞吠厖。飲谷見懸狖。遺聞故老傳。承平百年後。履茲周道直。盡歎戰功懋。稅駕日將逋。山前有孤塚。

由文德關過相見坡至華嚴洞小憩

統如街鼓猶頻敲。荒雞山郭鳴嚶嚶。儼裝西出臨遠郊。浮嵐冷霧密征袍。綫路漸逼鼙鼙巢。幽壑俯見杉  
篁梢。晨星磊落高曼拋。日出下界聞喧呶。峯迴逕仄誠蒐庠。誰遣五丁開硤礮。石崖中斷風颭颭。當關一  
夫如虎虓。仰攻坐廢千衝轆。何須百二誇函峯。退觀又怯岡巒窠。三峯離立殊頽顛。邊喬入谷登降交。向  
背起伏揚旂旛。車騎歷歷無遁遁。僕夫謁蹙汗流散。朝斐遙指前山坳。道人行脚僧打包。我亦瓶鉢隨身  
捎。齋廚野簌陳尊肴。洞門呀豁噓笙匏。揮斥二酉凌三茅。華嚴法界非虛說。巖牖枯籐罨蠶蛸。雪色蝙蝠  
深壁抓。暗窺但覺寒生髻。試秉烈炬驚潛蛟。石髓凝滴形媻媻。天花紛綴優曇包。大千色相同影泡。羊鬚  
有珠充僊庖。雲漿一吸超凡胞。悔不深入中心慄。此間結宇饒芻茭。烏犍百尾耕荒磽。艸堂肯使獄隴嘲。  
漫謔長句資譏謔。小肯爲記郵程鈔。

荆門雜詠

憔悴江潭賦九歌。楓林葉下洞庭波。蛾眉自古傷謠詠。獨采秋蘭弔汨羅。  
蒼茫雲樹隔昭邱。悵望秦川萬里游。遷客依人懷抱惡。不堪回首仲宣樓。

宋弼

字仲良。號蒙泉。德州人。乾隆十年進士。官至甘肅按察使。

題蓮洋山人集

誰掣鯨魚碧海。中玉溪端是出羣雄。臨川獨具千秋眼。爲許樊南繼杜公。  
虎氣龍身豈久藏。華陰赤土拭干將。當時夜夜豐城色。曾掩星文北斗傍。  
蒲坂遙連太乙山。二州八水照孱顏。如何姑射仙人宅。只在河聲嶽色間。  
妙解惟應慧業知。生天成佛漫相疑。傳燈消息分明在。看取拈花微笑時。

江權

字越門。歙縣人。乾隆十年進士。官夔州府知府。

自通江至南江縣途中作

肩輿怯崇岡。盤辟不敢上。僕夫左右從。宛如牽百丈。川塗各舟車。形狀已非兩。自茲及南邑。山石間林莽。  
尺地無透迤。百里失曠爽。僇徒時陟降。一身勞俯仰。念此山中民。跬步嘗負襁。日暮尋寒寺。深樹一鐘響。  
自劍州至蒼溪縣途中作

兩劍爭嶙峋。過此稍夷坦。驛路絡山梁。古柏翼長坂。夾道散清影。森森寒欲晚。州城半在山。城下一溪滿。  
涉溪上層巒。歇仄愁偏反。叮嚀告僕夫。日高行且緩。言尋招提宿。道路加餐飯。古寺多悲風。林聲夜未斷。  
明發望蒼溪。朝煙已在眼。

南江縣大巴山途中作

流氛恣蕩析，蠶鳥爨土滿。生聚今百年，荒蕪尙在眼。茲邑更僻陋，崖壑深且遠。夜黑虎豹叢，白日行人斷。巴山兩截嶽，拱立如相伴。大巴小巴相，隔約五十里。中有尋丈地，稍稍露平坦。下令招流移，畫疆授生產。今來省耕斂，出郭經折坂。盤旋渡難水，水名。往復似縈綰。行行巴山道，冰雪猶未散。深山多餘寒，燒畬亦已晚。民戶爭來迎，暮雨就行館。

### 銅鐘行

靈樓江上百尺高，夜深風雨爭喧號。陡聞有物在空際，吼聲動地如蒲牢。晨興相顧各詫異，上躡層梯辨真僞。四壁蕭條八闔空，鐵繩貫紐洪鐘絕。初疑神物不敢撓，神靈呵護蛟龍鳴。視之駭目色斑駁，聽之震耳聲鏗鏘。須臾若抗復若墜，摩挲細讀行間字。武氏長安是建元，大撓甲辰當歲次。吁嗟運會不可長，人間彈指成滄桑。此鐘歷劫未磨滅，尙說流傳自李唐。是時唐室方不競，龍燄坐攝中宮柄。夷滅宗潢逐帝儲，才人作后還稱聖。萬象神宮制作垂，昇仙太子紀穹碑。制成奇字書青簡，欲比蒼靈萬古師。以囙爲月囙爲日，轉注諧聲皆勿律。迄今題字尙依然，諦觀洵是當時物。星移物換幾千秋，雲散風流一轉眸。景王無射歸何處，獻子歌鐘不可求。金輪御世經千載，追蠡<sup>上聲</sup>歸然仍獨在。僞符贗鼎旣流傳，何妨拂拭生光彩。百年高閣尙雄尊，萬物顯晦同朝昏。未審浮來自何日，想見逆浪聲崩奔。鐘鑄自合州，相傳從嘉陵江浮來。





# 湖海詩傳卷十一

盛錦

字庭堅。吳縣人。諸生。著有青樓詩鈔。

蒲褐山房詩話青樓詩以入蜀爲第一。世人輒以杜少陵王新城爲比。然不知少陵由秦階經桔柏渡而至劍閣。新城乃從鳳翔寶雞經漢中以至寧羌。陸路不同。若青樓取道歸州。穿夔巫入成都。卽吳漢伐公孫述之路。亦卽放翁入蜀新城出蜀之路。其地雖皆屬天彭井絡。而山川形勢迥殊。放翁雖有鐵馬四風大散關之語。其後封爵渭南。而南北棧實未按轡及之。故諸公摹寫山水。各傳其勝。論詩者乃并爲一談。正如風枝之蟲。方隅之眼。宜見笑於通人也。

履霜操

自注瀘有撫琴渡相傳。尹伯奇彈履霜操處。遂疑是作。

霜體皚兮瀘之游。兒弗履兮畏我父母。兒身載寒兮。兒心載苦。兒心兮父心。兒身兮母身。寒兮苦兮實傷我親。兒罪兮莫道。親心兮可轉。俟日出而回光兮。履霜亦暖。

十二碛

羣峰東奔流。虎牙怒相向。對峙十二碛。羅列鐘鼓狀。顛崖蝨層霄。旁竇穿激浪。峽泉落九天。洶洶翻海藏。撐舟出井底。篙師氣先喪。衆工捷如猿。百丈綠壁上。木末縱飛騰。山凹迭升降。一鼓更作氣。千篙力誰讓。造化何神奇。設此待霸王。頗聞白帝子。於此拒漢將。鐵鎖貫浮梁。金戈森衛仗。蕭銑復何人。屯兵倚疊嶂。

羣雄電掃空。故壘猶在望。平生歷險難。未若茲遊壯。萬里投蠻荒。一身墮煙瘴。風餐案傾歎。水宿魂震盪。搜奇命轉輕。得句神益旺。詎畏前途修。瞿塘險如象。

空艚峽

出峽復入峽。兩岸插青冥。中流逐狂飈。奔騰萬馬聲。下灘梭一擲。觸石危檣傾。逆挽勞百夫。十步九倒行。力盡聽所止。刺篙就迴汀。愛此民居壯。凌空駕軒楹。宿雲出洞戶。古木撐巖屏。驚猿或挂樹。怪鳥時一鳴。捫蘿上絕壁。山風動冠纓。呼童拾錦石。信手扳雜英。興幽忘涉險。觸目多怡情。前途苦逼仄。絕境難久停。過午巖日晦。磊落見數星。厓黑畏突虎。蠻語頻丁寧。移舟近湍激。拍枕聲鏗鏘。骨肉緣久斷。中宵夢亦清。狂吟出險句。那顧鄰舟驚。

過灘

重峽間百灘。一灘度一厄。江渦衆壑趨。厓口亂石積。大石疊鼉鼉。小石攢劍戟。中流若沸川。翻倒蛟龍窟。牽舟逼下流。凜若阻兵革。長篙拄峰腰。遠纜走山脊。鳴金築衆工。銳進不盈尺。一絲中迸斷。百里供一擲。觸石無完艘。沈澗有驚魄。是時雨初霽。沙石多滑澤。亡命爭上厓。匍匐落冠鳥。婦孺互扶攜。雞犬任狼藉。暫脫魚腹災。波濤亦衽席。轉思斷澗初。四極奠磐石。豈其禹力衰。此境終未闢。吾尤罪巨靈。何惜隻手擘。天宰真夢夢。人事日偪窄。波靜有潛鱗。林深多斂翮。寄語營利徒。勿作遠行客。

峽夜

噉噉猿啼夜。瀟瀟鶴唳空。斷崖開四壁。深井落孤篷。樹漏慳明月。湍驚無定風。萬重雲水隔。歸夢亦途窮。

虎牙灘

楚蜀分爭地。雄關扼怒濤。灘聲牛峽轉。山勢虎牙高。巖樹丹青雜。舟檣上下勞。新詩橫槩賦。旅興一時豪。

曉發

曉發東安道。輕霜淨馬啼。亂鴉僧閣外。殘月女牆西。春冷花猶斂。沙平路欲迷。東皋待時雨。取次把鋤犁。

老將

白髮枕戈眠。黃沙帶甲穿。風雲經百戰。筋力盡三邊。舊識飛狐路。高談射虎年。聞笳心未死。尙想勒燕然。

登忠山謁武侯祠

瘴煙開曉霽。振策上忠山。霸氣餘三國。江聲走百蠻。懸崖祠屋古。割地陣岡閑。檜柏陰風起。疑提鐵騎還。

登白帝城

萬仞墻臨灩澦堆。子陽伯業劃江開。白鹽峰對城頭出。巫峽帆從地底來。雲起化龍迷故井。風生躍馬有高臺。漢家陵闕同灰滅。淚盡寒猿日夕哀。

白帝城謁昭烈武侯廟

永安宮殿峽江頭。一體君臣祀武侯。天祖式臨傳詔夜。風雲變色出師秋。鳴鑾久絕空山道。籌筆猶懸古驛樓。瞻尙死忠諫。死孝千秋配食重詒謀。

蜀道寫懷

辭家動作經年別。去國真成萬里遊。淚眼已枯猿嘯夜。鄉書空望雁來秋。竄叢路險連雲棧。鹿角灘驚上峽舟。心折江陵灌園叟。黃柑千樹比封侯。

舟抵瀘洲

錦江直下古城壕。地入炎荒近不毛。萬里親朋勞夢寐。十旬餐宿托風濤。征蠻羅甸軍聲遠。諭蜀文園典築高。掃盡瘴烟開郡閣。岷峨天半落揮毫。

任城使院晤翁霽堂有贈

並馬長安憶舊遊。逢君意氣振高秋。酒徒半散荆卿市。詩版孤懸李白樓。握手星辰搖短劍。離心風雨送扁舟。明年醉我南池上。須典千金紫綺裘。

題杜文貞公南池新祠自注沈萊園侍御建。肖公像配以許主簿。

浣花遊蹟寄南池。洗馬鳴蟬感替時。遇主名高三禮賦。懷人心折八哀詩。鑄同賈島應呼佛。繡比平原合買絲。玉貌仰瞻如舊識。憶曾親拜草堂祠。

白蓮

玉井分栽到野塘。冰綃翠袖迥生涼。半江殘月欲無影。一岸冷雲何處香。真相尙留開士社。紅衣盡洗美人妝。水仙擗罷扁舟去。誰與凌波解珮璫。

過渝州

月落清溪放櫂來。渝歌聲接楚猿哀。濤迴峽底三江合。壁立城頭萬戶開。貔虎尙屯巴子。龍蛇爭避夏王臺。何當振策塗山頂。黑水茫茫辨九垓。

別兄弟

未樹別酒已傷神。四海終輸同氣親。此去白雲天萬里。望歸無復倚閨人。

別家人

伏雌烹罷勸加餐。秉燭喃喃語夜闌。點檢篋中裘葛具。預知別後寄衣難。

周準

字欽萊。號迂村。長洲人。諸生。有虛室吟稿。

蒲崗山房詩話。陳格勸擊京江迂村往從受業。及至京師。不交權貴。志節皎然。雖東漢人獨行。不過過矣。沈文懋門下。承其指授者。以盛青樓周迂村顧祿百陳經。非爲最。其後則王鳳嗜錢。曉徵曹來殷。豬左。棧遺損之。張策時及子。後有攷詩學源流。爲接武羽翼之說者。不可不知。若企晉雖曾親風。旨要未嘗有斯言之奉也。

登北高峰絕頂

茲峰俯煙波。盤屈勢高峻。紆餘篁竹間。廻顧已千仞。澗滿藤陰垂。崖傾鹿蹟印。當其險初履。早識境逾進。潭憐空翠入。壁訝丹霞襯。寒嶠帶漁汶。晚帆凌雁陣。散情有遐致。舒日無留瞬。會稽渺天末。隔雲遙可認。何當泛越舫。一爲窮南鎮。

晚從冷泉遊。遂止招提境。入門聞清鐘。孤閣夜方永。傾耳聽泉聲。聲喧意彌靜。朝來小雨過。宿霧散高嶺。憑窗見層峯。澗壑殊清迥。不知曉雲過。但覺衣裳冷。清飈動林薄。初日照山影。行當訪縉光。直上松雲頂。

發朱砂菴選觀音巖登石人峰

言採黝山奇。早別朱砂石。升厓得險境。指示已悚惕。熟遊尚色變。何況遠來客。凌空四無倚。投趾不容隙。壁削緣藤行。崖傾藉人掖。所憑勇往志。不隨艱苦易。幽巖旣已經。危峰自不隔。振衣造其巔。奇勝在咫尺。俯身入煙蘿。欲詣仙人宅。

緣天都峰趾度雲巢洞上升仙梯遂憩文殊院

天都信岩嶢。特立若翠屏。取逕過其趾。俯仰皆奧境。松石俱象形。巖巒類盤纒。將陟目屢眩。恐墜心更警。行經陰洞中。恍惚陷深井。須臾從井出。冉冉首露頂。流盼多創造。不類人世景。境斷緣梯升。氣逼毛骨冷。意堅斯有獲。出險真自幸。向晚憩禪扉。一燈照孤影。

長江萬里圖

江氣溢素練。江濤走虛堂。風吹江草杜若香。江源萬里遙相望。我昔經行武昌岸。計程未及江之半。天清  
鄂渚見千里。惟有巴鬆出雲漢。楚寒別來三十載。披圖忽覩全蜀在。巴水盤迴控峽山。拂雲帶雨蒼茫間。  
鼉鳴蛟宮猿嘯窟。驚浪不礙漁舟閑。十二峰高如可攀。雲旗恍覩神女還。反思往日遊趾窄。異境未極空  
惋惜。白虎關。黃牛驛。引我夢魂重挂席。竹枝歌罷江天碧。

游空谷法螺諸菴

樹密路疑近。峰迴徑復分。泉聲喧亂石。花氣暖晴雲。碧澗印人蹟。蒼厓下鳥羣。坐憐紺宇接。到處絕塵氛。  
送陳原一之官甘肅

旅食京華歷幾霜。一官纔喜赴莊浪。六盤舊著唐宗蹟。五衛猶傳漢帝軀。山逼星河分井鬼。地連沙漠雜  
氐羌。西風匹馬衝寒去。早識安邊有定方。

行經拂水山莊

扁舟汎汎越南沙。倚杖愁臨澗路斜。孝穆荒齋猶竹石。摠持故宅尙鶯花。名高那許遺簪紱。情重難教棄  
室家。太息百年同逝水。淒涼還爲惜才華。

晨自松陵歸渡太湖卽事

迴望垂虹隔杳冥。湖波浩渺快揚舲。半篙日氣霧中白。萬點浪花煙外青。隱隱榜歌來雁汶。泔泔漁笛出雲汀。還憐心切鄉閭近。未暇攜筇訪洞庭。

題秦餘女史所畫楚辭圖

繞雲煙浪洞庭深。芳杜幽蘭逼水湄。北渚已傳湘女恨。南征更識楚臣心。雲中桂櫂聲疑咽。天際瑤臺影乍沉。寫盡離騷無限意。竹枝歌罷又猿吟。

江上曲

空江潮落水茫茫。南楚征途萬里長。爲是曾經分手地。不聽離曲亦神傷。

蝴蝶詞

萬花谷裏逐芳塵。自受翩躚粉澤新。多少繁華任留戀。不知止是夢中身。

漢川

漢川城郭枕江隄。黯黯烟波日乍低。我欲停橈訪神女。暮山無際楚雲西。

陳魁

字經邦。長洲人。諸生。

月夜聞笛



裂竹蒼龍吼。飛聲入暮林。誰將折柳曲。吹我故園心。風雨有時作。江湖此夕深。倚樓人不見。規月吐遙岑。  
訪沈石田舊居

故里荒祠在。鄉鄰尙典型。浮雲看富貴。介石寄丹青。世路憐皆濁。吾生任獨醒。弋人何所慕。鴻漸久冥冥。

秦箏曲

珠箔初開急柱鳴。錦衣畫閣坐彈箏。十年夢斷伊州月。猶帶淒涼隴上聲。

秋夜曲

別院涼歸夜未殘。芙蓉秋滿石闌干。珠簾不隔玲瓏月。來照釵頭玉燕寒。

顧詒祿

字祿百。長洲人。貢生。有吹萬閣詩鈔。

宋樹西平郡王碑

涇原突騎如鷹馳。德宗避狄離京師。兇渠乘間竊神器。羣寮俯首朝塔墀。西平開風奮勇武。提戈隕涕驅熊羆。飛狐夜出臨渭北。六軍感激忘其私。錦旗繡帽立陣上。欲使衆睹英雄姿。賊平人不識旗鼓。三代罕有帥神奇。肅清宮禁迎帝駕。鐘簾園寢均無移。帝還駐馬重嘉歎。生臣扶國蒙天慈。節兼隴右位元帥。長城永賴威邊陲。恩延後嗣繼台席。殊勳表請銘鼎鬲。裴公文章柳公筆。銀鈞鐵畫辭淋漓。流傳搦本自宋

代千載展誦虹霓垂。有唐中興功再見。惟王名與汾陽隨。如何君聽蔽奸譖。中道罷鎮空羈縻。宏才遠略置閒散。七年轉側懷憂疑。平涼劫盟國再辱。萬乘反受蠻夷欺。鹽州克復念王績。靈座始以新鹽遺。乃知秉軸貴。相社稷於此關安危。

朱碧山銀槎歌馬嶰谷席上賦

舊聞漢帝驚遠略。遣使西域尋河源。乘槎浮海歷歲月。誤入牛斗逢天孫。正史莫載疑杳渺。齊諧有志勞探繙。漢書張騫傳載漢使窮河源無乘槎事博物志稱天河與海通有人賣碧山一老信好事。鎔金想像成芳樽。雷皮老樹苔蘚剝。摧牙落角千年根。綸巾踞膝氣傲岸。仰視四際雙眉掀。古來銀工不多數。朱山唐倭二謝君和弟與昆。碧山神妙技尤絕。盡洗鑿斧無纖痕。槎旁款識刻至正。當時虞揭通交謹。閱今四百有餘歲。市朝屢易多更番。人間重器半銷毀。此槎未省何由存。主人博雅富金石。愛護奚啻虞雖敦。酒闌出棹重勸客。滿斟敢惜夕景昏。垂髫迴憶侍秀水。閑舉經眼皆瑤瑤。羽觴玉爵見無算。獨有一觶傳前元。聞之卅載恨未覩。把玩頓慰心神煩。談深飲劇漸酩酊。忽據班傳興狂言。鶩當建元月氏返。具述天馬生大宛。發兵取馬距郁城。六千騎卒空含冤。我思鶩罪在不赦。胡爲寶此重錦捫。主云鶩初羈外國。持節弗失懷君恩。人生一端使足取。議古那許深文論。斯言可聽試再酌。坐看落月橫西軒。

岳鄂王墓

大將星芒落。沉冤向此中。十年勞戰伐。三字痛英雄。復見神州陷。虛期漠北空。錢唐司馬在。相對泣孤忠。

虞山經拂水山莊

平泉竹石久凋零。寂寞空山戶盡扃。啼鳥尙來江令宅。蒼苔欲沒子雲亭。生前名字傳鈎黨。身後文章見典型。輸與東臬罷給事。千秋汗簡自垂青。

韓 騏

字其武。吳縣人。貢生。著有補瓢集。

震恪中餉鮮荔枝賦謝

頰虬遺卵閩海濱。火齊磊落炎雲屯。千林一掃附海舶。南風五日來吳門。吳門寓公閩中傑。然諾平生一言決。滿甕投將赤鳳珠。開絨訝入驪龍穴。斑竹几陳綠玉盤。擘開紅縷浮精丸。高堂白髮添燕喜。稚兒黃口辭朝餐。入口水綃氣清馥。齒牙特倩瓊漿漉。全家骨肉飽啖餘。遍及親隣又童僕。漢宮百本交趾栽。唐殿七日涪江來。數枝碧葉菁華盡。一騎紅塵笑鬪開。何如心交出片語。水遞分甘舊相許。望梅安用樂天圖。畫餅欲廢君謨序。人生嗜欲良有繇。不知其味吾何求。一朝饜飫生色相。夢魂夜夜楓亭游。陳家紫方家紅。絳苞玉液紛成叢。老饕欲語顏還赤。珍重期君歲一供。

題馬湘蘭爲王百谷畫蘭

秦淮水色通江綠。教伎樓頭沸絲竹。春風領袖號湘蘭。生小幽懷託空谷。吳門才子丞相賓。風流本是同心人。紅妝不但烟花主。白首終期翰墨親。剡溪雲染湘江佩。葉翦蕭疎花向背。亭亭修竹倚孤叢。投贈分明兩相配。齊名王氏玩好誠難偶。錦軸牙籤問敦尚。珍重標題作契兄。題爲百谷契兄依稀硯席同良友。二百年來供賞鑒。猩紅小記畱親驗。曾聞十斛買名姝。豈惜千金酬素艷。長板橋南暮靄橫。金閨亭館麝蕪平。當年十日酣歌舞。何似香從玉腕生。百谷七十誕辰。用蘭離女樂張逢十日爲壽。金閨傳爲盛事。書生薄命甘同妾。人世穠華摠灰滅。美人名字足千秋。一幅清芬歎雙絕。書生薄命原同妾。百谷句也。

曉渡揚子江

月落未落天轉風。榜人呼噪船開篷。老夫睡眼揩朦朧。一葉已在江流中。是時殘月猶泛水。金光烟燦馮夷宮。須臾日破海雲出。赤餞正射浮玉峯。金烏玉兔兩交暎。奇彩頗恨言難工。蝸廬貪睡晨懶起。而此絕境殊難逢。孤舟昨日繫江滸。眠食不快愁蘊隆。豈知江神釀靈異。使我一旦開心胸。葉葉帆移雁陣起。層層浪簇魚鱗重。遂從江南達江北。涼颼歛歛孤蘆叢。無風三尺浪安在。一衣帶水何能雄。所嗟白下路甚邇。江源須向岷峴窮。

太真扶醉上馬圖

潼關一戰哥舒虜。霓裳幻作漁陽鼓。倉皇騎馬出都門。鉞盒金釵傳恨譜。圖中景物亂未逢。繁華天寶如

夢中玉環扶醉乘花驄。鈿釵欲側雲鬢鬆。金銜玉勒誇芳穠。得非驪山賜浴罷。或是曲江歡宴終。阿姨丞相各歸第。明皇前導力士從。餘興欲入連昌宮。彼昏醉眼方朦朧。桃花池雨印頰紅。回眸一盼生春風。是時延秋烏未語。萬歲千秋樂相許。玉杯春薦荔枝香。回頭石馬嘶風雨。

題畫陳搏

退步英雄事業輕。睡中籌畫最分明。華山不與陳橋變。卻爲人間計太平。

題趙丞旨畫蘭

花花葉葉帶春風。白出王孫揮灑工。猶有遺民作心史。也將餘墨寫幽叢。

李果

字碩夫。號客山。長洲人。布衣有詠歸亭詩鈔。

蒲錫山房詩話。客山艱苦力學。忍飢誦經。衡門兩飯。竟日脩然。良友至。輒呼小童。取一錢。就茶肆。瀝茗共啜之。樵蘇不繼。怡然自得。巡撫宗室雅公。嘗過次山。侍御叩以吳中隱君子。侍御對以客山及惠松崖公。遂往造焉。避而不見。時人兩賢之。其後詔徵經學。總督黃文襄以松崖薦。亦雅公所推轂也。

善哉行

富貴可樂。不如神仙。文章雖美。不如金錢。一得志何常。貴在乘時。騏驥躓躓。驚馬先之。二舉足宜慎。臨淵履冰。志士守貞。憂心兢兢。三去日苦長。來日苦短。河流箭疾。時不可緩。四讀書味道。耕於南岡。知足不辱。

庶幾安康<sub>五</sub>

解

示兩兒

初冬可讀書。披帷對月影。困窮亦何常。天意默示警。所期在遠大。忘此清夜永。經義纂孟□。如汲得修綆。攜辭芟繆悠。百家足馳騁。蘊輝珠處淵。含英金在礦。世人競目睫。欲語還如哽。但求寡悔尤。焉用名炳炳。馬援屢聞過。柳玘重行已。吾家舊遺經。先德盛積累。匪勉無異營。頗識剝復理。中歲偶行游。致汝業漸弛。我無一頃田。經籍足耘耔。義理苟能通。出處有根柢。鑿藥與貨殖。困窮亦可倚。吾生少失學。垂老方知悔。展轉力就衰。炳燭思曉起。努力愛景光。汝曹從此始。

月夜黃姑灘露坐東山中一二知己

懷幽路轉紆。領異行復卻。寂寂黃姑灘。波光動林薄。臨流擷芳芷。月向懷中落。露下不知寒。空巖鳴獨鶴。坐久發微吟。覽物感離索。美人渺何許。吾懷向誰託。

還舟西津回望支硎天平山色

迴舟指西津。水淨寒波細。卻顧所來路。峯峯隔雲際。昨日別山阿。今朝復鼓枻。渺渺青芙蓉。欲去還含睇。重岩烟未沉。遙山樹如薺。何當復來游。咫尺悵迢遞。

王將軍劍歌

神物鑄成干將手。三尺蒼龍半夜吼。七星吐燄燭銀潢。魍魎潛藏白猿走。將軍匹馬來疏勒。手握寒光邊塞黑。贈將海內有心人。風吹一片無情色。半行籀文不可認。血花點點荆卿恨。平生慷慨思報恩。尊前睡毗何須問。

題黃山岡

黃山之高高插天。三十六峯橫雲烟。陰晴朝夕歛變化。畫師無數誰能傳。須江朱子本奇士。爲愛黃山入山住。興來拂素一寫生。筆底如有靈山助。蓮花天都何崔嵬。咫尺之間萬象開。傾岬疊石盡奇狀。飛泉倒瀉潑墨俱無痕。雲翻滄海濤崩奔。猿吟鶴唳杳莫聞。蒼岬古木一氣吞。雙手展卷不敢捫。更恐虎豹深林蹲。寒濕萬壘長松根。側見仙人倚吹笛。欲往不得傷精魂。世上喧卑那可道。振衣我欲茲山老。請君放筆爲我謀。一椽寫向何峯好。

晚菊

迎冬方吐艷。誰下竟誰看。豈敢傷遲暮。何妨歷歲寒。孤懷原淡泊。獨立未凋殘。遲爾風前落。騷人佐夕餐。

懷陳處士陽山

老臥天池嶺。寒松骨共蒼。人如陳仲子。詩是孟襄陽。有女尸蘋藻。無兒受縹緲。風流今已矣。忍更過書堂。

懷葉荃園黃山

黃山好山色。三十六芙蓉。以爾煙霞侶。高居第一峯。松圍秋屋雨。雲度隔溪鐘。我欲搜奇蹟。憑虛駕白龍。

送方望子還歙縣

千里新安路。君歸別思賒。江船搖夜雪。山驛繞寒花。負米荒城遠。看雲古樹斜。相逢舊隣曲。款款話桑麻。

旅舍喜逢故人

相別情難已。相逢話較多。關河同涕淚。出處各風波。棲隱知何地。懷憂且放譌。無絲及青鳥。長食玉山禾。

范文正公祠

石筍排空山骨清。范公祠廟儼崢嶸。獨從天下關憂樂。尙想胸中富甲兵。晚穗迎霜道斷隴。寒烏啼月傍丹楹。先皇銀榜龍章在。紅樹階前交映明。

送人之邳州

送子臨歧燭酒傾。獨騎羸馬渡河行。楚州雪霽延年里。淮海風高下相城。地勢荒寒稀見雁。窮圖寂寞罷談兵。橋邊黃石今何在。卻望遺祠亦繫情。

鄭廷暘

字嶠谷。長洲人。監生。有紺珠堂稿。



蒲菘山房詩話。嵎谷爲季雅先生子。書法褚中令。小楷尤工。與予書疏往來。率作蠅頭小字。而銀鈿鐵畫。出力藏稜。同時如蔣蟠。矯仙根。錢思贊。寶皆不逮也。詩卷無多。將文獻公稱其姿致無雙。如靈印殿柳。三起三眠。諫微君撰稱其意。到語工白。然高遠。今所錄十數首。爲其生平最佳之作。

### 金陵拜方正學先生祠

讀書抱大節。刀鋸豈所憚。先生聖人徒。乃爲烈士冠。授經潛溪門。卓犖事柔翰。立言金石堅。矢志星日燦。非當開創初。旁求棟梁幹。兩朝侍罟罟。休明賴襄贊。詎知繁鼓來。朝臣且魚爛。草詔不爲屈。正辭責背亂。寸磔少完膚。十族死奚算。凜矣百鍊忠。千春白虹貫。荒祠長千側。夜夜子規喚。網絲垂四字。蒼鼠走空幔。儼然見孤像。再拜起三嘆。風馬從雲車。應笑滄桑換。攷古覓殘碑。橫塔蝕苔蘚。

### 九日與嚴大策馬出德勝門山西堤至玉泉山登高作

城西山色青峻嶒。愛之入骨無由登。今朝忽遇重九節。解意況有同心朋。走投小巷叩君舍。出郭兩騎相驂乘。荒塗昨日風雨後。泥水活活盈溝塍。懶行驚馬畏鞭策。原隰高下猶龍騰。須臾回盼村落遠。長隄俯瞰秋潭澄。嚴霜未降草還綠。疎柳萬樹垂髭鬢。經過好景正滿目。不覺迎面烟繚層。年來辭家走京邑。染衣塵土時堪憎。茲游若在畫圖裏。蒼翠觸眼多非恆。龍山往日擅奇絕。安用對此形誇矜。阮生雙屐辦已久。攀援直上扶枯藤。振衣絕頂恣憑眺。日色慘淡烟光凝。長林叢木漸凋脫。時有馳突聞呼鷹。舉眸何處望鄉國。客心快悒愁逾增。景公徒蒙後人誦。牛山涕泣名誰稱。眼前墟墓積荆棘。羊虎傾倒何王陵。豈保

鼎鼎百年內。爾我攜手頻。相仍晚鐘近。出山下寺更。踏亂石。尋居僧。繞門黃葉落。幾許空梁欲滅琉璃燈。  
佛前稽首稍共憩。斜陽隱現明舳稜。呼童從此問歸路。莫待東崦寒蟾升。

江上夜泊

夕陽西墮近黃昏。江渚維舟傍樹根。水底雲開浮月色。灘邊風過長潮痕。老僧喚渡欲歸寺。小犬吠人何處村。今夜獨眠思舊侶。自應銷盡客中魂。

返照

舉目山川動客愁。生涯篷轉只悠悠。微雲乍過隔溪雨。返照忽明何處樓。逝水幾曾憐鬢髮。吟情惟是愛林邱。阻風中酒年年事。搖落江村翠竹秋。

無錫道中喜晴卽事

柳色春堤碧似烟。春流兩槳泛吳船。正愁雨細風斜後。恰到浮嵐暖翠邊。攤鼻漫吟蠶尾句。滌甌徐試惠山泉。少陵書籍如拈賣。此處堪求負郭田。

暮春偶作

九十春光已漸闌。濃陰一片晝漫漫。無多點雨濕芳徑。第幾番風吹曉寒。纔見柔條舒岸柳。尙教密室護盆蘭。過時未布東皇令。正恐農家二麥難。

題畫新梧清景

春盡高枝葉漸添。薄雲纔送雨廉纖。戎葵欲放荼蘼謝。一院清陰到翠簾。

題汪近人春深臥雨圖

竹雞啼雨濕重嵐。嬾看千林綠正酣。卻憶小樓簾不卷。杏花時節在江南。

王岡齡上舍邀游江村園居時屆秋仲桂花盛開是日至者爲翁壽堂徵君吳竹嶼學博沙白岸

葉義山王述庵曹習庵朱適庭張崑南王存素諸同學

壺嶠仙人舉手招。蓼花波影路非遙。榜人笑指垂楊岸。泊到紅欄第幾橋。  
西風吹綻小山叢。滿院幽香自不同。好譜廣寒秋一曲。夜深來聽月明中。  
北海今朝識面初。掩關爾雅樂畋漁。牙籤三萬鈎簾坐。猶覓人間未見書。  
林壑幽奇位置新。不容金粉掩天真。清暉娛處詩情澹。自是停雲畫裏人。  
舟行得絕句

一葉扁舟上水遲。頻年客裏鬢如絲。不堪更聽吳娘曲。恰是瀟瀟暮雨時。

金農

字壽門。錢唐人。布衣。有冬心先生集。

蒲褐山房詩話冬心性情遒峭世多以迂怪目之然遇同志者未嘗不熙怡自適也嘗繪其四十七歲小像蒲州劉仲益題云堯外臣漢逸民著晉革帶不諱貧疎髯高穎全天真其標格可想見矣中歲爲汗漫游編走齊魯燕趙秦晉楚粵卒無所遇而歸晉願年五十如玉溪生打鐘掃地爲清涼山行者晚寓揚州賣書畫以自給書出入楷隸本之國山及天發神識兩碑畫梅尤工頗自矜許然爲子揮酒者多至十餘幅今廣陵武林收藏書畫家或未能有此也

宿焦山

縹緲松寥山積翠下無路風籟鐘微茫鶴蹟雲散聚如聞定中僧禪窟勸小住牽月濯巾餅江光漾高樹

畫蘭竹自題紙尾寄程五鳴

江二炳炎

寫竹兼寫蘭欹疎墨痕吐一花與一枝無媚有清苦擲紙自太息不入畫師譜酬人分精粗妙語吾所取鈴以小私印署名隸書古半幅懸空齋色香滿巖塢隱坐整日看冷吟獨閉戶飲水張玉琴斜陽忽飛雨

吉祥寺泉上十韻

新霽來山中精舍騁游眄始入灌木陰稍深緒風善維南豁平疇極西簷浮巘靜雲一族居幽澗衆流衍洑出浸淺莎濫時破重蘚瀟瀟靈液華涓涓連珠演手斲不亂清口飲有廉辨卽此澹交訂君子意非舛惜哉無名緇綠塵門茶苑明朝續水緣石鼎攜松篔

吳中春雨泊舟入夜寒甚被酒作歌

春雨打篷雲冥冥篷底聽雨泊遠汀十五五長短亭好山對面失洞庭野梅縛棘香零丁疎香激玉飛

瓏玲苦寒瘳。瘳夜不寧。水際一鏡如孤螢。照書冷燄光。星星傾三百杯影。勸形滋味濁。清辨涓涓。醉來荒唐。啞楚醒。伴我臥者空酒瓶。

臘月二十四日江上無事因出家醞要諸鄰翁小飲

曾讀逸民傳。南邨舊隱淪。清江圍屋樹。寒雨對牀人。歲宴藥苗路。花開酒國春。依然敦漢俗。祭竈請比隣。  
懷吳門陸嶠

公子美無度。讀書吳郡間。門留鬱林石。牀對小雞山。終歲淹秋駕。何時綴玉班。殷勤通旅夢。細雨穆陵關。  
東岡之下老屋三楹。陳文貞公讀書處也。子嘗遊憩其間。懷企有作。

秋氣斂虛館。東岡生道心。林疎風脫翠。山暗雨添陰。既有出烟磬。復多遶濟禽。六時喧寂意。欲繼謝公吟。  
初秋養疾焚上

巖居養疾遠鄆壖。蓂朮多于粥飯緣。秋澗曲流喧枕上。槐花一寸積門前。未忘舌本思今日。尙損腰圍似去年。雲笈珠林從妙悟。絕勝騶衍共談天。

詣庶滋上人齋堂蔬飯望中條山

久從初地得皈依。紺宇精嚴一款扉。孤竹瘦於尊者相。野雲白似道人衣。何曾心地妨禽鳥。且向齋堂飽蕨薇。試上莓梯腰腳健。中條山色見纖微。

馬日瑄曰。騷兄弟招同王岐。余元甲江墳厲鶚閱巖汪沆陳舉集小玲瓏山館

少游兄弟性相仍。石屋宜招世外朋。萬翠竹聲非俗籟。一圭山遠見孤稜。酒闌遽作將歸雁。月好爭如無  
盡燈。尙與梅花有良約。香粘瑤席嚼春冰。

秋夜鮑明府鈔攜酒就劉郎泊小酌與姚世鍾同過

秋夜秋池幽且娟。涼鷗涼鷺五湖天。水明于月宜同夢。樹老如人又十年。散髮賀循言可聽。啣杯謝滿蹟  
堪憐。劉郎泊記思前度。好續吳興掌故傳。

南郭

連坳重阪近幽棲。菜甲抽青自灌畦。剛得天涼三日雨。秋光如水草蟲啼。

曉登煙霞嶺。歷水樂洞轉憩。慧日精舍。覓壁上題名。汎湖而歸。雜書三首寄昔年同遊王與周京

司直金志章厲鶚汪潭壑諸朋好

羃歷雲容翠巘寬。此間濟勝若騫鸞。野梅苦竹無人見。破曉冰霜各自寒。  
烟林葉盡聲如掃。山鳥日高啼已空。獨立吟成有誰和。一方寒玉水丁東。  
蛛塵蘚墨認依稀。招悵題名身世非。坐對諸峯浸湖面。黃妃塔下放船歸。

新編拙詩四卷手自鈔錄付女兒收藏雜題

天涯詩老浪相稱。根觸清愁歲月增。一櫂今成五湖長。酒波如練雨如澗。  
卷帙編完頂髮疎。中郎有女好收儲。帽箱剝落經籬敞。莫損嚴家餓隸書。

詠邱氏古樹

前輩風流一草堂。舊家松柏話勾章。歲寒自有諸孫守。不數成都八百桑。

沈之亮

字咨采。高郵人。子業富有雪月生涯集。

落花詩

多少繁華曲未終。一年容易費春工。爲憐青眼移時白。不見朱顏舊日紅。乍拂遊絲還着地。欲霑泥絮更隨風。偶然何必分茵廁。悟後應知色是空。

萬點風飄一片飛。年年三月送春歸。再來門戶封塵網。重到園亭剩落暉。滿地綠陰雛燕老。半溪紅漲鱖魚肥。尋芳辜負隣翁約。青草柴門獨掩扉。

亂紅堆砌奈愁何。辜負韶光九十過。謝客恐妨侵蠟屐。問津端擬覓漁簑。江淹賦別才應盡。潘岳逢春恨轉多。太息美人隨逝水。蜉蝣生死暗消磨。

春來早起困瞢騰。幾度呼童懶不甞。燕剪枝頭裁片片。馬蹄門外踏層層。分封香國青爲帝。減度空華老

悟僧寄語深閨遊子婦。高樓無事莫頻登。

陳皋

字江皋。號對鷗。錢唐人。貢生。

自蓮花池舍車步至天城寺

舍車理筵屨。石路盤谿窅。朝曦在溪門。斷崖露削瓜。冰底啼幽瀨。宛轉行修蛇。兩山哀肘腋。徑轉開衙衙。翠屏駕香界。萬萼青蓮花。平生泉石心。於此興更賒。禮佛向白足。幡影揚寶珈。

晚自歡喜嶺取道西峯樵徑而下

松風吼潮音。澹日西嶺帖。山僧道我行。取徑何嶮嶮。側身穿石門。荒榛齧衣袂。崩崖鬼面皴。暗雨莓苔泐。下臨勢不甞。有似冰帶屨。查子濟勝強。騰身自誇捷。同人怖無言。予亦屢回怯。稍見祇樹林。禪燈出香葉。仰面千仞巔。翠色與天接。不知一枝藤。雙足何由蹠。

登挂月峯絕頂

茲山北戒雄。浮圖聳其上。蜿蜒轉神京。元氣淋漓王。東連碣石遙。西與太行抗。長城一線分。海水杯中釀。微茫十六州。幾點蒼煙漾。馮來據上頭。縱日四無障。白雲在其下。青鳥不得向。況彼塵世間。昏曉自殊狀。日月探兩丸。天風逼衣繡。何來浮邱翁。乞以蒼龍杖。揮手謝同儔。吾將躡瀛閬。



# 吳煥文

字樸存。山陰人。貢生。有樸廷詩稿。

## 游硤石山青蓮寺

頭頭止見山。初入疑無路。行腳厲前猛。曲折乃畢赴。精進毋憚遙。仄徑鮮窘步。怪峯高插雲。寒氣慘集霧。小松掛層崖。五粒紛無數。天光見不多。悉爲險阻據。最後得石門。安穩遂平度。豁然淨界開。如迷忽頓悟。當陽結精藍。紺碧輝雲樹。蜂房綴千窠。虎牙磔四佈。中有青芙蓉。榭萼玲瓏貝。何年天風吹。墮此冷然御。其麓遶丹泉。危磯激吼怒。遠公擲筆臺。流傳毋乃誤。匡廬真面目。名同實難附。摩詰本無言。涅槃底用注。殘僧如猿狖。但知拾橡預。禪理誰與談。勝境我幸遇。咄哉養社人。競登珥山去。

## 曲陽孫晴崖明府掘地得晉王李克用書安天廟題名碑

陰風撼樹飄靈旗。山鬼吹火燒叢祠。沙黃崩塌露圭角。榮光下閃埋豐碑。孫君嗜古負奇癖。持撫金石靡子遺。石鼓遙辨趨雙字。金薤高媿窺軻詞。栽花曲陽有餘暇。命工掘地乃得之。剗泥剔蘚見古刻。傳自唐末僖宗時。隴西郡王忠且勇。中山告急親援師。道經神廟躬禱饗。凱旋賽神神格思。司空偕行名忝附。大書勒石盤蛟螭。歐九作紀軼此事。不學合受原父嗤。有唐晚葉事百戰。文人失職悲流離。嗚張鯨突鳳凰死。文筆亦復歸鴉兒。昭陵玉匣那可得。韓陵片石逾瓊瑰。依稀顏筋并柳骨。孫君寶此勿復疑。嗚呼孫君

寶此勿復疑。屹立直退千熊羆。

陸蘭圃右劍歌

昔觀周生說劍圖。厥衣短後纓曼胡。看畫尙覺神色王。況乃寶物懸庭隅。龜文龍藻光黯黯。莊矍桓葱價俱減。陸君何處購得之。石可中分蛟可斬。行年四十走風塵。磊砢昂藏八尺身。與酣斫地自起舞。風雨馳驟驚鬼神。我聞幽燕游俠子。慷慨願爲知己死。憑將櫛具報恩仇。葬近要離塚卽喜。君也讀書氣浩然。禮干義櫓無與前。恩耶仇耶平等視。所恨不逢張茂先。陸君酬爾一杯酒。拂拭無勞長在手。匣中虎氣任埋藏。自有光芒射牛斗。

扶衣玉刀歌爲朱浣桐方伯賦

維王爲兵傳古昔。後王德薄易銅鐵。耶溪旣涸堇山空。百鍊鋒芒在無缺。此玉原爲溫潤姿。良匠雕鐫異環玦。璞中有刃剖始呈。鞞外流輝襲難滅。一髮晶光冷射人。詎比鉛刀供小割。聞諸帝后御衣裳。用以抹腰無摺襖。不知幾度近山龍。一落風塵尙貞潔。自公購得長護身。人水不濡火不熱。千年寶物會通靈。豈逐烟雲歸變滅。宋家玉斧畫河圖。大渡遐荒外有截。劈正元時朝會陳。明堂丹陛凝寒雪。慨自滄桑世代更。沙漠牟蛇等飄瞥。此刀猶幸在人間。黼黻瑤琨兩淒絕。吁嗟公乎慎毋褻。玉恐傷殘刀恐折。善藏鏃鏑養精明。避攝六丁窺太乙。

黃素堂觀察五十初度以朱竹垞老人井田硯爲介爰賦長句以代嘏詞

造化韞奇石長壽端溪潛璞尤純堅。義取諸井琢成硯。水木滋氣耘書田。厥銘製自竹垞老。

銘云水而風田之容耕不

盡年長豐

結隣曾與相周旋。曝書亭前八萬卷。丹黃甲乙勞磨研。伏勝傳經歲九十。三食豚望誇神仙。我來晉

陽攜作伴。汲深繙短瓶。徒牽黃公秉節蒞茲土。勞農勸相操經權。剛中更具教養德。心如止水澄波澹。春秋恰符大衍數。菖蒲九節開華筵。鄙人進介乏長物。用以此硯申寅虔。從來石交能耐久。況取井養無枯偏。此硯在公猶在我。無得無失何推遷。祝公並受明王福。有收勿幕孚涓涓。汾水春波足灌溉。黃河秋信防淪漣。仁人利物不改邑。會看萬井譟豐年。

德州

斜日陵州渡。驅車有所思。杜亭無往蹟。董子有遺祠。春水魚爭上。昏林鳥下遲。香風吹墨露。閒意覓青旗。

陸青來見過次韻

濕雲濃霧曉難開。剝啄曾無舊雨來。舉舉江南重見子。滔滔天下孰憐才。桐枝乍折無鸞集。艾葉如張有雉媒。向後升沉何足計。是非都付掌中杯。

馮清輔枉顧

經歲羈孤歎苦辛。塊然也覺自嫌身。親朋遠別無多字。患難相看有幾人。渺渺烟波愁北渚。年年風月負

東隣毀車殺馬從今始。好向汀洲采白蘋。

春日晤廣陵唐再可

歸燕東風作隊忙。相逢趙話悲涼。雨中春色隨流水。月下簫聲憶故鄉。塵土難留騎鶴侶。烟波擬買種魚莊。幾番淘洗青衫淚。又爲唐衢泣數行。

賀周石帆學士納姬次符葯林韻

名香百和夜深含。好作同功上箔蠶。應笑香山垂老別。欲翻貝葉住精藍。銅街十二駕鈿車。蠟炬迎來鬢影斜。定向籬前親捧硯。吟成先飲玉蓮花。

趙虹

字飲谷嘉定人布衣。

蒲褐山房詩話飲谷遊幕府久著才名閒與樊榭翁胡夫查蓮坡諸名士唱和惜老而無子依其如于吳市中葺一室爲小吳船來訪者邀至茗飲子與樊榭微君定交于此生平能詩工詞兼善駢體歿皆散佚故所存詩止此其寓竹西亦久常主詩孝廉荔生家其序荔生槐墅詩鈔極爲婉麗。

揚州

淮南名郡最繁華。烟月重城百萬家。豪客春衫九鬣馬。佳人冶袖七香車。雷塘有塚生青草。板渚無波甃白沙。莫唱江南舊時曲。銷魂愁見落楊花。

岳王墳

恢復中原誓不難。靖康何意竟偏安。渡江帝子羞泥馬。賣國封書祕蠟丸。忠鯁旋聞疎趙李。英雄況復失張韓。六陵陵樹冬青盡。只有南枝尙鬱盤。

戊午七月自大梁東歸感喟成詩用以自贈

飄零淮楚踰河朔。轉徙幽州更大梁。迢遞關河雙去雁。古今歧路幾亡羊。時無燕趙悲歌士。坐有邯鄲挾瑟倡。但得翠娥深勸酒。不辭酩酊罄清觴。

問訊滄浪舊釣磯。樵兄漁弟共相依。眼看西北高樓遠。心逐東南孔雀飛。園吏好尋濠上樂。丈人已息漢陰機。浚郊不用弓旌辟。自署中吳老布衣。



# 湖海詩傳卷十二

## 張錫爵

字擔伯，嘉定人。貢生。有《吾友于齋詩鈔》。

蒲謁山房詩話：擔伯詩中，短中規，宜風宜雅，不失先正典型。自陸菊隱、孫松坪諸老云阻，優游衡泌，以吟咏發其性情，同時莫逮也。迄今六十餘年，而吐屬維新，古香映几，深衣大帶，猶仿佛遇之。曾孫彥曾，盡聲壇坫，譽美江湖，知其貽謀者遠已。

### 月夜過靈鷲上人院

小院垂烟羅，宵涼露微白。杖策獨幽尋，月明見行蹟。孤燈照不眠，中有忘言客。開門聞妙香，依依話秋夕。

### 題吳漁山雪景小幀二首

積雪埋孤村，空山靜寒夜。幽人應未眠，疎簾竹間下。隱隱壁甕燈，經聲出茅舍。  
遠岸玉塵崩，長空華月凍。木落天宇寒，宿鳥清無夢。遙見釣船歸，濛濛水雲動。

### 萬壽寺華嚴鐘歌

今改爲覺生寺

城西七里前朝寺，銅鐘如山土花漬。唇吐三千寶地音，背蟠十萬蓮花字。九重願力超人天，點畫波捺何翩翩。六丁呵護霄電紫，羣真下讀慈雲鮮。靖難功多新鬼哭，銅山槌破鐘成速。龜茲樂奏勝幡飄，雙樹光

涵少師禿鐘高三丈腰圍豐。君王笑錫公侯封。南山伐木桷虛壯。照耀慧日何曠曠。鼎湖龍馭排雲上。神物淒清墮經廠。仙梵禪燈歷九朝。特勅移來地蕭爽。萬牛回首千夫馳。華棧巨棟光參差。曇花感夢聲沉夜。銀草搖風曉擊時。聖孝原承文母命。六僧日供齋筵淨。雷轟天半紫關寒。潮捲津門塵世醒。文皇黑業豈能償。神廟垂衣祚自長。洪鐘靈應迦維力。金地千秋象教彰。前年繫馬鍾山下。靈谷蒲牢眠斷瓦。云是高皇東序鋪。金川破後無人打。

明宣宗御筆子母雞圖

上有勅賜內監王進等字

雄雞掉尾高參差。羽毛颯颯蘆花吹。青蟲入口尙天矯。丹頂倒泥珊瑚垂。牝雞張口拱而竅。二雛仰母求其慈。二雛爭蟲競延頸。一雛啄地偏委蛇。一雛上背一雛伏。注口總與蟲爲期。斜陽欲沒影荒淡。細草亂茁青猗猗。二雛七子各異態。雖有佳手誰能爲。安樂已平交趾棄。萬機多暇閑相嬉。含毫吮粉若無意。點染忽出胸中奇。宮娥遙看貴妃笑。內臣拜賜踰珠璣。三百年來事灰燼。此畫獨壽堪咨嗟。晴窗漫展豁蒙翳。題識隱隱銀鈎欵。得之象外洵無間。子母合繪良堪疑。君不見長門寂寂僊師閉。無子君心更誰記。

明景帝廢陵

秋風十里吹荒陵。綠垣欵斷莓苔青。停車竟路夕陽亂。淒涼寢殿枯松鳴。土木之變良可異。倉皇北狩雷王庭。廟謨國柄知不惜。舉身委振何其輕。長君引亂社稷重。議和遷國徒營營。列宗二祖養士報。司馬號



令行雷霆。精誠動天。戰士泣。咄哉。委任由君明。建炎踐祚。宗李在。何爲不返冰天行。東安門外舊君人。握髮出走宜郊迎。紫袍拜舞。臣子事南宮。朝賀家人情。皇儲既定邦本固。沒寧生順千年名。事不出此戀天位。束刀繡袋多疑驚。綸辛同鐘受杖亦何罪。一朝伐樹緣高平。完德良難吁可悼。奪門之變宜旋生。當時惡謚誠太酷。殺禮營葬無人爭。我來況逢劫火後。野燒漠漠連岩局。歎歎弔古不忍去。回看纖月升林垌。送人歸包山。

翠微寺

執手未能別。哀蟬還自吟。涼風一夜雨。秋滿太湖陰。歸夢日以遠。煙波況復深。願爲天際月。流照最高岑。迢迢翠微寺。一徑入寒烟。樵路秋山雨。僧房古樹蟬。蒼藤垂砌外。飛瀑落階前。啜茗閒窗坐。浮生意渺然。劉龍洲墓。

大布衣無愧。小朝廷可悲。渡江揮涕日。詣闕上書時。千載留殘碣。何人復古祠。顧湄今不作。惆悵立山陲。太倉顧伊人欲鳩同志爲復舊祠而不果。

臥佛閣

飛閣俯千峯。遙遙見山麓。高臥不知年。歸雲夜同宿。

河渚

日落河渚涼。面面煙波隔。何處起漁歌。天空葦花白。

### 王爾達

字通侯。嘉定人。廩生。有虛亭吟稿。

蒲菴山房詩話。先生同祖司業七世孫。太生孝廉之子。性情坦易。通懷樂善。多聞舊事。爲門弟子。談前言往行。孜孜不休。詩亦如之。子與鳳階同年。而先生呼爲小友。每語出肺腑。肝相示。和氣所薰。至今思之。猶坐春風中也。

### 閒居

客裏歸來日。匆匆已二年。詩懷緣病減。酒量趁愁添。屋小惟容膝。囊空不貯錢。故園行樂處。風月浩無邊。僻逕蓬蒿沒。卑棲耳目清。寧爲無事飲。恥作不平鳴。覓句拈枯管。緝書愛短檠。蕭蕭庭畔竹。共有歲寒盟。春初雪不止。

江鄉臘盡欲回春。雪共春來又浹旬。攬鏡漸悲青鬢改。對床猶喜白頭新。地爐溫暖添薪火。漁艇蕭條罷釣綸。何日凍消梅意動。攜柑貰酒趁芳辰。

### 和曹來殷歸省述懷之作二首

鶻噪枝頭散曉煙。軒車枉過敵廬前。故人暮景成三老。才子言旋記十年。欲訴舊愁如宿夢。幸逢乞假暫歸田。耳邊蟻鬪何曾歇。時患耳疾。只恐高談聽未全。

編羅折柳圃添樊。雨雨風風過幾番。親健正思追洛社。君恩未敢戀邱園。簞鋪細蟻蠶初子。籜解新龍竹有孫。風物鄉關原最美。得閒愛殺閉衡門。

雙清閣落成追悼南華先生

采殿揮毫信手成。頭銜管領是雙清。杏花春雨江南夢。空寄相思虞伯生。先生乞假南歸。纔至天津病歿。

構造皆由清俸餘。雲飛畫棟麗天書。閣成先赴修文召。香案仙班別有居。

王愔

字存慤。太倉人。諸生。

蒲褐山房詩話：存慤為烟客。鹽卿曾孫。繼堯侍郎從子。而畫筆蒼深。秀兼擅其長。詩法錢劉。詞宗姜史。極為沈文。愔公所賞。為子畫三。御漁莊。春夏秋冬四幅。見者疑為古人。嘗為企晉寫寒山雅集圖。十四人。文愔及定字徵君皆在。存慤寫景。張彬如寫照。時稱兩絕。子淵亦諸生。早歲學佛。受具於華山。遷居楓橋。不知所終。

傲劉松年

油油原上草。潺潺澗中泉。幽鳥時一鳴。遠邨帶朝烟。新綠漸稠密。落紅餘芳妍。柴門閉深陰。草閣臨春田。煩囂既云隔。機巧亦復捐。於焉慊心賞。自理風中絃。

山寺獨游仿夏禹玉筆意作圖題此

漸離塵世喧。遂造招提境。梵唄清道心。禪花照潭影。情忘不知返。趣澹默自領。瞑坐松下風。夕陽度秋嶺。

漁父圖做李晞古筆

漁父秋江上。乘潮泛釣船。得魚沽白酒。晚酌荻花邊。

梅花書屋做郭熙筆

長林繞屋幾千枝。想見幽人靜對時。小閣春寒香雪裏。半簾疎雨坐題詩。

蔡 隴

字文舟。崑山人。貢生。官含山縣訓導。

蒲芻山房詩話先生居縣之西墩墩東距嘉定安亭四十里蓋歸震川顧亭林所居故先生之學私淑於兩公為多性質慤實嗜欲教人以盡倫篤行讀書好古為亟嗣遷珠街鎮從游者益衆子童弗受經因得知讀書之要歸臨終為文以戒其子曰余碌碌無能經自守慨百年之虛度鮮一善之可存居五年以老致仕歸隱終為文以戒其子曰余碌碌無能經自守慨百年之虛度鮮一善之可稱壯歲飢驅言辭拙于冥報殘年吏隱筋力衰於當官上有桑於光前下無謀以裕後移家近市遂於世是為幸民竟膺中壽之期尤慙仁者茲以大分有與與世長辭雖天壽之殊形要於不貳既死生之一致夫復何悲似露將晞如蜩斯化啓手啓足髮膚差幸無傷附身附棺誠信何嫌於薄虛文無益末俗不經俱應捐除毋嫌駭聽倘旁觀未喻以為子道有虧可取遺命示之更有囑者平生苦志屬文悵心絕少至於酬和間有詩章尤屬支離見嗤大雅流傳奚望藏拙宜先倘有存留悉宜焚棄故詩文多散佚者孫之垣哀為一卷

留別環峯紳士

晚歲羈微祿。婆娑鬢雪深。長貧甘吏隱。多病忝官箴。鄉夢縈皋座。朋簪謝泮林。遙知故園月。千里照歸心。

憶昨辭三徑，攜家上一船。悲銜毛義檄，坐久鄭虔氈。講肆棲公廡，香燈侍昔賢。舍學無訓導，衙舍寄學環。秋奉祀，那堪策仕日，已是乞休年。

十月下浣在漕溪，正覺寺講約，因留信宿，賦贈智公上人。

捧檄來蕭寺，晴和及小春。上方瞻氣象，近市隔風塵。講席朋簪盍，寒氈佛火親。遠公煩貯酒，半偈悟前因。

西禪堂卽事

鄭虔歸白髮，筆研已封塵。愛此筠牕淨，悠然佛火親。茶瓜隨分足，花雨逐番新。莫問長生訣，憑君聽未真。

和曹聖淵冬日書懷

日御元枵斗柄迴，竹君梅友共追陪。寒消元亮杯中物，暖蒸昆明劫外灰。身未許人因有母，容爲悅己怨無媒。西山舊約平原隱，茅屋三間水一隈。

葛景中

字運乘，號若湖，崑山人。貢生。官來安訓導。

蒲謁山房詩話：先生明太常卿錫璠之後，遷居青浦珠街鎮，寓圓津禪院，教授諸生。爲詩學溫岐章莊，句如：閒居賦就霜凝髮，夢友詩成月滿梁。無事且傾婪尾酒，有情休續斷腸詩。錦囊句好題新畫。石鼎茶香讀異書，尙有故交留白社，更無殘夢到紅樓。涼思乍添前度雨，老懷重感去年秋。苦冷然可誦，及卒同邑劉□□探其事，略入玉山人傳中。

九日澱山登高

何年一拳石，踞此旋湖濱。邱壑無多地，登臨有幾人。吹花餘暖節，落葉伴閒身。莫送憑高目，秋風易愴神。

東庵

爲趁東皋屐，行吟興未央。半灣溪水碧，滿院木樨香。寺僻荒蘿徑，僧閒閉竹房。秋風吹短棹，歸思入斜陽。

秋懷

青鏡年華不暫留，西風又惹鬢絲秋。三春畫閣憐巢燕，萬里滄波羨海鷗。明月自臨芳草渡，好山多上夕陽樓。側身孤望成寥落，手把琅玕詠四愁。

金陵舊曲追次東籬舅氏韻

誰言春柳章臺路，只抵秋烟黃葉村。玉笛清歌憐別館，金釵巧笑憶當門。斷鴻落月秦樓夢，倦蝶疎花楚岫魂。建業西風人易老，白頭天寶話愁痕。

紅橋無復認桃根，萬事傷心烏夜村。蟬噪夕陽臨故苑，鳥啼深樹傍誰門。悲殘崔護來時面，銷盡江淹別後魂。剩粉零香今莫問，昆明何限劫灰痕。

金粉繁華自昔論，家家春色苧蘿村。魚鱗碧瓦花園屋，雁齒紅橋柳巷門。鸚鵡珠簾朝學語，海棠銀燭夜銷魂。而今秋冷江城月，只有青衫惹淚痕。

辛亥生朝感興

蓬累年年負壯圖。相逢剛得阿蒙呼。東方自昔常求米。南郭於今且據梧。未必成名非豎子。尙餘故態似狂奴。出門一笑羊腸曲。馬齒空憐老識途。

### 沙維杓

字斗初。長洲人。布衣。有耕道堂集。

蒲褐山房詩話。斗初與張崑南皆居下津橋。自號兩布衣。斗初隱於商。來往江西湖北間。長髯巨額。如酒豪劍客。詩亦多悲壯激發之音。崑南隱於醫。豐頤紅頰。神情怡曠。間好古琴。詩亦多清和閒適之趣。兩人性情各別。而好吟咏則同。皆爲吳企晉所契。嘯侶開樽。呼朋命屐。靡不與兩人共之。嘗刻爲二布衣集。今下世已久。詩板亦不復存矣。

### 宿四宜堂

梵宇敞湖天。宵深風露冷。澗松奏琴韻。崖月逗孤影。樹近俯鶴巢。燈遙辨漁艇。久嬰塵世喧。暫喜招提靜。半偈雖未持。衆妙先已領。多累愧向平。無營慕宗炳。支枕不能寐。浮生歎俄頃。

### 登中峯寺訪念亭上人

一雨衆芳歇。綠陰佳霽初。擾擾心不閒。久與林僧疎。茲晨踐舊約。取路忘崎嶇。杳冥入蒼靄。忽得支公廬。叩門興非一。握手歡有餘。蔬圃半藥草。禪榻多儒書。吾生愛靜便。捨此將焉如。夕照斂梧竹。歸鳥喧庭除。淹留出寺晚。惜別還踟蹰。

同張崑南王蘭泉曹來殷自華山夜還宿靜菴上人精舍

上方鐘動初。潭壑興寒霧。不知微雨來。靄然中林暮。歸鳥相啁啾。暗泉互奔赴。藤枯難屢攀。磴危少安步。松際漏月光。照見山下路。回憩高僧廬。愉悅論往素。慮澹息衆緣。心清得微悟。龕燈明夜闌。唱焉起遐慕。

漁浦潭

起視越江湄。磊落晨星朗。舟子貪兼程。聞雞撥蘭漿。宿陰曉尙屯。信潮寒未上。森森岸嶠高。漾漾川路廣。急湍多迴流。迅飈無停響。探奇矜遠涉。踏險怯初往。界峰雲漠漠。赤亭樹蒼蒼。壁險猿挂藤。水清魚避網。緣源去安極。遐眺益蕭爽。暫違塵世喧。聊資烟霞賞。

題姚雪軒吳山晴翠圖用東坡書王定國所藏烟江疊嶂圖韻

翠花初落辭故山。舊游回首空雲烟。嚴冬蕭條變草木。披圖風景還依然。但見千山風翠各奔赴。懸崖百尺噴飛泉。晴光雨色互窈窕。捲簾雲樹疑斜川。板橋茆屋宛村落。雞棲豚棚當門前。石梯盤空度木杪。培鈴風鐸喧諸天。烘雲染霧妙點綴。一邱一壑皆清妍。忽思吾廬何處是。不歸久廢山中田。蹇蹙烏帽走塵土。未若此地耕鑿終殘年。空谷采薪山寂寂。石潭汲水雲娟娟。攜琴坐待月上飲。醉倒自愛松根眠。帝鄉縹緲無夢到。回首已謝蓬萊仙。雲轡半幅寫歸思。青鞵布襪須隨緣。歲寒桂樹恐零落。作詩聊繼招隱淮南篇。

宿中峯寺



丈室層霄外，明燈坐夜分。星河澄霽壑，鈴鐸語寒雲。問法依支遁，論交愧領軍。境空心更寂，花露滴俱聞。

江夜

牢落荒江夜，星霜歲欲周。枯桑出野火，凍浦斷行舟。莫問馮生鍊，空餘季子裘。臨風獨搔首，哀鴈下汀洲。

潤州夜渡

山扼中流險，潮迴北渡難。魚龍深夜寂，星月大江寒。泛泛憐雙鬢，茫茫集百端。嚴城吹凍角，悽切向南冠。

泊蕪城

此夕蕪城泊，鄉心更黯然。夜燈江口戍，寒雨楚人船。冷落愁孤客，飄零感暮年。荒雞一再唱，擁被未成眠。

刊溝道中

短晷西馳疾，長淮北上遲。岸高崩積雪，船響犯流澌。烟火謝公埭，松杉董相祠。賴多陳蹟在，憑吊一吟詩。

過燕子磯

削壁臨千仞，征帆日去來。雲端盤鶴鶴，樹杪出樓臺。岸坼隨潮走，江喧觸石迴。白門懷古地，繫纜重徘徊。

松滋送友人歸

北風吹雪灑征衣，匹馬衝寒汝竟歸。短鬢獨判淹澤國，尺書須仗達柴扉。楓香驛冷猿啼苦，桑落洲空鷓影稀。此日河梁一分手，荒城留滯更何依。

瓜州城樓曉望

城上秋陰黯不開。烏鳥曉角傍空哀。數行宿鴈蘆中起。一片風帆樹杪來。日上海門分島嶼。霧消江郭見樓臺。夢魂阻絕鄉關遠。歲月惟將客鬢催。

菊

叢菊凌晨白露團。後時終恐易凋殘。幾經籬落迎秋發。半向天涯帶淚看。元亮棲遲耽寂寞。少陵行役飽艱難。對花忽動平生感。蕭颯霜風兩鬢寒。

秋日雜興

頻年旅食意如何。歷險真從夢裏過。驅馬亂山穿虎豹。偃帆滄海傍龜鼉。梁鴻去國歌彌苦。王粲登樓淚更多。歸臥故園空四壁。家貧無事不蹉跎。對酒高歌氣尚雄。古來潦倒幾人同。擔簦躡屨功名晚。擊筑吹簫道路窮。華髮蕭疎催暮景。綈袍零落感晨風。百年通塞何須問。且向滄江把釣筒。

歸舟漫興

鳥鷺唼喋滿烟汀。橋李城南路再經。一葉輕舟風正穩。晚來吹過落帆亭。晴波渺渺澹無烟。酒店漁罾遠岸連。又見蛤蜊新上市。水鄉風景逼殘年。

月夜渡太湖

湖水接天天不分。水禽夜呼烟際聞。滿船明月唱歌去。七十二峯皆白雲。

張 崗

字崑南。號古樵。長洲人。布衣。有鶴健堂詩鈔。

秋日過碧公埕院

修竹無遠近。入門但清風。秋陰澹斜照。暮色蒼然空。苔花細路轉。石礪寒流通。碧公寂滅久。孤埕荒烟中。臨堂思舊講。循林想遺蹤。高風昔已渺。邱壑今猶同。了然悟無生。趺坐聞禪鐘。

登堯峯作

夙昔聞堯峯。游心歲已積。杪春羣物秀。及茲事清適。路轉峰西偏。蕭條但松石。飛泉若風雨。淙淙下絕壁。向晚猿鳥啼。時還見樵客。緬彼五湖水。東逝自古昔。烟波碧如此。人事幾更易。請從支遁流。空山共禪寂。

早春遂初園卽事

停橈向林園。修竹衡門裏。逶迤入苔逕。嵐翠滴牕几。種藥有山翁。垂綸見童子。境遠親禽魚。汀香秀蘭芷。開軒面西山。雲壑尤清美。丈人養微疴。逍遙慕園綺。懷新感物華。論舊惜年齒。梅花已零落。但有青溪水。坐愁風雨多。春暉澹如此。夜深巖戶寒。幽籟松林起。信宿卽歸期。相思悵何已。

題三泖漁莊圖

湖湖浩淼浮清瀾。九峯秀出晴雲端。故人結茅傍汀渚。綠篔簹秋風寒。已知水木遠人境。況復鮭菜供盤餐。蟹醃漁簞吾已具。從君散髮垂綸竿。

秋暮同楊石餘過葆中集遂初園雨中登閣分賦

憶昔攜琴坐山閣。空山猿嘯風蕭索。一彈流水響寒空。再鼓湘雲起薄薄。卽今重到已三秋。依然風露滿汀洲。芙蓉零落不堪採。美人相對空離憂。

蕭齋秋晚風雨多。相逢奈此良宵何。黃柑丹荔手自劈。況有翠袖彈雲和。與君歡樂已遲暮。別後相思渺雲樹。漁洋山下好烟波。明日揚帆五湖去。

銷夏灣看白蓮

吳王銷夏處。尚有白蓮花。湖色澹無際。水天秋一涯。微風動蘋末。疎雨散蒹葭。日暮垂楊岸。同誰繫釣槎。

雨中中峯眺望

一夜中峯宿。風泉萬壑音。曉鐘雲外斷。春樹雨中深。華髮催遲暮。禪林閱古今。浮生多感慨。不獨爲登臨。

歲暮送友人之吳興

復作蒼溪別。依依岐路間。斜陽孤棹客。晴雪五湖山。逝水看東去。冥鴻聽北還。天涯當歲暮。想像鬢毛斑。

送友人游天姥

潮落扁舟夕，飄然澤國東。桃花一夜雨，春水數帆風。此去登天姥，行吟憶謝公。空山摘瑤草，千里恨誰同。

月夜舟次寄懷諸子

斜陽渡口水，烟分東望平。沙鷺幾羣，江浦雨晴潮未落。兼葭月上酒初醺，歸船涼露三更笛。別夢秋山一片雲，此夕懷人勞遠思。西風憔悴沈休文。

秋夜雨中集金管園中卽席懷亡友亦瑜

秋暝松牕燈火虛，故人清宴子雲廬。啼殘林鳥空山靜，落盡汀蘭暮雨疎。對酒尙吟思舊賦，論懷休擬絕交書。相逢盡是江潭侶，重向秋風問索居。

秋日登靈巖同石餘企晉

振衣同上落虹亭，古塔雲深入杳冥。山市草荒秋露白，香溪雨過暮潮青。天空一雁來胥口，木落諸風見洞庭。莫向西風更懷古，菱歌淒絕起烟汀。

寄懷朱草衣客楚中

竹西一別幾經年，雲海相思共渺然。老去杜陵猶作客，病來麀詒愛逃禪。月斜湘雁鳴沙浦，霜冷吳楓落釣船。惆悵故山猿鶴在，幾時歸臥白雲邊。

重遇揚州賽紅女史愴念舊游賦贈

露桃花暝畫樓東。簫管曾同醉綺叢。今夕相逢俱是夢。月明重唱玉玲瓏。  
瓊花也復解憐人。腸斷隋家舊苑塵。水調無聲江月悄。十年冷落竹西春。  
忍將金粉怨當年。落盡桃花春可憐。多少揚州興廢事。就中愁殺杜樊川。

送友游洞庭山

洞庭秋色渺愁何。日暮乘潮載酒過。七十二峯天際落。片帆西去白雲多。

胡承祝

字華三。銅陵人。貢生。官蘇州府學訓導。有輟耕書屋吟稿。

擬韋左司寄友用寄全椒山中道士韻

郡齋夜漏沉。忽夢烟霞客。訪我秋雨中。屐齒印苔石。坐花間前軒。尊酒數晨夕。夢醒月在梁。依稀見行蹟。

擬韋左司寄寺居用寺居寄崔主簿韻

禪室掩青燈。蟲語響籬落。寒雲淡欲無。山月照虛閣。風泉繞幽林。孤樹興不薄。苦無同心言。誰與慰離索。

題王蘭泉三泖漁莊圖

雲間三泖環重湖。迴汀曲澗激相縈。紆九峯倒影潑蒼翠。水天一色涵空虛。此間代有高人居。季鷹歸老餐

蓴鱸二陸當年未入雒。讀書愛樂平原廬。君家意氣雄千夫。金門獻賦長卿如。鳳池翰染方磊落。胡爲寂寞盟樵漁。知君樂志惟琴書。衡門抱影塵襟祛。數椽結構依芳渚。水邨沙戶相招呼。忽飢誦經人事絕。蘆簾紙閣青燈孤。有時刺艇來菰蘆。竹竿手把答簪俱。筆床茶竈左右列。嘯傲烟月何舒徐。子家鷓鴣岸江環。閭波寬匹練。光平鋪。風冷蕭蕭飄菰葦。雨昏拍拍飛鷗鳥。頻年匏繫羈東吳。樵兄漁弟還往疎。恨不及早賦歸去。鳴榔月下譟烏烏。披君畫卷烟霞敷。此境輞水驟網無。鮭菜江鄉美風景。足迹未到神先徂。溶溶秋水兼葭枯。伊人宛在清而濯。何時結隣來辭澗。撈魚射鴨同長述。

曉發

宿雨風吹盡。篷窗薄冷侵。水烟臨曉重。山翠入秋深。野渡人聲聚。遙天雁影沉。那堪回首望。落木正蕭森。

春曉曲

翠帳輕寒動。春風入繡閨。遼西無夢到。一任曉鶯啼。

題畫

迴汀曲澗杏無涯。曬網漁舟對岸斜。一帶疎林殘照外。白雲黃葉幾人家。

款乃曲

烟澹湖村燈火微。隔溪漁艇夜深歸。棹歌杳杳不知處。涼月一灘沙鳥飛。

### 過春山

字葆中號湘雲吳縣人諸生有湘雲遺稿。

蒲褐山房詞話湘雲家居市井性愛邱樊獨與沙斗初吳企晉朱適庭張崑南諸君為友博通羣籍尤精於新舊唐書嘗為補遺糾謬未及成而卒惠徵君定字極稱之年纔二十有九格石漁磊寄懷詩云花萼圖書並徵音筆林茶邊伴微吟最憐小閣聯林語多病常懷出世心其標格可知矣詩宗劉春虛王龍標及王孟章柳錢郎澄鮮陶逸妙悟天然自出清襟不山襲取玉樓早賦賞識者希沈歸愚先生甄錄別裁時子示以詩采擇數首今舉其工者悉著之庶毋致烟雲變滅也。

### 雜詩

織女常苦寒。農夫常苦飢。里閭游俠兒。裘馬自輕肥。上林射雉往。平樂鬪雞歸。華燭布瑤席。香風引妓圍。酣歌散烟霧。咳唾成珠璣。得意苟如此。安知是與非。

### 雨霽即事

霽色收微雨。白雲澹遙天。東原結棹歌。新流分稻田。苦逕每孤往。蕭蕭聞暮蟬。藤陰凝暗露。樹杪生孤烟。秋氣晚來佳。為吟桑者篇。

### 秋日寄諸子

秋林風蕭蕭。茅徑無人迹。閒居久沈冥。步履散愁疾。衆鳥各已歸。西山藹餘日。不見素心人。浩歌空竚立。

### 夏日閒居



果園沐新雨。空翠積几席。卷書午倦餘。墜葉紛蕭槭。乳鷺集卑枝。陰蟲吟暗壁。遇物多所懷。靜觀知有獲。同心二三子。幽事已成昔。新月滿蒼苔。誰爲一步屨。

中峯水明樓

積雨岩壑靜。古木吹幽香。山樓坐翠微。雲氣生衣裳。佛火耿幽龕。經聲雜風篁。蕭然萬籟寂。水石空青蒼。夙懷方外游。何爲疲津梁。誓將持半偈。掩關臥繩床。

雪中簡吳竹嶼

雨雪積深夜。荒溪斷樵牧。晨烟冷茅茨。陰色靜空谷。迴風颯以至。殘滴響修竹。蕭條孤興發。視聽轉幽獨。故人隔溪水。郵墟辨喬木。何當著屐來。床頭酒初熟。

沙白岸朱適庭秋嶺吳竹嶼夜集茅齋遲張崑南不至

山月隨客歸。華門烟中啓。涼露暗生衣。落葉時盈几。忘言淡相對。頗得清靜理。開軒望遠郊。隱隱微鐘起。不見抱琴人。幽懷付流水。

同吳竹嶼登凝遠樓

雨後遙山碧如洗。蘿逕無人暝烟起。露滴荷衣生暮寒。抱琴獨宿秋聲裏。爲君一鼓滄浪吟。萬壑千巖流水深。何處夜猿啼不斷。西風蕭颯引離心。

祇樹庵黃山松歌

何人植此黃山松。虬枝屈鐵高竄縱。日色慘淡烟濛濛。虛堂白晝生雷風。疑是軒轅遨遊載玉女。青天飛下蒼精龍。不然仙人縮地弄雲海。恍惚坐我天都峯。蓮花百丈倒空翠。飛泉十里噴長虹。老幹槎枒奏琴籟。寒濤澎湃聲摩空。道人無營靜對此。薄寒翠滴秋衣濃。招予松根聽清響。落葉謾謾驚秋蟲。無勞採藥三桑東。但乞方便安禪宮。高枕莓苔跣兩足。悠然悲覺寒山鐘。

寄吳竹嶼

野外疎人事。蕭然掩敝廬。涼風落山果。微雨長秋蔬。倚村歌招隱。臨流誦卜居。芷蘭誰采采。日夕落愁予。同吳竹嶼水亭夜話

水亭織月上。蘿徑散秋陰。涼露生衣袂。清風滿竹林。美人坐遙夜。逸興托孤琴。一聽滄浪唱。悠然塵外心。對雪獨酌和邵灑夫

積雪滿窮巷。林深獨閉門。隔窗梅破臘。盡日酒盈樽。凍浦下寒鴈。空山啼夜猿。扁舟欲乘興。杳杳暮天昏。積雨荒江暮。危樓水氣昏。亂山開夕照。獨鳥下寒村。種秫吾將老。裁詩誰與論。近來憔悴意。欲共白鷗言。

積雨

竹爐山房訪天鈞。上人不遇上人好。古能詩藏竹爐詩。卷墨蹟希世寶也。

精舍泉聲裏。行人出翠微。雨餘芳草長。春冷雜花稀。浩劫留詩卷。名山老布衣。無因陪杖屨。惆悵對斜暉。

曉起

曉起理蔬圃。疏籬日影遲。秋寒菜甲細。露重豆花垂。散帙時閒讀。濁醪長自持。隣翁諳野趣。乘興過東菑。

問楊石餘疾

落葉滿汀洲。斜陽閉竹樓。十年吳苑客。一臥海門秋。往事悲青鏡。餘生付白鷗。相將有嵇阮。把臂入林邱。

曉登支硎山

閑入青蘿去。寒山深幾重。晴雲生古石。空翠落長松。倚杖看流水。忘言坐曉鐘。下方初放梵。曙色辨諸峯。

山行卽事

澗道依山轉。迢迢積翠深。疎鐘荒塢靜。修竹數家陰。暮色歸田犬。溪光下渚禽。幽棲從我老。卜築對遙岑。

石湖

數里入空翠。峯回碧澗幽。新霜變木葉。斜日亂溪流。帆影松陵暝。菱歌笠澤秋。忘機羨漁父。把釣狎沙鷗。

宿水石閣

斜光帶木杪。山徑已蒼然。門掩藤蘿月。人歸橘柚烟。明燈臨冰飯。欹枕對鷗眠。一夜秋蕭颯。蘆花落滿船。

湖上曉起

宿雨霽空江。初陽隱寒樹。蘆洲不見人。微聞水邊語。

梁溪雜詠

東風過雨草芊芊。斜日山橋聚釣船。一路冷烟柳欲絮。春衣初試賣餚天。

邨居

遠山一碧帶孤村。樹石蕭疎晝掩門。閒臥不知新雨過。晚涼藥院長苔痕。

朱研

字子存。號紫岑。休寧籍。吳縣人。監生。

塞上曲

營門日落晚蒼茫。瀚海天山道路長。愁絕李陵臺畔路。夜深東望月如霜。  
長城寒色起邊愁。深夜彎弓上戍樓。漢將令嚴霜月白。更無長笛奏伊州。

朱昂

字德基。號適庭。長洲人。監生。有養雲亭詩鈔。

題翁齋堂秋林覓句圖

風泉振林木。墜葉紛如雨。鴻雁初來賓。蟋蟀聲在宇。幽人動遐思。清吟良獨苦。悠悠孰知音。空山有樵父。

擬韋左司寄友

郡齋春風至。谷鳥林端鳴。時清多暇豫。端居懷友生。名山昔同游。芳樽茲獨傾。一從秋雨別。離索絨中情。去者愜幽賞。居者羈世榮。雜花明前川。春草日以萌。寂寥掩扉臥。良會何由并。

黃山松歌爲靜菴上人賦

黟山峭拔生古松。玉屏鐵壁眠虬龍。老榦槎枒萬枝立。蒲團石上雲烟封。陰崖終古闕樵採。斧斤所棄高。龍窠影摩蒼天野。鶴唳風鳴絕壁洪。濤吞軒皇一去五千載。振衣誰躡青芙蓉。道人移來植淨域。竹爐煮瀑森陰濃。有時干霄撼風雨。下瞰蒲柳皆凡庸。我來松根重感慨。月斜獨聽寒山鐘。久辭故山適異縣。楓江旅泊淹孤蹤。十年夢想落雲海。無能策杖披蒙籠。皮皴骨瘦絕類此。星霜過眼秋徂冬。何時還山結舊約。僊人招我天都峯。

斗初企晉過訪宿小樓

隣寺疎鐘歇。江村落木多。柴門深雨閉。客櫂暮寒過。促席依松檜。移床近薜蘿。山中樵信近。握手問如何。

寄懷凌祖錫

碧柳依南浦。相思春雨餘。雲帆三百里。海雁數行書。天末憐同調。花時歎索居。經年勞夢寐。君子意何如。

聽張古樵彈琴

幽居委巷靜。日晚坐鳴琴。傾耳泉流澗。當窗風入林。樓高寒雁過。山遠暮雲深。再鼓瀟湘曲。飄然諧夙心。

元夕吳江道中

夕鳥下村烟。春江欲暝天。梅花開異縣。客夢入新年。極浦疎燈出。孤帆細雨懸。逐縈芳樹色。歸路渺平川。

題王蘭泉三泖漁莊圖

吳淞百里水泠泠。草色閒門釣舫停。秋雨忽添疎樹綠。夕陽還送遠山青。人歸輞口雲迴合。棹入僊源路杳冥。從此結茅桑苧下。生涯好續種魚經。

寄題吳企晉秋江歸櫂圖

秋風命駕惜離羣。黃帽青氈此夕分。別路猿吟三楚樹。還家帆卸五湖雲。閒情早賦陶彭澤。清夜高歌鄭廣文。整頓香溪舊漁舍。臨流結網趁斜曛。

題黃永夫竹漁莊圖

負郭閑田半畝宮。門前櫂轉曲溪通。綠楊晒網橋三板。春水環邨竹幾叢。東漢隱淪推叔度。西江詩格重涪翁。何當結屋南隣近。共話桑麻杯酒中。

和太史浚谷族叔偕同人游汪伯子巖東草堂之作次韻

名園幽寂樹層層。長者停車訪舊朋。山果雨中初結實。藥欄春盡半牽藤。溪流小艇聞漁笛。閣倚重巖隱。

佛燈絕好竹林吟嘯處。清游我亦記來曾。

題江村草堂圖

芙蓉秋浦碧迢迢。又值寒塘木葉飄。曾憶扁舟漁火夜。殘鐘落月過楓橋。  
秋柳問門野寺孤。玉遮山色晚模糊。好將黃鶴丹青筆。寫出江樓聽雨圖。

易諧

字夔勳。號松滋。江都人。候補知府。有抱山堂詩鈔。

題王蘭泉三泖漁莊圖

烟光結幽村。竹木紛可喜。古屋三兩間。靜者此棲止。吟詩發妙性。窮經喻微理。時一弄扁舟。長竿釣秋水。  
立夏前一日西疇小飲

爲惜春將去。幽尋過竹廬。綠深棲鳥靜。風定落花疎。野迳苔痕合。夕陽臆影虛。芳華容易歇。把酒一踟蹰。  
環溪野望

僊源不可到。卽此足閑情。草色碧無際。溪流春有聲。好花三月暮。疎雨一朝晴。向夕漁譌起。微風隔浦生。

陸貽穀

字露傳。號湘蘋。青浦人。貢生。

題黃雪廊

長廊凝望處。檀暈映簾櫳。香恰當秋半。游疑在月中。霏霏臨曲檻。馥馥入遙空。夜靜徘徊久。清虛此地通。

沈懋功

字枚臣。青浦人。貢生。有妙香詩草。

蠟梅

數點檀心耐細看。蜂脾偷蜜怯餘寒。隔江梅柳春將至。預報東風蠟一丸。

爲西岑倪氏題畫

霜林染遍葉。酣紅平遠秋。山人畫中徑。曲不知何處轉。小橋西去一灣通。

邵玘

字珏庭。青浦人。貢生。有西樵詩鈔。

題西莊光祿課畊圖

東風芳草堤。淥水菰蒲境。農事春來繁。畊夫未咸乘。夫君大雅才。振衣在華省。偶因休沐暇。聊睇田園景。楚徑何盤紆。遐阡頗修整。勉以畊耨勞。吞茲箕箒影。犬吠遠村間。雞鳴墟里靜。良覲一以逢。嘉慶自此屏。

王本蕃



字芳儀。青浦人。諸生。

渡澱山湖

風度歸帆疾。晴空漾夕輝。漁舡聲唱和。村舍影稀微。汀草連天碧。沙鷗逐浪飛。湖中春漲滿。應羨鱖魚肥。

王 玖

字二癡。常熟人。暈之子。

爲述庵先生畫三泖漁莊并題

打槳入空明。橫橋出秋嶼。人在釣魚汀。如聞隔烟語。



# 湖海詩傳卷十三

## 梁敦書

字幼循，號冲泉，錢塘人。乾隆十二年舉人，官工部侍郎。

蒲馮山房詩話：冲泉爲文莊公仲子，嗜學好古，詩得文莊家學，抒寫性靈，研深工力，其服官啟歷中外，懋著廉聲，當乘臬湖南時，適梁文定公爲中丞，拊循之暇，修舉廢墜，潭州鐵佛寺舊有鐵柱，周刻陀羅尼咒，爲淳化元年所鑄，久埋土中，因修寺發土得之，嘗擗以遺余，余爲作詩以記其事。

### 蓬壺朝旭爲湯少光祿先甲賦文石

我公等身富著述，書法恰與光祿匹。餘事風流水石閒，到處搜羅不失一。文旌近自思唐歸，攜石滿篋生光輝。過從主與客成二，冰甕清異爐烟霏。或如江上漁磯濺，剩有垂綸落一片。或如峽內鐵堂開，何處尋詩人對面。其餘衆美難具陳，就中一石何玢璣。海天一色白鳥漾，絕壁拔起凌蒼旻。青黛模糊溼欲瀉，紅雲繚繞光紛射。我疑火炎昆山巔，又擬夢游赤壁下。公言此是蓬壺尊，初升朝旭蒸天關。小山旁列附庸耳，餘霞倒映扶桑暎。始皇求仙徒浪好，博望乘槎恐虛蹈。壺中九華昔縱傳，海上三山茲可到。千態萬象徑寸中，一覽嗚谷馮夷束。縮地有術縮本畫，蛟龍潛伏雲氣通。是時庚暑方揮汗，嵐氣波光動几案。清絕茶甌又酒甌，衣袖生寒忘日旰。前年曾作萬勝游，題品自謂窮巖幽。今來觀止氣已懾，砭砭詎與球琳儔。

公將旋京致使命。敦也瓜期備朝請。問字還當借異書。玩石時從養本性。

### 廖景文

字觀揚。號古檀。婁縣人。居青浦。乾隆十二年舉人。官合肥知縣。

#### 自寒巖靈峯歷香亭

春風散晴和。花塢繁桃杏。登彼千仞岡。澄潭鑒鬢影。石陷地自偏。雲扃境何靜。蹠屐力不勝。拖筇上煙艇。  
泝流舟行遲。幽趣乃全領。潯環蝦尾洲。款乃穿溟滓。雲碓聞煙扉。淡若邨墟景。萬卷書無存。舊有萬卷一樓遺址  
川流自永。清磬響林泉。斜陽銜峯頂。誓欲窮仙源。茫然凌萬頃。

#### 虎邱玉茗軒卽事

山館依巖徑。紅欄積翠分。花寒桐院雨。茶沸石泉雲。倚竹悄無語。聞簾忽見君。殷勤同惜別。芳訊幾時聞。  
感舊二絕

遺真一曲譜真真。舊事傳來墨暈新。物換星移家樂散。十年春恨細如塵。

鶴放孤山舉手招。綠迷秋浦水迢迢。何時重訪貞姬墓。紅帽青衫過六橋。

#### 舒城卽事

髻隱煙嵐到眼昏。龍眠居士迹猶存。畫眉聲裏穿雲去。碧嶂蒼松別一邨。

寄石門

年來心跡冷如冰。玉版禪參大小乘。今日板輿過竹院。白雲深處擁寒燈。  
尙平事了一身閒。扶病衝寒到此閒。竹杖芒屨人莫笑。出山原是爲看山。

過米海嶽墓

寺門斜對最高峯。梵宇蒼涼暮靄濃。惆悵襄陽埋玉後。更無人倚十三松。

王鳳儀

字廷和。號審淵。太倉人。乾隆十二年舉人。官至西安鹽道。

蒲馮山房詩話。廷和爲孝。言巡撫之孫。和州述濬子。與弟嶠谷。皆能傳其家。畫學。廷和在蜀。雖從制軍督運。汶川而人。求其翰墨者。益衆。山樓谷。腳行帳一區。草束米囊之外。絹素盈牀。廷和揮灑。應之日。取鳥道。蠶叢。作爲畫本。閒以吟哦。故所作益奇。凡橫戈躡馬之上。見者都爲失笑。

閒居行作

幽棲罕人事。當書掩籬門。所得在靜理。無論城市喧。虛庭滴深翠。遶屋秋苔痕。清風了無意。惠然披我軒。  
卽事生悟悅。真趣時復存。古琴再三弄。可以滌塵煩。將爲洛生詠。曲盡已忘言。

食菜二十韻

久客違鄉風。每食念時蔬。湖蓴及山筍。吳餉杏難續。北方有異菜。佳者出安肅。秋畦嫩甲齊。茸茸已盈握。

肥霜飽根菜。燦然黃且綠。巡圃割沙泥。連車汗烏犢。市販擔新柔。園官薦香熟。先生藜莧腸。清餓食無肉。朝旭照荒廚。闌干餘苜蓿。忽欣食指動。觀頤得所欲。一把已堆盤。百錢行滿屋。松薪燒破甑。浮浮煮黃玉。妻孥勸加餐。放箸自捫腹。其餘壓老盆。御冬誇旨蓄。得飽卽爲珍。底用窮水陸。適口味自長。寡嗜願易足。矧此比醍醐。天子亦已篤。元修名旣喜。信民言可讀。逝將學灌園。芳蔬手親斲。

鐵畫詩並序

蕪湖鐵工湯鵬。能鍛鐵作畫。凡花卉草蟲山水屏障。無不精妙。其山水巨幅。必曠年乃成。世不多見。見者皆徑尺小景耳。好事者爭購之。範以木懸諸壁間。或合四面以成一燈。亦名鐵燈。每幅輒值數金。且不易得。湯旣歿。他工效爲之。終不能逮。蓋錘鑪之巧。前後所無也。同年山舟梁編修作詩見示。賦此爲和。

良工使鐵如使筆。萬象紛紛躍冶出。龍睛夜照昆吾寒。碎翦元金若無質。隔牆鼓鞀疑有神。洪鑪百轉燒酣春。春枝婀娜春蟲撲。沒骨新翻鏤銀簇。或爲巨嶂窮刻鏤。十日一石猶嫌促。界欄銜壁懸玲瓏。清光飛射秋屏空。連臺四照九微轉。蘭膏掩映星星紅。雲烟過眼千金換。那及青瓜鍊烏炭。巧匠爭傳了緩名。寫生欲學嵇康鍛。梅根舊冶尙輝輝。不比當時老畫師。若教妙畫通靈去。雷兩應隨龍劍飛。

題畫時在灌縣桃關

少不如上書請纓終子雲。健不如射生飲血曹將軍。胡爲短衣曼纓走萬里。人山更與羣山羣。蒼烟斷空白日匿。山勢杳與天無極。鳥道春盤一綫青。龍湫晝閉重陰黑。平生五嶽羅心胸。蠟屐欲躡松喬蹤。猿啼鶴唳不到處。落墨忽掃西南峯。高堂素壁坐蕭瑟。絕壑時聞風雨疾。莫指丹青當臥遊。雲間雪外方籌筆。

寒下曲

萬馬出雲中。三邊戍草空。鐵衣春疊雪。玉帳夜翻風。健卒能橫槊。孤兒解帶弓。漢家方遠略。不敢薄從戎。空碛寒雲外。連營積雪閒。風翎時飲石。火旆欲燒山。駝馬收胡幕。金繒出漢關。璽書猶未報。大將在關顏。新賜單于宴。前驅淨寒氛。將開五屬國。更調六將軍。飛檄隨邊鳥。翻營逼陣雲。金人初入獻。驃騎已邀勳。沙市卽事時。余權判荊州。官廨在沙市。距府治十五里。

憔悴南冠久滯淫。洛宮花月劇駸駸。官居近野諳田事。蠻語隨人變土音。故國尊鱸千里夢。虛堂琴鶴十年心。焚香執卷堪消日。退食還應愧俸金。

題畫

溪光黯黯常籠樹。山氣空濛不辨雲。還似江南梅熟候。綠陰如幕雨紛紛。蒼茫風景黯江天。竹杖芒屨入暮烟。客思蒲帆秋水外。詩情楓樹板橋邊。

題查儉堂觀察北征集後

玉壘金城路透迤，鼓鼙聲裏向關河。  
鞭絲帽影堂堂去，又聽西風出塞歌。  
雪花六月犯貂裘，塞北風雲接素秋。  
行盡蜀山七百里，亂霞黃葉是松州。

玉門誰更繼班超，老去戎軒鬢半彫。  
卻喜歸來笳鼓競，載將詩卷過紅橋。  
松州在

橐筆年來鞞肉生，新詩百讀感商聲。  
短衣匹馬吾猶健，恨不從公作騎兵。

### 王秉翰

字合谿，漢軍鑲紅旗人。乾隆十二年舉人，官至東河總督。有《合谿詩草》。

#### 宿松歸塘

烏雀棲烟樹，牛羊下夕原。  
危峯疑阻路，曲逕又通邨。  
雨意連山暗，蟲聲徹夜喧。  
數程已不遠，十度月黃昏。

#### 晚舟

寒林有宿雅，莫靄欲成霞。  
火露漁舟暗，星懸嶺樹斜。  
板橋通野寺，草舍集人家。  
爲問停橈處，猶云驛路賒。

### 邵齊熊

字松阿，昭文人。乾隆十二年舉人，十九年賜中書。有《隱几山房詩鈔》。

舟次夜雨同江楓，原蔣秋澗家兄叔。  
清話用少陵，宿贊公土室韻。

古岸繫扁舟，雨滴宵逾靜。  
蕭蕭篷背風，寒燈淒孤影。  
促座輿偏生，清譚夕以永。  
雪黎分玉乳，鬪茗試龍井。



忘機意自得。灑脫性所秉。聽雨旣愜願。對牀愛夜迴。二客況佳士。清風溯箕穎。平生喜交遊。一笑萬慮屏。安得洗寒空。素月出高嶺。回首望燕臺。雲沒西山頂。

舟次天津

南歸多逸興。沽上問青帘。落日大堤晚。深林野水添。津雲迷估舶。海月動秋檐。空外寒帖急。誰家女手織。次杜林先生題壁原韻贈至上人

一桁青山倚翠筠。山空省得是閒身。濤聲欲噴松間月。雲逕欣逢世外人。勝處烟霞無定相。靜中華木不關春。禪心試看空潭影。魚躍萍開總見真。

梁國治

字階平。號瑤峯。會稽人。乾隆十三年殿試第一人及第。官至東閣大學士。謚文定。

過觀音巖

石壁立水外。風濤浩洶洶。何年巨靈劈。幻此金蓮湧。崑崙豁幽竇。液瀝垂乳漚。飛空上危梯。萬象羅森聳。澄潭空心顏。倒景羣山拱。江帆日暮搖。回首蒼烟重。一聲清磬鳴。上界香雲擁。

過港口驛次雲巖侍讀韻

歇心隨處足。堂有歇心處三大字是董思白督楚學時書今非其舊矣小憩息羣喧。不見銀鉤舊。誰同貝葉翻。萬年畱寶刹。前有萬年橋寺因以

名五字和慈恩。歲歲星軺過溪聲。客到門。

謳唸將楚曲。夢眇望湘烟。永夜南樓月。懷人北洛船。前塵蓬梗合。客夢藕絲連。我已忘情者。題詩任晏眠。

平定城樓天衢閣成詩以紀之

飛閣浮空接漢槎。冠山濃翠挹晨霞。關河榆柳連三月。烟火樓臺出萬家。幾度嚴城籌保障。偶從賢守話桑麻。蓬瀛天際塵難到。指點人寰路未賒。

汪廷瓊

字衡玉。號持齋。鎮洋人。乾隆十三年殿試第三人。及第。官至工部侍郎。有賜書堂集。

題蔡葛山先生觀海圖

蒲昌引度絡西北。百谷分道趨東南。六鼇最屬拱地軸。雖坎應位陰陽含。閩山磅礴結霞嶠。辟易金廈千峯嵐。就中太武更弁冕。嵯峨嶺削羅諸男。天雞踞旦閭闔啟。博桑高射蓮華葩。此是先生讀書處。十年月窟天根探。罡風卉歛雜魚梵。匡牀靜課爐香飴。壇前萬象露俶詭。馬銜騰睽虬螭驂。臨崖振衣一縱目。近取遠納歸淵涵。畫圖寫景兼寫臆。神運直使鯤鵬慙。我昔向若躡旗鼓。名山卻步但解捫籃篋。至今落筆謝蠡勺。望洋欲語徒嬰媿。

迎鑾赴榆關宿永平試院見舊刻三松歌因和其韻

迎鑾道出榆關東。寒飈已戒律未冬。平州官廨暮投宿。重門授鑰塵猶封。佶曲磴路入奧窔。山堂突兀當  
巖嵒。堂前堂後雲影羃。舉頭瞥見三喬松。徘徊庭除夜霧合。未遑掃石披蒙茸。詰旦整冠爲肅揖。千尋古  
幹何鬱蔥。是時曉日吐光采。金支翠葆扶童童。上拂華蓋蔭曾宇。下拖霏霧連崇墉。昔賢駐節發高唱。遙  
想振筆凌長風。我今銜命歷畿甸。輜軒北指經盧龍。夷齊古廟在咫尺。仰止孤竹欽遺蹤。屈蟠之叟雖未  
識。夷齊廟中有屈蟠松。以此例彼將毋同。寒垣雪早沒山骨。停車難覓霜林紅。惟有虬姿轉蒼翠。天曹藻寫元冥窮。  
岑樓忽落步虛響。仰視濤籟翻琤鏜。乃知德產厚雨露。因篤直隄人材鍾。豈容樵牧涸斤採。要待匠石勤  
磨礪。苦心造就始適用。抑高舉下猶張弓。會當奇文副嘉觀。磊落翹秀開心胸。詩成策馬尋古道。灤河繞  
岸聞山鐘。

素心蘭

花葉澹如此。一庭風露深。炎埃吹不到。空谷杳難尋。潔白筌詩意。寂寥琴操音。虛堂冰鑑在。晤對有同心。  
感從木蘭曉發都門

金枝肄武天家法。侍從班掄驂乘人。風襲弓衣初滌暑。露零車幟不飛塵。平橋沙軟駝蹄淺。馳道陰濃馬  
步馴。北望雲莊猶六舍。懷恩感遇倍駢駢。

題皇六子燕坐圖次韻

花香鳥語有禪蹤。靜掃蒲團簾影重。小憩便參尊勝座。無言兼息辯才鋒。庭前苔長聽經石。屋角雲移作禮松。結習未除凡骨在。一瓶慙伴六時鐘。

奉命祭告東嶽恭紀

城闕更籌肅麗譙。廟庭燎火徹通宵。天閭誅蕩趨重殿。神陞森嚴備百寮。盛德大生羣望長。明禋晉舉萬靈朝。春巡鑾輅申昭假。早有繁禧集慶霄。

冬夜朱石君同年招飲新居有詩索和走筆奉簡

蘭堂夜飲舊坊東。新居在舊宅稍東老遇歡場故能同。屢索三升新釀白。楚澆十丈軟塵紅。盍簪落落星低曙。飛轍匆匆燭散風。早貴如君誰得比。年華猶是日方中。

朱珪

字石君。大興人。乾隆十三年進士。今官戶部尚書協辦大學士。

蒲褐山房詩話參政兄弟少入翰林。即以高文典册。照耀蓬萊華蓋之間。為蘇林所仰。垂三十年。然其尚名教。與清節。世或未盡知也。任山西布政使。司以方正為巡撫。所嫌。謂其不諳吏治。由是仍改官翰林。久之。上深知其公正廉潔。累擢用為巡撫。入長吏戶二部。而參政愛才。下士。士以此望而趨之。昔韓忠獻為中正所歸。而於元祐諸賢。未嘗偏徇。葉文忠為清流眉目。而于東林君子。亦無私好。參政蓋深得此意者也。

己卯仲冬奉命祭告南嶽定輿道中月夜觀雪

皎月下積雪。竟空生白烟。氣寒清無風。涕唾瑤冰堅。圓靈際大地。凍光一色連。河漢失蕩漾。列星收精躔。雪月本同居。一鏡照雙妍。羿妃與玉女。交手拍皓肩。旁舞萬靈娥。助笑開瑳然。戲吐玉池水。萬頃瓊瑤田。夜行不可耐。絕景誰當傳。

喜雨呈舅氏董寧公

司牧額上泚。農夫眼中淚。齋心哀龍公。迸此雨腳脆。久愁雲慘澹。暫訝珠瑣碎。綿綿聽簷溜。欲斷屢驚悸。遙知四郊外。點點入芒穗。行恆交雲根。汾漳欲潤氣。居然生枯槁。不忍嗜薪蕪。深慚肉食鄙。靜念糠粃悴。澗句謹齋廚。頗狎菜根味。行當饗雨師。歌舞薦祈。寄聲白水翁。杜詩白水見舅氏清宴許我醉。

蒙恩復入翰林竹君兄以詩見賀奉答

方材宜軫園宜穀。散樗亦受膏霖沐。車行平地穩栖雞。巢近高天收野鷺。十年悔不熟讀書。一枕何當淨掛目。君如退之苦詰盤。我學方平甘鞭扑。布帆無恙到三山。肉芝可采輕九牧。羨君高議開石渠。坐令玉堂生暖昱。子雲口吃頗鴟夷。不能爲舌聊爲腹。偶作劉誓妻。孛瞠深辨頡。書神鬼哭。東坡有弟何敢望。太邱必世應知惡。漫誇屋上星蔚然。且聽窻前雨滲漉。

富陽道中次黃左田韻

之江晴湖搖空蒼。蔚藍倒影涵渺茫。暗潮漸遠沙岸靜。碧玉簪。簪菱花妝。山枝誰唱思公子。鷗浴僛翻亦

如此卅年老我七往還。巖頂桐君青不死。昨來拏棹錢唐東。鑑湖鄞江風景同。釣臺七里最幽絕。一重一掩探無窮。髭霜齒抗慙學道。山鬼有靈顧我笑。御風貫月更何人。如此江山竟空到。連宵月出華滿江。金波蕩漾流珠降。眼酣心醉玩不得。清夢不隔蓬萊窻。同游初平真妙器。餐霞已識峯蹄棄。然犀照水漫相矜。靜鏡浮烟我何意。上灘邪許篙力柔。下灘風動箭射眸。從流順逆各自努。一盃江水長油油。

游半山觀梅花

半山山後神道路。廿里梅花香潑霧。交林夾徑行愈深。萬隊霓裳擁靈媵。散花天姝香國來。優曇薝蔔彌天篩。眼根鼻觀住不得。八識淨澈庵摩開。江南鄧尉香雪海。莆田凌厝名妃在。洞天咫尺知者希。吳儂爭艷天桃常。盤陀居士偷學閒。目成萬冶甘孤繆。傭兒生長依冰玉。斛量梅子收梅田。可憐香色多傾國。雪霽暉移光欲泐。一篙回首百徘徊。夢魂飛徧琉璃域。

謁東坡亭卽公白鶴峯故居在歸善縣城北

入州督罷嶺外游。三年故客仍淹留。合江嘉祐未黔突。買山更上白鶴頭。我行殘臘月正望。百七十里勇未休。惠守導我謁祠蹟。北江繞戶開軒幽。山僧指觀百尺井。當年手鑿勿幕收。嗟公丙子作重九。朝霞已卷孤光秋。明年又復渡海去。逆旅電逝真虛舟。大賢所憩人愛樹。況此鴻爪了可求。公神跨鶴返奎斗。萬世俎豆同魯鄒。如公遷謫尚不朽。而我擁節慚鞫謀。西隣咫尺勾漏令。東望拱揖韓潮州。他時誰識盤陀

老。竭來此路停軒騶。

舟行

粵人送我五嶺北。皖人迎我三水南。我身浮雲寄空曠。誰將逝影求江潭。三年種樹未翦愛。連宵好雨宜稼甘。舟行遲遲聽襖靄。岸沙漠漠紆烟嵐。吏民猶見古直道。祝我此去當迴瞻。我謝邦人情豈忍。力微恩重才非堪。蠻風蠻雨費調變。海鯨島鱷難驅戡。書生何有銅鑄柱。宦跡或可山留龕。食猶戒肉鐘敢毀。飲能敵水泉焉貪。皖山江月吾肺腑。昔年餘澤猶津涵。道傍父老喜露冕。燈前竹馬歌趨趨。他時記我竭來處。桑下已宿浮屠三。

六月廿七日竹君先兄忌

最了無生旨。難忘不朽名。文章金薤重。富貴白衣輕。芳樹空連理。青山醉一觥。相知論海內。作誌愧欒城。

詠顏平原

妖星照野海飛瀾。瀉血何人首築壇。西望常山舌不爛。南流睢水齒先寒。論功千載汾陽郭。轉敗三齊卽墨單。忠義神仙同脫屣。漫將尸解擬劉安。或疑公好神仙。不知公真不死矣。

馮浩

字養吾。號孟亭。桐鄉人。乾隆十三年進士。官監察御史。有孟亭詩文集。

兜觥歸趙一十六韻

前明萬歷初常熱趙文毅官檢討勅張江陵奪情廷杖除名欵許文毅拜杖時陰雷動天異吳傳云杖時陰雲四起天鼓大震故據以為言

文毅拜杖時陰雷動天異吳傳云杖時陰雲四起天鼓大震故據以為言墮肉腊而藏中閔凝血淚體肉

而藏之夫人腊兜觥為餞贈銘勒廿四字前輩穎陽生論交初未貳款云穎陽生許國門戶此萌芽班聯紛擊刺

禍烈人凋殘運窮國殄瘁大端垂史書遺物綴傳記推移二百年復始歸苗嗣追溯收儲家六七屢遷地

朋來競捧玩酌彼或酣醉斯須設輕脫非意驚翻墜諦觀古色深沈黝溢溫粹感歎昔諸公一一神所庇

拜藏欽祖澤禮祀守宗器舊侶玉杯亡許文穆鑄玉杯贈吳公今不知所在江東無有二恆山竝高門忠毅鐵如意高邑趙忠毅物

以同姓敬及之

舟中喜見惠山

青山斗入空船裏山氣薄人襟袖起此身坐臥此山中何會限卻衣帶水山頭晴雲作絮飛山下落木山

風吹復開水面寫山色煙鬢隱現時可窺鴛鴦湖邊無寸碧秋蟀春鷓思蠟屐山靈莫笑行客忙老去方

宜弄泉石

于忠肅公墓

九廟將傾隻手當旋令中外固金湯濟時遠勝唐靈武失策羞稱宋靖康絕寒居然生馬角元勳何罪死

魚腸氛靈披豁青霄朗高揭丹心日月光



錢汝誠

字立之。號東麓。嘉興人。文端公子。乾隆十三年進士。官至刑部侍郎。

敬業堂山躑躅盛開。主人招飲。花下詩以紀之。

趨庭指點說兒時。今夕歡同杖履隨。曾是高曾遺手澤。能無淚灑角弓詩。  
萬株火齊萬玫瑰。一朵花宜傾一杯。花影在杯杯在手。主人愛客客休回。

李中簡

字廉衣。號文園。任邱人。乾隆十三年進士。官至侍講學士。

辛巳季春五日龍池紀遊二十韻

一百五日天氣新。三十六渠春水漲。龍池下注三十六渠坐惜鶯花催節過。來追觴詠龍池上。龍池風景城西南。碧

草芊綿彌一望。屢穿曲岸逗烟津。豁眼垂楊拂畫舫。新荷平鋪饒妥貼。迸籜孤抽空倚傍。山川佳麗客後

來。臺榭玲瓏誰始創。細檢題名無故老。劇憐磨盾輸飛將。千金百戰想風流。白髮青山對惆悵。池上有明將軍鄧子

龍一聯鑿括其語池心構亭發興孤。水面看山得神王。最好冲融窈窕中。玉壺風聲生微浪。回身俯檻窺水源。蟹

眼松風迷想像。不知地脈濟南如。濟南泉水若如湧珠錯擬天漿帝臺餉。遙見紅裙作薄遊。正逢象板邀低唱。堤邊

桃柳認新栽。牀脚龜魚憐舊放。佳處全分西子湖。秀色小亞南屏嶂。春蘭秋菊不同時。地角天涯宵相讓。

已知勝蹟須品評。況復塵蹤得寬曠。鴻爪安知鄉夢遙。龍槎一任蠻碑妄。向晚殷雷送微雨。坐深織月窺夕帳。歸途不用鳴騶喧。清景隨緣余所尙。

辛巳三月六日自永昌起程聞金雞邨有溫泉迂道訪焉賦詩一首

板橋東去風日喧。十里五里雞鳴邨。粉蝶不斷菜花路。綠水自穿楊柳門。縱心獨往偶成適。懷古百端誰與論。春山又送馬蹄遠。萋萋芳草思王孫。

### 張裕榮

字幼穆。號樊川。桐城人。乾隆十三年進士。官至國子監祭酒。

琴城課士圖爲盧太守嵩作

長吏帥斯民。身教與言教。士爲民之秀。閭左是則傲。成人既有德。小子亦可造。其風返古初。其化始學校。奈何吏道雜。操術味津要。百里忝侯封。覲然執同瑀。空遊百室林。譬如身未到。賢守令棄城。愛士勤啄菹。胄子抱書來。一顧掀髯笑。講堂曾手關。水木澄瀟照。諸生謹程課。佳時赴期約。音要門闌停阜蓋。牕几側烏帽。藝苑鼓笙簧。文壇卓旌纛。子良藹如春。心香靜繚繞。長者坐臬比。靈臺詎能肖。閒與章縫游。魚水入罟罩。涕唾視繭絲。談笑馴虎虺。必逆北溟鯤。整隱南山豹。惠然示茲圖。佑以詩古調。展卷生清風。太息發長嘯。今之古人哉。一洗世俗誚。五馬鳴鸞鑣。旦晚聽綸詔。豈惟韋丹碑。但誌一隅效。壺漿溢康衢。敢爲迎者

告。

### 邵齊然

字光人。號開谷。昭文人。乾隆十三年進士。官至杭州府知府。有聊存草。

蒲謁山房詩話。開谷兄弟五人。先後登科第。入館閣。而開谷尤以風度勝。故京雒名人交口譽之。及以部郎出守杭州。修學校。纂志書。文教一新。因與巡撫監司齟齬。惋憤而卒。開谷尤工書。學蘇文忠公。時與河東巡使沈君棧齊名。今維摩輿福諸寺間。遺碑具在。中吳人士所當摩挲把玩也。存詩雖少。而清宛可誦。足見一斑。

### 九日法源寺看菊晚過王述庵寓齋小飲分韻得客字

涼風吹我襟。草木日夜易。黃花於此時。凌霜露標格。閒尋古招提。入門有奇獲。周羅軒階前。僧意靳珠璧。滿頭插未能。開口笑自適。秋光殊可愛。爽氣侵肝膈。招攜素心人。歡會旅肴核。論文氣如虹。射覆手屢戟。慮不牽世榮。心已醉佳客。厭厭且莫歸。微月窺簾額。

### 新秋夜雨

每到秋來雨。淒涼滴晚空。無端當漏靜。不覺入愁中。明滅一燈影。飄蕭半夜風。暗隨黃葉墮。清響上疎櫳。耿耿久不寐。蕭蕭聽未稀。有人愁永夕。無語對孤幃。殘穗挑將盡。流螢溼不飛。秋風看貼體。應悔典春衣。

### 劉星煒

字映榆。號圃三。武進人。乾隆十三年進士。官至工部侍郎。

贈廖古檀明府

三泖湖波近若耶。人家水木舊清華。安仁詞賦知名久。不待河陽始種花。  
金斗城高鎖綠苔。公餘攜鶴任徘徊。知君懷古多情思。定上城東鮑照臺。

查禮

字恂叔。號儉堂。宛平人。乾隆十三年。由監生爲戶部主事。官至湖南巡撫。有銅鼓書堂集。

蒲謁山房詩話中丞爲蓮坡先生弟。能吟詠。喜賓客。襟抱與兄相似。尤嗜古印章。金玉銅甕。自吾子行王厚之而下。名人鐫刻者無所不備。藏書千有千餘。生平莅蜀最久。而居西南松潘徼外者十嘗七八。崎嶇險阻。爲羌人所服。偶歸省。重築楊文憲升菴。藝花竹。招邀爲文酒之會。然亭衢初達。速賦龍蛇。此勢臣志士所爲扼腕太息也。

西峪雲居寺

山坳結花宮。朱蔓隱石罅。下馬尋寺門。門前碧湖瀉。住僧喜客來。整衣遠相迓。遂登十笏堂。竹樹侵臺榭。古殿氣森嚴。四面羅精舍。拾級歷愈高。漸與鳥巢亞。焚香塔影圓。禮佛磬聲罷。齋廚甘淡泊。客飯泯高下。坐令塵俗心。種種冰雪化。地靜堪讀書。將期半龕借。

宿西峪雲居寺後院

深峪夜尤靜。懸空宿高閣。推窗看前峯。一片青漠漠。星斗插簷間。巖花霑露落。萬籟寂不喧。秋氣滿丹壑。孤鐙繁剌竿。冷光頰寥廓。倚林山鬼嘯。羅帶想綽約。坐久月上東。遲回入簾箔。經牀方偃眠。天風掃殘藜。

兜率寺

連巖勢迴抱。未測深幾重。古寺居中央。白雲當戶封。入門見老樹。滴翠清陰濃。鯨魚靜不鳴。碧蘚生廢鐘。殿背嵌經版。活筆含纖鋒。坐讀淹晷晷。微言懷睟容。諸天本閔寂。塵土無由逢。僧雖喚客起。更踏前山峯。

登文殊殿後閣晚望

遊屐遍山阿。腰腳仍未倦。登高望所遊。歷歷眼中見。向背羣峯殊。陰晴衆壑變。喬枝飛木葉。瑟瑟與秋戰。壁間佛像古。紺目白毫現。明季肇塑雕。內監督營繕。此身非常住。百年等過電。踟躕下閣來。清梵起鄰院。

清音洞

一水源源來。漩澗逼山足。山石空同開。亂流入山腹。沿流側徑通。往來走樵牧。水積漸成溪。溪遠更紆曲。鬼工鏤幻形。天匠鑿奇局。邱壑理所無。亦竟結空谷。斯遊得巨觀。是時冬氣肅。取徑穿洞過。巖崑若廣屋。鐘乳延苔花。垂垂挂碧玉。小坐心骨寒。衣裳染蒼綠。此中有清音。涓漣奏琴筑。洞口含殘暉。煙光散林木。幽邃宛畫圖。閒雲遮縱目。名山比高人。遯世遠塵俗。隱跡峙荒陬。意可避榮辱。孰知萬古後。偏我蹈其麓。摩崖更題詩。山靈勿謂瀆。

嵐光洞

陟險歷亂山。身若蟻旋磨。空谷響急流。略徇溪閒臥。微吟眈尋幽。嵐光爲我破。瞥然一洞天。邱壑生頓挫。

人自洞中行。水亦洞中過。石徑多崎嶇。心悸崖前墮。下瞰水底潭。澄清不忍唾。漁父舉網來。舴艋兩三箇。登臨恣所向。徘徊步還坐。鳥語共泉鳴。終古聲相和。

登摘星陀絕頂

入山頗盡登。臨目翹首高崖還。側足褰衣負杖結伴行。磴磴芒屨踏蒼綠。猿驚鳥駭路若線。俯對窺竇萬丈谷。愈危愈進進愈難。直自腹腰度緣督。循初憚險中道返。予獨爭先尙馳逐。近巔忽見雙峯開。厲風洶洶振萬木。薄寒宜有肌粟生。盛氣翻教汗如沐。行行漸與鐵縷邇。匍匐欲前先頸縮。木梯數級懸虛空。若掉都盧憂反覆。百升豈有天可飛。一跌定知魂不續。全身眩轉付雲烟。餘念逍遙託鴻鶴。須臾越險陟山尖。枯僧待客茶已熟。自言卓立久不眠。屏絕醯鹽甘菜菹。得非金世鐵頭陀。靜閱恆沙如轉燭。我來亦覺塵境忘。下瞰羣峯殊碌碌。北望紅螺僅隔巔。隱現風光照茅屋。南望桑乾近不遙。一帶蜿蜒界沙陸。卻愁歸路益嶮巖。襤被擬畱桑下宿。塵機未斷仍下坡。如鷁退飛宋都六。古賢居室戒垂堂。大道康衢憂脫輓。何爲漫試榛荆間。慕澗騰坑狎樵牧。東坡昔上吳王臺。亦有同遊臥九曲。歸途客問摘何星。笑指星光若朝旭。

石經洞觀隋靜琬法師所刻佛經

佛法東行自秦景。殿庭夜夢金人影。洛城白馬馱經來。畫像遂遍清源臺。月支于闐翻譯凡幾部。小品大

乘紛莫數。法苑晨鈔貝葉書。香林夜散曼陀雨。茫茫大地分劫塵。或恐銷沈異今古。隋代沙門有琬公。慨然念之愛心忡。誓將四百二萬言。一一勒石垂蒼穹。鐫摹四大部。點畫釵腳工。其餘弟子復繼作。洊歷五季猶未充。太平清寧續刻亦繁富。合計二千七百餘石瘞其中。萬人乃畢一人力。慈雲廣覆蓮花宮。我來不見寫經客。但見悻悻古洞青瑤石。鈿鋒深刻等摩崖。周遭舒指捫四壁。雨淋不到日不炙。鏡光欲照鬚眉碧。遙思隋時歐褚猶未生。筆蹤乃爾多精英。恐是真範先生劉元平。或者司隸大夫薛道衡。摩挲躑躅不忍去。眼底萬斛明珠傾。重尋八洞徑屈盤。鎔鐵作櫃石作欄。俯闕疊石密于櫛。亦有側立高巒岼。窗櫺隙處露字畫。縛帚掃拂真奇觀。穴深直疑劖地肺。當日或使神工安。春雲陰陰春晝寒。秋風颯颯秋光殘。爐香不絕清磬杳。千年無客來開關。因慨吾儒六經光日月。鴻都古本多殘逸。開成以後訛亦多。蘚蝕落侵如棄物。昨朝偶得嘉祐本。千百石中存什一。孰若此經閉置名山閒。碑碑完好無闕剋。豈真龍象永呵護。定力不受風輪旋。吁嗟乎。讀書衛道何人識。空與緇流競得失。每逢奇境心膽雄。茲覽尤覺情突兀。負筇肩笠取逕欲下山。滿山莎草蟲唧唧。

投半壁店僧寺

涿州懷古  
沿坡尋宿地。秋柳繞田塍。均水畱殘碣。孤雲伴老僧。茆菴昏過雨。山店夜明燈。一榻支頤臥。幽懷夢裏增。

荒臺殘壘雲橫。巖邑從來慣用兵。二水爭流環傑閣。千峯連翠落高城。精廬尙有靈椿覆。仙館應無赤鯉迎。試看童童舊車蓋。樓桑邨外暮煙生。

春暮散步城東渡河過香林院小憩出舍晚歸

潑醅新水滿塘坳。激澗晴光浸柳梢。三月海螯初上市。一春江燕未歸巢。澄懷豈必常高臥。遠眺無妨出近郊。寂歷紺園人不到。隔牆閒聽梵鐘敲。

喜申及甫上舍白都下至招同紫仙荆帆西顛江臬循初文錫及心穀兄飲舍南小築分賦得九青

寒雲如凍晝冥冥。忽報征車遠叩扃。我數梅花登小閣。人隨臘雪到閒庭。眼前誰市千金駿。座上休孤雙玉瓶。更喜卜鄰酬宿諾。清吟應許百回聽。

寒食過水西莊雨中作

歲月侵尋歎擲梭。身同泡影感滄波。水西寒食煙猶冷。門外梨花雨正多。悶檢殘書人懶讀。喜添新漲客須過。可堪載酒呼漁艇。獨把魚竿溼短蓑。

夜坐

池上茅齋竹外亭。風來微覺有芳馨。月當夜瘴消時白。山向秋林闕處青。卻飲非關愁酒病。品泉猶得續



茶經。太平一載侵尋過。暫許偷閒枕席寧。

暮春竹樹青華居卽事

間寂西岡景物疎。清華竹樹襯幽居。一灣碧水侵階淨。幾疊青山入檻虛。春暖老奴晴曬藥。花陰小吏日鈔書。天涯領郡稀民事。吟詠無妨案牘餘。

王德甫考功由滇南來川以詩遙寄子月六日借趙損之抵汝川西榻行館因次原韻以答

拂廬連壘結氈鄉。雪片封山冷夕陽。徼外烏啼邊草白。關前馬踏陣雲黃。短兵西向如飛礮。上將南來定破羌。報道故人聯騎至。盾邊籌筆助疆場。峻谷蠻江作塹壕。斑斕山勢接天高。襄糧計可爲三覆。掃穴謀須用六韜。絕域烽烟征雁避。殘年孤月野狐號。凱旋屈指無多日。古句先期詠大刀。飄泊萍蓬跡略同。近攔鋒鏑百蠻中。錦衣軍駐桃關北。畫省郎馳玉壘東。寒夜小畱欣有伴。吟壇闊別恨無窮。圍爐翦燭西窗下。詩律當嚴似卽戎。

約王德甫丹仁趙損之明守亭過行帳小飲

萬馬西來塞草荒。連山積雪少春光。弓刀隊裏藏身健。風雨聲中感話長。羽檄頻催披轉粟。烽烟高起強傳觴。相逢盡說籌邊事。嘯詠誰堪靖戰場。

余慶長

字元亭。安陸人。乾隆十五年舉人。官至成都府同知。有壬癸詩藁。

蒲謁山房詩話。元亭生長楚中。獨嗜陳季立。顧亭林之學。爲人淵靜。閒止。薄宦川滇。非其好也。皆歸後益。留心經術。古文亦清深。簡潔。詩偶爲之。然如牂牁名士。推張叔河北。文章重魏。收躬耕養母。旌江革。尚節懷人。識范雲。知有小園。屬開府。可能大樹。號將軍。高情已欲舉黃鶴。中隱且從盟白鷗。頗工隸事。隨予雲南。江西。幕中十餘年。極稱同志。又爲予撰銅政考八十卷。始終本末。蓋然畢具。亦食貨志。必採之書也。

人日過莫浪坡

蠅盤青嶺窟。猿落白雲窠。人日常爲客。天涯復此過。春烟生石磴。孤夢逐江沱。行息菴前水。清泉倚薜蘿。

退思堂懷輿山太守

十笏頽椽蔭荔牆。無端躑躅退思堂。子瞻詩和陶彭澤。漫叟歌招孟武昌。簿領閒時惟閉閣。賓僚散去自焚香。平生心跡眞蕭瑟。落落高風未可望。

寄楊虹孫李翼茲兩進士

關西清德傳楊震。北海詞林有李邕。一見又知旋遠別。兩年莫得問芳蹤。文須久澤纔成豹。性不能馴未是龍。欲寄詩無阿買寫。最難療處病疎慵。

吳獅

字在揚。吳縣人。乾隆十五年舉人。有艾香吟草。

包山

橫舟入包山。曲徑引幽翠。蒼松旣鬱盤。寒篠亦密被。潺潺澗瀉坡。漠漠雲封寺。始至疲已忘。隨步輒領異。不辨五湖烟。但覺千嶂邃。時有樵聲來。瞥見山僧至。留憩飯伊蒲。參證無生意。指點毛公壇。幽閒起涼吹。仙蹤緬已杳。養真夙所嗜。安得謝塵鞅。儻然此孤寄。

擬韋左司寺居

白雲護禪居。獨夜聞葉落。清氣習靜知。悠然滿山閣。吏事謝喧煩。幽興耽澹薄。不見同心人。鈴語慰離索。

將至武昌寄王西莊鳴盛

浩淼江流吳楚分。故園回首悵離羣。一聲落雁伍殘照。千里孤舟入斷雲。露白緞蘭悲屈子。峯青鼓瑟弔湘君。登樓幸有同心侶。玉笛吹時得共聞。

詠懷

散期三樂興何長。帶索披裘豈是狂。劉項空勞爭逐鹿。穀臧相笑等亡羊。花邊好鳥春風酒。松下清琴夜月香。莫問行藏尋管輅。殘僧野鶴共徜徉。

黃文蓮

字庭芳。號星槎。上海人。乾隆十五年舉人。官泌陽知縣。有聽雨集。

夜坐

月出臨廣除。牆陰見殘雪。松竹一掩映。光景洵清挹。閒居寂無聊。攬衣坐超忽。稍聞宿鳥喧。漸覺爐薰歇。我欲撫瑤琴。幽懷誰與說。月送孤鴻飛。碧雲渺天末。

題秋林讀書圖

秋氣忽淒厲。落葉紛階除。之子抱古處。閉門絕軒車。涼風在簾戶。清影交籬筵。凝塵湛瑤席。時復陳吾書。淵淵潤金石。渺渺親黃虞。道腴得至味。不知饑與飭。翳子困世網。未結山中廬。古人日以遠。芳歲日以徂。何當共饑粥。悠悠謝簪裾。

石琴精舍用韋公義演法師西齋詩韻

西峯古巖下。日夕聞清磬。闌石無人蹤。松風悅禪性。茅茨帶修澗。香積依樵徑。回首重林端。白雲度山暝。寄懷王德甫效山谷體

臥病秋光殘。懷人江路永。記別初夏時。忽忽山窗冷。竹几裊香絲。繩牀蹲藥鼎。碧梧吹脫葉。一一下苔井。坐憶湖湖西。碧玉光千頃。水際鷓鴣眠。烟外蘋花暝。夕陽沾酒橋。夜月吹簫艇。更愛雲中山。九點環高嶺。松蘿樵徑深。梵唄禪林迴。勝地愜清游。幽尋足遐騁。獨惜抱秋衾。閒對孤燈耿。會須把釣竿。趁此烟波境。

著我綠蓑衣。同君背笈簪。

拜韓忠武王墓

西風蕭蕭靈氣蒼。古松離立參天長。穹碑十丈字盈萬。銘功第一韓蕘王。蕘王當年佐大業。手撐半壁歸錢塘。金山一戰破敵膽。中軍袍鼓資紅妝。紅袍得脫實天意。不關獻策燒帆檣。官家魚水格天開。燕山夢斷徒悲涼。英雄束手置閒散。良弓克敵嗟空藏。奚童蹇驢足游豫。日對山色餐湖光。嗚呼中興稱四將。局促那數劉與張。精忠鄂國洵伯仲。黃龍痛飲情慨慷。一生一死豈異軌。韓忠之戒何煌煌。只今寢園絕樵採。賜莊風景連滄浪。千秋魂魄應戀此。棲霞回首騁翔翔。冬青杜宇恨未滅。令我懷古霑衣裳。

趙忠毅公鐵如意歌爲外舅作

空堂白晝生雷電。倏忽光芒射星漢。輿酣決眼三摩挲。知是尙書舊時玩。尙書嶽立森孤標。彈壓婦寺清羣寮。陳辭直欲誅曹節。抗疏何嫌劾趙媯。茄花委鬼相糾結。忠義生平嘗噴切。想像悲歌擊節時。中宵起舞情嗚咽。一自飄零別玉鑾。荷戈遠謫鴈門關。徒聞竿下金雞放。未見天涯戍客還。東林舊事成千載。古製蒼茫閱人代。碧草荒苔埋沒多。天垣星斗依然在。太息孤忠照古今。畱傳舊物等球琳。試將銘語分明誦。彷彿當時鐵石心。

得曹劒亭舅氏書知有悼亡之戚卻寄

寂寂滄江候雁過。瑤華萬里慰蹉跎。寧知荀粲傷難再。頓使桓伊喚奈何。遲日板輿勞獨御。畫簾微雨漫  
燕歌。畱賓苦憶開西掖。夜夜琴尊聚玉珂。

過王存素寓齋有贈

竹梧小逕啟雲關。酒伴詩朋共往還。結社幾年依北郭。捲簾終日對西山。松陰滿院閒調鶴。月色經秋好  
放鷗。便擬滄洲共乘興。看君潑墨寫孱顏。

香櫞

別種江鄉重橘田。山家爭摘晚秋天。疎林霜後香偏遠。小閣裝來品自妍。每到嚴寒封蠟蒂。最宜遙夜伴  
茶煙。笑他兒女誇新樣。綵縷低懸斗帳邊。

蚤春過趙升之邨居看梅兼寄吳企晉

溪雲林謁望中移。數里江邨步履遲。閒客正宜無事飲。幽花偏愛半開時。水邊烟淨浮空影。籬外香來露  
瘦枝。忽憶銅亢山下路。十年風雪負前期。

王元啓

字宋賢。號惺齋。嘉興人。乾隆十六年進士。官將樂知縣。有祇平居士集。

蒲褐山房詩話惺齋冲和厚重神觀從容足爲後生矜式。工古文。尤熟於宋諸儒書。通鑑綱目皆能  
再三尋繹。補其遺誤。又長於推步前史。月日參錯者。均爲考定。惜名位不彰。人鮮知者。曾主山東深

源書院。余奉使至濟南。往訪之。始得悉其學術。嗣後有所論撰。必寄於京師。故祇平居士集若干卷。亦予與令子尙珪攜至南昌所審定者。

題杜太守甲知通州日釐正祀典罷權油酒雜稅二文臺後二首

誓宗祀先達。後學所矜微。奈何從賊臣。妄使玷鄉校。時魏藻德濫廁鄉賢杜公領通牧。志在維風教。念茲關勸懲。僭差不容稍。直筆彰信史。詎任彌縫巧。錚錚數百言。震耳若驚爆。綱常一以明。粟主旋毀橈。誅彼既死魂。足使人心校。死鬼豈足誅。維用勸忠孝。

關征弊屢稅。國賦自有常。誅求逮負販。奉法殊未臧。公心切民隱。疾痛如身嘗。作書告大吏。陳義何慨慷。飛章達宸聽。恩語來天闕。歡聲動衢巷。共拜聖澤長。乃知盛明代。選吏須循良。德澤不下究。吏實乖其方。公恩廣且永。潞水同汪洋。

故明金御史殉難詩御史名毓。嗣保定人。崇禎末奉命監李建泰軍。山右未至。賊已逼退。保定城陷入井死。

乾坤瀕洞燿。塵昏狼狽蟻。紛聚屯橫流。潰決不可制。逆勢直欲滔天奔。金侯攬轡憫肯綮。逝將赤手墮崑源。茫茫晉土皆賊壘。右臂已失寧復論。畿南郡邑實門戶。走保鄉土堅藩垣。妖星忽熾帝星隕。六宮九廟咸灰燼。復仇討賊志彌烈。皎皎大義明朝暎。毀家犒士博死力。爭先徒步當輻輳。山摧地裂鮮完土。勺水莫止炎岡燉。猶懸蕩瀟簸宇宙。孤松豈得牢其根。危城既破身與殉。英風颯颯飛忠魂。維時守臣重首領。迎賊往往先開門。失身蒙恥等一死。視侯不異狐與豚。侯之志義耿不泯。去之百歲今猶存。寒泉古井

湖海詩傳 卷十三

人莫汲時有虹起光蜿蜒。



